

書叢本基學國

集翁放陸

(三)

著游陸



行發館書印務商

限 期 表

上海图书馆藏书




A541 212 0006 1147B

書叢本基學國


集翁放陸

(三)

著游陸



行發館書印務商



1654404

陸放翁集

劍南詩稿

卷第二十九

水村曲

山村今年晚禾旱。奏下民租蠲太半。水村雨足米狼戾也。放三分慰民意。看榜歸來迭歌舞。共喜清平好。官府老翁猶記軍興時。汝輩少年那得知。

石洞餉酒

忘憂自古無上策。欲飲家貧酒盃迨。今朝鵲喜報遠餉。未圻赤泥先動色。魚長三尺催膾玉。巨蟹兩螯仍斫雪。勿言地僻少過從。清風明月俱吾客。驅除二豎走三彭。零落眼花生耳熱。陶然酣臥聽松聲。媿爾公卿足憂責。

病退

病退身仍健。春回日漸長。神訶金鼎藥。龍出玉函方。美睡三竿日。安禪半篆香。殘年已如許。幸復起膏肓。

偶書

身放江湖遠。年推里巷尊。鄰翁分酒子。羽客借桐孫。泱泱冰消澗。纖纖柳映門。小車非漢相。時亦到前村。

讀史

南言萼菜似羊酪。北說荔枝如石榴。自古論人多類此。簡編千載判悠悠。

飲石洞酒戲作

酣酣霞暈力通神。澹澹鵝雛色可人。一笑破除垂老日。滿懷搖蕩隔年春。梅花的的吹初破。楊柳纖纖染未勻。醉倒橋邊人不怪。西曹免護相君茵。

霜寒

霜重晨簷滴。薪乾夜焙溫。老惟便布褐。病不出柴門。瓶裏梅花墮。窗間鵲語喧。閑人信無事。午睡到黃昏。

賽神曲

擊鼓坎坎吹笙鳴。綠袍槐簡立老巫。紅衫繡裙舞小姑。烏白燭明蠟不如。鯉魚糝美出神廚。老巫前致詞。小姑抱酒壺。願神來享常驩娛。使我嘉穀收連車。牛羊暮歸塞門閭。雞鶩一母生百雛。歲歲賜粟年年蠲。租蒲鞭不施。園土空虛束草作官。但形模刻木爲吏。無文書。淳風復還。義皇初。繩亦不結。況其餘。神歸人散。醉相扶。夜深歌舞官道隅。

涼州行

涼州四面皆沙磧。風吹沙平馬無迹。東門供帳接中使。萬里朱宣布襖勅。勅中墨色如未乾。君王心念兒郎寒。當街謝恩拜舞罷。萬歲聲上黃雲端。安西北庭皆郡縣。四夷朝貢無征戰。舊時胡虜陷關中。五丈原頭作邊面。

望夫石

送君遠戍交河北。男兒自身許國。不能彎弓騎惡馬。欲隨君去何由得。登山矯首西北雲。形容雖變心猶存。月明夜夜照淚痕。鐵心石腸輸與君。

江村道中書觸目

短籬曲曲對開門。脩竹陰陰不見村。別浦回潮魚滬密。孤舟春近雁沙溫。路逢行客時交轡。店賣新醅一舉樽。忽過亂山幽絕處。恍如白帝到東屯。

采蓮曲

采蓮吳姝巧笑倩。小舟點破煙波面。雙頭折得欲有贈。重重葉蓋羞人見。女伴相邀拾翠羽。歸棹如飛那可許。傾鬟障袖不應人。遙指石帆山下雨。

兀坐頗念遊歷山水戲作

萬里當時寄一官。十年客枕不曾安。鬼愁灘下扁舟晚。蛇退陂前古驛寒。昔歎遠遊生雪鬢。近緣多病學金丹。功名非復衰翁事。獨有江山興未闌。鬼愁灘在安康漢江中。蛇退陂在鹽施兩郡之間。皆畏途也。然山水特奇。

五雜組

五雜組。山雉羽。往復還。江頭路。不得已。貴臣去。

又

五雜組。機上綺。往復還。冶遊子。不得已。富兒死。

漁扉

湖上千峯翠作圍。正應佳處著漁扉。迂疎自計難謀食。老病誰令未拂衣。萬里滄波鷗乍沒。千年華表鶴重歸。一盃粟飯吾何恨。自古高人有采薇。

詠史

夜雨燈前感慨深。爲邦一士重千金。風雲未展康時略。天地能知許國心。劍忽拄頤都將相。帽曾壓耳隱山林。英雄自古常如此。君看隆中梁甫吟。

烏棲曲

楚王手自格猛獸。七澤三江爲苑囿。城門夜開待獵歸。萬炬照空如白晝。樂聲前後震百里。樹樹棲鳥盡驚起。宮中美人謂將旦。髮澤口脂費千萬。樂聲早暮少斷時。莫怪棲鳥無穩枝。

古別離

君北遊司并。我南適熊湘。邂逅淮陰市。共飲官道傍。丈夫各有懷。窮達詎可量。臨別一取醉。浩歌神激揚。勳業有際會。風雲正蒼茫。亂點劍峯血。苦寒芒屨霜。死卽萬鬼鄰。生當致虞唐。丹雞不須盟。我非兒女腸。

書歎

夜深青燈耿窗扉。老翁稚子窮相依。齋鹽不給脫粟飯。布褐僅有懸鶉衣。偶然得肉思其飽。吾兒苦讓不忍違。兒飢讀書到雞唱。意雖甚壯氣力微。可憐落筆漸健快。其奈瘦面無光輝。布衣儒生例骨立。紈袴市兒皆瓠肥。勿言學古徒自困。吾曹捨此將安歸。作詩自寬亦慰汝。吟罷撫几頻歔歔。

十二月二十六夜聽雨

新春尙七日。小雨暗江城。茆簷夜點滴。已作春雨聲。輕黃上柳枝。嫩綠抽菊萌。造物本何心。誰主此發生。頗疑重雲外。斗杓已東傾。老至不可卻。一尊忘濁清。

起晚

傍簷百舌語。惚瓏已覺新春在眼中。欲起未成還小睡。忽看初日滿窗紅。

陳少監餉澄清堂酒

酣暢年來豈易逢。齋湯蜜汁亦時中。玉醅忽逐春風至。一吸懸知百榼空。

雪中作


黑風卷地連三日。密雪穿簾又一回。衰病不禁天色惡。笑談誰共酒尊開。忍寒瘦馬嘶空櫪。覓食飢鴉啄廢臺。笑遣蠻童撼園竹。輟羹分火待歸來。

甲寅元日子七十矣酒間作短歌示子

我昔自蜀歸。百年已過半。觀棋未終局。回視斧柯爛。飽知山林樂。富貴何足換。退休失健決。正坐闇且懦。齒髮日衰殘。歲月難把玩。蕭朱尙或隙。籍湜固宜畔。出門無一欣。撫事有三歎。新年遂七十。推敬媿里閭。眷眷惜茲夕。凜凜畏明日。豁然忽大笑。愁若春冰泮。窮達真兩忘。生死付一貫。清尊旣激盪。碩果亦璀璨。擁門紛鼓笛。上壽列童冠。老翁亦忘疲。起舞影零亂。不獨誇癡頑。自足洗患難。投床判宿醒。美睡到日旰。

七十

陸放翁集 劍南詩稿 卷二十九



(二五九)

七十殘年百念枯。桑榆元不補東隅。但存隱具金鴉髻。那夢朝衣玉鹿盧。身世蠶眠將作繭。形容牛老已垂胡。客來莫問先生處。不釣娥江卽鏡湖。

正旦後一日

七十今年是連朝樂未休。比鄰更頌禱。親黨共遲留。羊映紅纏酒。花簪絳帕頭。從今日有喜。農事起西疇。絳帕頭蓋以絳帛飾巾幘之類。

立春

採花枝上寶旛新。看遍秦山楚水春。村舍不知時節換。傍檐百舌苦撩人。

老境

髮白未及童齒搖。未及脫正如一席飲。燒燭將見跋。谿山環草舍。霜露侵布褐。文章雖自力。亦已強弩末。寧將垂老耳。更受世事聒。匡廬入我夢。行已寄瓶鉢。

偶懷小益南鄭之間悵然有賦

西戍梁州鬢未絲。嶓山漾水幾題詩。劍分蒼石高皇迹。蟠冢廟傍有高皇試劍石。中分如截巖擁朱門老子祠。三泉道上有老君洞。景趣幽邃。燒兔驛亭微雪夜。騎驢棧路早梅時。登臨不用頻悽斷。未死安知無後期。

再用前韻不依次

憶昨從戎丞相府。元瑜書檄仲宣詩。雲屯騎士臨邊日。魚貫降胡獻捷時。史册誤人悲壯志。關河回首負

初期。豈知二紀身猶在。衰鬢星星老侍祠。

北坡梅開已久。一株獨不著花。立春日忽放一枝戲作。

日日來尋坡上梅。枯槎忽見一枝開。廣寒宮裏長生藥。醫得冰魂雪魄回。

人日

新歲逢人日。老夫持道齋。斷冰浮野水。微綠發枯荄。壽景豐年象。今年元日至。人日皆晴。閑吟曠士懷。春旛已陳迹。鬪巧笑吳娃。前一日立春。

夜讀呂化光文章。拋盡愛功名之句。戲作。

玉關西望氣橫秋。肯信功名不自由。卻是文章差得力。至今知有呂衡州。

遇術士飲以卮酒

行藥來村北。觀魚立水邊。忽逢長揖客。能算小行年。酒薄聊頰頰。囊空闕贈錢。時清君未死。訪我華山前。

閑趣

老子卽今雙白鬢。鏡湖自古幾青山。半窗蘿月獨欹枕。滿院松風常掩關。天地許寬誰礙汝。琴尊是處可開顏。將行亦莫買春草。幸有一筇相伴閑。

正月二十日晨起弄筆

深院窗扉曉色遲。新愁宿醉兩參差。雨聲欲與夢相入。春意不隨人共衰。零落殘梅臨小約。縱橫野水赴清池。物華撩我緣何事。似恐新年漸廢詩。

春夜讀書

枉是儒冠遇太平。窮人那許共功名。枯腸不飽三升稷。皓首猶親二尺檠。寓世已爲當去客。愛書更付未
來生。夜闌撫几愁無奈。起視離離斗柄傾。

春晴泛湖入城

春色初回杜若洲。隔煙時見矯輕鷗。嵩雲緱月年年夢。楚柁吳檣處處愁。魚躍銀刀論網買。酒傾綠蟻滿
盃浮。前生杜牧吾身是。又向江南遍倚樓。

書齋壁

老病人扶氣力微。闌干西角立斜暉。流年冉冉功名誤。新冢纍纍故舊稀。仗馬曾鳴宜永棄。牧羝雖乳敢
言歸。住菴活計無多子。只要筇枝與衲衣。

又

落魄人間不記年。晚營茆棟鏡湖邊。室空惟是四壁立。面瘦漸生雙頰顛。地僻門無殘客到。歲豐路有醉
人眠。君看朝市紅塵鬧。始信吾曹是地仙。

春日睡起

睡起悠然弄衲琴。銅猊半燼海南沉。淒涼故里逢春處。忠憤孤臣許國心。水滿鳧鷖初拍拍。雨餘花木已
陰陰。吾兒振楫淮邊未。歸近清愁轉不禁。子虞書報二月離古壽。

老病謝客或者非之戲作

病侵腰脊兩經秋。欲下繩床不自由。客至難令三握髮。佛來僅可小低頭。安禪還我閑蒙袂。怒氣從渠勇挾輒。亦欲署門還嬾去。死生貴賤本悠悠。

永日無一事作詩自詒

目昏罷觀書。足蹇停遊山。二事差可樂。造物乃復慳。得非閱我老。作意鑄其頑。掃除盡宿習。使得終日閑。閑亦何負汝。剡曲茆三間。奇石玩犖角。清流聽淙潺。勿言村醪薄。數酌可解顏。翛然日已夕。臥看飛鳥還。

窗前作小土山藝蘭及玉簪最後得香百合併種之戲作

芳蘭移取徧中林。餘地何妨種玉簪。更乞兩叢香百合。老翁七十尙童心。

泛舟觀桃花

花溼二月桃花發。霞照波心錦裹山。說與東風直須惜。莫吹一片落人間。花溼桃花最盛處。

又

桃源只在鏡湖中。影落清波十里紅。自別西川海棠後。初將爛醉答春風。自梅仙塢至花溼。恰十里。

又

種桃亦解比封君。世故紛紛寂不聞。九轉金丹應已熟。全家仙去隱紅雲。

又

湖南小山花更多。不醉將如春色何。釣得鮮鱗堪斫脰。任教微雨溼漁蓑。湖南山名。在柯山之南。

又

鄰曲一生花裏活。村翁疑是古遺民。初來自被春留住。枉道當時爲避秦。

新闢小園

人生如意每難全。草草園池卻自然。世事已拋高枕外。春風常在短筇前。墮空花片紛紅雨。徧地苔痕長綠錢。酒戶漸增詩興在。天容此老剩狂顛。

又

西戍歸來鬢已霜。生兒又過乃翁長。眼明身健殘年足。飯軟茶甘萬事忘。學廢僅能書姓字。客來嬾復倒衣裳。山園寂寂春將晚。酷愛幽花似蜜香。

又

席地幕天君勿嘲。隨宜野蔌與山肴。幽花避日藏深葉。歸燕尋人理舊巢。曲水詠觴空念昔。斜川鄰曲自論交。清貧尙媿茶山在。送老湖邊有把茆。曾文清至歿常寓僧舍。

又

新展山園半畝強。笑人車馬出籠坊。山禽乍暖慙勸語。野花無風自在香。點點水紋迎細雨。疎疎籬影界斜陽。出門遙向鄰翁說。釋耒相從共一觴。

又

東軒嫩日上疏櫺。吹盡浮雲作意晴。林暖牆頭雙鶻語。水清池面小魚行。畦添藥品誰能別。架引藤陰忽已成。倚杖怡然便終日。老夫那復不平鳴。

又

祠祿糜人未棄官。春深幽國有餘歡。笱生遮道妨行藥。果熟團枝礙整冠。養酒拆泥初灑灑。生綃裁扇又團團。退飛風際由來事。莫羨青霄刷羽翰。

上巳小飲追憶乾道中嘗以是日病酒留三泉江月亭悽然有感

零落殘花一兩枝。綠陰庭院燕差池。隔牆笑語鞦韆散。惆悵三泉驛裏時。元微之詩三泉驛內逢上巳

晚步門外散懷

大千沙界一浮漚。成壞元知不自由。寓迹箇中誰耐久。問君底事不歸休。春陂欲雨黃鴉鬧。晚渡無人白犢浮。七十之年何啻足。戲憑藥物小遲留。

又

萬化紛紛本一機。不爲腐骨欲安歸。彭殤共盡孰脩短。堯桀兩忘無是非。濡首極知當痛飲。剪翎那復許羣飛。江郊未解春寒惡。高柳吹花又滿衣。

欲出遇雨

東風吹雨惱遊人。滿路新泥換細塵。花睡柳眠春自嬾。誰知我更嬾於春。

飢坐戲詠

衰鬢蕭然滿鏡霜。一菴歸老鏡湖傍。有懷每恨交朋遠。無食方知日月長。落筆未妨詩袞袞。閉門猶喜氣揚揚。晚來袖手蒲團穩。笑喚兒童代夜香。

蔬食

今年徹底貧，不復具一肉。日高對空案，腸鳴轉車軸。春齋忽已花，老筍欲成竹。平生飯蔬食，至此亦不足。孰知讀書卻少進，忍飢對客談堯舜。但令此道簞有傳，深山餓死吾何恨。

山亭

風惡闌回雨，天寒勒住花。尋幽扶柳栗，息倦倚槎牙。分韻僧吟苦，爭棋客笑譁。相逢仍草草，歸路並山斜。

久不得張漢州書

儘道三巴遠，那無一紙書。衰遲自難記，不是故人疎。

春晚村居

一事元無可得忙，悠然半醉倚胡牀。牡丹枝上青春老，燕子聲中白日長。身世已如風六鷁，文章仍似閭黃楊。太平有象無人識，南陌東阡擣麩香。

遊雲門諸蘭若

花過木陰合，溪雲生暮涼。牛行響白水，鷺下點青秧。古寺宛如昔，穉松森已行。道傍松及三十年，則僧輒伐去，復種小者，予自幼歲至今已見三種矣。耆年不下榻，童子爲燒香。

與子坦子聿遊明覺十四韻

我自何山來，覓路占樓鐘。聯翩兩葛巾，跌宕一短筇。深谷已曛黑，夕陽猶半峯。堂中千歲師，磊砢如古松。殘僧三四輩，斗粟各自春。長廊久寂寞，香火亦闕供。頗聞在世時，一鉢制惡龍。時時出雷雨，百里常年豐。

宿緣勿云盡。獻供無春農。饑鳥晨攫飯。飢鼠夜穿墉。而況我輩人。生世本不逢。胡不安汝分。終年抗塵容。靜觀興廢事。可洗芥蒂胸。一笑下山去。村塢煙重重。

淨智西窗

一窗新綠愜幽情。袖手哦詩取次成。牆外蜜蜂來又去。可憐終日太忙生。

小僧乞詩

風前掩萋草吹香。溪上霏微雨送涼。萬里安西無夢到。卻尋僧話破年光。

西窗睡起

老便寂寂厭紛紛。借得禪房臥看雲。夜宴怕逢觥錄事。秋山傭伴獵將軍。餘年敢望十寒暑。夙習正須三沐熏。斜日滿窗誰喚起。數聲啼鳥隔溪聞。

平水

旅飯風埃小市傍。卻呼拄杖踏斜陽。可憐陌上離離草。一種逢春各短長。

三月二十五夜達旦不能寐

愁眼已無寐。更堪衰病嬰。蕭蕭窗竹影。礫礫水禽聲。捶楚民方急。煙塵虜未平。一身那敢計。雪涕爲時傾。

又

憂國心常折。觀書眼欲枯。百年終坎壈。一飯且枝梧。忽忽殘春過。迢迢清夜徂。壯心空萬里。老病要人扶。

園中小飲

此老胸中萬頃寬。小園幽徑日追歡。寧教酒欠尋常債。恥就人求本分官。高柳陰濃煙欲暝。叢花紅溼露初溥。時月桂方盛開。要知澤國年光晚。已過清明尙淺寒。

舟中夕望

船掠湖堤不入城。葛巾羽扇試春行。女牆迤邐橫輕靄。佛閣崢嶸倚晚晴。樹冒藤花堆故繡。風吹鶯語送新聲。細思造物何由報。遣作閑人過此生。

四月一日作

桃李逢春次第開。坐看零落付蒼苔。壓車麥穗黃雲重。食葉蠶聲白雨來。鏡裏頓驚年事速。天邊誰挽斗杓回。可憐團扇塵侵損。又見生絳月樣裁。

舟行過梅市

新換單衣細葛輕。翛然隨處得閑行。綠陰浦口維舟處。霽日場中打麥聲。醉叟臥途知酒賤。耕農滿野喜時平。老來無復雕龍思。遇興新詩取次成。

山園雜賦

初夏未覺暑。微陰殊勝晴。藤冠稱新沐。蓴菜解餘醒。偶據盤陀坐。還扶柳栗行。平生志助業。今日一毫輕。

又

藤陰初覆架。菱蔓漸穿萍。水繞籬根綠。山從樹罅青。長辭帝所夢。不媿草堂靈。賴有黃醅法。終年任醉醒。

又

一日老一日。一年貧一年。元無肉食相。且作地行仙。本不營三窟。何須直一錢。村墟櫻筍鬧。剩放醉中顛。

又

芳莖真妙士。霜菊亦奇才。邂逅心生敬。慙慙手自培。扶持新長桂。護惜欲殘梅。此意何人解。頽然付酒盃。

西窗

西窗徧受夕陽明。好事能來慰此情。看畫客無寒具手。論書僧有折釵評。薑宜山茗留閑啜。鼓下湖蓴喜共烹。酒肉朱門非我事。諸君小住聽松聲。

山頭鹿

呦呦山頭鹿。毛角自媚好。渴飲澗底泉。飢齧林間草。漢家方和親。將軍灞陵老。天寒弓力勁。木落霜氣早。短衣日馳射。遂鹿應弦倒。金槃犀筋命。有繫翠壁蒼崖迹。如掃何時詔下北。擊胡卻起將軍遠。征討泉甘草茂上林中。使我母子常相保。

夏四月渴雨恐害布種代鄉鄰作插秧歌

浸種二月初。插秧四月中。小舟載秧把。往來疾於鴻。吳鹽雪花白。村酒粥面濃。長歌相贈答。宛轉含幽風。日暮飛槩歸。小市鼓鼕鼕。起居問尊老。勤儉教兒童。何人采此謠。爲我告相公。不必賜民租。但願常年豐。

雲童童行

雲童童。挾雨來。雨未濡。土雲已開。不能爲人斂浮埃。山南山北空聞雷。青秧欲稿吁可哀。

董逃行讀古樂府擬作。

漢末盜賊如牛毛。千戈萬槩更相磨。兩都宮殿摩雲高。坐見霜露生蓬蒿。渠魁赫赫起臨洮。僵屍自照臍中膏。危難繼作如崩濤。王朝荒穢誰復薶。踰城散走墜空壕。扶老將幼山中號。昔者羣枉根株牢。衆憤不能損秋毫。誰知此亂亦不遭。名雖放斥實遁逃。平民跽死聲嗷嗷。今茲受禍乃我曹。

閔雨

黃沙白霧晝常昏。嗣歲豐凶詎易論。寂寂不聞秧鼓動。啞啞實厭水車翻。粟困久盡無遺粒。淚席嘗沾有舊痕。聞道憂民又傳詔。蒼生何以報君恩。有詔禱雨天竺山。

又

赤日黃塵江上村。徵租惟有吏過門。微風敢喜北窗臥。大旱恐非東海冤。千載傳巖疑可致。一篇洪範向誰論。青蔬半畝垂生死。且喚鄰翁共灌園。

喜雨

楚巫奔走畏天慳。變化寧知轉盼間。初夜電光搖北斗。父老以北斗下有電候雨。平明雲氣冒南山。坐令沃野新秧遍。已覺豐年舊觀還。白首老農愁破處。夢回高枕聽潺潺。

初夏

已作梅黃雨。猶餘麥秀寒。穿林紅練帶。拔地碧琅玕。酒向愁邊薄。衣從病後寬。所欣消渴減。乳酪正甘酸。

村舍

門巷桑麻暗。庖廚筍豉香。僮奴課鉏菜。婢子學燒糠。貧任青春過。閑知白日長。非關愛疎懶。無事可成忙。

鳥啼

野人無曆日。鳥啼知四時。二月聞子規。春耕不可遲。三月聞黃鸝。幼婦閔蠶飢。四月鳴布穀。家家蠶上簇。五月鳴鴉舅。苗稚憂草茂。人言農家苦。望晴復望雨。樂處誰得知。生不識官府。葛衫麥飯有。卽休湖橋小市酒。如油。夜夜扶歸常爛醉。不怕行逢灞陵尉。

感舊

廢隴荒陂泥汜耕。生無助業死無名。衰頹日甚君休問。三十年前白髮生。紹興壬午。予年三十八。與查元章。王危叟。同出垂拱殿門。二君指予問曰。子亦有白髮耶。相與太息。今三十二年矣。

讀書至夜半燈盡欲睡慨然有感

白髮蕭蕭老空谷。人歎厄窮心自足。東郊曉射墮錦雉。北嶮春耕叱黃犢。區區世事何足論。未死斷知常閉門。關河好在萬里路。理亂不至三家村。夜分燈暗月入戶。賦詩肯道儒冠誤。飢鷹勁翮高有聲。橫截陂湖正南去。

遣興

壯歲元多病。長年敢自期。賤貧交易絕。憂患夢常悲。續食叨微祿。寬心賴小兒。平生鏡湖上。天乞小茆茨。

農舍

農舍雖云苦。君恩詎可忘。繭稠初滿簇。麥熟已登場。渺渺開村路。登登築野塘。但須時雨足。擊壤詠時康。

四月晦日小雨

霏霏亂點暗朝光。款款奇聲渡野塘。一浦未輸新漲綠。四郊聊壓早塵黃。風生團扇清無暑。衣覆熏籠潤有香。竹屋茆簷得奇趣。不須殿閣詠微涼。

泛舟過吉澤

蕭蕭菰蒲如荻林。五月已覺秋意深。煙波滅沒沒有漁艇。浦溆飛鳴多水禽。稽山出雲極奇變。陸子岸幘方微吟。一聲菱唱起何許。洗盡萬里功名心。

書歎

高廟衣冠月出遊。中原父老淚交流。諸公誰效回天力。散吏空懷恤緯憂。雨細漁菴晨舉網。月明耕隴夜驅牛。神州克復知何日。北望飛蓬萬里秋。

五月得雨稻苗盡立

城郭迎龍鼓吹喧。甘膏三夕慰黎元。草荒常日經行路。水到前村舊漲痕。黃犢盡耕稀曠土。綠苗無際接旁村。家家足食山無盜。安枕何勞夜閉門。

薄醉遣懷

跼踖蝸廬迨蕭條。鶴髮新途窮貧入夢。身老病欺人帶索。忘三組。羹藜抵八珍。蓬窗一盃酒。自覺膽輪困。

陸放翁集

劍南詩稿

卷第三十

五月十一日夜坐達旦

莫笑耽書不計年，寒儒業定幾生前。
讀經今日章編絕，作賦當時鐵硯穿。
公路晚悲身至此，令威歸歎塚
燐然。三更聽雨蓬窗底，又作鰥魚夜不眠。

題陽關圖

誰畫陽關贈別詩，斷腸如在渭橋時。
荒城孤驛夢千里，遠水斜陽天四垂。
青史功名常蹭蹬，白頭襟抱足
乖離。山河未復胡塵暗，一寸孤愁只自知。

新暑書事

城中五月汗霑衣，吾愛吾廬喜氣微。
珍簾含風來遠餉，輕羅疊雪出鳴機。
艾人當戶佳時過，筒黍堆盤舊
俗非。漫欲題詩還嬾去，老來百事與心違。
去歲業正，則餉蘄篲，得以禦暑。今年蠶事僅得五六分，遂辦暑
服。

時雨

時雨及芒種，四野皆插秧。
家家麥飯美，處處菱歌長。
老我成惰農，永日付竹床。
衰髮短不櫛，愛此一雨涼。

庭木集奇聲。架藤發幽香。鶯衣溼不去。勸我持一觴。卽今幸無事。際海皆農桑。野老固不窮。擊壤歌虞唐。
示客

桑柘成陰百草香。縑車聲裏午風涼。客來莫說人間事。且共山林夏日長。

南堂默坐

日日樹頭鶉鷓鳴。夜夜谿邊姑惡聲。堂中老子獨無語。寂然似可終吾生。大鵬一舉九萬程。下視海內徒營營。秋蟲春鳥非我類。何至伴渠鳴不平。

夏日

燕子生雛梅子黃。斷雲殘雨過林塘。孤舟正作答答夢。九陌難隨襪襪忙。團扇與來閑弄筆。寒泉漱罷獨焚香。太平處處熏風好。不獨宮中愛日長。

小酌

白髮蕭然海上村。猶能草草置清樽。今年項里楊梅熟。綠李來禽不足言。

夏夜

露溼芙渠冷。月明薔蔔香。殘醉吹欲無。颼颼髮根涼。豈惟棄世事。形影亦相忘。空憶南山下。新秋射虎場。
又

我昔在南鄭。夜過東駱谷。平川月如霜。萬馬皆露宿。思從六月師。關輔談笑復。那知二十年。秋風枯苜蓿。

看鏡

凋盡朱顏白盡頭。神仙富貴兩悠悠。胡塵遮斷陽關路。空聽琵琶奏石州。

又

七十衰翁臥故山。鏡中無復舊朱顏。一聯輕甲流塵積。不爲君王戍玉關。馬正惠。公喜功名。每日幸未甚。衰若有邊警。願預征行。得良馬數疋。輕甲一聯足矣。

明妃曲

漢家和親成故事。萬里風塵妾何辜。掖庭終有一人行。敢道君王棄憔悴。雙駝駕車夷樂悲。公卿誰悟和戎非。蒲桃宮中顏色慘。雞鹿塞外行人稀。沙磧茫茫天四圍。一片雲生雪卽飛。太古以來無寸草。借問春從何處歸。

思遠遊

我志日已衰。詩亦無傑句。正如隨翅鶴。悵望遼海路。雖云須藥物。幸未迫霜露。裂裳裹兩踵。此詩亦已屢。嵯峨青城雲。慘淡嶓冢樹。秋風吹短裘。萬里入芒屨。

太息

太息重太息。吾生誰與歸。那知暮景迫。但覺故人稀。避禍歸猶困。憂讒默亦非。今年貧徹底。擬賣舊漁磯。

六月二十六日夜夢赴季長招飲

少城駿馬逐春風。二十年間萬事空。清夢都忘雙鬢改。繡筵還喜一尊同。烏巾掩冉簪花重。羯鼓敲鏗列炬紅。安得此歡真入眼。碧油幢擁主人翁。

夜分不寐起坐園中至旦

涼氣蘇衰疾。幽人杖藜。月驚孤鶻起。天帶衆星西。松菊今彭澤。山川古會稽。清吟殊未愜。喔喔已晨雞。

露坐

此手乃可憐。經月不把酒。著書又苦晚。何以圖不朽。空庭坐三更。磊落垂北斗。向來歷關河。萬里空回首。豈知三十年。竟作越中叟。後生雖滿眼。非復舊交友。形體迫衰謝。妻子亦何有。悵望懷古人。吞聲死農畝。

晨起

心安已到無心處。病去渾如未病前。晨起更知秋色好。一庭風露聽鳴蟬。

散步東邨

偶從北崦繚東崗。曳杖行歌踏夕陽。一徑入雲多鹿跡。數家臨水共漁梁。野風蕭瑟知秋早。社酒淋漓喜歲穰。鄰曲不須憐老態。尙能尋句答年光。

早秋

涼颼浙浙撼庭柯。微雨蕭蕭集浦荷。草閣檐虛覺山近。蓬窗地迳得香多。謀身自拙窮無鬼。閉戶長閑睡有魔。臺省諸公盛冠劍。固應老子得婆娑。

又

秋入房櫺夜漸長。紗廚笛簟怯新涼。螢光得意穿簾隙。桐葉知時拂井牀。世事本來誰得鹿。人生何處不亡羊。燈前笑向吾兒說。又過銅匱半篆香。

又

落魄巴江號放翁。斯名歲晚亦成空。酒醒遙夜孤舟雨。睡美清秋一榻風。駭浪千重無死地。神丹九轉有新功。雲端不遇飛仙過。誰願幽人寂寞中。

又

貂裘塵土憶東周。瓜隴風霜隱故侯。嬾似老雞頻失旦。衰如蠹葉早知秋。壺觴非復平生友。歲月空添客子愁。病起筆端猶健在。未妨揮灑賦登樓。

七月二十一日午睡夢泛江風濤甚壯覺而有賦

夢中不記適何邦。風飽蒲颿入大江。久矣眼中無此快。蹴天雪浪濺船窗。

幽居戲贈鄰曲

暮年遠屏天所借。落佩倒冠如得謝。雖無壺酒助歌呼。幸有蠹書供枕藉。市聲不聞耳差靜。車轍掃空身轉暇。雨慳葵葉未吐甲。露重榴房初坼罅。深紅菱角密覆水。爛紫蒲桃重垂架。直令掩關避世俗。未害煎茶喚鄰舍。蕭蕭雞犬衡門晚。寂寂燈火幽窗夜。勸君切勿縱高談。性命如絲不禁嚇。

遣興

失馬真成福。移山未必愚。故園三徑廢。餘俸一錢無。望道心常渴。觀書眼欲枯。宦遊歸自好。不必爲尊鱸。

又

療飢惟恃粥。動步已須人。欲午猶支枕。經旬不過鄰。鵲棲寒自穩。鷗沒遠難馴。莫笑謀身拙。黃冠學季真。

步至湖上寓小舟還舍

淒涼懷古地。慘澹暮秋天。紅樹秦馳道。青山禹廟壩。湖風飄斷角。墟日起孤煙。老恨功名晚。無人共著鞭。

又

山居苦無事。携稚出門行。酒賤逢人醉。農閑到處耕。巷牛聽晚笛。池鷺唼枯萍。東望生秋興。樓臺壓繚城。

又

病墮支離境。閑尋漫浪遊。湖平天鏡曉。山峭石帆秋。賒酒家家許。看花處處留。歸途倦扶杖。卻上釣魚舟。

又

萬壑爭流地。身閑得縱觀。未能容蟹舍。聊得寄漁竿。遠浦樵風急。空山窆石寒。踟躕不知晚。磔磔有歸翰。

又

細浪隨搖櫂。新涼入岸巾。斷行初到雁。空擔暮歸人。漫道貧非病。誰知懶是真。疎鐘起詩思。迢遞度煙津。

送王仲言倅泰州絕句

汝陰太史萬籤藏。酸棗先生六世芳。豹尾屬車留不住。卻尋陳迹海陵倉。晁景迂與先太史有海陵酬唱。

又

紫薇傑作傳千載。物色分留待下車。老病難陪曳裾客。因來時寄一行書。劉貢甫嘗爲倅倅。

醉中作

彤臚爲家雲作友。流年盡付樽中酒。清歡穿林鸞鳳吟。草書落紙龍蛇走。人間無復王景略。千載風雲常

寂寞安得熊羆十萬師。蹴踏幽并洗河洛。

秋夜書感

闌干斗插西慘淡。河絡角開歲財屬爾。草木忽搖落。平生歷畏塗。赤手犯蛟鱓。幸收垂盡日。歸臥一丘壑。鄉鄰怪此老。骯髒尙如昨。使無湖海寬。朝市何處著。諸公方袞袞。一士要謬謬。謀食古所羞。終身美藜藿。

八月三日驟涼有感

殘暑侵人畏汗霑。清秋乍見月纖纖。自燒熟火添香獸。旋把寒泉注硯蟾。佳客誤占螢入戶。遠書空喜鵲鳴簷。悠然獨對清燈臥。誰念柴門老病兼。俗以螢飛入室爲有客至之兆。

南堂與兒輩夜坐

殘暑初歸肺病蘇。胡床清夜集前除。風高木葉危將脫。月上天河淡欲無。鵲影繞枝棲未穩。荷盤擎露重相扶。淒然又起流年感。兩鬢如蓬日夜枯。

泛舟至魯墟

南蕩東陂弄夕霏。葛巾鶴氅試秋衣。纖纖新月迎船出。兩兩珍禽背水飛。病思漸蘇開酒戒。宦情已絕謝塵鞿。郊居是處堪乘興。不怕城笳苦喚歸。

園蔬薦村酒戲作

身入今年老。囊從早歲空。元無擊鮮事。常作啜醢翁。菹有秋菰白。羹惟野蕘紅。何人萬錢筋。一笑對西風。

雨夕排悶

買牛耕剡曲。舉世笑迂疎。流落愈憂國。衰殘猶讀書。滔滔安稅駕。耿耿獨愁余。破屋秋多雨。情懷用底摠。

又

煙雨暗郊墟。頽然臥草廬。蟲喧夢回枕。燈伴讀殘書。短褐頻關念。荒畦久廢鋤。更堪湖水漲。累日食無魚。

湖中作

社瓮醅香燕子歸。陰風吹雨暗郊扉。疏溝園叟方攜鍤。采藥蠻童已溼衣。山雉尾垂衝靄去。水雞翅重踞波飛。憑闌一笑君知否。肺渴秋來勢漸微。

讀易

揖遜干戈兩不知。巢居穴處各熙熙。無端鑿破乾坤祕。禍始羲皇一畫時。

郊行夜歸有感

小市歌呼散幽人。悄獨行。斷鴻沙際冷。重露草根明。信古癡常絕。酬恩命本輕。還家掩屏臥。衰涕浩縱橫。

醉歌

三十六策醉特奇。竹林諸公端可師。秋風蕭蕭吹鬢絲。蟹螯正可左手持。醉倒村路兒扶歸。瞠目不識問是誰。浩歌起舞夜何其。北斗磊落明河移。貴人惜醉渠自癡。黃金絡馬誇市兒。一朝禍來莫支持。新州如山不可移。

買酒

放翁病起不禁愁。買酒看山自獻酬。八月吳中未搖落。誰令衰鬢早知秋。

秋雨歎

淙淙雨聲瀉高秋。稻梁浸瀾雨不休。志士仁人萬行淚。孤臣孽子無窮憂。一身窮困未暇恤。如此無事理。有不聖言古訓舉不驗。簡編可用汗馬牛。嗚呼有粟吾得食。夜睡何時得安席。我生猶及宣和年。建炎以來身所歷。高皇一言感天地。盜賊千羣掃無迹。疽囊雖慘固可醫。誰爲聖代施鍼石。

憂國

恩許還山已六年。誓憑耕稼餞華顛。養心雖若冰將釋。憂國猶虞火未然。議論孰能忘忌諱。人材正要越拘攣。羣公亦采芻蕘否。貞觀開元在目前。

夜意

居家元是客。在俗亦如僧。點滴檐間雨。青熒帳外燈。壯心終蹭蹬。去日捷飛騰。不及寒沙雁。來時下杜陵。

大風雨中作甲寅八月二十三日夜

風如拔山怒。雨如決河傾。屋漏不可支。窗戶俱有聲。烏鳶墮地死。雞犬噤不鳴。老病無避處。起坐徒歎驚。三年稼如雲。一旦敗垂成。夫豈或使之。憂乃及躬耕。鄰曲無人色。婦子淚縱橫。且抽架上書。洪範推五行。

題齋壁

閉門無事不勝閑。心境超然一室寬。香岫火深生細靄。硯池風過起微瀾。睡餘但欲依書几。坐久還思弄釣竿。擾擾平生成底事。鏡湖歸隱老黃冠。

又

手斷雲根結草廬。平生心事滿無餘。二升菰米晨炊飯。一椀松燈夜讀書。天理直須閑處看。人謀常向巧中疎。煙波有趣君知否。裂網伸鉤也得魚。

窮途

窮途多感慨。老境少知聞。酒裏閑消日。書中自策勳。全軀希碌碌。掃軌厭紛紛。每愧吾鄉老。頭童念致君。
先友傅公給事。暮年髮髯。每酒酣脫幘。覽鏡歎曰。吾其已乎。

貧病

行年七十尚攜鉏。貧悴還如白紵初。好事鄰僧勤送米。過門谿友強留魚。客來旋過牆頭酒。睡起閑抽架上書。要信榮枯元不動。胸中浩浩著空虛。

秋晚

春粳入甑香炊玉。壓酒鳴槽滴碎珠。甲第朱門漫豪侈。山家風味定應無。

又

新築場如鏡面平。家家歡喜賀秋成。老來懶惰慚丁壯。美睡中間打稻聲。

又

秋菰出水白如玉。寒薺繞牆甘若飴。正是長齋豈不可。凜然大節固難移。

又

竹竿坡面老別駕。飯顆山頭瘦拾遺。自古詩人例如此。放翁窮死未須悲。

山村書所見

老枳垂藤晝常黑。雛鷹聲作嬰兒啼。伐薪歸來遇急雨。石路下山如踏梯。

又

荒坡茫茫牧牛童。扳角上背捷如風。腰間一枝搢枯竹。橫吹短笛過村東。

三年前嘗與兒輩步過東涇小嶺得勝處可營別墅貧不能成偶復至其地悵然有感

前年度嶺踏斜陽。曾卜松陰置草堂。只倚氣吞雲夢澤。竟無錢買雪堆莊。煙脂菱角空頻摘。火齊楊梅已再嘗。事不如心居十九。往來常羨捕魚郎。山多楊梅有合抱者。下臨鏡湖皆菱蕩。

園中秋夕

季秋哉。生明風露正。悽冷放翁澹無事。樂此清夜永。飢鷹棲不穩。勁翅起東嶺。湖邊千樹柳。何處寄幽影。人生寓宇內。俯仰一炊頃。此心無媿負。簞食均五鼎。許身輩稷卨。終亦輸箕穎。天風倘可乘。采蓮登玉井。秋晴每至園中輒抵暮戲示兒子

老翁七十如童兒。置書不觀事遊嬉。園中壘瓦強名塔。庭下埋盆聊作池。青蒲紅蓼共掩映。病棕瘦竹相扶持。衰頹已作老驥臥。來往尙如黃犢馳。但知身存百無害。莫問老健能幾時。汝勤挾筴乃堪笑。且共飯豆羹秋葵。

醉睡初覺偶作

小圃醒還醉。幽窗起復眠。虛明炷香地。清潤斲花天。老去才雖盡。窮來志益堅。阿瞞那可語。平日笑橋玄。

汪茂南提舉挽詞

學已三冬富。書猶萬卷藏。名場雖蹭蹬。朝論極揄揚。小試襦袴詠。遂辭鷓鴣行。秋風九原路。挽鐸倍淒涼。

又

往者紹興末。江淮聞戰聲。上流煩舊德。下客辱深知。陳迹成今古。追懷每涕洟。郎君雖不識。撫事亦增悲。

先相公督師荆襄。游首蒙招致幕府。會留樞屬。不克行。

謝徐居厚汪叔潛攜酒見訪

我雖生亂離。猶及見前輩。衣冠方南奔。文獻往往在。幸供掃灑役。迹忝諸生內。話言猶在耳。造次敢不佩。殘年趨死近。孤學與時背。妄出更何求。終老事耕耒。史君稽古學。力大障橫潰。廣文亦偉士。名字震當代。同舟肯過我。凜與前脩配。憂時抱忠鯁。論事極慷慨。嗟予雖益衰。耳目幸未廢。何當卜鄰牆。早暮聆警效。

喜鄭唐老相過

鄭子有書癖。對書百事忘。頭亂不暇櫛。鬢冷不暇嘗。持此金石心。力求古文章。吟哦屈宋作。蚤夜聲琅琅。方揮卻日戈。恥窺及肩牆。不見今六年。所得非復常。扁舟夜過我。劇論神激揚。徐出二三篇。穉米於太倉。已足起衰懦。黑絲生鬢霜。使得盡見之。殆可鍼膏肓。願子繼自今。勿惜傾錦囊。因來數爲寄。歲晚慰所望。

秋晚散步門外

栗里歸栽菊。青門隱賣瓜。羸軀病天色。衰鬢怯年華。野曠鳥聲樂。溪清雁影斜。門前秋潦退。也擬築堤沙。

潦水壞道數丈方與鄰曲共修之。

寄徐秀才斯遠并呈莊賢良器之

徐子作別十年餘。無人可寄一紙書。閉門美睡畏剝啄。自怪一念常關渠。西風蕭蕭吹槁葉。秋光正滿蝸牛廬。讀書易倦出無友。撫几慵恍空愁予。蜀莊之孫往南郭。亦復迹遠非情疎。何時同載過老子。共飯赤米羹青蔬。

閑中

閑中高趣傲羲皇。身臥維摩示病床。活眼硯凹宜墨色。長毫甌小聚茶香。門無客至惟風月。案有書存但老莊。問我東歸今幾日。坐看庭樹六番黃。

秋霽

驅除雲霧極知難。敢意天公不作慳。汛掃中庭待明月。攀躋危榭望青山。取琴理曲茶煙畔。看鶴梳翎竹影間。不爲新晴宜著句。擬將幽事破除閑。

晨起

晨起梳頭拂面絲。行年七十豈前期。此生猶著幾兩屐。長日惟消一局棋。空釜生魚忍貧慣。閉門羅雀與秋宜。區區名義真當勉。正是先師戒得時。

箜篌謠二首寄季長少卿

庭樹非不榮。霜蠶萬葉枯。朋友豈我棄。漸遠勢自疎。中夜起太息。發篋覓舊書。塵昏蠹蝕損。行缺字欲無。

一讀色已變。再讀涕淚濡。卷書置篋中。寧使飽蠹魚。

又

少壯離別時。回顧日月長。會合終有期。何恨天一方。我齒如敗屐。君髮如新霜。餘日復幾何。萬里遙相望。欲泣老無淚。欲夢不可常。寄書何時到。江漢春茫茫。

閎極有作

貴已不如賤。狂應又勝癡。新寒壓酒夜。微雨種花時。堂下藤成架。門邊枳作籬。老人無日課。有興卽題詩。

自詠

常記當年入洛初。華燈百萬擲樗蒲。平生意薄刀筆吏。投老身爲山澤臞。已罷向空書咄咄。尙能擊缶和鳴鳴。今朝客至無尋處。正伴園丁斲芋區。

夢范參政

夢中不知何歲月。長亭慘淡天飛雪。酒肉如山鼓吹喧。車馬結束有行色。我起持公不得語。但道不料今。遽別平生故人。端有幾。長號頓足淚迸血。生存相別尙如此。何況一旦泉壤隔。欲懷雞黍病爲重。千里關河阻臨穴。速死從公尙何憾。眼中寧復見此傑。青燈耿耿山雨寒。援筆詩成心欲裂。

乞奉祠未報食且不繼

富貴常求繫日繩。阨窮卻羨棄家僧。強顏始覺貧爲害。對鏡方嗟老可憎。出戶風霜欺短褐。讀書父子共昏燈。聖師夢奠二千載。一卷遺書終可憑。

山寺

信步得佳寺。入門吹斷香。林深栗鼠健。屋老瓦松長。弔古增悽愴。憑高寄慨慷。忽忽興未盡。新月映方塘。

太師魏國史公挽歌詞

早擅淵源學。常懷懇款忠。雲龍際千載。典册冠三公。論諫寧中止。謀謨不苟同。此心誰復識。志士泣秋風。

又

位歷公卿貴。身兼將相榮。珥貂儀一品。錫帶價連城。入告推忠厚。躬行本志誠。斯民何以報。萬里徧春耕。

又

道德補天石。助勞夾日龍。犯顏無不盡。造膝略皆從。歲貢來戎幣。秋防滅塞烽。畫圖麟閣上。猶足折遐衝。

又

舊弼初收召。惟公力贊揚。都亭移供帳。全魏徹封疆。大度寧猜阻。羣言自中傷。拳拳虛左意。猶可資穹蒼。

公初援附。卽力薦張忠獻公于壽王。如賜館都亭驛。超封魏國公。皆公密奏。且嘗乞用張公爲首相而已。

佐之。

又

攏干勞久戍。大將未班師。抗議回天意。忘身爲聖時。人心嶮莫測。時事遠難知。汗簡方傳信。孤生欲語誰。吳璘戍德順軍。師老欲還。不敢自請。公爲相。察其情。卽力請班師。西鄙賴以無事。後議者乃指公爲棄地。公不辨也。

三峽歌

乾道庚寅予始入蜀。上下三峽屢矣。後二十五年。歸耕山陰。偶讀梁簡文巴東三峽歌。感之。擬作九首。實紹熙甲寅十月二日也。

神女廟前秋月明。黃牛峽裏暮猿聲。危途性命不容恤。百丈牽船侵夜行。

又

不怕灘如竹節稠。新灘已過可無憂。古粧峨峨一尺髻。木盞銀盃邀客舟。

又

十二巫山見九峯。船頭彩翠滿秋空。朝雲暮雨渾虛語。一夜猿啼明月中。

又

錦繡樓前看賣花。麝香山下摘新茶。長安卿相多憂畏。老向夔州不用嗟。

又

險詐沾沾不媿天。交情回首薄如煙。東遊萬里雖堪樂。灑灑瞿唐要放船。

又

蠻江水碧瘴花紅。白舫黃旗無便風。涪萬四時常避水。棚居高出亂雲中。

又

亂插山花篋子紅。蠻歌相和讓西東。忽然四散不知處。踏月捫蘿歸峒中。

又

萬州溪西花柳多。四鄰相應竹枝歌。問君今夕不痛飲。奈此滿川明月何。

又

我遊南賓春暮時。蜀船曾繫挂猿枝。雲迷江岸屈原塔。花落空山夏禹祠。

十月三日泛舟湖中作

桑落可釀酒。草枯可呼鷹。平生當此時。意氣十倍增。即今境界別。千錢買短篷。鏡湖三百里。往來寒日中。小飯炊彫胡。玉食無此美。臥聞水鳥聲。世念去如洗。知此恨太晚。享此恐不足。南山忽已昏。更就漁村宿。

早行

寒漏參差斷。晨雞次第鳴。匆匆半枕夢。草草一盃羹。澤國多逢雨。閑人不計程。雲間出寸塔。迎我有餘情。

晚泊

樓上鳴鳴角。橋邊點點燈。聚沙新到雁。趁渡獨歸僧。日隱山光暗。天低海氣蒸。居人笑老子。醉髮亂鬚鬢。

遣懷

暮年世事轉悠悠。攪涕悽然類楚囚。不道渾無排遣處。病觀周易悶梳頭。

舟行戲書

世事無窮膏火煎。羈魂病骨久羸然。覺時不及夢差樂。死去始嗟生可憐。慷慨知非請纓日。推移忽及挂冠年。揚帆海浦差強意。臥看秋濤蹴遠天。

此页空白

陸放翁集

劍南詩稿

卷第三十一

久雨

黃葉雨中盡。飢鴻煙際來。時艱歲仍惡。身死病相催。西埭無行路。南山有疾雷。囊空罷沽酒。一醉轉悠哉。

偶得長魚巨蟹。命酒小飲。蓋久無此舉也。

老生日日困鹽齋。異味櫻魚與楮雞。敢望槎頭分縮項。況當霜後得團臍。堪憐妄出緣香餌。尙想橫行向草泥。東甌夜來梅已動。一樽芳醞徑須攜。

泛舟湖山間有感

我似人間不繫舟。好風好月亦閑遊。歸來華表千年鶴。滅沒煙波萬里鷗。歲晚客貂那復歎。時艱黎緯未忘憂。野人只欲安耕釣。江左夷吾可見不。

望永思陵

綠衣迎拜屬車塵。草木曾霑雨露春。三十五年身未死。卻爲天下最窮人。

又

盱食憂民宴樂疎。太倉幾有九年儲。賈生未解人間事。北闕猶陳痛哭書。紹興庚辰辛巳間。游屢貢誓言。

略蒙施用

糟蟹

舊交髻簿久相忘。公子相從獨味長。醉死糟丘終不悔。看來端的是無腸。

霜夜

梅花欲動夢魂狂。橙子閑搓指爪香。莫怪草堂清到骨。一梳殘月伴新霜。

又

黃甘磊落圍三寸。赤蟹輪囷可一斤。更喚東陽麴道士。與君霜夜策奇勳。時東陽餉酒。

又

澹月窺窗似有情。更堪梅影向人橫。放翁不受天魔惱。獨擁青氈睡到明。

書室明暖終日婆娑。其間倦則扶杖至小園戲作長句

放翁老手竟超然。俗子何由與作緣。百榼舊曾誇席地。一窗今復幻壺天。夢回橙在屏風曲。雨霽梅迎拄杖前。吾愛吾廬得安臥。笑人思穎憶平泉。李衛公憶平泉山居。歐陽公思穎詩。皆數十篇。

又

美睡宜人勝按摩。江南十月氣猶和。重簾不捲留香久。古硯微凹聚墨多。月上忽看梅影出。風高時送鴈聲過。一杯太淡君休笑。牛背吾方扣角歌。

初冬

老客人間百事慵。樂哉閉戶過今冬。朝爐獸炭騰紅焰。夜榻蠻氈擁紫茸。蝟刺圻蓬新粟熟。鵝雛弄色凍醅濃。題詩正自消閑日。本不爭先萬戶封。

買屐

一雨三日泥。泥乾雨還作。出門每有礙。使我慘不樂。百錢買木屐。日日繞村行。東阡與北陌。不問陰與晴。青鞋豈不佳。要是欠耐久。何當踏深雪。就飲湖橋酒。

十月晦日作

藤疎不覆架。桐落欲平溝。閨歲風霜晚。衰年日月遒。觀書方坐石。把釣又登舟。不是無羈束。閑人得自由。

贈道友

凡骨已蛻身自輕。勃落葉上行無聲。華陰市樓醉舞罷。卻上蓬峯看月明。

又

憶在長安爛漫遊。大明宮闕與雲浮。今朝偶上慈恩塔。北望茫茫黍禾秋。唐含光殿與慈恩塔南北相直。

又

當時辛苦學長生。準擬中原看太平。今日醉遊心已足。一瓢歸去隱青城。

又

二盃兀兀復騰騰。服氣燒丹總不能。借問生涯在何許。孤舟風雨伴漁燈。

又

零落殘碑草棘中。北邙蕭瑟又秋風。舊時憶在鷓行裏。幾見宜麻拜相公。

示子聿

儒林早歲竊虛名。白首何曾負短檠。堪歎一衰今至此。夢回聞汝讀書聲。

老境

平生百不遂。惟有老如期。眼澀觀書夜。心衰把酒時。僧分新掘藥。客誦舊題詩。四十年前我。回看定是誰。

予所居三山在鏡湖上近取舍東地一畝種花數十株彊名小園因戲作長句

出郭西南十里過。小園風月得婆娑。翠屏三扇恰相倚。玉鏡一奩誰爲磨。投鐻未嫌衰鬢白。插花聊喜醉顏酡。耶溪更盡青鞋興。免使將軍怒脫靴。

被命再領沖佑有感

殘骸日益衰。晨夜抱疾痛。地爐得微火。終日不熈動。讀書舊成癖。今但坐作夢。未能追鴻冥。乃復分鶴俸。風霜舍邊柳。合抱皆手種。眼中人盡非。欲話誰與共。

冬夜戲書

東歸剡曲寄徜徉。閑日雖冬亦自長。梅瘦有情橫淡月。雲輕無力護清霜。長魚通印鹽花白。珍鮓披鱗麴糵香。一飽喟然還自憫。彊顏垂老食官倉。

又

將挂衣冠彊小留。期年畢竟是歸休。青氈獨擁欺霜夜。濁酒頻傾洗客愁。鶴影冷飜丹井月。雁聲遙帶玉

關秋。一生自笑閑中過。不爲功名也白頭。

又

老樹霜餘已盡紅。縱橫落葉滿庭中。一鈞澹澹西南月。萬鼓憑憑東北風。賒酒每慚添舊券。讀書何計策新功。蓬窗坐睡摧頽甚。隔竹敲茶賴小童。

幽居

落葉紛可掃。幽花寒自開。困空無雀噪。門靜有僧來。孤學時方棄。窮途勢莫回。呼兒了租賦。莫待縣符催。

又

雨霽雞栖早。風高雁陣斜。園丁刈霜稻。村女賣秋茶。缺井磨樵斧。枯桑繫釣槎。客來那用問。此是放翁家。

送蘇召叟秀才入蜀效宛陵先生體

士勇赴知己。義重身固輕。尊公況有命。子得辭此行。結廬出門去。迢迢過蠻荆。泝江卜風色。入峽聽猿聲。萬里一紙書。南寄孤雁征。山陰在何處。計子難爲情。願言早來歸。鄰曲當出迎。機舟柯橋市。一棹手自傾。

寄題哲上人漫堂

老子從來任運行。愛君堂以漫爲名。北邙大有英雄骨。枉用工夫過一生。

冬夜獨酌

寒水茫茫浸月明。疎鐘杳杳帶霜清。一樽濁酒有妙理。十里荒雞非惡聲。物外雖增新跌宕。胸中未洗舊崢嶸。頽然坐睡蒲團穩。殘火昏燈伴五更。

夜坐燈滅戲作

冷飯黃齋傲太平。鬢絲原不爲愁生。忽因燈死得奇觀。明月滿窗梅影橫。

艾如張

錦膺繡羽名山雞。清泉可飲林可栖。稻粱滿野棄不啄。雖有奇禍無階梯。東村西村煙雨晚。蕭艾離離林薄淺。翩然一下駭機發。汝雖知悔安能免。漢家天子南山下。萬騎合圍窮日夜。犬牙鷹爪死不辭。觸機折頸吁可悲。

上之回

咸陽宮闕天下壯。五更衛士傳雞鳴。重門洞開鑾駕出。回中更在雲霄上。雲霄一路蟠青冥。車聲隱鱗馳雷霆。宓妃穿仗王母下。何必軒皇居大庭。君王遊幸無終極。萬年盡是歡娛日。文成已死方不讎。茂陵松柏秋蕭瑟。

雜詠園中菓子

不酸金橘種初成。無核枇杷接亦生。珍產已從幽圃得。濁醪仍就小槽傾。

又

漿石榴隨餠作節。蠟櫻桃與酪同時。兩株偶向池邊種。可喜今年墜折枝。

又

架垂馬乳收論斛。港種雞頭采滿船。鼉鼎若爲占食指。麴車未用墮饑涎。

又
山杏谿桃本看花。纍纍成實亦堪誇。鹽收蜜漬饒風味。送與山僧下夜茶。

閉戶

聲利能令智者愚。放翁閉戶養迂疎。地爐枯葉夜煨芋。竹筍寒泉晨灌蔬。徇俗不如翻着屨。愛山只合倒騎驢。今朝更有欣然處。萬里知心一紙書。蜀兵來得張季長歸唐安江原書。

又

冠蓋長安幾番新。放翁只似向來貧。滿窗紅日價無敵。半榼新醅香動人。宴坐心光無蔽障。橫眠踵息自清勻。世間不用詢名字。身是無懷上古民。

連日大寒夜坐復苦飢戲作短歌

翁飢不能具小殮。兒凍何由成複裨。藏書充棟讀至老。固願少出蘇黎元。念常萬事度可否。肯使一恨彌乾坤。古來賢達少晚謬。千載遺笑綺與園。老翁肝心等鐵石。他年骨朽此固存。村沽雖薄亦取醉。起看江月傾金盆。

園中對酒作

僵僂衰翁雪滿顛。愛花耽酒似當年。雖無錦障七十里。也有青銅三百錢。數掩竹籬分小徑。一泓沙井貯寒泉。栽紅接白株株活。坐擁春工太半權。

孝宗皇帝挽詞

陸放翁集 劍南詩稿 卷三十一

七

(二二九七)

大道本生知。崇高志不移。凝神超事物。觀妙極希夷。訪藥三山遠。遺弓萬國悲。神孫昔鍾愛。天作太平基。

又

代邸膺圖日。臨朝涕泗橫。誠心非外飾。至孝化羣生。高廟聯龍袞。思陵接柏城。平生奉親意。一理貫幽明。

又

便殿諮詢早。深宮宴樂稀。欲頒傳位詔。猶索未明衣。壽損名方永。身羸國愈肥。孤臣泣陵柏。心折九虞歸。

小兒入城

小兒破帽出求師。老父寒爐夜畫詩。不耐青燈寫孤影。聊呼薄酒慰長飢。我今僅守詩書業。汝勿輕捐少壯時。但恨北風如許惡。湖橋歸路想流澌。

夜坐

萬蠹披書卷。孤螢引篆香。病思無事樂。老悔少年狂。南渡衣冠盛。西征道路長。如今俱夢破。高枕看人忙。

又

葉盡木無聲。天高夜自明。映窗燈半滅。掠野雁孤征。瓦裂人間事。雲浮身後名。惟應托長鏡。寂寞送浮生。

縱筆

惰游不能耕。心媿新春白。獻傲茅三間。主人終勝客。

又

朝士腰下黃。山僧鼻端白。放翁俱笑汝。飽飯作閑客。

又
溫溫地爐紅。皎皎紙窗白。忽聞啄木聲。疑是敲門客。

又
雪晴蓼甲紅。雨足韭頭白。雖無萬錢具。野飯可留客。

又
小兒勿大勤。使汝髮早白。長爲南畝民。殊勝東閣客。

郊行夜歸書觸目

老翁病起厭端居。隨意東西不問途。霜野草枯鷹欲下。江天雲溼雁相呼。空垣破竈逃租屋。青帽紅燈賣酒爐。未畏還家踏泥燎。園丁持炬小兒扶。

閉戶

老人閉戶動經月。嬾就東家借蹇驢。身後有名豈如酒。體中不佳聊讀書。秦王開圖見匕首。漢相徇市載廚車。人間憂怖古如此。莫怪荒畦常荷鋤。

十一月五日夜半偶作

草徑江村人迹絕。白頭病臥一書生。窗間月出見梅影。枕上酒醒聞雁聲。寂寞已甘千古笑。馳驅猶望兩河平。後生誰記當年事。淚濺龍牀請北征。

晴和出遊湖山間

日出氣稍和。呼船渡煙津。微風西南來。水面生魚鱗。適此一日佳。聊娛百年身。捋鬚俯船舷。一笑彼何人。聞餘春事早已覺。陽和新梅花處處開。幽香襲衣巾。久病喜我出。問訊傾鄉鄰。舟回不須速。看涌白玉輪。病思

賣劍還山學老農。不堪衰與病交攻。將軍閉戶方鋤菜。處士攜家欲負舂。殘齒彊留終脆脆。病腰扶拜苦龍鍾。壯遊誰信梁州日。大雪登城望夕烽。

寄子虛

老自安故鄉。况復觸罪罟。五年三奉祠。每請幸聽許。貧家似破屋。隨事且撐拄。雖殊乞墦肉。已近掘野鼠。平生膽力薄。不敢犯張禹。有時一言失。恐懼氣如縷。念此思挂冠。白首冀安處。吾兒哀乃翁。歲暮忍羈旅。何時得斗粟。歸舍聊共煮。使草北關書。乞骸歸卒伍。

紙閣午睡

紙閣甌爐火一炊。斷香欲出礙蒲簾。放翁不管人間事。睡味無窮似蜜甜。

又

黃紬被煖青氈穩。紙閣油窗晚更妍。一飽無營睡終日。自疑身在結繩前。

夜分復起讀書

愁極不成寐。起開窗下書。似囚逢縱釋。如癢得爬梳。燈火夜過半。風霜歲欲除。平生濟時意。卻作愛吾廬。效蜀人煎茶戲作長句

午枕初回夢蝶牀。紅絲小磴破旗槍。正須山石龍頭鼎。一試風爐蟹眼湯。巖電已能開倦眼。春雷不許殷枯腸。飯囊酒瓮紛紛是。誰賞蒙山紫筍香。

書逆旅壁

百憂襲暮年。懷抱日騷屑。雖云歸故鄉。何異萬里客。窮冬迫寒餓。凜有在陳厄。駕言適近村。慘慘天欲雪。人沽村市酒。馬鬣山坡麥。旅炊雜沙土。得飽何暇擇。手戰若龜兆。面槁無人色。士窮自其分。所幸全大節。功名已甌墮。身世真瓦裂。不學玉關人。飢鷹方夜掣。

嬾趣

謝病掩柴荆。年來嬾趣成。舌根茶味永。鼻觀酒香清。已矣馳驅息。悠然磊砢平。高眠得三昧。夢斷已窗明。

閑中富貴

要信人生各有緣。閑中富貴亦關天。綠窗靜對千梢竹。翠竇新疏一脈泉。愛百衲琴常鎖匣。買雙鉤帖不論錢。箇中得意君知否。不換金貂與玉蟬。

又

天爲疎慵剌與閑。一菴青嶂白雲間。衲僧過別歸廬阜。羽客來尋說華山。冬筍生林龍鱗鱗。寒泉落磻珮。珊瑚俗人自是無。因到。雖設柴門不上關。

書近況寄蜀中道舊

遺事復遺榮。空齋一榻橫。宿醒投未正。新句煖初成。山崦傳梅信。天窗送雪聲。戲題勻碧紙。遣鶴報青城。

醉中自贈

富貴猶宜早退休。一生齟齬更何求。賦形未至欠壬甲。語命寧須增斗牛。粟里收身貧亦樂。平陵埋骨死無憂。狂歌醉舞真當勉。剩折梅花插滿頭。

明日自和

二頃元知未易求。不如馬磨學文休。正令未死有幾日。那得殘年叢百憂。霜野挾弓朝射雁。煙陂吹笛暮呼牛。興來醉倒尋常事。莫信兒童笑白頭。

雪中至近村

荒山風雪歲將殘。貸粟迢迢犯苦寒。急燎征裘憩牛屋。旋沽村酒挂驢鞍。清貧徹骨初無憾。老健逢人彊自寬。深夜還家未能睡。解囊吹火取詩看。

歲暮感懷以餘年諒無幾休日愴已迫爲韻

昨暮送客歸。短櫂過魯墟。故廬有遺趾。青山遠牆隅。桑竹雖鬱然。舊植已無餘。瓦礫不可求。而況屋壁書。繁舟問鄰人。搔首久躊躇。行當挂朝衣。躬耕返吾初。

又

我家釋耒起。遠自東封前。詩書守素業。蟬聯二百年。長老日零落。念之心惕然。每恐後生輩。或爲利欲遷。我少亦知學。踳躅及華顛。訟過豈不力。壽非金石堅。

又

我壯已早衰。晨鏡每惆悵。藥物姑自持。耆老曷敢望。造物有乘除。貧悴博無恙。歸鄉更多感。朋舊盡凋喪。客來多避席。謂我丈人行。此意詎不忘。報子以直諒。

又

士生始志學。固爲聖人徒。人人可稷卨。世世皆唐虞。仰事與俯育。治道無絕殊。孔孟之所傳。世俗顧謂迂。申韓尙刻薄。老莊競虛無。爾車非不良。盍行九軌途。

又

江左謝太傅。高臥頗自喜。東山豈不佳。惜也終一起。阿堅偶自敗。元子亦適死。區區疑謗中。勳業端有幾。當時嘲小草。雖戲實中理。所以山中人。至今笑園綺。

又

家世本無年。甲子近一周。小子獨何幸。七十今平頭。往者收朝迹。亟欲求歸休。厚恩許奉祠。得祿歲愈憂。三釜不及親。顧爲妻子留。何由洗此媿。欲挽天河流。

又

高皇昔中興。風雨躬沐櫛。一士未嘗遺。萬里皆馳驅。廉聽關言路。虛懷詢得失。孤臣實草芥。亦獲對宣室。龍顏宛在目。德不報萬一。橋山松柏寒。淚盡史臣筆。

又

王師宿梁益。行臺護諸將。腐儒忝辟書。萬里至渭上。旌旗照關路。風雪暗戎帳。堂堂鐵馬陣。疊疊木牛餉。

誰知骨相薄。空負心膽壯。回首二十年。撫事增悲愴。

又

在昔祖宗時。風俗極粹美。人材兼南北。議論忘彼此。誰令各植黨。更仆而迭起。中更夷狄禍。此風猶未已。臣不難負君。生者固賣死。儻築太平基。請自厚俗始。

又

井地以養民。整整若棋畫。初無甚貧富。家有五畝宅。哀哉古益遠。禍始開阡陌。富豪役千奴。貧老無寸帛。困窮禮義廢。盜賊起蹙迫。誰能講古制。壽我太平脈。

桐江哲上人。以端硯遺子。聿纔寸餘。而質甚奇。天將雨。輒先流泚。予爲效宛陵先生體作詩一首。吾兒得巖硯。其徑甫踰寸。奇哉掌握物。乃有琮璧潤。器寶備才德。初不以形論。汝能忘山林。懷之可嘉遜。

立春前三日作

春近寒尤苦。先生不下堂。烏皮蒙燕几。白拂挂禪牀。書架斜斜設。梅花細細香。悠然睡還起。已覺日微長。

贈應秀才

過宋不見元城公。渡淮不見陳了翁。當時人人皆太息。自今海內傾高風。老夫七十居鄉縣。齷齪龍鍾何足見。辱君雪裏來叩門。自說辛勤求識面。我得茶山一轉語。文章切忌參死句。知君此外無他求。有求寧踏三山路。

春耕

今年液水滿西疇。父老人人有秋。只要耕犁及時節。裹茶買餅去租牛。

首春連陰

入春十日九日陰。積雪未解雨復霏。西家船漏湖水漲。東家驢病街泥深。去秋宿麥不入土。今年米貴如黃金。老嫗哭子那可聽。僵死不覆黔婁衾。州家遣騎餽春酒。欲飲復止吾何心。出門空歎歲華速。已見微綠生高林。

夜坐

衰翁不出門。歲月過電雹。窗明地爐煖。袖手坐寂寞。可憐瓶中梅。爛漫幾開落。小園亦數樹。曾未破一萼。三更北風急。雨雪恐復作。且當勤舉杯。莫恨浮蟻濁。

新春

老境三年病。新元十日陰。疎籬枯蔓綴。壞壁綠苔侵。憂國孤臣淚。平胡壯士心。吾非兒女輩。肯賦白頭吟。

得季長書追懷南鄭幕府慨然有作

從戎昔在山南日。彊半春光醉裏銷。綠樹啼鶯窺帽影。畫橋飛絮逐鞭梢。花經小雨開差晚。笙怯餘寒澀未調。惆悵流年又如許。羈魂欲仗楚詞招。

正月十一日夜夢與亡友譚德稱相遇於成都小東門外既覺慨然有作

當年與子別江干。漸老心知後會難。豈料今宵清夢裏。東門交轡說春寒。

送陳吏部還朝

邂逅稽山許攬鬚。塵埃時得近冰壺。不辭我老雞豚社。且喜公歸櫻筍廚。滿室琴書懷燕几。一川風雨送行艫。勉哉早了功名債。要畫騎牛第二圖。先賢良與劉凝之。有廬山騎牛圖。

觀棋

一枰翻覆戰枯棋。慶弔相尋喜復悲。失馬翁言良可信。牧豬奴戲未妨爲。白蛇斷處真成快。黑幟空時又一奇。斂付兩奩茶對酒。泠泠聽我誦新詩。

春行

簞帽絲絲雨。芒鞋策策泥。柳斜風帶北。花斂日平西。社酒誇新壓。春蕪喜遍犁。深村無客過。父子自扶攜。

雨霽春色粲然喜而有賦

應接年光老漸慵。猶能一飲百分空。半霑蝶粉簾櫳雨。遠送鶯聲巷陌風。千縷麴塵楊柳綠。萬枝猩血海棠紅。從來造物陶甄手。卻在閑人詩句中。

幽思

雲際茅茨一兩間。春來幽事日相關。臨窗靜試下巖硯。欹枕臥看靈壁山。紅練帶飛俱意得。錦熏籠煖尚香慳。錦熏籠謂瑞香。今朝社過添惆悵。高棟巢空燕未還。

贈持鉢道人

青鐵作小冠。白紵縫短褐。右扶九節杖。左執七綴鉢。何嘗有定止。到處可生活。惟有烈士心。白刃不能奪。相逢一笑粲。滯思得披豁。揮袂去若飛。跂望已天末。

柳

楊柳春風綠萬條。憑鞍一望已魂消。當年鳳集城邊路。曾愛纖纖拂畫橋。

又

西園雨打杏花稀。使面章臺事已非。只恐無情堤上柳。又將風絮送春歸。

山園雜詠

祠祿留人未挂冠。山園三畝著身寬。百年竟向愁邊老。萬事元輸靜處看。花徑糝紅供晚醉。月天生暈作春寒。汗青事業都忘盡。時賴吾兒舉話端。

又

殘春終日在林亭。散髮披衣醉復醒。科斗已成蛙閣閣。櫻桃初結子青青。魚遊滄海寧濡沫。禽慕雕籠即翦翎。簿晚東風吹小雨。笑攜長鏡伴畦丁。

又

桃花爛熳杏花稀。春色撩人不忍違。俗客年來真掃迹。清樽日暮獨忘歸。魚行池面紅雲散。鵲起枝頭綠雪飛。莫道顛狂無訴處。臥看香篆掩齋扉。

又

已過社雨尙春寒。小醉初醒怯依欄。柳帶花移宜土潤。鶴和雛養要籠寬。孤翁白首投村社。諸彥青雲接羽翰。誰信幽居多樂事。晚窗兒女話團圓。

又

春光何止二分空。寒食都無數日中。密葉成陰花寂寂。舊巢添土燕匆匆。紙鷲收線愁風惡。秧馬掀泥喜雨濛。堪歎今年衰更甚。蒼顏縱醉不成紅。

陸放翁集

劍南詩稿

卷第三十二

雨夜書感

宦遊四十年，歸逐桑榆暖。皇恩念黎老，一官猶置散。春殘桃李盡，風雨閉空館。有懷無與陳，萬事付酒碗。近代固多賢，吾意終不滿。可憐杜拾遺，冒死明房瑄。慷慨詎非奇，經綸恨才短。羣胡穴中原，令人歎微管。

又

儒生不自貴，執藝等卜祝。詩書定何物，爲汝市爵祿。唐虞雖日遠，凜凜猶在目。誰能舉其要，治功端可復。平生纔知此，俛仰髮已禿。一豪不獲施，老病死巖谷。安知萬世後，終無可封俗。願廣稽古心，端拱咨嶽牧。

鏡湖

躬耕蘄一飽，閱閱望有年。水旱適繼作，斗米幾千錢。鏡湖洑已久，造禍初非天。孰能求其故，遺迹猶隱然。增卑以爲高，培薄使之堅。坐復千載利，名託亡窮傳。民愚不能知，仕者苟目前。吾言固應棄，悄愴夜不眠。

舟中戲書

平生萬事付之天，百折猶能氣浩然。試問軟塵金絡馬，何如柔艣月侵船。英雄到底是癡絕，富貴但能妨醉眠。三百里湖隨意住，人間真有地行仙。

春晚懷山南

梨花堆雪柳吹絲。常記梁州古驛前。二十四年成昨夢。每逢春晚即悽然。

又

壯歲從戎不憶家。梁州裘馬鬪豪華。至今夜夜尋春夢。猶在吳園藉落花。

又

梁州一別幾清明。常憶西郊信馬行。桃李成塵總閑事。梨花楊柳最關情。

又

身寄江湖兩鬢霜。金鞭朱彈夢猶狂。遙知南鄭城西路。月與梨花共斷腸。

春晚書齋壁

海棠已成雪。桃李不足言。纖纖麥被野。鬱鬱桑連村。穉蠶細如螳。杜宇號朝昏。展幕秣餌美。坐社黍酒渾。早筍漸上市。青韭初出園。老夫下箸喜。盡屏雞與豚。幽居亦何樂。且洗兩耳喧。呼兒燒柏子。悠然坐東軒。

七十一翁吟

七十一翁心事闌。坐叨祠祿養衰殘。樽中無酒但清坐。架上有書猶縱觀。吏部齒搖心悵望。將軍髀滿淚汎瀾。客來共飯增羞澀。小摘山蔬不揜槃。

山茶一樹自冬至清明後著花不已

東園三日雨兼風。桃李飄零掃地空。惟有山茶偏耐久。綠叢又放數枝紅。

晨起

初日破蒼煙，零亂松竹影。老夫起燒香，童子行汲井。平生水雲身，不墮車馬境。願言學龐公，全家事幽屏。

春晚雜興

寂寂野人家，柴扉傍水斜。僧分晨鉢筍，客共午甌茶。燕戶添新土，蛛絲罨落花。悠然便終日，惟此送年華。

又

澤國固多雨，暮春猶薄寒。兒童葺茶舍，婦女賽蠶官。閱世年雖往，爲農興未闌。窮途得一飽，亦足慰艱難。

又

池面萍初紫，牆頭杏已青。攜兒撐小艇，留客坐孤亭。相法無侯骨，生年直酒星。正須遺萬事，莫遣片時醒。

又

小市湖橋北，幽居石埭西。蒲深姑惡哭，樹密穉歸啼。山茗封青箬，村醪坼赤泥。平生汗簡手，投老慣扶犁。

又

病瘍無意緒，閉戶作生涯。草草半盂飯，悠悠一盃茶。笑穿居士屨，閑看女郎花。唐人謂辛夷爲女郎花，園中有此花，一叢二百朵，莫問明朝事，忘家卽出家。

又

青梅薦煮酒，綠樹變鳴禽。處世已如客，傷春無復心。焚香惟默坐，曳杖亦幽尋。一日悠然過，深慚惜寸陰。

齋中雜題

陸放翁集 劍南詩稿 卷三十二

三

(一三二一)

列屋娥眉不足誇。可齋別自是生涯。閑將西蜀團窠錦。自背南唐落墨花。

又

小醉微吟過一春。人間儂是最閑人。龜毛拂子長三尺。拈起風光處處新。

又

槩几硯涵鸚鵡眼。古奩香斲鷓鴣斑。絕知造物慙懃意。成就衰翁到死閑。

又

幽居厭見凡花草。紅紫紛紛不復栽。自斲蒼苔換黃土。南山移得玉芝來。窗外新移雲門玉芝一本甚茂。

老疾戲自贈

年過七十日夜衰。羸然骨立不支持。一身百病作無時。飯且不足那論醫。鏡中之人定是誰。面骨突兀鬢成絲。買棺作冢計已遲。一旦寧免累諸兒。門前湖山可遨嬉。心雖欲往力不隨。左車牙脫吁可悲。問汝何不食肉糜。

夜坐聞湖中漁歌

少年嗜書竭目力。老去觀書澀如棘。短檠油盡固自佳。坐守一窗如漆黑。漁家鼻鼻起三更。哀而不怨非凡聲。明星已高聲未已。疑是湖中隱君子。

上巳書事

單衣初著下湖天。飛蓋相隨出郭船。得雨人人喜秧信。祈蠶戶戶斂神錢。黃雞煮臠無停筯。青韭淹菹欲

墮涎丞相傳聞又三押。衝茅未改日高眠。

對酒

手摘醱醲翦牡丹。山家草草亦杯盤。溪頭一夜風吹雨。又作殘春幾日寒。

自規

陸君拙自謀。七十猶糲食。著書雖如山。身不一錢直。默自觀我生。困弱良得力。轉喉畏或觸。睡面敢自拭。世路方未夷。機穽寧有極。但能常閉門。尊拳貸雞肋。

窮居有感

孤村煙草暮淒迷。笠子蓑衣自架犁。生計似蛛聊補網。弊廬如燕旋添泥。人亡耆舊多時學。地廢陂湖失古隄。迂闊自知無著處。敢因窮厄怨推擠。

春夏之交風日清美欣然有賦

日鑄珍芽開小缶。銀波煮酒湛華觴。槐陰漸長簾櫳暗。梅子初嘗齒頰香。戶戶祈蠶喧鼓笛。村村乘雨築陂塘。年光何預衰翁事。伴蝶隨鶯也解狂。

又

天遣殘年脫鬢鞮。功名不恨與心違。綠陂細雨移秧罷。朱舫斜陽擘紙歸。花市丹青賣團扇。象牀刀尺製單衣。白頭曳杖人爭看。共歎浮生七十稀。

又

芳潤園林不似貧。年光無盡逐番新。來禽顏色不禁雨。搏黍語言如惜春。身外豈關吾輩事。鏡中已換昔時人。神仙定未超塵俗。猶插金貂侍帝晨。

夜歸

疎鐘渡水來。素月依林上。煙火認茅廬。故倚船篷望。

農家歎

有山皆種麥。有水皆種稻。牛領瘡見骨。叱叱猶夜耕。竭力事本業。所願樂太平。門前誰剝啄。縣吏徵租聲。一身入縣庭。日夜窮笞撻。人孰不憚死。自計無由生。還家欲具說。恐傷父母情。老人儻得食。妻子鴻毛輕。

三月十一日郊行

到處人家可乞漿。槐陰巷陌午風涼。水陂漫漫新秧綠。山壠離離大麥黃。父子力耕春漸老。婦姑共績夜猶長。堯民擊壤雖難繼。芹美懷君未敢忘。

初夏行平水道中

老去人間樂事稀。一年容易又春歸。市橋壓擔蓴絲滑。村店堆盤豆莢肥。傍水風林鶯語語。滿原煙草蝶飛飛。郊行已覺侵微暑。小立桐陰換夾衣。

初夏幽居偶題

放逐還家一老翁。癡頑自笑更誰同。倚欄風月黃昏後。攜杖園林綠潤中。泳水小魚依藻荇。覓巢輕燕拂簾櫳。此身要豈堅牢物。莫遣須臾酒盞空。

又

展盡高槐日漸長。了無蜂蝶爲花忙。青梅旋摘宜鹽白。煮酒初嘗帶臘香。林下光陰無一事。水邊窗戶有餘涼。應門不用辭衰疾。車馬何由到野堂。

又

昔如轉戰墮重圍。今幸騫翔脫駭機。曉樹好風鶯獨語。夜窗細雨燕相依。安居不恨蝸廬迮。得食寧論鶴料微。更喜暮年彊健在。又看刀尺製縑衣。

又

朱櫻羊酪喜新舊。碧井桐陰轉午涼。書几得晴宜試墨。衣篝因潤稱熏香。枯龜自覺支牀穩。老馬安能試草長。半世學騷終不近。空餘清夢上沅湘。

晨起

青青水中萍。粲粲牆下草。開歲纔幾時。已歎春事老。鳴禽傍窗戶。怪我倦幽討。長吟感人懷。病枕起亦早。下牀呼獠奴。浩蕩恣灑掃。綠陰列蒼石。芳樽得頻倒。客來但與飲。談天有何好。亦莫雕肺肝。吟哦學郊島。

小圃

剡曲西邊築草堂。小園聊復寄相羊。魚行水際汀蘋動。麝過林中野草香。覓句有時攜筆硯。遺懷隨事具杯觴。少年朋舊凋零盡。不獨思人亦自傷。

幽居

青門不種故侯瓜。揀得湖山便寄家。老境一塵依水竹。壯遊萬里犯風沙。氣衰那辦飲無算。病著更知生有涯。莫道吾廬全索寞。牆東新補數株花。

夜賦

小齋寂寂似禪寮。臥數更籌覺夜遙。帳外殘燈欺不寐。梁間棲燕伴無聊。江湖蹭蹬朱顏改。憂患侵凌壯志消。挂旆天山少年事。此身終負聖明朝。

閑中書事

病過新年逐日添。清愁殘醉兩厭厭。惜花萎去常遮日。待燕歸來始下簾。堂上清風生玉塵。澗中寒溜注銅蟾。一生留滯君休歎。意望天公本自廉。

又

一畝山園半畝池。流年忽逮挂冠期。賣花醉叟剝紅桂。種藥高僧寄玉芝。午枕爲兒哦舊句。晚窗留客算殘棋。登庸策免多新報。老子癡頑總不知。

初夏

紛紛紅紫已成塵。布穀聲中夏令新。夾路桑麻行不盡。始知身是太平人。

又

翦韭醃薑粟作漿。新炊麥飯滿村香。先生醉後騎黃犢。北陌東阡看戲場。

又

稻未分秧麥已秋。豚蹄不用祝甌窶。老翁七十猶彊健。沒膝春泥夜叱牛。

又

買得新船疾似飛。蠶飢遙望采桑歸。越羅蜀錦吾何用。且備幽人卒歲衣。

又

槐柳成陰雨洗塵。櫻桃乳酪併嘗新。古來江左多佳句。夏淺勝春最可人。夏淺卻勝春。徐陵詩也。

又

杜鵑血盡啼未歇。蝴蝶夢殘心更狂。我自人間少情者。老來十倍惜年光。

又

賜食金盤出寶闈。玄熊掌映紫駝蹄。侯家但詫承恩澤。豈識山廚苦蕘藟。

又

隋家古寺郡西南。寺廢殘僧只二三。藜藿滿庭塵闍佛。時聞鐃鼓賽春蠶。

又

渺渺荒陂古埭東。柳姑小廟柳陰中。放翁老憊扶藜杖。也逐鄉人禱歲豐。

又

老翁賣卜古城隅。兼寫宜蠶保麥符。日日得錢惟買酒。不愁醉倒有兒扶。

四月旦作時立夏已十餘日

京塵相值各匆忙。誰信閑人日月長。爭葉蠶飢鬧風雨。趁虛茶嬾鬪旗槍。林中晚筍供廚美。庭下新桐覆井涼。堪笑山家太早計。已陳竹几與藤牀。

春夏之交鳴鳥百族惟布穀聲最悲急動人戲作十韻

春風捨人去。陸子歎以驚。欲挽春使回。無奈布穀聲。春亦何負汝。且暮聲不停。或謂布穀者。一氣感使鳴。春老自當去。微禽彼何情。上天運四時。斗柄亦崢嶸。奈何獨私春。欲使久不傾。南風吹衆綠。一掃紫與頰。此時豈不佳。乃爾懷不平。勿作兒女態。起視東郊耕。

倚杖

倚杖柴門外。踟躕到日斜。兒童拾笱籜。婦女賣茶芽。掠岸過漁艇。隔離聞緯車。年來詩料別。滿眼是桑麻。

野步

蝶舞蔬畦晚。鳩鳴麥野晴。就陰時小息。尋徑復微行。村婦窺籬看。山翁拂席迎。市朝那有此。一笑慰餘生。

竹窗晝眠

初夏暑雨薄。但覺白日長。向來萬里心。盡付一竹牀。新筍出林表。森然羽林槍。時聞解籜聲。靈府生清涼。平生喜晝眠。此志晚乃償。安枕了無夢。孰爲蝶與莊。徐起掬寒泉。中有菱絲香。清歡送落日。與世永相忘。

騰騰

騰騰吾喪我。兀兀我忘吾。萬事皆墮甑。一身真朽株。江天號鶴鶴。村巷暗楸梧。薄酒猶堪醉。歸來稚子扶。

幽棲

閑人了無事。地僻稱幽栖。肺米留雞食。移琴避燕泥。桐生窗欲暗。筍長徑還迷。不作容車計。門閭儘放低。

又

誰謂幽棲陋。茅茨足庇牀。雨便梧葉大。風度練花香。浴佛兒童喜。繅絲婦女忙。竭來三十載。吾鬢固宜霜。

乾道丙戌。始卜居鏡湖之三山。今甫三十年矣。

睡起

虛堂四簷竹。脩脩朱夏正。午如高秋。八尺風漪雲碧凋。一榻寬如禹九州。屈信展轉俱自由。息以兩踵無與喉。世方窘若魚吞鈎。我獨超然鷹脫鞵。一物不向靈臺留。非睡非覺以神遊。青城紫閣多朋儔。相逢握手笑不休。

愁坐忽思南鄭小益之間

當年蜀道秦關。萬里飄然往還。酒病曾留西縣。眼明初見南山。

又

籌筆門前芳草。回龍道上青山。萬里猶能夢到。再遊未信天慳。

四月十三夜四更起讀書

七十未捐書。正恐死乃息。起挑窗下燈。度此風雨夕。

夏雨初霽題齋壁

楸花練花照眼明。幽人浴罷葛衣輕。燕低去地不盈尺。鵲喜傍簷時數聲。對奕軒窗消永晝。曬絲院落落喜

新晴忽驚重五無多日。采縷纏筒弔屈平。

東窗

萱草石榴相續開。數枝晚筍破蒼苔。背人紅練穿林去。直是無情不再來。

聞梟

兩忘堯桀自心平。此念胡爲掃復生。幸是安眠無一事。苦憐鶯語惡梟聲。

雨中示子聿

窮閭父子自相依。寂寂茅廬映竹扉。瓜蔓水生初抹岸。練花寒動卻添衣。吾玄自笑豈尙白。汝瘦元知能勝肥。苦學勿爲干祿計。宦途雖樂不如歸。

山園屢種楊梅皆不成。枇杷一株獨結實。可愛戲作長句。

楊梅空有樹團團。卻是枇杷解滿盤。難學權門堆火齊。且從分子拾金丸。枝頭不怕風搖落。地上惟憂鳥啄殘。清曉呼僮乘露摘。任教半熟雜甘酸。枇杷盡熟時。鴉鳥不可復禦。故熟七八分則取之。

夢遊山寺焚香煮茗甚適。既覺悵然以詩記之。

平日居山恨不深。暫來差足慰幽尋。僧歸共說道逢虎。院靜惟聞風滿林。毫盞雪濤驅滯思。篆盤雲縷洗塵襟。此行殊勝邯鄲客。數刻清閑直萬金。

夏日

柴扉晝掩竹林幽。坐使炎天變素秋。扇月團團似秋滿。簟波細細欲平流。朋儕零落關河阻。疾病沉綿歲

月道。賴有澄湖常在眼。虎頭不用畫滄洲。

巢山

巢山避世紛身隱。萬重雲。半谷傳樵響。中林過鹿羣。蟲蝨葉成冢。風蹙水生紋。不蹋溪橋路。仙凡自此分。

又

短髮巢山客。人知姓字誰。穿林雙不借。取水一軍持。渴鹿羣窺澗。驚猿獨鼻枝。何曾畜筆硯。景物自成詩。

四月二十三日作

颭颭荷離水。翩翩燕出巢。苔添雨後暈。筍放露中梢。世路千重浪。生涯一把茅。欸門僧亦絕。無句鍊推敲。

又

莫笑茅廬迢。何曾厭日長。飯餘殮酪滑。浴罷葛巾涼。落日桐陰轉。微風梔子香。貧家猶裹粽。隨事答年光。

觀月

清風發疎林。皎月上素壁。悠然倚庭楯。愛此風月夕。人間好時節。俯仰成宿昔。少年不痛飲。老大空歎息。

溽暑

溽暑雨將作。南風來解圍。幽花臨砌坼。乳燕傍巢飛。腰斧剝桑去。攜籃采藥歸。翻憐少年老。疊雪詫宮衣。

晨起

衰老少睡眠。睡晚覺常早。五更攬衣起。漏鼓猶考考。青燈耿孤影。不睡坐亦好。讀盡一編書。南窗朝日杲。

閑思

陸放翁集

劍南詩稿 卷三十二

一三

(一三二)

溝水細無聲。窗扉晚更明。簾開燕雙入。人靜鶻羣行。青李求初至。黃醅釀已成。出門無奈嬾。不是傲公卿。

又

小雨時時作。幽花續續紅。新蟬落庭樹。癡燕集屏風。傍枕拋書卷。臨池下釣筒。閑中有真樂。那得歎途窮。

梅天

稻壠移初遍。梅天澀未晴。輕陰昏茗色。餘潤咽琴聲。時傍菱塘立。還尋沙徑行。杜門終此世。更誓未來生。

夜坐

燈暗一室幽。鳥鳴四山靜。道人坐倚壁。度此清夜永。少時志功名。癡絕如捕影。造物遺以窮。磨礪發深省。

坐令盆盎淺。渺渺波萬頃。雖未造道真。南轅終至郢。

麥熟市米價減。鄰里病者亦皆愈。欣然有賦。

凶年已度麥方秋。學道從來幸寡求。荷鋤自隨身若寄。漉籬可賣飯何憂。鄰翁瀕死復相見。村市小涼時獨遊。不怕歸時又侵夜。新添略約跨溝溝。

雨中作

風聲如翻濤。雨點如撒菽。皇天念此老。一爲洗煩促。呼童取短檠。聊展舊書讀。悽然對孤影。感歎衰鬢禿。兀如老病馬。關河久在目。伏櫪雖已疲。連雲思苜蓿。

夜雨

齒牙搖動鬢毛疎。四壁蕭然臥草廬。急雨聲酣戰叢竹。孤燈焰短伴殘書。壯心未減從戎日。苦學猶如覓

舉初自笑堅頑誰得似。同儕大半已丘墟。

乙卯重五

重五山村好。榴花忽已繁。粽包分兩髻。艾束著危冠。舊俗方儲藥。羸軀亦點丹。日斜吾事畢。一笑向杯盤。

夏夜風雨極涼枕上口占

北窗八尺臥文藤。夜雨生涼洗鬱蒸。鼻鼻清愁縈斷角。悠悠孤夢伴殘燈。羸軀垂老嗟焉往。公論猶存似可憑。聊向斯文圖不朽。未甘粥飯學山僧。

窮居

半世偃偃信所之。窮居仍抱暮年悲。燒金術誤囊衣薄。種黍年凶酒味醜。大廈萬間空有志。後車千乘更無期。掩書常笑城南杜。麻屨還朝授拾遺。

思蜀

白首躬耕遇海饑。江南自笑欲疇依。凌煙勳業無人許。濯錦園林有夢歸。心似遊僧思遠適。身如敗將陷重圍。客來彊欲相寬釋。每說人生七十稀。

五月二十三夜記夢

夜漏欲盡鷄初唱。夢到神仙信非妄。泉流直舂碧澗底。松根橫走蒼崖上。徐行林際遇飛橋。峭壁驚濤臨萬丈。非惟履嶮足蹉跎。已覺處幽神悄悄。空巖滴乳久化石。寶蓋珠璣紛物象。鬼神慘澹疑欲搏。龍蜃蜿蜒誰敢傍。長眉老仙乘白雲。握手授我綠玉杖。三生汝有世外緣。一念已斷塵中障。雖云曩事不復憶。憐

汝瞳子神猶王。何須更待熟金丹。從我歸哉住崑閬。

送葉尙書

曩歲榜扁舟。萬里歸自蜀。五月下瞿唐。六月過浮玉。於時始識公。一笑忘暑毒。羽扇臨清流。華觴跋紅燭。一別十五年。去日如電速。孤生晚還朝。斂退慚陸陸。要津非所冀。見公心自足。斥歸又七載。衰病將就木。造物哀其窮。公來位嶽牧。每見語諄諄。與世異寒燠。聖朝方急賢。登用及釣築。如公實舊德。願豈待夢卜。初聞一札下。已報四輩趣。懸知新天子。虛懷須啓沃。願公論其大。始爲天下福。即宜垂拱麻。寧復摛文宿。

路傍曲

冷飯雜沙礫。短褐蒙霜露。黃葉滿山郵。行人跨驢去。

又

大道南北出。車輪無停日。彼豈皆奇才。我獨飢至夕。

又

淒涼路傍曲。朱門人不知。秋街槐葉落。正是斷腸時。

贈汪叔潛

火雲嵯峨如疊嶂。百病攻衰非一狀。低簷小屋桑竹村。忽辱君來問亡恙。蹶然攬衣起闔門。裹飯仍煩遠相餉。歲饑野外無供給。羞澀餘糧不盈盎。我守此窮三十年。尙恐死前無力量。君誠不以老棄予。苦語見規宜勿讓。

出遊

莫笑衰殘百不能。一枝筇杖捷飛騰。山空野火焚秦冢。日澹煙蕪遍禹陵。小浦漲潮迎釣艇。疎鐘出谷送行僧。踟躕不覺歸途晚。村落人家已上燈。

此页空白

陸放翁集

劍南詩稿

卷第三十三

立秋後四日雨

天爲新秋故作涼。海風吹雨入虛堂。涼生庭樹陰陰綠。潤襲箬衣泥泥香。杯泛鵝兒供小歡。碓舂雲子喜新嘗。一年又見星橋近。未信仙家日月長。

夙興

老眼無眠覺夜長。攬衣不復待窗光。明星漸淡避初日。秋露已濃生曉涼。出草幽花紅紫雜。穿林啼鳥去來忙。是中有趣君知否。喧寂年來已兩忘。

存養堂爲汪叔潛作

絳帳先生見處別。少年立節如冰雪。胸中凜凜萬卷書。一字不爲庸人說。存心養性以事天。人知不知渠晏然。窮經日夜廢寢飯。不怕諸生嘲腹便。三旌五鼎俱忘想。致一工夫在存養。我今老病死卽休。未死尙欲從公講。

感昔

三著朝冠入上都。黃封頻醉渴相如。馬慵立仗寧辭斥。蘭偶當門敢怨鋤。富貴尙思還此笏。衰殘故合愛

吾廬燈前目力依然在。且盡山房萬卷書。

又

五丈原頭秋色新。當時許國欲忘身。長安之西過萬里。北斗以南惟一人。往事已如遼海鶴。餘年空羨葛天民。腰間白羽凋零盡。卻照清溪整角巾。

病稍平示兒輩

人與鴉俱曉。天憑雁送秋。極知生意盡。彊爲汝曹留。藥餌傾殘橐。風霜迫故裘。倚屏搔短髮。且復寄悠悠。

野堂

野堂蕭颯雪侵冠。歷盡人間行路難。病馬不收煙草暝。孤桐半落井牀寒。長瓶濁酒猶堪醉。敗篋殘編更細看。此興不隨年共老。未容城角動憂端。

又

姓名無復世人聞。靜處何妨獨策勳。久矣不堪東閣客。歸哉無媿北山文。橫林霜近有丹葉。平野雨餘多斷雲。更喜鷓鴣來漸熟。一溪煙水與中分。

又

野堂地僻無車馬。草徑柴門晝亦扃。栗里雖貧儲舊粟。玉川終老抱遺經。病身凜凜殘秋葉。故友寥寥欲旦星。賴有吾兒堪暖眼。夜闌常共一燈青。

又

鼓缶酣歌樂太平。野堂窗戶極疎明。棄官正爲愚無用。謝客新緣病有名。閑入鄉人賽神社。時從長者放魚行。驩然要有關心處。打稻家家趁晚晴。

七月下旬得疾不能出戶者十有八日病起有賦

秋風吹海氛。氣候頗不令。昏昏七十翁。擾擾半月病。著書殊未成。卽死目不瞑。扶持賴藥物。僅得全性命。雨添苔暈青。風入桐枝勁。深巷無人聲。摺頤發孤詠。

夢有餉地黃者味甘如蜜戲作數語記之

有客餉珍草。發奮驚絕奇。正爾取嚼齧。炮製不暇施。異香透崑崙。清水生玉池。至味不可名。何止甘如飴。兒稚喜語翁。雪頰生黑絲。老病失所在。便欲棄杖馳。晨雞喚夢覺。齒頰餘甘滋。寄聲山中友。安用求金芝。

秋夜

燈欲殘時酒半消。斷礎疎雨共無憀。老來萬事渾非昔。惟有詩情似灞橋。

又

夜雨淒涼客思迷。聞礮卻是夢回時。人人解說悲秋事。不似詩人徹底知。

病起憊甚有歎

殘年迫衰謝。一病不枝梧。書情傍人讀。行須稚子扶。真心付天地。畢世釣江湖。無米博佳傳。虛名那可圖。

小舟晚歸

扶病尋溪友。忘憂泛釣槎。渚寒無宿鷺。月白有啼鴉。敗壁青燈暗。幽窗稚子譁。無生未暇說。且復議桑麻。

又

秋晚吾廬好。柴門映斷山。潮生魚箔短。木落雉媒閑。繚櫟蒼茫外。漁舟浩蕩間。客來常謝病。老鈍耐嘲訕。

夜坐

老眼清無寐。孤懷默自傷。思人交舊盡。撫事歲時長。籬犬吠殘月。江楓凋早霜。放翁殊耐事。掩卷撥爐香。

幽事

老夫病起日支離。幽事關心只自知。社近鄰翁餽新釀。客歸童子拾殘棋。功名已付來生了。筆墨尤非晚歲宜。餘習可憐除未盡。移花引水伴兒嬉。

病後衰甚非籃輿不能出門感歎有賦

酒興詩情尚自如。形骸可怪頓成疎。平生只倚雙鳧舄。此日常須一鹿車。寂寂豈惟慚鄧禹。厭厭更覺類曹蜍。晚窗弄筆聊湔祓。數首清詩手自書。

秋思

人生四十歎頭顱。久矣心知負壯圖。未死皆爲閑日月。無求儘有醉工夫。風凋木葉流年晚。秋入窗扉病骨蘇。信步出門湖萬頃。季鷹不用憶蓴鱸。

題村店壁

五十年來命壓頭。卽今殘髮不禁愁。亂鴉陣起霜天晚。落葉聲乾古渡秋。小市鬻醪聊兀傲。長亭秣蹇得遲留。一身自處窮如許。幸是無因爲國謀。

病去

病去身差健。秋高氣漸寒。未甘常伏几。時作一憑闌。玉粒炊粳軟。香塵搗藥殘。欣然願兒輩。燈下語團圓。

白首

白首稱祠吏。清時作幸民。招呼林下客。遊戲夢中身。山路烏騾穩。煙波畫楫新。村村有花柳。無事即尋春。

書病乙卯七月二十二日臥病兩旬始平九月二日作此詩

暮年雖病不甚劇。掇藥噉粥猶自力。今年七月風眩作。兒子在前不能識。杯中藥冷呼不醒。全家相顧無人色。昏昏但思向壁臥。蟲臂鼠肝寧暇恤。醫巫技殫欲斂手。天高鬼惡吁莫測。偶然得活出望外。扶杖下牀猶屢踣。讀書心在目力短。袖手堅坐到窗黑。無功祿食四十年。歎息此責何由塞。

舍北晚眺

紅樹青林帶暮煙。並橋常有賣魚船。樊川詩句營丘畫。盡在先生拄杖邊。

又

日日津頭繫小舟。老人自嬾出門遊。一枝筇杖疎籬外。占斷千巖萬壑秋。

夜閱篋中書偶得李德遠數帖因思昔相從時所言後多可驗感歎有作

早歲傳聞月旦評。殿門邂逅眼偏明。當時一坐推談止。今日叢林見話行。老臥煙村身偶在。夜開蠹紙淚如傾。豈知三十餘年後。河洛胡塵訖未平。予送德遠歸臨川詩有盱食煩明主。胡沙暗舊京之句。頗爲前輩所稱。時紹興辛巳春也。

登東山

漆園傲吏養生主。栗里高人歸去來。俱作放翁新受用。不妨平地脫塵埃。松崖壁立臨樵塢。竹徑蛇蟠上
敵臺。送盡夕陽山更好。與君踏月浩歌回。

貧樂

蕭然曲肱地。自號直心翁。淨名書云。直心是道場。拙宦三災過。勞生一笑空。新蔬經雨綠。晚稻得霜紅。飽
食真無事。浩歌明月中。

乙卯重九

九日村醅熟。逢迎不用呼。樽前狂起舞。陌上醉相扶。殘髮新霜白。衰顏落葉枯。明年何足問。且復插茱萸。
縱步近村

病去身輕試杖藜。滿村麴麥正離離。照溪自歎尙微瘦。趁渡人言殊未衰。草塞瓶頭沽濁酒。花簪笠頂引
羣兒。裴回不恨歸差晚。正愛青燈映竹籬。

題齋壁

看盡人間利與名。歸來始覺此身輕。禍機不敗漁舟興。樂事渾輸地碓聲。破篋雖無衣可典。寒畦已有芋
堪烹。餘年且健貧何害。剩與鄰翁醉太平。

范參政挽詞

屢出專戎闔。過歸上政途。勳勞光竹帛。風采震羌胡。籤帙新藏富。園林勝事殊。知公仙去日。遺恨一毫無。

又

孤拙知心少。平生僅數公。凋零遂無幾。遲暮與誰同。瓊樹世塵外。神山雲海中。夢魂寧復接。慟哭向西風。

病後往來湖山間戲書

周公居東三食新。夷吾在魯丘厄陳。聖賢憂患尚如此。況我本是羈窮人。今秋危病輒不死。餘業自笑堅頑身。結茅所幸得佳處。石帆天鏡無纖塵。捫蘿峭壁上采藥。腰斧長歌行負薪。尋僧獨泛若耶月。攜友共采湘湖蓴。蠹亡範金陋勾踐。斯頌刻石憎嬴秦。不如一酌禹祠去。惡衣菲食真吾鄰。禹祠在吾廬東南十餘里。

秋夜遣懷

六年歸臥水雲鄉。本自無閑可得忙。羸病豈知身尚健。迂疎真與世相忘。霜清水落年華晚。月黑梟鳴夜漏長。瑣瑣井蛙何足計。一篇秋水笑蒙莊。

初冬暄甚

吳中十月雪霜慳。風景暄妍葉未殷。杲日還看浴東海。薄雲不解冒南山。蛙鳴閣閣荒池曲。蠅出營營食案間。安得玄冥正時令。紅爐綠酒一開顏。

贈湖上父老十八韻

一鏡三百里。環以碧玉峯。天公賜我厚。極目爲提封。煙收見石帆。雨霽望臥龍。嵯峨寶林塔。迢遞天章鐘。興來思一出。霜晴及初冬。父老捨杖迎。衣冠頗嚴恭。語我相識久。幸未棄老農。問者傳伏枕。喜聞足音聲。

貧舍有盤食。勿責異味重。麴甃新油香。黍酒甕面濃。已遣買撲握。亦可致噉嚼。願公領此意。秣蹇聊從容。我起爲太息。厚意敢不從。吾生行逆境。平地九折邛。況今又老退。如子豈易逢。但願從今健。衰疾緩見攻。遇興卽扣門。草具煩炊春。但恐乘月來。妨子睡味濃。

初冬感懷二首

落葉掃還積。斷鴻飛更鳴。羸軀得霜健。老眼向書明。水瘦河聲壯。莢枯馬力生。竟爲農父死。白首負功名。庭蕪失故綠。園樹染新丹。病思閑支枕。詩情獨倚闌。帶移頻覺瘦。貂弊不禁寒。惟有牆陰薺。離離又滿盤。

讀杜詩

城南杜五少不羈。意輕造物呼作兒。一門酣法到孫子。熟視嚴武名挺之。看渠胸次隘宇宙。惜哉千萬不一施。空回英概入筆墨。生民清廟非唐詩。向今天開太宗業。馬周遇合非公誰。後世但作詩人看。使我撫几空嗟咨。

記九月三十日夜半夢

一夢邯鄲亦壯哉。沙堤金轡絡龍媒。兩行畫戟森朱戶。十丈平橋夾綠槐。東閣羣英鳴珮集。北庭大戰捷旗來。太平事業方施設。誰遣晨鷄苦喚回。

小舟遊近村捨舟步歸

數家茅屋自成村。地確聲中晝掩門。寒日欲沉蒼霧合。人間隨處有桃源。

又

借得漁船泝小谿。繫船浦口卻扶藜。莫言村落蕭條甚。也勝京塵沒馬蹄。

又

不識如何喚作愁。東阡南陌且閑遊。兒童共道先生醉。折得黃花插滿頭。

又

斜陽古柳趙家莊。負鼓盲翁正作場。死後是非誰管得。滿村聽說蔡中郎。

蜀僧宗傑來乞詩三日。不去作長句送之。

看遍東南數十州。寄船卻泝蜀江秋。孤雲兩角山亡恙。斗米三錢路不憂。今年所在皆大稔。萬里得詩長揖去。它年挈笠再來不放翁爛醉尋常事。莫笑黃花插滿頭。

羲農

羲農去不反。釋老似而非。太息衆皆醉。逝將誰與歸。經時忘肉味。盡日掩柴扉。安得同心者。燈前語造微。

冬夜不寐

蒙眼睡眠少。空村霜露淒。錚錚聞叩鐵。喔喔數鳴鷄。月入知窗破。衾單幸屋低。明晨炊米盡。吾起不容稽。

十月

塞向傾書櫃。開爐積豆萁。林居得溫暖。天遣養衰遲。甕盎藏蔬後。鉏耰下麥時。農家冬最樂。我老頗能知。

讀易

羸軀抱疾時時劇。白髮乘衰日日增。淨掃東窗讀周易。笑人投老欲依僧。

又

老喜杜門常謝客，病惟讀易不迎醫。冬來更愧乖慵甚，醉過收蕎下麥時。

聞雁

霜高木葉空，月落天宇黑。哀哀斷行雁，來自關塞北。江湖稻粱少，念汝安得食。蘆深洲渚冷，歲晚霰雪逼。不知重雲外，何處避畢弋。我窮思遠征，羨汝有羽翼。

悲歌行

士如天馬龍爲友，雲夢胸中吞八九。秦皇殿上奪白璧，項羽帳中撞玉斗。張綱本不問狐狸，董龍何足方。鷄狗風埃蹭蹬不自振，寶劍牀頭作雷吼。憶遇高皇諸隆準，豈意孤臣空白首。卽今埋骨丈五墳，骨會作塵心不朽。胡不爲長星萬丈掃幽州，胡不如昔人圖復九世讎。封侯廟食丈夫事，齷齪生死真吾羞。

村飲

吳中霽霜晚，冬草有未衰。坐令老病叟，遂失凋年悲。翩翩烏紗帽，裊裊殘菊枝。雖無車馬客，時與鄰翁期。新醅壓尙渾，雉兔亦及時。自覺勝淵明，但醉不賦詩。

鏡湖西南有山曰外山，民某氏居之。其居少西，小潭受飛泉，羣山環合，眞異境也。爲作短歌。

漢東九十九重岡，武都九十九脈泉。豈如君家環翠阜，小潭珮玦聲鏘然。我欲從君乞菴地，開軒下看泉中天。金丹九轉太多事，服水自可追飛仙。雲孫相遇不相識，笑問塵世今可年。掬泉弄月清獻罷，卻折玉井秋風蓮。

十月十七日子生日也孤村風雨蕭然偶得二絕句子生淮上是日平旦大風雨駭人及子墮地雨乃止

少傅奉詔朝京師。櫂船生我淮之湄。宣和七年冬十月猶是中原無事時。

又

我生急雨暗淮天。出沒蛟鼉浪入船。白首功名無尺寸。茅簷還聽雨聲眠。

遊山舟中遇風雨戲作

龍驤萬斛去如鴻。巨浪惟能窘短篷。不是山靈嫌俗駕。一生常值打頭風。

一齒動搖似不可復留有感

晚境常憂豁可憎。苦留終不受丁寧。主貧何恨客辭去。木老元知葉自零。未害朶頤臨肉俎。但妨叩齒讀仙經。從今有酒須勤買。莫學騷人要獨醒。

山行

老翁七十亦何求。尙賴山行散百憂。擲耳帽寬新小疾。獨轆車穩正閑遊。酒旗滴雨村場晚。茶竈炊煙野寺秋。若論人間長久事。高吟何啻傲封侯。

老學菴予取師曠老而學如秉燭夜行之語名菴

窮冬短景苦慙忙。老學菴中日自長。名譽不如心自肯。文辭終與道相妨。吾心本自同天地。俗學何知溺糝糠。已與兒曹相約定。勿爲無益費年光。

枕上偶成

放臣不復望脩門。身寄江頭黃葉村。酒渴喜聞疎雨滴。夢回愁對一燈昏。河潼形勝寧終棄。周漢規模要細論。自恨不如雲際雁。南來猶得過中原。

舍北閑望作六字絕句

潘岳一篇秋興。李成八幅寒林。舍北偶然倚杖。盡見古人用心。

題菴壁

竹間僅有屋三楹。小菴纔兩間。雖號吾廬實客亭。已斷雨聲重點滴。欲殘燈影更晶熒。酒惟排悶難中聖。茶卻名家可作經。頭眩減來還病蹇。何時徹底得康寧。

又

身似蝸牛蠹有廬。卻緣無用得安居。地爐封火欺寒雨。紙閣油窗見細書。麪熟山僧分餽。船來溪友餉薪。樗閉門莫笑衰頹甚。讀易論詩亦未疎。

縱筆

老眼輕千乘。枯腸卻八珍。直令身潦倒。未害膽輪囷。酒裏遺浮世。書中見古人。平生笑園綺。老蹋帝城塵。

又

壯歲志天下。崎嶇無一施。高談對鄰父。朴學付癡兒。補柵憐鷄冷。分糧憫雀飢。吾生忽至此。惆悵鏡中絲。

又

天道何時定。人生固有涯。壯年行出塞。晚歲病還家。積憤憑誰豁。孤忠祇自嗟。今朝茅屋底。隱約聽霜笳。十月二十八日夜雞初鳴時夢與數女仙遇其一作詩示予頗哀怨如人間語惟末句稍異予戲之曰若無此句不可爲神仙矣其一從傍戒曰汝當勿忘此規作詩者甚有愧色予頗悔之既覺賦兩絕句以解嘲

玉姝眉黛翠連娟。弄翰閑題小碧牋。人世愁多無著處。故應分與蕊宮仙。

又

虹作飛橋蜃吐樓。羣仙來賦海山秋。玉姝定自多才思。更與人間替說愁。

山行

緣崖曲曲羊腸路。傍水疎疎麕眼籬。舉起短鞭成一笑。吾詩正是策勳時。

又

眼邊處處皆新句。塵務經心苦自迷。今日偶然親拾得。亂松深處石橋西。

貧甚作短歌排悶

閒何闕。逢諸葛。畏人常憂不得活。事不諧。問文開。不蹋權門更可哀。卽今白髮如霜草。一飽茫然身已老。惟有躬耕差可爲。賣劍買牛悔不早。年豐米賤身獨飢。今朝得米無薪炊。地上去天八萬里。空自呼天天豈知。

過張王行廟

烈士生不遇，栖栖爲旅人。英魂死不沒，凜凜爲明神。明神受帝命，廟食福我民。牲酒何足言，壓抑姑少伸。火旱千里赤，與人下雷雨。降水不反壑，談笑出平土。善人錫之福，姦僞亦擊汝。豈若世上人，吞聲氣如縷。

秋月曲

舊時家住長安城，萬戶千門秋月明。紫陌朱樓歌吹海，酣宴不覺銀河傾。受降城頭更奇絕，莽莽平沙千里月。選兵夜出打番營，鐵馬蹴冰冰欲裂。塞月未落成功回，腰鼓橫笛如春雷。長安高樓豈不樂，與此相去何遼哉。丈夫志在垂不朽，漆胡骷髏持飲酒。舉頭雲表飛金盤，痛飲不用思長安。

卽事

蕭騷白髮滿綸巾，猶是人間詩酒身。湖上悲秋新有作，眼邊敗意絕無人。稻梁栖畝雁初下，煙水粘天鷗自馴。堪笑推移成老大，時時几杖接鄉鄰。

悲歌行

感慨常自悲，發爲窮苦辭。偈仄不少伸，夢中亦酸辛。脂車思遠道，太息令人老。中原宋輿圖，今乃傳胡雛。此責在臣子，諸公其可已。談笑復舊京，令人憶西平。

讀李泌事偶書

莘渭當時已誤來，商山芝老更堪哀。人生若要常無事，兩顆梨須手自煨。

晨起

晨起梳頭嬾，披衣立草堂。霧昏全隱樹，氣暖不成霜。灘急回魚隊，天低襯雁行。新春猶一月，已覺日微長。

喜雨

一秋未雨冬未雪。坐使肺肝生客熱。不惟裘褐藏篋笥。臥毯坐氈俱未設。樽中有酒不敢嘗。小甕黃齏卻時覿。新春距今一月爾。便恐蝗生殘宿麥。天公老手真可人。夜雨蕭蕭洗旱塵。北風吹雪定不晚。喜入三山湯麩椀。

閑趣

堅閉門來又過冬。一裘且復擁龍鍾。不辭陋巷如漿冷。自愛新醅似粥醲。迎婦橋邊燈煜煜。賽神林外鼓寥寥。豈惟自得閑中趣。要遣兒孫世作農。

自警

人生非金石。壽夭不自知。一日復一日。亦或至耄期。方其未死間。早夜勿自欺。嗟彼陷溺者。太山起毫釐。努力戒惰偷。堯舜可庶幾。我今齒髮弊。彊健復幾時。一寸學古心。自視猶可爲。雞鳴推枕起。爲善亦孳孳。天定終勝人。吾世或未衰。素業果有傳。三復吾此詩。

雨後

鏡湖歸隱老黃冠。布褐蕭然一室寬。燈影青熒人未睡。雨聲點滴夜將闌。四朝出處朋儕盡。半世漂流骨相寒。青史無名端可恥。著書留與後人看。

又

蕭蕭殘髮雪侵冠。冉冉清愁用底寬。把卷昏眸常欲閉。投牀睡興卻先闌。惟須酒沃相如渴。未分人哀范

叔寒雨霽定知梅已動。佩壺明日試尋看。

窗黑

風雨窗常黑。衰翁罷讀書。縱橫慚七略。廢惰失三餘。宴坐工夫熟。多聞習氣除。韓公未解此。誤謂腹空虛。

雨止行至門外戲作

蒼雨收殘滴。溪雲弄晚晴。出門還浩歎。幾屐了吾生。

野飲

綠岸波生染麴塵。碧天雲細蹙魚鱗。山居剩得舒長日。野飲自無拘忌人。元結詩云。坐無拘忌人。勿限醉與醒。酒甕石邊孤店晚。樵風溪畔早梅春。懷章正可驚奴輩。未勝行歌獨負薪。

雨夜有懷張季長少卿

放翁雖老未忘情。獨臥山村每自驚。鼎鼎百年如電速。寥寥一笑抵河清。梅初破。藟行江路。燈欲成。花聽雨聲。正用此時思劇飲。故交零落愴餘生。

雨中熟睡至夕

擁爐聽雨生睡思。澀眼瞢瞢惟欲閉。丈夫少壯要自力。飽食養慵真可媿。我今不睡欲何爲。常恐兒曹落吾事。蠻氈紙帳方施行。五鼎八珍無此味。

又

少陵今雨無客至。寂寞衡門晝常閉。孝先酣枕夢周公。弟子雖嘲可無媿。世上紛紛榮辱多。不如睡中差

省事小兒忽報煎茶熟。起擁寒爐究餘味。

憶昔

憶昔輕裝萬里行。水郵山驛不論程。屢經漢帝燒餘棧。曾宿唐家雪外城。壯志可憐成昨夢。殘年惟有事春耕。西窗忽聽空階雨。獨對青燈意未平。

燈下看梅

風雨經旬怯倚闌。梅花折得就燈看。有情應寄去年別。無寐不禁清夜寒。病起搯筇幽興在。春遲載酒後期寬。籬東數樹尤奇絕。日遣蠻童候路乾。

程泰之尙書挽詞

又
文古唐元結。經明漢仲舒。三朝八座貴。千載九丘書。早接遊從末。常聞議論餘。死生今永訣。追恨寄聲疎。

昔在紹興末。同趨行殿門。方思尋宿好。忽已奉遺言。誅行曲臺議。飾終明主恩。高皇舊朝士。今復幾人存。

雨夕獨酌書感

數掩蘆藩常不開。飢鴉兩兩啄青苔。雨來十日未成雪。歲盡一枝初見梅。池上晚行攜獨鶴。燈前夜酌撥新醅。漁村老景今如許。駿馬舊遊安在哉。

白首

白首元無一事成。朝來大笑絕冠纓。花飛早已知春減。漏盡寧容更夜行。蕭散且爲無算飲。猖狂未免不

平鳴玉關青海今安在。麥野桑村送此生。

客言來自上臯道中以其語作一絕

日曬霜融作淺泥。酒家卻在斷橋西。五陵今代無豪俠。獨臥茅簷聽午鷄。

睡起

老怯年華速。閑知晝漏長。已回酣枕夢。未過古匳香。洗面宮眉綠。開茶帶胯方。山家風味在。雖病意差彊。

陸放翁集

劍南詩稿

卷第三十四

歲暮

案閒官曆喜更端。鬢畔羅幡巧耐寒。篩辣擣香籜臘酒。染紅絲綠簇春盤。衰容未覺餘年迫。佳日猶思一笑歡。太息兒童癡過我。鄉儼雖陋亦爭看。

殘臘二首

破臘春先到。微陰日易醺。鳥聲猶寂寂。木意已欣欣。雲起山分疊。風生水蹙紋。斷腸何處笛。偏向醉中聞。殘臘無多日。吾生又一年。林塘明夕照。墟落淡春煙。山色危欄角。梅花綠酒邊。歲時元自好。老病獨悽然。

一壺歌

悠悠日月沒根株。常在人閒醉一壺。傾倒欲空還潑灑。不曾教化不曾沾。

又

先生醉後卽高歌。千古英雄奈我何。花底一壺天所破。不曾飲盡不曾多。

又

自從軒昊到隋唐。幾見中原作戰場。三十萬年如電掣。不曾記得不曾忘。

又

恥從嶽牧立堯庭。況見商周戰血腥。攜得一壺閑處飲。不曾苦醉不曾醒。

又

長安市上醉春風。亂插繁花滿帽紅。看盡人間興廢事。不曾富貴不曾窮。

屬疾

白頭屬疾臥丘園。藥物枝梧且僅存。月黑淺山聞鵬嘯。窗明高樹送鴉翻。讒欺薄命深消骨。憂集窮途黯斷魂。回視少時真隔世。但餘一念在元元。

新歲

風入鞭梢緊。春從草色深。山坡臥新犢。園木轉幽禽。勳業少年夢。關河遊子心。爾來都掃盡。濁酒帶醅斟。

早春

數聲屋角聽鳴禽。紅糝青梢忽滿林。雨過東臯一犁潤。冰消南澗半篙深。逢僧竹院閑評藥。攜鶴山村醉擁琴。青史功名黃閣貴。有時應不到如今。

太古

太古安知慮與堯。茹毛飲血自逍搖。不須追咎爲書契。初結繩時俗已澆。

春夜

老憊生如寄。春寒夢亦孤。燈花時自墜。鼻語迭相呼。萬里書難得。三年病未蘇。窗深不知曉。但覺動林烏。

正月六日作

上天四序分寒燠。以漸相尋不相瀆。今年立春七日耳。暖景溫風何迫促。羣蛙怒鳴蚊蚋出。蚍蜉插翅飛滿屋。兒童便欲覓團扇。我亦汗垢思湯沐。山坡梅花常恨晚。一夕開盡如雪谷。籬邊已放桃蕊紅。庭下頓長萱芽綠。小人識淺喜欲舞。輕衫冷燄相追逐。春深癘鬼不貸人。此暖但憂非汝福。

寄題吳斗南翫芳亭

北斗以南有吳侯。人物知非第二流。讀書不放一字過。閉戶忽驚雙鬢秋。平生離騷讀千遍。屈泥秭歸要親見。歸來落筆愈驚人。宋玉景差俱北面。玩芳亭中蘭茝芳。朝回解帶春晝長。愛君憂國有奇作。坐令壯觀還沅湘。老人曩亦同此趣。甚欲閑題玩芳句。無奈生涯今已別。倒壑枯楠忘歲月。

春初驟暄一夕梅盡開明日大風花落成積戲作

暖逼梅花爛漫開。飄零便恐付蒼苔。更堪連夜風如許。似妒愁人把一杯。

又

殘梅零落不禁吹。真是無花空折枝。堪笑老人風味減。三年不作送梅詩。予往歲多有送梅之作。今開筆已累年。

又

年年爛醉萬梅中。吸酒如鯨到手空。花欲過時常惜別。今年此別更匆匆。

讀老子傳

陸放翁集 劍南詩稿 卷三十四

三

(一三四七)

巍巍闕里與天崇。禮樂詩書萬世宗。但說周公曾入夢。寧於老氏歎猶龍。

示元用

德孫學語已驚人。悶裏時時一笑新。老子已應如櫪驥。此郎端恐是天麟。會看神授如椽筆。莫改家傳折角巾。汝叔不癡當愛汝。夜窗燈火勉相親。

春思

七十老翁身退耕。可憐未減舊風情。典衣取酒那論價。秉燭看花每到明。江浦時時逢畫楫。寺樓處處聽新鶯。此生無復陽關夢。不怕樽前唱渭城。

春望

天地回春律。山川掃積陰。波光迎日動。柳色向人深。霑灑憂時淚。飛騰滅虜心。人扶上危榭。未廢一長吟。

丙辰上元前一日

弊裘破帽髮鬢髻。宛似山房罷講僧。身病不禁連夜雨。家貧只挂舊年燈。修椽柳外掀樓角。危檻雲間露塔層。自笑閑遊本無定。興闌隨處倚枯藤。

夜雨思恬蒼遊

道心退惰如風鷁。世念堅彊似火牛。安得短篷湖海去。夜深聽雨琵琶洲。

春陰

麴塵柳色正遮門。石黛江流曲抱村。小院春光方盎盎。遠山雨氣又昏昏。傍簷林鳥驚幽夢。極目煙蕪捲

燒痕。只道餘寒尙如許。不知生意滿乾坤。

寒夜歌

陸子七十猶窮人。空山度此冰雪晨。既不能挺長劍以抉九天之雲。又不能持斗魁以回萬物之春。食不足以活妻子。化不足以行鄉鄰。忍飢讀書忽白首。行歌拾穗將終身。論事憤叱目若炬。望古踊躍心生塵。三萬里之黃河入東海。五千仞之太華磨蒼旻。坐令此地沒胡虜。兩京宮闕悲荆榛。誰施赤手驅蛇龍。誰恢天網致鳳麟。君看煌煌藝祖業。志士豈得空酸辛。

正月十六日園中偶賦

又向柴荆過上元。豪華前事不須論。偶逢花發閑持酒。不得人扶嬾出門。薄技號山曾獻玉。榮途染指亦嘗龕。年來洗盡東陵夢。瓜瓞蕭蕭老故園。

陵霄花

庭中青松四無鄰。陵霄百尺依松身。高花夙墮赤玉盞。老蔓煙溼蒼龍鱗。古來豪傑人少知。昂霄聳壑寧自期。拘才委地固多矣。今我撫事心傷悲。

懷舊

鶴鳴山下竹連雲。鳳集城邊柳映門。當日不知爲客樂。如今回首卻消魂。

又

駿騾西過雨漫天。千里江山在眼邊。二十四年如昨夢。憑誰問訊帶枷仙。

又

狼煙不舉羽書稀。幙府相從日打圍。最憶定軍山下路。亂飄紅葉滿戎衣。

又

翠崖紅棧鬱參差。小益初程景最奇。誰向豪端收拾得。李將軍畫少陵詩。

又

回龍寺壁看維摩。最得曹吳筆意多。風雨塵埃昏欲盡。何人更著手摩挲。

又

嶓冢山頭是漢源。故祠寂寞掩朱門。擊鮮藉草無窮樂。送老那知江上村。

夜坐

蓬窗夜半竹騷然。坐守殘編悄不眠。辛苦空成左傳癖。逍遙常媿大慈仙。風寧可繫功名誤。日不能黏歲月遷。明旦覓船湖上去。西村桃李淡春煙。

入城舟中作

櫂邊蘸岸按藍水。蓬外橫空破墨山。更著灘頭一行鷺。此身真在畫圖間。

寓蓬萊館

朱門高柳畫橋南。掠面風埃喜解驂。霽日偶逢春盎盎。野人不慣屋潭潭。堂中剩喜簪裾集。樓上時聞鼓角酣。明發扁舟覓歸路。趁時吾欲事農蠶。

過能仁光孝寺欲訪听老會府中速客遂不果入

春日城南過寶坊。馳驅不得駐車箱。高門臨道淨如拭。傑屋凌空勢欲翔。齋近鐘魚初送響。風微松檜自生香。暫來堪笑忙如許。坐羨高人白晝長。

夜二鼓留西城門歸三山

秉炬夜離驛。戴星出西關。舟人飛畫楫。門鎖響銅環。漁火明遙浦。溪風解醉顏。鄰家亦驚起。迎我笑堅頑。

讀杜詩

千載詩亡不復刪。少陵談笑卽追還。常憎晚輩言詩史。清廟生民伯仲間。

蘇韜光節推挽歌詞

才名京兆掾。門閥魏公孫。遇事雖骯髒。接人終靜溫。寧吟灞橋雪。不掃舍人門。二妙凋零盡。衰翁慨獨存。

韜光與訓直吏都下世相距三年。

村翁

放翁真箇是村翁。釣渭耕莘事不同。蹴踢煙雲兩芒屨。憑陵風雪一蓬籠。屢經駭浪身終免。遍閱浮漚壽未窮。幸有春衣堪換酒。道邊醉臥示神通。

寄子布

釣灘耕壠雪盈簪。從入新年病至今。遠使有書常灑淚。長宵無夢更傷心。何由老眼迎歸櫂。空爲秋風感暮碁。一紙新詩千萬恨。臨風悵望獨長吟。

落花

朱朱白白不禁吹。老未忘情作許悲。瑞錦已殘猶有夢。明霞初散可無詩。人應偷樣傳圖本。天亦收香付蜜脾。榮悴相尋君看取。曉來青子已團枝。

南窗

身輕婚嫁畢。耳靜市朝疎。褹帶脫烏幘。一窗寬有餘。

排悶

白髮無端日日新。自憐猶作百憂身。孤燈聽雨常終夜。一棹尋花又送春。旋壓麥饊邀父老。時分菜把餉比鄰。不須頻起陳人歎。已是清朝六世民。

過鄰家戲作

老脫朝冠岸幅巾。時時乘興遠比鄰。瓶無儲粟吾猶樂。步有新船子豈貧。醅甕香浮花露熟。藥欄土潤玉芝新。玉芝謂鬼臼。山家多有之。相從覓笑真當勉。又過浮生一歲春。

看花

好樹典衣買。新花扶杖看。村醪雜清濁。山果半甘酸。家事貧尤簡。詩情老未闌。鷓鴣閑似我。日暮立清灘。

閑趣

同儕零落曉星稀。久住人間豈自期。衰病已成垂白叟。春寒又到牡丹時。溪邊喚客閑持釣。燈下留僧共覆棋。一日轉頭還過卻。紛紛世事不須知。

春盡遣懷

裊裊爐香晝掩扉。殘年真是解塵鞿。青餼旋擣通鄰好。白葛新裁製暑衣。避日小魚穿藻去。倚風輕燕拂簾飛。要知名宦非初意。三十年前已念歸。予以乾道乙酉卜築湖上。今三十有二年矣。

二友

清芬六出水。梔子堅瘦九節石。菖蒲放翁閉門得二友。千古夷齊今豈無。

半丈紅盛開

滿酌吳中清若空。共賞池邊半丈紅。老子通神誰得似。短筇到處卽春風。

感事

鷄犬相聞三萬里。遷都豈不有關中。廣陵南幸雄圖盡。淚眼山河夕照紅。

又

堂堂韓岳兩驍將。駕馭可使復中原。廟謀尙出王導下。願用金陵爲北門。

又

渭上晝昏吹戰塵。橫戈慷慨欲忘身。東歸卻作漁村老。自誤青春不怨人。

又

捫蝨當時頗自奇。功名遠付十年期。酒澆不下胸中恨。吐向青天未必知。

豐年行

南村北村春雨晴。東家西家地碓聲。稻陂正滿綠針密。麥隴無際黃雲平。前年穀與金同價。家家涕泣伐桑柘。豈知還復有今年。酒肉如山賽春社。吏不到門人晝眠。老穉安樂如登仙。縣前歸來傳好語。黃紙續放身丁錢。

四月一日夜漏欲盡起坐達旦

春歸不可留。斗柄已崢嶸。老至不可卻。雪鬢森千莖。少年所讀書。廢忘如隔生。舊交死欲盡。存者萬里程。高談無與廢。欲語輒吞聲。悠悠一飽計。泯泯千載名。逝將山丘歸。不見河雒清。挑燈坐待旦。攬筆衰涕傾。

蓬萊行

山峭插雲海。樓高入煙霄。不知何宮殿。東望鬱岩巖。是時青童君。初散通明朝。風濤中破裂。涌出黃金橋。授我玉芝房。服之塵念消。凡骨一朝換。八極坐可超。

馮縣丞挽歌詞綱字仲柔

尊公同故里。季父接周行。晚憇烏衣巷。重逢玉樹郎。名流多賞識。榮路正騰驤。愁絕河梁上。風煙暮莽蒼。

幽居初夏

湖山勝處放翁家。槐柳陰中野徑斜。水滿有時觀下鷺。草深無處不鳴蛙。籜龍已過頭番筍。木筆猶開第一花。歎息老來交舊盡。睡餘誰共午甌茶。

又

藤冠草屨病支離。門外紛紛百不知。解籜有聲驚倦枕。飛花無力點清池。閑思舊事惟求醉。老感流年只

自悲綠樹陰中紅練起。一團零亂溼臙脂。

又

長歌嫋嫋插秧天。小繖翻翻入市船。高棟巢乾初乳燕。綠槐陰密已鳴蟬。只言未俗人情惡。未廢先生日晏眠。推枕起來閑弄筆。銅蟾手自挹寒泉。

又

鬢毛禿盡齒牙疎。難受人間折簡呼。詩酒本來無藉在。形骸況復不枝梧。槐陰漸密能鄣日。池水新生可浴鳧。移得太行終亦死。平生常笑北山愚。

出蜀十九年故交零落殆盡慨然有作

西遊邂逅得諸君。落筆千言酒百分。聚散亦知元有數。死生豈料不相聞。平羌空憶吟江月。小益何由度棧雲。一事與君聊自慰。兒曹或可付斯文。

憶天彭牡丹之盛有感

常記彭州送牡丹。祥雲徑尺照金盤。豈知身老農桑野。一朵妖紅夢裏看。

五月七日夜夢中作

征行過孤壘。寂寞已千年。馬病霜菅瘦。狐鳴古冢穿。煙塵身欲老。金石志方堅。零落英雄盡。何人共著鞭。

又

霜露薄貂裘。連年塞上留。蘆笳青冢月。鐵馬玉關秋。振臂忘身憊。憑天報國讎。諸公方袞袞。好運幄中籌。

急雨

急雨清風發土香。靈臺如受寶犀涼。華胥一枕遽然覺。卻聽蟬聲送夕陽。

夜中步月

夜半不成寐。起尋微月行。風生驚葉墮。露重覺荷傾。兀兀酒中趣。悠悠身後名。興闌還掩戶。坐待日東生。

晨起

齒豁不可補。髮脫無由栽。清晨明鏡中。老色蒼然來。餘年亦自惜。未忍付酒杯。抽架取我書。危坐闔復開。萬世見唐堯。夔龍獲親陪。寥寥三千年。氣象挽可回。豈以七尺軀。願受世俗衰。道在無不可。廊廟均蒿萊。

枕上聞布穀聲

老去惟思日月遲。更堪青鬢總成絲。無端催取流年去。最恨溪頭布穀兒。

雨夜

北風吹雨亂疎鐘。蔌蔌燈花破碎紅。孤夢正行天一握。高城俄報鼓三通。衰遲空抱屠龍技。豪俊誰收汗馬功。但願輿圖早來復。白頭敢望起雲中。孤雲兩角去天一握。蓋褒斜道上也。

焚黃

啼呼梨棗憶兒時。駒隙頻經日月馳。早歲已興風木歎。餘生永廢蓼莪詩。燎黃恩重空垂泣。戴白身存敢自期。足蹇僅能成拜起。籃輿歸路不勝悲。

卽事

陶令常耽酒。龐翁不出家。安貧炊麥飯。省事嚼茶芽。池滿浮雞鴨。庭荒噪蛄蛙。詩成賞音絕。自向小兒誇。

失鸚鵡

不見池邊整羽衣。繞村散覓走羣兒。卑飛正恐爲人得。徑去何須報我知。久憶蘋洲應自喜。尙餘菰米亦堪悲。放翁未到忘情處。日暮憑欄獨詠詩。

贈童道人蓋與予同甲子

吾儕之生乙巳年。達者寥寥窮比肩。退士一生藜藿食。散人萬里江湖天。忍貧不變我自許。挾術自營君豈然。一事尙須煩布策。幾時能具釣魚船。方謀買一小舟未到也。

上方鉅老求宿蘆詩宿蘆蓋所寓室名以其似漁舟也

一曲亭前水接天。放翁短棹弄風煙。宿蘆縱有江湖趣。猶是人間曠釣船。

夜坐園中至夜分

岸巾閑倚胡牀坐。步履還扶拄杖行。漸近秋清知病減。盡捐世累覺心平。翻翻雙鵲風枝爽。熠熠孤螢露草明。更欲裴回盡幽興。鐘譙傳漏報三更。

六月二十四日夜分夢范至能李知幾尤延之同集江亭諸公請予賦詩記江湖之樂詩成而覺忘數字而已

露箬霜筠織短篷。飄然來往淡煙中。偶經菱市尋谿友。卻揀蘋汀下釣筒。白菡萏香初過雨。紅蜻蜓弱不禁風。吳中近事君知否。團扇家家畫放翁。

晨起

月澹知將曉。風清喜近秋。狂吟詞跌宕。新沐髮飈飈。桐葉危先墮。蟬聲斷更遙。達生隨處樂。自笑替人愁。

村飲示鄰曲

七年收朝迹。名不到權門。耿耿一寸心。思與窮友論。憶昔西戍日。孱虜氣可吞。偶失萬戶侯。遂老三家村。朱顏捨我去。白髮日夜繁。夕陽坐溪邊。看兒牧雞豚。雕胡幸可炊。亦有社酒渾。耳熱我欲歌。四坐且勿喧。卽今黃河上。事殊曹與袁。扶義孰可遣。一戰洗乾坤。西酌吳玠墓。南招宗澤魂。焚庭涉其血。豈獨清中原。吾儕雖益老。忠義傳子孫。征遼詔儻下。從我屬囊韃。

醉歸

十畝春蕪手自犁。瓜牛廬在鏡湖西。禪心每笑彈棋局。道眼長捐刮膜篋。絕食就官分鶴料。無車免客笑雞栖。頃獨有一竹輿。今亦壞矣。旗亭酒賤秋風近。夜夜歸來醉似泥。

二愛并序

陶淵明詩云。孟夏草木長。遶屋樹扶疎。衆鳥欣有託。吾亦愛吾廬。孟東野亦云。遠岸雪難暮。勁枝風易號。霜禽各嘯侶。吾亦愛吾曹。予暇日詠二詩。有感。作二愛詩。

結屋不袤丈。著身還有餘。破壁作小窗。亦足陳吾書。無酒當飲水。無肉當飯蔬。知止乃不殆。此語良非虛。古人造道處。正自無絕殊。願君勿它求。且復愛吾廬。

門外秋水深。日日集鷗鷺。是豈相與期。正以同類故。殘年過七十。朋舊半丘墓。非吾濟世心。歎息莫予助。

人生非金石。去日如脫兔。三復東野詩。獨立悲歲暮。

蜻蜓油

舍北蜻蜓浦。新秋偶一來。菱絲煙際老。芡背露中開。漁火明還滅。沙禽去卻回。吾行興無盡。舟子莫相催。

題韓運鹽竹隱堂絕句三首茂卿字立道

鄴下王孫今勝流。相逢三伏凜生秋。未嘗一日可無竹。似是前身王子猷。

又

塵埃車馬日駸駸。誰解從君一散襟。待我清秋有閑日。抱琴來寫萬龍吟。

又

靜處知君解策勳。爐香裊裊起微雲。岸巾不住尋青士。敲枕還應對墨君。

哭杜府君

叔高初過我。風度何玉立。超然衆客中。可慕不待揖。入都多賓友。伯高數來集。質如琮璧淵。氣等芝蘭襲。晚乃過仲高。午日曬行笠。忽忽邊別去。悵望空快悒。有如此三高。青紫何足拾。豈無知之者。相視莫維繫。窮魚雖相憫。可媿吐微溼。亦知尊公賢。何止蓋鄉邑。向風每拳拳。識面眞汲汲。秋風忽聞訃。執書歎以泣。造門不自決。追悔今何及。又聞著書富。手澤溢巾笈。哀毀要無益。遺稿勤綴緝。

初秋夜坐

徂歲又如許。吾生眞若浮。露蟬鳴達曉。風葉墮先秋。野迴星辰大。天空河漢流。胡牀幸亡恙。且復寄悠悠。

宴坐自午至暮

身外寥寥掃怨恩。胸中浩浩納乾坤。飽經世事常高枕。慣見人情不署門。孤日夜分生海底。百川秋漲泝河源。珥貂碧落從來事。東訪蓬萊不足言。

舟中詠落景餘清暉。輕橈弄溪渚之句。蓋孟浩然耶溪泛舟詩也。因其句爲韻賦詩。

獨鶴還故鄉。巋然但城郭。出門無與遊。所至苦寂寞。裹飯事幽討。此計殊不惡。薄暮宿漁家。蒼煙帶墟落。

又

維舟入谷口。信步造異境。隔離鷄犬聲。滿地梧桐影。瓦甑炊香稻。石泉汲新井。人間苦徧仄。愛此須臾景。

又

老圃髮如霜。見客能廢鋤。與坐使之年。自云八十餘。老身六朝民。草舍數世居。力守遠祖言。一字不學書。

又

沿溪得茅店。酒旗出柴荆。杖頭錢已空。一醉何由成。主人語鄭重。手把甕面清。勸我姑小留。溪魚亦可烹。

又

秦皇酒甕邊。古有釣魚磯。我來必竟日。時挈雙鯉歸。白鷺真可人。常先孤棹飛。高詠江練句。令人憶玄暉。

又

鏡湖三百里。風止鏡面平。持以照吾心。俗塵安得生。散髮鷗鷺間。萬事秋毫輕。誰能拂東絹。寫我孤舟橫。

又

朝發雲根寺。暮宿煙際橋。冷螢溼不飛。潛魚驚自跳。菱船歌裊裊。荻浦風蕭蕭。平明宿鳥起。我亦理歸橈。

又

古祠照滄波。老木闕雲洞。輕舟不搖楫。正用一風送。汲井漱甘液。掃榻寓幽夢。所恨山未深。城笳聽三弄。

又

禹穴探斷簡。樵風泛清溪。倒影森松桂。避船散鳥鷺。塵中有異境。十里青玻璃。高塔忽招人。湖邊日未低。

又

溪行已清秋。還舍尙殘暑。天公爲解圍。簾櫳過疎雨。青蔬喜小摘。紅粒亦新杵。一飽坐北軒。蘋花泣煙渚。

此页空白

陸放翁集

劍南詩稿

卷第三十五

浮生

浮生真是寄郵亭。短鬢忽忽失故青。睡少始知愁有力。病增方歎藥無靈。謀生嬾似逢秋燕。訪舊疎於欲
旦星。自笑若爲銷此恨。濁醪聊復倒餘瓶。

秋夜

高屐枯筇一老翁。燈前自笑髮如蓬。冷冷月浸荒庭竹。淅淅風凋古井桐。病思未蘇秋尙淺。醉魂初醒夜
方中。故人萬里無消息。便擬江頭問斷鴻。

秋夜紀懷

缺月淡欲盡。老雞鳴苦遲。聊爲待旦坐。不作感秋悲。魯叟一王法。幽人七月詩。平生經世志。老死欲誰期。
又

瞿曇起西域。老氏奮中州。談理一家說。蠹民千載憂。橫流常有自。獨立豈相仇。垂世詩書在。兒童勿外求。
又

北斗垂莽蒼。明河浮太清。風林一葉下。露草百蟲鳴。病入新涼減。詩從半睡成。還思散關路。炬火驛前迎。

書懷

蕭颯先秋鬢，龍鍾未死身。不惟今日老，已是一生貧。食菜從兒瘦，關門任客嗔。世間餘一念，河雒尙胡塵。

林居秋日

桔槔引水遠荒畦，病臥蝸廬不厭低。小聚數家秋靄裏，平波千頃夕陽西。亭臯草木猶葱蒨，天上風雲已

七月二十四日作

閑拂青銅一惘然，此生應老海雲邊。涼颺入袂詩初就，幽鳥呼人夢不全。天上鵲歸星渚冷，月中桂長露華鮮。射胡羽箭凋零盡，坐負心期四十年。

枕上作時聞臨海四明皆大水

撫枕時時猶歎歎，匏窮已極畏凶饑。雨聲浙瀝孤齋冷，客夢蕭條萬里歸。山邑風雷移蜃穴，海城水潦半民扉。如雲秋稼方相賀，一飽還憂與願違。

書懷

漫道年來未極衰，窮途憔悴實難支。半分臂減休文瘦，七尺軀存曼倩飢。尙憶青衫陪衆雋，寧期白首負明時。悠然萬里烟波興，除卻沙鷗總不知。

秋陰至近村

村店閑尋酒，筇枝瘦倚肩。雲齊龍卷雨，野曠鶴盤天。露井飄桐後，清觴泛菊前。欲歸還小立，搔首意悠然。

閑居自述

自許山翁嬾是真，紛紛外物豈關身。花如解笑還多事，石不能言最可人。淨掃明窗憑素几，閑穿密竹岸烏巾。殘年自有青天管，便是無錐也未貧。

秋雨初霽試筆

墨入紅絲點漆濃，閑將倦筆寫秋容。雨聲已斷時聞滴，雲氣將歸別起峯。斜日半穿臨水竹，好風遙送隔城鐘。遠遊更動輕舟興，太息何人解見從。

幽懷

苦茅架竹亦吾廬，病起幽懷得小攄。愛酒已捐身外事，閉門猶讀死前書。鄰家人喜添新贖，小市奴歸得早蔬。但使身安歲中熟，敢辭老境落樵漁。

雨後出門散步

細水穿沙溜，殘雲扶雨歸。不成遊酒市，且作倚漁扉。老大徂年速，羈窮壯志違。破裘雖百結，猶勝泣牛衣。

又

病葉常先賈，寒潮只暗生。扶衰賴藥石，隨意出柴荆。細路牛欄濕，疎籬續火明。枯榮不須計，千古一棊枰。

秋夜示兒輩

吳下當時薄阿蒙，豈知垂老歎途窮。秋砧巷陌昏昏月，夜燭簾櫳裊裊風。縮項鱸魚收晚釣，長腰粳米出新墾。兒曹幸可團欒語，憂患如山一笑空。

七十二歲吟

七十人言自古稀。我今過二未全衰。讀書似走名場日。許國如騎戰馬時。秋晚雁來空自感。夜闌酒盡不勝悲。渭濱星實逾千載。一表何人繼出師。

兩夜讀書

風雨瀕洞吞孤村。讀書擁褐不出門。歷觀忠邪見肝肺。直與治亂窮根原。傳巖之野感帝夢。此事難以今人論。危冠長劍一見用。萬里耕桑吾道尊。

又

一燈如螢雨潺潺。老夫讀書蓬戶間。但與古人對生面。那恨鏡裏凋朱顏。功名本來我輩事。人自踳蹬天何慳。君看病驥瘦露骨。不思仗下思天山。

秋晚

聚落蕭條古埭東。蘆藩蓬戶臥衰翁。井桐葉盡新霜後。衣杵聲繁夕照中。身似敗棋難復振。心如病木已中空。村醪酸澀君無笑。也解燈前作臉紅。

新菊

已過重陽十日期。菊叢初破兩三枝。自憐短鬢蕭蕭白。不似黃花驛裏時。黃花驛在岐鳳間。予嘗過之。

又

老去流年不耐催。微霜又見菊花開。莫言冷落西風晚。也有飛飛小蝶來。

九月二十八日五鼓起坐抽架上書得九域志泫然有感

一事無成老已成。不堪歲月又崢嶸。愁生新雁寒初下。睡起殘燈曉尚明。天地何由容醜虜。功名正恐屬書生。行年七十初心在。偶展輿圖淚自傾。

題橋南堂圖

平生不識橋南路。聞道清流帶煙樹。今朝開卷一欣然。恍若身親到其處。徐郎獨立疑如山。招不能來塵不去。舊居萬瓦碧浮煙。結茅卻就橋南住。雪盡春生水似藍。想君清獻釣魚菴。道上紅塵高十丈。斷無一點到橋南。

題吳參議達觀堂堂勝蓋朱希真所作也僕少亦辱知於朱公故尤感慨云

中原遺老雒川公。鬢鬚白盡雙頰紅。揮毫爲君作齋勝。想見眼中餘子空。餘子碌碌何足數。獨付莊周賈生語。看君踐履四十年。始知此公不輕許。公今度世爲飛仙。開卷使我神凜然。清時臺省要才傑。諸公誰致雒川客。

舍北搖落景物殊佳偶作

今年冬候晚。仲月始微霜。野日明楓葉。江風斷雁行。窮塗多藉躡。老境易悲傷。自笑詩情嬾。蕭然舊錦囊。

路擁新霜葉。溪餘舊漲沙。栖鳥初滿樹。歸鴨各知家。世事元堪笑。吾生固有涯。南村聞酒熟。試遣小僮賒。

又

小聚鷗沙北。橫林蟹舍東。船頭眠醉叟。牛背立村童。日落雲全碧。霜餘葉半紅。窮鱗與倦翼。終勝在池籠。

又

屋角成金字。溪流作縠紋。斜通小橋路。半掩夕陽門。孤艇衝煙過。疎鐘隔塢聞。杜門非獨病。實自厭紛紛。

又

草徑人稀到。柴扉手自開。林疎鶉小泊。溪淺鷺頻來。簷角除瓜蔓。牆隅斲芋魁。東鄰臠肉至。一笑舉新醅。

自嘲

身見紹興初。改元百罹敢料至今存。生涯破碎餘龍具。學問荒唐守兔園。獨立未除還笏氣。餘生猶待闔棺論。北窗燈暗霜風惡。且置孤愁近酒樽。

作夢

作夢今逾七十年。平生懷抱尚依然。結茅杜曲桑麻地。覓句灞橋風雪天。驃騎向來求作佛。淮南末路望登仙。世間妄想何窮盡。輸與山翁一醉眠。

夜坐

杳杳霜鐘十里聲。娟娟江月半窗明。陳編欲絕猶堪讀。微火相依更有情。九曲煙雲新散吏。時方被命再領武夷祠祿。百年鉛槧老諸生。頽然待旦君無笑。尚勝聞雞賦早行。溫岐詩云：雞聲茅店月。人迹板橋霜。唐人早行絕唱也。

北園雜詠

西村林外起炊煙。南浦橋邊繫釣船。樂歲家家俱自得。桃源未必是神仙。

又

舍北橋東幽事多。老夫飯飽得婆娑。茅簷日落聞春相。荻浦煙深有櫂歌。

又

小橋密接西岡路。支徑深通北嶮村。老子意行無遠近。月中時打野人門。

又

東吳霜薄富園蔬。紫芥青菘小雨餘。未說春盤供采擷。老夫湯餅亦時須。

又

鉏麥家家趁晚晴。築陂處處待春耕。小槽酒熟豚蹄美。剩與兒童樂太平。

又

閑伴鄰翁去荷鋤。林疎歷歷見村墟。怪生白鷺飛無數。水落灘生易取魚。

又

短筇行樂出柴荆。雪意闌珊卻變晴。林際已看春雉起。屋頭還聽歲豬鳴。

又

歲殘已似早春天。隔水橫林一抹煙。聞道隸西梅半吐。攜兒閑上釣魚船。

又

白髮蕭蕭病滿身。凍雲野渡正愁人。揚鞭大散關頭日。曾看中原萬里春。

又

暮年身似一虛舟。付與滄波自在流。垂地雪雲吹不散。且傾桑落贈槎頭。

龜堂獨坐遣悶

髮已凋疎齒已搖。高談誰與慰無聊。苦心雖嘔何由出。病骨非讒亦自銷。玉雪細塵烹瑞草。煙脂小把斷靈苗。防風苗色紅如麝。脂可作蘆。賀公吳語吾能似。太息遺魂不可招。

又

放逐還山八見春。枯顛槁項雪霜新。大牀不解除豪氣。凡眼安能識貴人。食有淖糜猶足飽。衣存短褐未全貧。北窗坐臥君無笑。拈起烏藤捷有神。

復竊祠祿示兒子

得飽不啻足。閉門還讀書。翁猶羹不糝。兒固食無魚。袞繡曷加我。箠瓢常晏如。人生隨所遇。勿替此心初。

隴頭水

隴頭十月天。雨霜壯士夜。挽綠沉槍。臥聞隴水思故鄉。三更起坐淚數行。我語壯士勉自彊。男兒墮地志四方。裹尸馬革固其常。豈若婦女不下堂。生逢和親最可傷。歲輦金絮輸胡羌。夜視太白收光芒。報國欲死無戰場。

雪歌

黑雲黯黯如鷗鷺。急霰颯颯疑投沙。初聞萬竅號地籟。已見六出飛天花。寧論異事吠羣犬。且喜和氣連千家。穿簾投隙矜嫵媚。平坑塞谷迷谿沓。遙遙林塔出玉筍。渺渺江路蟠脩蛇。扣門方擬貰鄰酒。篝火更欲尋僧茶。懸知朝士集闕角。靴聲入賀趨正衙。吾衰久矣尙何說。所幸一稔均幽遐。

春近

短褐枯筇老病身。龍鍾也復喜新春。已知不解多年住。且作都無一事人。簷角鳥聲呼醉夢。室中花氣襲衣巾。朝來更有欣然處。一筇山蔬勝八珍。

望永阜陵

聖主乘乾臨斧屐。小臣承詔上丹墀。寧知齒豁頭童後。更遇天崩地陷時。泣至眼枯無血續。夢隨魂斷獨心知。白頭才盡空濡筆。寧繼生民下武詩。

初拜再領祠宮之命有感

黃紙初開喜可知。追懷平昔卻成悲。生當京國承平日。仕及皇家再造時。小草出山初已誤。斷雲含雨欲何施。兒孫賀罷仍無事。卻赴幽人把釣期。

醉中信筆作四絕句既成懼觀者不知野人本心也復作一絕

麥野桑村有酒徒。過門相覓醉相扶。朱門日日教歌舞。也有儂家此樂無。

又

過得一日過一日。人間萬事不須謀。鄰家幸可賒芳醞。紅蕊何曾笑白頭。

又

今朝賣穀得青錢。自出街頭買彘肩。草火燎來香滿屋。未容下筯已流涎。

又

老覺人間足畏塗。怕人渾似怕於菟。晴明頗動青鞵興。先探門前有客無。

又

治道巍巍本易成。狂言安得略施行。太平事業人皆見。不計封倫死與生。

臘月十九日午睡覺復酣臥至晚戲作

枕痕著而眼芒。羊欲起元無抵死忙。擁被卻尋初斷夢。掩屏重撥欲殘香。雪雲雖散寒猶緊。春意將回晝已長。老去此身無著處。華胥真恐是吾鄉。

睡起至園中

春風忽已遍天涯。老子猶能領物華。淺碧細傾家釀酒。小紅初試手栽花。野人易與輸肝肺。俗語誰能挂齒牙。更欲世間同省事。勾回蟻戰放蜂衙。

北園離外放步

北園西出路逶迤。荆作門扉枳縛籬。鋤麥正忙人滿野。營巢未定鵲爭枝。招呼父老嘗新釀。約束兒童築壞陂。遇興闌行使終日。隔溪積火已參差。

歲暮獨酌感懷

明時頻忝武夷仙，俯仰人間只自憐。
總角回思如昨日，挂冠過限已三年。
病多晴日思行藥，睡少清宵學坐禪。
更歎衰孱不禁酒，地黃一盞卽頽然。

盆池

雨送疎疎響，風吹細細紋。
猶稀綠萍點，已映小魚羣。
傍有一拳石，又生膚寸雲。
我來閑照影，一笑整綸巾。

對食

蓬蘽生庭葉擁堦，經旬飯豆爨枯藍。
烟霽舊謂行夷路，薪水今悲繫病懷。
夢裏百年元易過，人間萬事苦難諧。
癡兒自墮闍黎計，歡喜聞鐘已過齋。

蹭蹬

少慕功名頗自奇，一生蹭蹬鬢成絲。
市樓酒美貧何預，斗柄春回老不知。
黑幟遊魂應有數，白衣效命永無期。
魚梁東畔牛欄北，舉世誰能識此悲。

海棠圖

人間奇草木，天必付名流。
菊待陶元亮，竹須王子猷。
我爲西蜀客，辱與海棠遊。
再見應無日，開圖特地愁。
丁巳正月二日，雞初鳴，夢至一山寺，名鳳山，其尤勝處曰味軒，予爲賦詩，既覺不遺一字。

初春

已窮阿閣勝，更作味軒遊。
不盡山河大，無根日月浮。
吾身元是幻，何物彊名愁。
久覓卓菴處，是間應可留。
誰把鵝黃染柳絲，似催鄰曲蹋青期。
已忘萬里封侯志，但憶千回上樹時。
朝雨池塘光潑灑，暮煙樓觀碧

參差紫姑一作行藏欲問還休去身世從來心自知

雨中作

三日雨頻作昏昏饒睡眠泥深散酒市風惡惱燈天茅屋松明照茶鑊雪水煎山家自成趣撫枕寄悠然

又

浙浙連江雨悄悄一室幽茶甘留齒頰香潤上衣裘泥滓將雛鴨林樊喚婦鳩短章雖漫興聊足散吾愁

又

短鬢白如絲梅花似舊時掩屏愁入夢隱几雨催詩病爲陰天劇春緣閨歲遲非關畏車馬衰甚實難支

縱筆

氣本充天地書非汗馬牛人人見堯舜世世有巢由朝市紅塵鬧山村白髮稠所欣吾道在江漢古東流

題慧老芋巖

煨芋當時話已新如今拈出更精神十年相國非吾願半顆君當別付人

立春日

江花江水每年同春日春盤放手空天地無私生萬物山林有處著衰翁牛趨死地身無罪梅發京華信不通數片飛飛猶臘雪村鄰相喚賀年豐去冬無雪今年以正月十日巳時立春而平旦有雪數片猶臘雪也

病中作

老軀百病集。頽然仰天呼。汝病勿怨天。藥石幸可扶。寓形天地間。疾病誰能無。不從酒色來。病自無根株。但使元氣在。雖劇行當蘇。哀哉忿忿子。永棄元化爐。

又

牧羊知治民。解牛得養生。一理儻造微。何事不可明。我老抱病久。頗窺古人情。唐堯授四時。帝道所以成。周家七百年。王業本農耕。造端無甚奇。至今稱太平。人生正如此。默默要無營。心君但高拱。萬物安能櫻。花壓烏巾酒滿卮。舊逢春日恨春遲。如今病臥孤村裏。過了新春也不知。

立春日

又

慶元丁巳春來晚。人日初過近上元。空對一樽三太息。無人爲戴縷金旛。

北望

中原墮胡塵。北望但莽莽。蒼年死已盡。童稚日夜長。羊裘左其衽。寧復記疇曩。豈無豪俊士。憤氣塞穹壤。我欲友斯人。悲詫寄遐想。夢行黃河濱。雲開見仙掌。

上元夜作

百年古謂風前燭。我逾七十飯不足。亦知生世無工拙。久向人間耐榮辱。今年上元燈滿城。十里東風度。絲竹蓬窗溼薪不禦寒。獨取殘書伴兒讀。忽然得意見古人。半椀凍齋甘勝肉。書生蓋棺事未定。論著儻存終見錄。富貴無名豈勝數。意氣空能驕世俗。君不見拄天拄地邢君牙。不如詩人窮瞎張太祝。

長歌行

不羨騎鶴上青天。不羨峨冠明主前。但願少賒死。得見平胡年。一朝胡運衰。送死桑乾川。胡星澹無光。龍庭爲飛烟。西琛過葱嶺。東戍踰朝鮮。巍巍天王都。九鼎奠澗瀍。萬國朝未央。玉帛來聯翩。黃頭汝小醜。汗我王會篇。盡誅非無名。不足煩戈鋌。還汝以舊職。牧羊遼海邊。

讀書

兩眼欲讀天下書。力雖不迨志有餘。千載欲追聖人徒。慷慨自信寧免愚。置書不讀談虛無。誰其始爲此。創疽古時澤。被禽與魚。博施所以爲唐虞。正使老釋信不誣。爲我未免近楊朱。高軒大旆塞路衢。臺閣尊顯來于子。安得禹皐日。陳謨沾濡四表無。焦枯坐令事業兒。真儒老農不恨老耕鋤。

枕上作

龍鍾七十豈前期。矮帽枯筇與老宜。愁得酒卮如敵國。病須書卷作良醫。登山筋力雖猶健。閉戶工夫頗自奇。今日快情春睡足。臥聽簷鳥語多時。

書志

往年出都門。誓墓志已決。況今蒲柳姿。俛仰及大耋。妻孥厭寒餓。鄰里笑迂拙。悲歌行拾穗。幽憤臥鬣雪。千歲埋松根。陰風蕩空穴。肝心獨不化。凝結變金鐵。鑄爲上方劍。釁以佞臣血。匣藏武庫中。出參髦頭列。三尺粲星辰。萬里靜妖孽。君看此神奇。醜虜何足滅。

夜賦

簷滴新春雨。窗昏半夜燈。病無詩一字。窮賴酒三升。郡中月。設折酒九斗。日恰得三升。世路澀如棘。祠官冷欲冰。殘年只此是。年少解飛騰。

晚步

晚步清溪上。微陰忽快晴。鴉棲先小泊。魚暖已羣行。藥餌扶垂老。耕桑樂太平。非關戀鄉社。久客倦遐征。

漁歌

斜陽收盡暮煙青。嫋嫋漁歌起遠汀。商略野人何所恨。數聲哀絕不堪聽。

殘夢

少時鐵馬蹴河冰。老去摧藏百不能。風雨滿山窗未曉。只將殘夢伴殘燈。

書憤

白髮蕭蕭臥澤中。祇憑天地鑒孤忠。阨窮蘇武餐毘久。憂憤張巡嚼齒空。細雨春蕪上林苑。頽垣夜月洛陽宮。壯心未與年俱老。死去猶能作鬼雄。

又

鏡裏流年兩鬢殘。寸心自許尙如丹。衰遲罷試戎衣窄。悲憤猶爭寶劍寒。遠戍十年臨的博。壯圖萬里戰皋蘭。關河自古無窮事。誰料如今袖手看。

小舟遊西涇度西岡而歸

小雨重三後。餘寒百五前。聊乘瓜蔓水。閑泛木蘭船。雪暗梨千樹。烟迷柳一川。西岡夕陽路。不到又經年。

春行

九日春陰一日晴。強扶衰病此閑行。猩紅帶露海棠溼。鴨綠平堤湖水明。杜子美曉看紅溼處。花重錦官城。李太白蜀江紅且明。用溼字明字。可謂奪造化之功。世未有拈出者。酒賤柳陰逢醉臥。土肥稻壟看深耕。山翁莫道渾無用。解與明時說太平。

姜總管自築墓舍名繭菴求詩

君不見贅翁退隱眞皇時。繭室遺名星日垂。雖無豪士千車送。不媿高人一錫隨。又不見貞觀故人有王顯。抵老摧頹不作繭。一時戲語今尙傳。人生窮達誰能免。繭菴知君出游戲。壽過期頤乃常事。青松手種三千本。會看半空飄鼓吹。人老則衰君不然。快瀉玉船鯨吸川。釣璜遠祖應相似。八十方爲筮仕年。

湖上今歲遊人頗盛戲作

龍船看罷日平西。柳闇花穠步步迷。射的山前朱舫小。樵風溼上紫驢嘶。

又

畫船鼓吹載涼州。不到三更枉出遊。忽有歌聲出霄漢。誰家開宴五雲樓。

又

翠阜青林煙疊重。朱樓畫閣雨空濛。禹祠西走蘭亭路。一片湖山錦繡中。

又

臺府官醅歲歲新。蘭亭春勝鏡湖春。三山小瓮雖堪笑。也向湖邊作醉人。

賞花至湖上

吾國名花天下稀。園林盡日敞朱扉。蝶穿密葉常相失。蜂戀繁香不記歸。欲過每愁風蕩漾。半開却要雨霏微。良辰樂事真當勉。莫遣忽忽一片飛。

暮春

季子黃金盡。安仁白髮新。無情五更雨。便送一年春。難續西樓夢。空存北陌身。海棠應似舊。惆悵又成塵。

又

綠葉枝頭密。青蕪陌上深。江山妨極目。天地入孤吟。身已雙蓬鬢。家惟一素琴。世情君莫說。頭痛欲涔涔。

暮春

數間茅屋鏡湖濱。萬卷藏書不救貧。燕去燕來還過日。花開花落卽經春。開編喜見平生友。照水驚非曩歲人。自笑滅胡心尚在。憑高慷慨欲忘身。

此
页
空
白

陸放翁集

劍南詩稿

卷第三十六

九里

破曉憑鞍野興濃。鷺飛先我過村東。綠鍼細細稻浮水。絳雪紛紛花舞風。陌上鞦韆喧笑語。擔頭瓶甬簇青紅。誰知老子裴回意。絕愛山橫淡靄中。

清明

氣候江吳異。清明乃爾寒。老增丘墓感。貧苦道途難。燕子家家入。梨花樹樹殘。一春回首盡。懷抱若爲寬。

一百五五行

一百五日東郊時。陂塘水滿雨如絲。人家青煙不禁火。俚俗豈復思子推。舊墳年多木已拱。新墳積土高。纍纍老鴉飛。嗚啣肉去。紙錢雨溼挂樹枝。深松茂柏死自樂。地下應笑生人悲。眼中青山身後塚。此事決定君何疑。風吹雲破日下照。小灘碎礫光陸離。停車暫憩道傍舍。解囊且補殘春詩。

送李憲被召舊與其先侍郎遊從

早謁龍門鬢未秋。暮年乃復接英遊。海瀕已幸見公子。瓜壘仍煩訪故侯。霖雨卽陪諸老進。德星肯爲一方留。西城柳色青如許。欲挽長條特地愁。

初夏

已過浣花天。行開解粽筵。店沽浮蠟酒。步屐載秧船。古俗交情久。豐年樂事偏。出波蓴菜滑。上市鯪魚鮮。僧閣梅山麓。漁扉禹廟壩。丹青不可畫。得句一欣然。

幽居

社結山林友。家藏種樹書。蔽牀欣卜宅。容駟笑高閭。薄飯頻盃韭。單衣旋製練。東家借蹇罷。南市買船初。美景遊俱遍。鄰翁好不疎。時時得乘興。豈獨愛吾廬。

閑適

朝讀易一卦。時鈔史數行。花開聊把酒。睡起獨焚香。寂寂市聲遠。悠悠村日長。吾衰尙何恨。兒女解耕桑。

病中夜賦

客如病鶴臥還起。燈似孤螢闔復開。首着花催春事去。梧桐葉送雨聲來。榮河溫洛幾時復。志士仁人空自哀。但使胡塵一朝靜。此身不恨死蒿萊。

閑身

炊烟漠漠閉柴荆。聊用閑身答太平。重碧飛觴心未老。硬黃臨帖眼猶明。吳蠶滿箔含桃熟。壠麥登車搏黍鳴。補劓息黥今有地。問君何處用虛名。

書感

奪璧元知價不贖。屠龍誰信本無求。哦詩聲裏歲時速。憂國淚邊天地秋。已欠謝安俱泛海。況無王粲與

登樓此身著處憑君記。萬里烟波沒白鷗。

衰病

衰病集餘日推移成老翁。衡門隱者趣大布。古人風。几杖呻吟裏。山川莽蒼中。從來世緣薄。不是坐詩窮。

雜題

少談王霸謀身拙。晚好詩騷學道疎。賴有一籌差自慰。閉門不作子公書。

又

莫笑花前白髮新。宣和人醉慶元春。何時道路平如砥。卻就清伊整幅巾。

又

三生元是出家人。一念差來墮薦紳。二寸楮冠雙草屨。天公還我水雲身。

又

黃庭兩卷伴身閑。盤篆香殘日未殘。泛泛孤身似萍葉。始知天地不勝寬。

又

年華偃蹇留不住。鬢雪縱橫耘更多。樂天不生夢得死。恨無人續竹枝歌。

又

年來世事掃除盡。猶有閑吟頗自奇。安得陟釐九萬箇。爲君盡寫暮年詩。

自傷

朝雨暮雨梅子黃。東家西家鬻蘭香。白頭老嫗哭空堂。不獨悼死亦自傷。齒如敗屨鬢如霜。計此光景寧久長。扶杖欲起輒仆牀。去死近如不隔牆。世間萬事俱茫茫。惟有進德當自強。往從二士餓首陽。千載骨朽猶芬芳。

雨後絕涼偶作

槐陰日色薄。桐葉雨聲長。林下有餘適。城中無此涼。浮瓜寒水碧。斲藥小鉏香。未許陶潛達。華簪何足忘。
陶詩云聊用忘華簪。

村居

黍酒濃浮瓮。瓜蒞綠映槃。老便藜粥美。病喜粟漿酸。紗帽新裁穩。緇袍舊製寬。村居亦何好。聊用發詩端。

久雨

水長平侵岸。雲低半失村。菰蒲亂鳧鴨。泥潦困雞豚。弄筆排孤悶。煎茶洗睡昏。荒郊多狗盜。及早閉柴門。

七十三吟

七十三年事事新。涵濡幸作六朝民。髮無可白方爲老。酒不能除始覺貧。末路已悲身是客。此心猶與物爲春。柴門勿謂常岑寂。時有鄉鄰請藥人。

會稽

海近風雲惡。城高鼓角雄。山川橫慘淡。樓閣半虛空。故國千年鶴。征途萬里蓬。餘生猶幾日。盡合付杯中。

泛舟

山照澄波鬢鬢青。新蒲梢上立蜻蜓。孤舟每爲尋詩出，輸與漁翁醉不醒。
夜觀子虛所得淮上地圖

閉置空齋清夜徂。時聞水鳥暗相呼。胡塵漫漫連淮潁，淚盡燈前看地圖。

水村

家住煙波似畫圖。殘年不復歎頭顱。深深竹塢見螢度，翳翳孤叢聞鳥呼。十里笳聲上雲漢，一空星影落陂湖。天公著我非無地，卻悔從來錯怪渠。

題菴壁

萬里東歸白髮翁。閉門不復與人通。綠樽浮蟻狂猶在，黃紙棲鴉夢已空。薄技徒勞真刻楮，浮生隨處是飛蓬。湖邊吹笛非凡士，儻肯相從寂寞中。每風月佳夕，輒有笛聲起湖之西南，莫知何人意其隘者也。

又

俠氣當年蓋五陵。今成粥飯在家僧。身存但倚貧非病，齒落方慚豁可憎。踏月閑穿雙草屨，聽琴橫按一枯藤。年來萬事都經遍，強笑看人獨未曾。

晚歸舟中作

路入芙蓉浦。家依糴種村。急灘雙鷺立，平野萬鷗翻。市散人爭渡，僧歸寺掩門。淒涼誦新句，招得欲殘魂。

送嚴居厚棄官歸建陽溪莊
曼容不過六百石，淵明僅留八十日。寥寥千載有兩公，海內至今推絕識。放翁貪祿老始歸，自今不作一

錢直見人勇退輒欣慕。亟欲起拜忘衰疾。吾廬近在官道傍。門外未掃車馬迹。溪莊有地肯見分。會結茅齋傍青壁。

次朱元晦韻題嚴居厚溪莊圖

鶴俸元知不療窮。葉舟還入亂雲中。溪莊直下秋千頃。贏得閑身伴釣翁。

夢中遊禹祠

湖上無人月自明。夢中髣髴得閑行。庭空滿地楸梧影。風壯侵雲鼓角聲。世異客懷增慘愴。秋高歲事已崢嶸。長歌忽遇騎鯨客。喚取同朝白玉京。

感懷

老抱遺書隱故山。鏡中衰鬢似霜菅。規模肯墮管蕭亞。夢想每馳河渭間。竹帛竟孤千載事。江湖敢恨一生閑。殘功賴有吾兒續。把卷燈前爲破顏。

酒熟

侯印何由得酒泉。小槽新熟亦欣然。放翁達處過彭澤。客自在傍吾自眠。

病起遊近村

老人摧頹絕造請。門設常關草生徑。一年三百六十日。三百五十九日病。一日不病出忘歸。繞村處處扣柴扉。水東溪友新酒熟。舍北園公菘菜肥。平生養氣心不動。黜陟雖聞了如夢。從今病愈卽相尋。共聽糟牀滴春瓮。

秋夜讀書示兒子

久病少睡眠。往往中夕起。呼燈取書讀。不能盡數紙。喟然置之歎。生世後闕里。持蠶欲測海。遽復迫老死。人生各有業。唐虞本吾事。詩書脫秦厄。天意固在此。異端塞穹壤。作俑孰爲始。神禹逝不還。吾其如涿水。丘塚相望故舊空。放翁猶復寄滬中。少眠危坐待窗白。得酒細傾生頰紅。雖媿蛟龍起雲雨。尙勝魚鳥困池籠。秋來莫道無遊興。野渡村橋處處通。

秋晚書感

王成之給事挽歌辭

昔泝黃牛峽。曾經白鷺洲。從容參步武。談笑極風流。晚預蓬萊客。時從諛祓遊。揮毫看半醉。追想只添愁。

又

詩騷湘水客。風度曲江公。一夕南樓去。千秋東省空。囊封震朝右。墨敕絕宮中。贈極文昌貴。君恩厚飾終。

書南堂壁

偶築湖邊舍。侵尋四十春。山丘未蘊骨。詩酒尙關身。樵路霜侵屨。漁舟雨墊巾。忝蒙鄉黨敬。六聖有遺民。予生於宣和乙巳歲。

又

荒寒淺村步。隱翳小茅茨。偶逐漁樵住。都忘歲月移。閑惟接僧話。老始愛陶詩。蒼齒猶須幾。羸然敢自期。

秋晚

寒渚雁新下。壞牆蛩夜吟。庭莎欲無色。園樹不成陰。露灑孤臣淚。馳驅壯士心。明朝鏡中髮。飽受雪霜侵。

晨起待子聿歸

老人盥櫛罷。坐待汝晨省。忽思隔重關。懷抱增耿耿。小雨暗北窗。誰與慰淒冷。卷書默袖手。奈此清晝永。懸知河橋下。亦已喚胙媪。長路歸當飢。呼童具湯麩。

信筆

吾生本暫寓。無日不可死。區區遲速間。何地著愠喜。朝移一株石。暮引一脈水。是中亦何樂。一笑聊爾耳。

有酒或一醉。無酒終日閑。雨足通南澗。木落見西山。飯飽出柴門。本散腰脚頑。偶然遇野人。笑語欲忘還。

龜堂東窗戲弄筆墨偶得絕句

身如蠶老已三眠。一繭何妨自裏纏。豆飯藜羹支永日。檜籬竹屋送餘年。

又

一樽且復罄幽歡。不是癡頑強自寬。死去何憂累兒子。千錢可買市成棺。

又

北菴睡起坐東廂。無事方知日月長。天與詩人送詩本。一雙黃蝶弄秋光。

又

老衰有臉詩先退。勳業無心夢漸稀。淺浦小山孤絕處。數家烟火自相依。

又
老人孤寂似無家。午枕初回日已斜。偶得風和身亦健。舍南舍北探梅花。

次呂子益韻

呂子奇才非復常。詩來起我醉中狂。大音誰和陽春曲。眞色一空時世粧。東閣獻諛無轍迹。西湖寄傲有杯觴。病懷正待君湔祓。墨妙時須寄數行。

舍北行飯書觸目

晚飧初潑一甌茶。曳杖閑行興未涯。烟樹參差墨濃淡。風鴉零亂字橫斜。夕陽偏傍平橋路。寒蝶猶依晚菊花。堪笑衰翁耐荒寂。短衣霑露未還家。

又

落雁昏鴉集遠洲。青林紅樹擁平疇。意行舍北三叉路。閑看橋西一片秋。小婦破烟撐去艇。丫童橫笛喚歸牛。形容野景無餘思。自怪癡頑不解愁。

明日復得五字

羸病偶不死。端居思出遊。山寒麥笛短。天闊雁聲遒。學劍元癡絕。脂車久罷休。鄰翁獨眷眷。同好自相求。

又
腰痛今朝愈。褰裳野興長。黃鴉號亂篠。碧蝶繞枯桑。陂壞良疇廢。村空舊路荒。十年逢九潦。誰與問蒼蒼。

十一月二十二日夜待子聿未歸

寒爐火半銷。壞壁燈欲死。人行籬犬吠。月出林鵲起。吾兒信偶非。長路老子可憐煎百慮。人人父子與我同。立朝勿遣交河戍。

南窗

暄妍一窗日。的皪數枝梅。小鼎煎茶熟。幽人作夢回。新春又將近。晚景但堪哀。用底舒懷抱。殘書闔復開。

幽居

衰鬢蕭條笑舊青。一枝棲穩寄餘齡。徐行不媿衣露肘。安臥何妨席見經。視客恰如堂上燕。捐書那願案頭螢。時時開說前賢事。聊遣鄉閭識典刑。

春近山中即事

乞得松楠手自栽。結茅聊喜避風埃。百年孰與夢長短。萬事只如雲去來。雪後梅花初半吐。身閑樽酒盍頻開。錦官城外青羊路。常記當年小獵回。

又

節物貧家有故常。春盤臘粥逐時忙。悠悠歲月催雙鬢。草草雞豚薦一觴。人意自殊平日樂。梅花寧減故時香。小園新展西南角。挂樹青蘿百尺長。

又

世亂王孫泣路隅。時平野老醉相扶。種橙正可三年大。愛竹何曾一日無。細路迢迢上雲雨。輕舟渺渺入菰蒲。暮歸剩欲談幽勝。安得丹青爲作圖。

雪夜感舊

江月亭前樺燭香。龍門閣上馱聲長。亂山古驛經三折。小市孤城宿兩當。晚歲猶思事鞍馬。當時那信老耕桑。綠沉金鎖俱塵委。雪灑寒燈淚數行。

將進酒

我欲挽住北斗杓。常指蒼龍無動搖。春風日夜吹草木。只有榮盛無時凋。我欲剗斷日行道。陽鳥當空月杲杲。非惟四海常不夜。亦使人生失衰老。如山積麴高崔嵬。大江釀作蒲萄醅。頽然一醉三千杯。借問白髮何從來。

歲暮懷張季長

已迫桑榆景。況逢梅柳時。功名終自誤。老病獨如期。醉眼嫌天迤。孤吟覺鬼悲。唐安在何許。無字寄相思。

謝朱元晦寄紙被

木枕藜牀席見經。臥看飄雪入窗櫺。布衾紙被元相似。只欠高人爲作銘。

又

紙被圍身度雪天。白於狐腋軟於綿。放翁用處君知否。絕勝蒲團夜坐禪。

送王季嘉赴湖南漕司主管官

它人作陵邑。榜笞朝暮急。王子乃不然。袖手萬事集。它人西入都。競裁丞相書。王子掉頭去。長沙萬里餘。問子謀身無。乃左凜如霜。松姿磊砢。屈原賈誼。死有靈。計此兩人心。獨可。

菴中夜興

示疾維摩無侍者。夜闌自掩草菴門。有情梅影半窗月。相應雞聲十里村。紙帳擁裘尋斷夢。地爐撥火煖殘樽。扶衰又踐新春境。萬事元知不足論。

初春欲散步畏寒而歸

峭寒漠漠入重貂。酒力欺人凝不消。春困苦多無處賣。客魂欲斷倩誰招。一溪水淺梅枝瘦。四野雲酣雪意驕。欲到前村無奈嬾。卻尋歸路度西橋。

憶昔

憶昔從戎出渭濱。壺漿馬首泣遺民。夜棲高冢占星象。晝上巢車望虜塵。共道功名方迫逐。豈知老病只逡巡。燈前撫卷空流涕。何限人間失意人。

戊午元日讀書至夜分有感

七十年來又四年。雨聲燈影故依然。未收浮世風漚夢。尙了前生蠹簡緣。老學辛勤那有補。舊聞零落恐無傳。先師鉢袋終當付。歎息誰能共著鞭。

又

強戴羅旛怯歲增。光陰堪歎捷飛騰。簷間點滴新春雨。窗下青燐半夜燈。傍架討尋書散亂。倚屏吟嘯髮鬢髻。極知老境惟當佚。絕學端居恨未能。

雜感

志士山棲恨不深。人知已是負初心。不須先說嚴光輩。直自巢由錯到今。

又

勸君莫識一丁字。此事從來誤幾人。輸與茅簷負暄叟。時時睡覺一頻伸。

又

世事紛紛無已時。勸君杯到不須辭。但能爛醉三千日。楚漢興亡總不知。

又

百年鼎鼎成何事。寒暑相催卽白頭。縱得金丹真不死。摩挲銅狄更添愁。

又

世間魚鳥各飛沉。茅屋青山無古今。畢竟替他愁不得。幾人虛費一生心。

又

一杯濁酒卽醺然。自笑閑愁七十年。今日出門天地別。此身如在結繩前。

又

山人那信宦塗艱。強著朝衣趁曉班。豪氣不除狂態作。始知只合死空山。

又

老子傾囊得萬錢。石帆山下買烏犍。牧童避雨歸來晚。一笛春風草滿川。

又

故舊書來訪死生。時聞剝啄叩柴荆。自嗟不及東家老。至死無人識姓名。

又

忍窮待死十年間。老子誰知老更頑。溪友留魚供晚酌。鄰僧送米續朝餐。

歎老

朋儕什九墮丘墟。自笑身如脫網魚。委命已悲吾道喪。垂名真負此心初。齒殘僅可決滯肉。眼澀知難讀細書。家事豈容關老子。兒曹努力事耕鋤。

朝飢食齋麵甚美戲作

一杯齋餽。老子腹膨脹。坐擁茅簷日。山茶未用烹。

又

一杯齋餽。手自芼油葱。天上蘇陀供。懸知未易同。

漁隱堂獨坐至夕

斜倚筇枝岸幅巾。閉門久已謝知聞。中庭日正花無影。曲沼風生水有紋。三尺桐絲多靜寄。一樽玉盃足幽欣。世間萬事都忘盡。惟向閑中屢策勳。

讀書

讀書肝膽尚輪囷。蠹簡堆中著此身。飽識三千餘歲事。已爲七十四年人。鏡中衰鬢難藏老。海內虛名不救貧。只欲從今都掃盡。剩沽春酒答新春。

北望

昔我初生歲中原失太平。寧知墓木拱。不見塞塵清。京洛無來信。江淮尙宿兵。何時青海月。重照漢家營。

蘭

南巖路最近。飯已時散策。香來知有蘭。遽求乃弗獲。生世本幽谷。豈願爲世娛。無心託階庭。當門任君鋤。

古梅

梅花吐幽香。百卉皆可屏。一朝見古梅。梅亦墮凡境。重疊碧蘚暈。天矯蒼虬枝。誰汲古礪水。養此塵外姿。

山脚散步由舍北歸

偶散東岡步。因成北渚遊。鴉昏先小泊。魚暖欲羣浮。緩曳紅藤杖。斜披紫綺裘。閑身病亦可。隨處得無愁。

又

幽徑欣行藥。衰年困負薪。梅殘香更遠。草動綠初勻。魚似濠梁樂。鷗如海上馴。度橋成一笑。微健及新春。

又

空碧升團月。江郊弄夕霏。生涯今始是。年事古猶稀。冰解魚初躍。風和雁欲歸。興來忘遠近。草露已沾衣。

寄題連江陳氏拂石軒李似之嘗有歌詞

平生聞說西江水。百丈齋淪深見底。漁舟來去白鷗飛。上有綸巾隱君子。作詩自許輩陶謝。歎傲煙雲弄清泚。紛紛聲利滿人間。耳本不聞安用洗。李公過江號高流。逸氣凜凜橫清秋。沙邊一笑偶邂逅。掃石蔭松相獻酬。浩歌聲斷七十載。尙寄萬壑風颼颼。放翁老憊狂未歇。買船欲作西江遊。

得張季長書以大蓬見稱蓋以予寄祿官視昔祕書監也因作五字寄之

老病江湖上煩公問死生。仙蓬雖誤到殘錦只虛名。近歲裁損濫恩所謂十色錦者所存亡幾點滴二更雨淒涼萬里情向來遺恨極不遂隱青城。

病足累日不能出巷門折花自娛

頻報園花照眼明。蹒跚正廢下堂行。擁衾又聽五更雨屈指元無三日晴。不奈病何拋酒醜。麤知春在賴鶯聲。一枝自浸銅瓶水喜與年光未隔生。

書意

帝命煌煌敕百神。方傾天漢洗胡塵。但須荊州一好漢安用商山四老人。竹帛恐貽千古笑。江湖未媿百年身。此心欲與何人說。病足呻吟又過春。

新燕

天工不用剪刀催。山杏溪桃次第開。要信今年春事早。社前十日燕新來。

北巖采新茶用忘懷錄中法煎飲欣然忘病之未去也

槐火初鑽燧。松風自候湯。攜籃苔徑遠。落爪雪芽長。細啜襟靈爽。微吟齒頰香。歸時更清絕。竹影踏斜陽。

連日至梅仙塢及花涇觀桃花抵暮乃歸

千載桃源信不通。鏡湖西塢擅春風。舟行十里畫屏上。身在西山紅雨中。俗事挽人常故故。夕陽歸櫂莫忽忽。豪華無復當年樂。爛醉狂歌亦足雄。

又

桃花塢近釣魚磯。不比劉郎萬里歸。水底紅雲迷醉眼。樽前絳雪點春衣。病依几杖猶能出。老愛風光未忍違。天借清遊每窮日。夜深炬火候柴扉。

此页空白

陸放翁集

劍南詩稿

卷第三十七

病中作

破裘縫更暖。糲食美無餘。摩詰病說法。虞卿窮著書。身羸支枕久。足蹇下堂疎。今日晴窗好。幽懷得好摠。

題郭太尉金州第中至喜堂

安康甲第天下傳。玉題繡井摩雲煙。落成鼓吹震百里。意氣欲壓秦山川。第中樂堂最宏麗。奎畫岌岌蛟龍纏。知公所喜在勇退。顧視解組如登仙。公心雖爾天未可。終倚北伐銘燕然。十年宿衛功第一。小却臥護長淮邊。帳前犀甲羅十萬。幕下珠履逾三千。願公小緩高枕計。卽今河雒猶腥羶。出師雞鹿擁皂纛。畫象麒麟峨玉蟬。是時公喜客亦樂。爲公滿瀉黃金船。

暮春

山陰又見暮春初。禁火園林社雨餘。世事不妨隨日改。年光未遽與人疎。鼓香下箸嘗蓴菜。鹽白開奩得鬻魚。草草一杯終可喜。數間茅屋亦吾廬。

小園新晴

散髮陽狂不計年。園林只在小窗前。斷虹千尺卷殘雨。新月一鉤生暮天。臘釀拆泥留客醉。山茶落禮喚

兒煎物華心賞元無盡。剩住人間作地仙。

又

衰病猶煩藥石功。殘春終日在園中。地偏幽草爲誰綠。雨霽新花如許紅。足蹇扶持須篋子。杯深暖熱賴鄰翁。此身雖向閑中老。若比休休却未同。
司空表聖休休亭歌曰：休休休，莫莫莫，伎倆雖多性靈惡，賴是常教閑處著。

春晚感事

據鞍千里何曾病。閉戶安眠百病生。每憶嘉陵江上路。插花藉草醉清明。

又

寒食梁州十萬家。鞦韆蹴鞠尙豪華。犢車輕轆歸城晚。爭碾平蕪入亂花。

春晚園中作

杏子青青梅子酸。山園轉眼又春殘。老懷豈復小年樂。病骨不禁清曉寒。學術背時甘義墮。功名無路久心闌。蠶收麥熟吾何恨。但遣銀杯似海寬。

題夷堅志後

筆近反離騷。書非支諾皋。豈惟堪史補。端足擅文豪。馳騁空凡馬。從容立斷鼇。陋儒那得議。汝輩亦徒勞。

幽居

小舫藤爲纜。幽居竹織門。短籬圍藕蕩。細路入桑村。魚膾槎頭美。醅傾粥面渾。殘年謝軒冕。猶足號黎元。

聞鳥聲有感

小市提壺酤濁酒。東陂脫袴插青秧。歸來靜臥茅簷底。如覺閑中白日長。

又

流年冉冉去無情。日夜溪頭布穀聲。城郭雖存人換盡。令威應悔學長生。

與子虞子坦坐龜堂後東窗偶書

時鳥朝暮鳴芳草。日夜生東風。捨我去。歲律俄崢嶸。綴簇繭白白。出陂稻青青。鳴機織苧葛。暑服亦已成。小兒結山房。窗戶頗疎明。萬事不挂眼。朱黃浩縱橫。佳哉東北風。吹下讀書聲。功名詎敢望。且復慰父兄。是日午間。聞子聿在山半讀書。相與欣然。

行年

行年過七十。與世兩相忘。墨沼龜魚樂。藥園芝朮香。吾生一蟲臂。世路幾羊腸。楮弁新裁就。翛然學道裝。新作兩褚冠。

東窗小酌

烏帽翩僂白苧涼。東窗隨事具杯觴。流年不貸世人老。造物能容吾輩狂。藤葉成陰山鳥下。檜花滿地蜜蜂忙。何人畫得農家樂。咿軋繰車隔短牆。

又

市塵遠不到林塘。嫩暑軒窗晝漏長。蠶妾趁時爭鹽繭。農夫得雨正移秧。徒行有客驚頑健。爛醉無人笑

老狂。卻掩菴門徑投枕。鼾聲雷起撼蓼牀。

西林傳菴主求定菴詩

粥後鐘魚未動時。夜燈仍對碧琉璃。不須更說能生慧。枯木寒灰也自奇。

又

業力驅人舉世忙。西林袖手一爐香。未能成佛渾閑事。十劫看渠坐道場。

夏日

將雛燕子漸離巢。過母龍孫已放梢。日出並湖初曬網。雨餘乘屋旋添茅。家貧舊業元知廢。身老微官久合拋。莫恨門前車馬絕。豈無農圃與論交。

又

過眼春光久已空。曬絲擣麥又匆匆。新泥滿路梅黃雨。古木號山月暈風。角黍菱新間鱸俎。靈符墨溼照房櫳。歲華不爲衰翁駐。且付餘生一笑中。

又

吳中五月暑猶微。竟日南堂坐掩扉。綠樹露一作霧。香鶯獨語。畫廊風惡一作急。燕雙歸。三千界內人人錯。七十年來念念非。投老萬緣俱掃盡。從今僧亦不須依。

又

雨斷雲歸旋作晴。尙餘紅溼在簾旌。燕雛掠地飛無力。梅子臨池墜有聲。米糲解包供午餉。萍齋榜枕析

朝醒。此翁不負頑軀處。捫腹時時繞舍行。

又

梅雨初收景氣新。太平阡陌樂閑身。陂塘漫漫行秧馬。門巷陰陰挂艾人。白葛烏紗稱時節。黃雞綠酒聚比鄰。掀髯一笑吾真足。不爲無錐更歎貧。

夜酌

酒淥孤燈夜。梅黃細雨天。聊成顧影醉。復作曲肱眠。腰下蘇秦印。囊中趙壹錢。丈夫隨所遇。底處不陶然。

夏夜

夏夜誰知亦自長。幽居渺在水雲鄉。月侵竹簾清無暑。風度衣篝潤有香。棲鵲自驚移別樹。流螢相逐過橫塘。放翁尙苦餘醒在。細綆銅餅落井牀。

又

山崦風生鷓鴣悲。柴門月上樹陰移。熏衣汗雨初乾後。把卷蚊雷不動時。孤悶難禁終歲病。浮生易滿百年期。釣竿只待清秋近。一棹煙波信所之。

又

展轉紗幮睡不成。一藤扶僂繞廊行。月昇雙鵲移枝宿。露下孤螢綴蔓明。汲井忽驚人已起。開門堪歎事還生。羽衣道帽從吾好。柏子煙中起磬聲。

又

龜息綿綿破五更。起扶藤杖並南榮。擇栖孤鵲尚三匝。司旦老雞俄一鳴。移坐徐看山月吐。脫巾聊受水風清。不知竟是真仙未。夜夜神遊白玉京。

泛舟

水鄉元不減吳松。短櫂沿洄野興濃。鬱鬱冬青森翠葆。離離夜合散紅茸。水涯多此二樹村。深初度穿林。笛寺近先聞出塢鐘。歸路夕陽猶滿岸。憑舷一笑覽衰容。

感舊

要識梁州遠。南山在眼邊。霜郊熊撲樹。雪路馬蒙氈。慘淡遺壇側。拜韓信壇至今猶存。蕭條古廟墟。沔陽有蜀後主所立武侯廟。百詩猶可想。歎息遂無傳。予山南雜詩百餘篇。舟行過望雲灘。墜水中。至今以爲恨。

又

夜涉南沮水。朝過小益城。梯山天一握。度棧土微平。雨近秦雲暗。霜高隴月明。至今孤夢裏。喝馬有遺聲。喝馬皆七字韻語。聞之悲愴動人。

又

早發金堆市。更衣石櫃亭。灘聲秋後壯。山色雨餘青。道潭愁車轍。橋危避駝鈴。功名竟何在。撫事感頽齡。

又

塵土暗貂裘。森然白髮稠。年光真袞袞。吾事竟悠悠。馬宿平沙夜。軍中馬及麻卒。夏夜皆露宿沙上。烽傳

絕塞秋平安火竝南山來。至山南城下。故人零落盡。追寫只添愁。

又

凜凜隆中相。臨戎遂不還。塵埃出師表。草棘定軍山。壯氣河潼外。雄名管樂間。登堂拜遺像。千載媿吾顏。

又

我思杜陵叟。處處有遺蹤。錦里瞻祠柏。綿州弔海棕。蹉跎悲櫪驥。感會失雲龍。生世後斯士。吾將安所從。

書喜

雨足郊原正得晴。地縣萬里盡春耕。陰陰阡陌桑麻暗。軋軋房櫓機杼鳴。亭鼓不聞知盜息。社錢易斂慶秋成。天公不負書生眼。留向人間看太平。

自詠

平生萬事付愁癡。兀兀騰騰到死時。夜踏亂雲過略約。曉分寒溜注軍持。束薪山客招烹石。渡海番僧乞製碑。作個生涯君勿笑。拄天勲業亦兒嬉。

露坐立秋前五日。

旋削甘瓜進酒卮。斷雲漠漠斗離離。北臨積水風來壯。東恨長林月上遲。秋近不堪聞急杵。夜涼已復怯輕絺。天孫老抱河梁恨。豈獨人生事可悲。

又

岸幘臨窗意未便。又拖筇杖出庭前。清秋欲近露霑草。皎月未升星滿天。過埭船爭明旦市。踴車人廢徹

宵眠齊氏一飽勤如許。坐食官倉每惕然。

親舊或見嘲終歲。杜門戲作解嘲。

十年蕭散住林間。只是幽居不是閑。續得茶經新絕筆。補成僧史可藏山。詩題紫閣憑雲寄。藥報青城附鶴還。自笑何曾總無事。枉教人道閉柴關。

北窗

寒泉斷藕素絲長。紋簾開瓜碧玉香。午睡覺來桐影轉。無人可共北窗涼。

新秋以窗裏人將老門前樹欲秋爲韻作小詩

殘暑無多日。幽居近小江。酒醒中夜起。松月入山窗。

又

陸子江海人所願。守節死潮生釣瀨邊。月落菱歌裏。

又

小智每自私。大患緣有身。孰能忘彼己。吾將友斯人。

又

野艇千錢買。明當泛渺茫。但能容一榼。家具不須將。

又

立朝紹興間。猶及見諸老。魂夢不可逢。丘坎閉秋草。

又

朝真方捨杖。步月始開門。零落山花後。經旬掩綠樽。

又

唐虞雖已遠。至道豈無傳。度日一編裏。懷人千載前。

又

秋風昨夜來。聲滿梧桐樹。故人渺天末。此夕誰與度。

又

少年雖婚宦。淡然本無欲。婆婆三畝園。自歎不啻足。

又

無食妨何事。吾兒可散愁。焚香正巾褐。聽汝讀春秋。

食新有感貧居久蔬食至是方稍得肉

壯遊車轍遍天涯。晚得祠官不去家。優老每慚千載遇。食新又歎一年加。出波魚美如通印。下棧羊肥抵

臥沙。捫腹笑歌仍索酒。不嫌鄰舍怪譁譁。

秋夕露坐作

銀河半落露華清。南斗闌干北斗明。冉冉方悲老將至。纖纖又歎月初生。酒牀細滴香浮盞。衣杵相聞聲滿城。萬卷讀書無用處。却將耕稼報昇平。

有年

不向神林乞雨晴。天公自解相西成。急符收盡無逋賦。新酒沽多足笑聲。外戶徹肩停夕柝。齊民相勸力春耕。傳聞夜市連三鼓。却恨龐公不入城。

大雨

北風挾驕雲。突起塞宇宙。赫日初未西。盼轉失白晝。翻空黑幟合。列陣奇鬼鬪。雨鏃飛縱橫。雷車助奔驟。平階水入戶。溝瀆不能受。對面語不聞。持繖避屋漏。兒童抱圖書。衣屨那暇救。縱暴理豈長。忽已收蒼霽。比鄰更相勞。措拾如過寇。老子獨癡頑。長歌對醇酎。

東西家

東家雲出岫。西家籠半山。西家泉落澗。東家鳴珮環。相對籬數掩。各有茆三間。芹羹與麥飯。日不廢往還。兒女若一家。雞犬意自閑。我亦思卜鄰。餘地君勿慳。

予自春夏屢病至立秋而愈作長句自賀

良藥扶衰抵萬金。漸加糜粥輟呻吟。溪風拂簾有秋意。山影半庭生夕陰。薄俗只成驚老眼。幽居正得遂初心。岸巾待月欄干曲。更覺天公愛我深。

七月十一日雨後夜坐戶外觀月

浴罷淡無事。岸幘臨前軒。雷雨始退散。雲月相吐吞。風蟬斷還續。枝間終夕喧。露螢闔復開。熠熠綴草根。殘暑會當去。孰敢厭炮燔。四時莽相代。所歎歲月奔。歡悰挽不留。白髮生無根。兒女日夜長。子且復有孫。

澗松偶未薪。野鶴猶孤鶩。華表幸來歸。餘事何足言。

王與道尙書挽詞

朗朗百間屋。汪汪千頃陂。直能彰主聖。清不願人知。許國多艱日。逢辰獨斷時。人猶望霖雨。殄瘁不勝悲。

又

昔遇開藩日。嘗叨下榻榮。從容陪讌笑。傾倒及平生。借譽言猶在。懷知涕易橫。終慚五字句。不盡百年情。

初秋

雨氣排殘暑。風聲送早秋。拂窗聞葉落。繞井看螢流。臥起須人助。炊春尙自謀。蕭條歲將晚。百慮入搔頭。

感秋

秋色關河外。秋聲天地間。壯士感此時。朝鏡凋朱顏。一身寄空谷。萬里夢天山。噫嗚怒皆裂。憤激悲涕濟。古來真龍駒。未必置天閑。長松倒澗壑。委棄同秦菅。得志未可測。談笑濟時艱。凜然出師表。一字不可刪。

北窗試筆

老來日月速。去若弦上箭。方看出土牛。已復送巢燕。清晨覓縑衣。正午廢紈扇。北窗小雨餘。盆山鬱葱蒨。病體爲之輕。一笑玩筆硯。雖無顏柳工。揮灑亦忘倦。紙窮墨漸燥。蚰蜒爭入卷。屬兒善藏之。勿遣俗子見。

秋思

秋毫不受俗塵侵。隨處悠然一散襟。天際挂虹初斷雨。雲頭翳日又成陰。引泉北澗長澆竹。拂榻西窗自斲琴。藥石掃空身便健。始知萬事要無心。

又

雨長蒼苔滿釣磯。坐令秋暑斂餘威。天高月破殘雲出。野曠風驚蠹葉飛。終歲鉏犁猶不飽。萬家礎杵獨無衣。早知竟坐儒冠誤。射虎南山未必非。

又

身似龐翁不出家。一窗自了淡生涯。山薑零落初成子。石竹淒涼半吐花。寒澗挹泉供試墨。墮巢篝火喚煎茶。掩關本意君知否。兩耳衰年不耐譁。

又

老懷不慣著閑愁。信脚時爲野外遊。過雁未驚殘月曉。片雲先借一天秋。村醅似粥家家醉。社肉如林處處留。七十已稀今又過。問君端的更何求。

新涼

山居謝來客。病體喜新涼。幽草上牆綠。落花霑土香。捐書心自息。聽雨夢偏長。菰葉鄰人餉。欣然獨舉觴。

又

菰首初離水。蠶芽淺漬糟。粳香等炊玉。韭美勝炮羔。露下殘蕪濕。風生萬木號。從今更何事。痛飲讀離騷。

自遣

踽踽人間未死身。鄉閭共敬六朝民。睡無由著緣多感。醉不能成坐一貧。幽屏最憎蟲弔夜。狂吟略似鳥鳴春。也知世俗誰知我。猶待君王獵渭濱。

自規

曲肱飲水彼何人。汝獨何爲厭賤貧。大節勿汙千載史。少時便盡百年身。圖書幸可傳遺業。雞黍何妨約近鄰。今日仲秋還小雨。剩鉏麥壟待新春。鄉人謂八月一日得雨。宜來年麥。

感舊末章蓋思有以自廣

庚寅歲入巴東硤。臥聽清猿月下聲。二十九年窮未死。卻思當日似前生。

又

百堂小益最初程。朱棧青崖照眼明。十日經行圖障裏。時時馬上聽鶯聲。

又

路入梁州似掌平。鞦韆蹴鞠趁清明。未論日遠長安近。且喜南山天際橫。

又

青城山裏屏風疊。太華峯頭腰帶輕。跨鶴橫空吾欲去。九秋月露看青冥。

秋日獨酌

草木秋始繁。黃碧照籬落。雖云各有時。意緒終索莫。老人固多感。對此聊命酌。風霜肅萬物。過雁在寥廓。吾當識其大。微物不足託。何以豁曠懷。短章可時作。

夙興

草堂風雨少睡眠。骨冷始覺非壯年。水鳥長鳴聲戛然。庭中棲鴉亦已翩。老人清餓如龜蟬。起坐甚愛小

窗妍。一生宦遊膏火煎。歸來杜門氣麤全。人看雖不直一錢。知我自有穹穹天。賦詩彙成棄不傳。殘鐘斷磬知誰編。

身世

身世浮沉等一漚。臥看校尉例封侯。青燈微火藥鐺夜。淡月淒風衣杵秋。醉裏不辭嘲兀兀。吟邊時得寄悠悠。卽今老眼無開處。又向城南倚寺樓。

憶昔

憶自梁州下益州。身閑處處醉紅樓。早知虛起彈冠意。悔不常爲秉燭遊。詩思已慚馳陣馬。目光猶覺射車牛。蓮峯日觀何時到。下看人間萬里秋。

豐歲

豐歲驩聲動四鄰。深秋景氣粲如春。羊腔酒擔爭迎婦。鼙鼓龍船共賽神。處處喜晴過甲子。家家築屋趁庚申。老翁欲伴鄉閭醉。先辦長衫紫領巾。

村居

孤村淺浦近江城。西折坡陀一嶺橫。墟落煙生含暮色。園林風勁作秋聲。年豐租稅無逋負。酒熟鄉鄰遞送迎。老病愈知難報國。只將高枕送餘生。

中秋夜半後無雲而月色微淡尤爲絕景

輕煙薄靄九霄寒。素月渾如隔縠看。此夕洞庭應更好。誰能從我跨青鸞。

夜賦

老人不食覺魂清。恍若身遊白玉京。夜靜月驚林鶻起。水涼風颭露荷傾。昏燈一點窺孤夢。畫角三終轉五更。欲醉海山還嬾去。且攜羽扇憩青城。

遣興

學廢文章傳世少。身閑車馬過門疎。壯心易盡饒肩酒。義氣肯貪熊掌魚。列聖仁恩深雨露。兩京宮闕尚丘墟。素懷華渭嗟誰問。且作狂歌楚接輿。

秋賽

柳姑廟前煙出浦。冉冉縈空青一縷。須臾散作四山雲。明日來爲社公雨。小巫屢舞大巫歌。士女拜祝肩相摩。芳茶綠酒進雜遝。長魚大載高嵯峨。常年徵科煩箠楚。縣家血溼庭前土。妻啼兒號不敢怨。期會常憂累官府。今年家家有餘粟。縣符未下輸先足。木刻吏蒲作鞭。自然粟帛如流泉。儲積不愁無九年。

寄題周丞相平園

先生道心平如砥。秋毫忿慾何曾起。漫將周易著牀頭。本不洗心那洗耳。先生國論如砥平。三朝倚之作權衡。泰階兩兩元不動。自然萬里無機槍。如今歸來曲肱臥。世事無窮俱看破。不栽桃李不鉏蘭。山僧野叟時來過。吾儕七十固已壽。更到期頤亦何有。倘知生死本自平。拈放一邊如把酒。

雨三日歌

秋風戒寒雨三日。空村無人暮蕭瑟。北窗書生萬卷書。齒豁頭童真可惜。輪囷新蟹黃欲滿。磊落香橙綠

堪摘興來尙能氣吞酒。詩成不覺淚漬筆。士生蓬矢射四方。掃平河雒吾儕職。湖中隱士倘可逢。握手與君談至夕。

戲作治生絕句

治生何用學陶朱。少許能慳便有餘。惜酒已停晨服藥。省油仍廢夜觀書。

龜堂雜題

龜堂端是無能者。妄想元無一事成。最後數年尤可笑。飽餐甘寢送浮生。

又

癡頑老子老無能。遊惰農夫酒肉僧。閉著菴門終日睡。任人來喚不曾應。

又

長腰玉粒出新春。秋穫真成畝一鍾。衣食麤供官賦足。何妨世世作耕農。

又

冷雨蕭蕭澀不晴。亂書圍坐正縱橫。忽聞小盞新醅熟。急喚兒童洗破觥。

偶讀陳無己芍藥詩云一枝剩欲簪雙髻。未有人間第一人。蓋晚年所作也。爲之絕倒。戲作小詩。

少年妄想已癡絕。鏡裏何堪白髮生。縱有傾城何預汝。可憐元未解人情。

村舍

過埭六七里。並江三四家。潮生魚漚短。風起鴨船斜。世守桑麻業。長無市井譁。

雨中作

雨聲可愛秋方見。睡味無窮老始知。半醉擁衾支倦枕。誰能三復放翁詩。

江郊

白草江郊暮。青帘野店秋。喧呼估船客。嵬峨飲家流。老豈題橋柱。愁惟倚寺樓。更傷昏澀眼。煙際數歸牛。

閑趣

被擁聽秋雨。兒扶上夜香。甑炊霜後稻。糟漬社前薑。馬病空思路。僧歸却住房。風扉久嘔軋。錯認鶻聲長。

又

飯滿七綴鉢。香凝百衲窗。雨聲酣曉枕。燈燼落秋釭。疾豎元知遜。天魔亦已降。超然對兒子。未媿鹿門龐。

又

老至衰滋劇。秋高病尙侵。坐看兒學字。臥聽客彈琴。困滿雀方鬪。栖寒雞欲瘖。世情元自嬾。不是事違心。

小飲

莫笑放翁顛。歌呼覆酒船。雙螯初斫雪。珍鯨已披緜。寒雨連旬日。新橙又一年。更須重九到。作意菊花前。

作字

整整復斜斜。翻如風際鴉。書成半行草。眼倦正昏花。未辦倉盛筆。寧能錐畫沙。老夫端可媿。頭白不名家。

晝睡起偶賦

蝴蝶與蒙莊。頽然寓一牀。日隨香篆過。夢逐雨聲長。酒喜新篳綠。橙如故歲黃。昏昏還隱几。誰識老龜堂。

小舟過吉澤效王右丞

澤園霜露晚。孤村煙火微。本去官道遠。自然人迹稀。木落山盡出。鐘鳴僧獨歸。漁家閑似我。未夕閉柴扉。

湖山雜賦

門前天鏡倒千峯。舍後菰蒲與海通。乘興出遊無遠近。煙波何處覓孤篷。

又

一生到處賈胡留。身屬官倉不自由。白首歸來更何恨。十年爛醉石帆秋。

又

東西相望兩湖橋。來往無時一畫橈。買酒每尋村市步。煮蔬時就野僧寮。

又

不到梅山二十霜。望中常似隔他鄉。一杯罌粟紗燈下。最憶初寒宿上方。梅山寺與敝廬南北相望無二十里然不到最久。

十里然不到最久。

又

煙中一棹小江秋。憶上牛頭倚寺樓。今日籬邊殘照裏。却從西北望牛頭。

太息

早歲元于利欲輕。但餘一念在功名。白頭不試平戎策。虛向江湖過此生。

又

書生忠義與誰論。骨朽猶應此念存。砥柱河流僊掌日。死前恨不見中原。

又

自古才高每恨浮。偉人要是出中州。卽今未必無房魏。埋沒胡沙死卽休。

又

關輔堂堂墮虜塵。渭城杜曲又逢春。安知今日新豐市。不有悠然獨酌人。

學書

九月十九柿葉紅。閉門學書人笑翁。世間誰許一錢直。窗底自用十年功。老蔓纏松飽霜雪。瘦蛟出海掣虛空。卽今譏評何足道。後五百年言自公。

晚興

壯遊車轍遍天涯。晚落農桑不自知。許國雖堅身遽老。讀書未倦眼先衰。雲深嶺路樵歸晚。雨細江亭渡發遲。一事猶堪慰孤寂。錦囊傾倒有新詩。

秋晴見天際飛鴻有感

新晴天宇色正青。羣鴻高竄在冥冥。兒童相呼共仰視。我亦扶杖來中庭。豐年到處稻梁滿。胡不暫下栖沙汀。應須江海寄曠快。肯爲霜雪嗟飄零。書生可笑不自喜。憔悴久翦籠中翎。鷗波萬里每媿杜鶴化。千載知非丁。風前哀號漫激烈。月下孤影常玲瓏。詩成欲寫復嬾去。誦似溪友聲泠泠。

初寒獨居戲作

開殼一作蠶。得紫棗。帶葉摘黃甘。獨臥維摩室。誰同彌勒龕。宗文樹雞柵。靈照挈蔬籃。一段無生話。燈籠可與一作自可談。

夢觀牡丹

忘卻晨梳滿把絲。棟花嫌不似胭脂。起來一笑看清鏡。惟插梨花卻較宜。

書喜

水際柴荆鍵不開。野人相覓漫敲推。寒雅陣黑疑雲過。老木聲酣認雨來。酒價日低常得醉。官租時辦不勞催。平生未省如今樂。却笑傍觀誤見哀。

又

今年端的是豐穰。十里家家喜欲狂。俗美農夫知讓畔。化行蠶婦不爭桑。酒坊飲客朝成市。佛廟村伶夜作場。身是閑人新病愈。賸移霜菊待重陽。

又

滿川秋穫重頹肩。拾穗兒童擁道邊。夜夜江村無吠犬。家家市步有新船。奪攘不復憂山越。安樂渾疑是地仙。惟有衰翁最知達。避胡猶記建炎年。

小飲能行至湖塘而歸

社酒真如粥而濃。朱顏頃刻換衰容。霜輕已覺樹搖落。雲起始知山疊重。梅市魚歸衝雨棹。寶林人定隔成鐘。此翁大似遊僧樣。爐煖窗深又過冬。

病雁祠祿將滿。幸蠡支朝夕。遂不敢復有請。而作是詩。

蘆洲有病雁。雪霜摧羽翰。不辭道路遠。置身湖海寬。稻梁亦滿目。鳴聲自辛酸。我正與此同。百憂雙鬢殘。東歸忽十載。四忝侍祠官。雖云幸得飽。早夜不敢安。乃知學者心。羞媿甚飢寒。讀我病雁篇。萬鍾均一簞。

澤居

澤居僅足不求餘。曠快真同縱壑魚。平日酷憎蠅附驥。暮年肯作鶴乘車。齒搖但煮岷山芋。眼澀惟觀胃監書。此際自應還往絕。本無心與俗人疎。

秋穫歌

牆頭累累柿子黃。人家秋穫爭登場。長碓擣珠照地光。大甌炊玉連村香。萬人牆進輸官倉。倉吏鬻冷不暇嘗。訖事散去喜若狂。醉臥相枕官道傍。數年斯民阨凶荒。轉徙溝壑殫相望。縣吏亭長如餓狼。婦女怖死兒童僵。豈知皇天賜豐穰。畝收一鍾富萬箱。我願鄰曲謹蓋藏。縮衣節食勤耕桑。追思食不壓糟糠。勿使水旱憂堯湯。

戊午重九

朋舊相望天一涯。登高結伴只鄰家。秋風自欲吹紗帽。衰鬢何曾泥菊花。藥市神仙思益部。饅盤節物記京華。自憐病後歡悵薄。小醉歸來日未斜。

重九懷獨孤景略

昔逢重九日。初識獨孤君。竝轡洮河馬。聯詩劍閣雲。已悲吳蜀遠。更歎死生分。安得持卮酒。澆君丈五坟。

晨鏡

晨起覽清鏡。有叟鬢已皤。鹹黃色類梔。面皺紋如鞞。熟視但驚歎。初不相誰何。久乃稍醒悟。舉手自摩挲。與汝周旋久。流年捷飛梭。生當老病死。求脫理則那。切勿彊撐拄。據鞍效廉頗。惟須勤把酒。暫遣衰顏醜。

秋霽遣懷

陸生少日心膽壯。萬里憑陵寄疎放。玉關曾誓馬革裹。滄海豈憂魚腹葬。人生富貴本細事。釣築逢時俱將相。正令不遇亦何慊。藥鑪丹爐老青嶂。今年秋晚苦多雨。三十六溪新綠漲。極知世事不足論。霧日小舟行可榜。

屏迹

昔者航濤江。雲山迎我東。擊楫誓江神。永託冥冥鴻。十年桑榆暖。萬事馬牛風。邇來愈屏迹。庭戶深蒿蓬。就甕挹新醅。傍畦擷晚菘。鄰曲或念我。小鮮亦時供。喟然撫几歎。恨今已龍鍾。向使早十年。何媿柴桑翁。

初寒

今日霜露冷。凜然悲暮秋。垂帷跨微火。發篋出輕裘。徂歲逝將換。殘生愈覺浮。一杯還自閱。小獵記梁州。

風雨

風雨從北來。萬木皆怒號。入夜殊未止。聲亂秋江濤。渺然老書生。白頭臥蓬蒿。閉門不敢出。裂面風如刀。鄰人閱我寒。牆頭過濁醪。時哉一昏醉。新橙宜蟹螯。

龜堂自詠

龜堂一老翁。短褐立秋風。時過同籬菊。身衰似井桐。新霜萬瓦白。朝日數樞紅。且復尋書卷。悠然度歲窮。

又

采藤持織履。剝楮治爲冠。看劍心空壯。騎驢骨本寒。病多辭酒伴。老甚解祠官。予十月奉祠歲滿。不復敢請。賴有扁舟在秋濤萬里寬。

閑居初冬作

香椀蒲團又一新。天將閑處著閑身。東窗換紙明初日。南圃移花及小春。婦女晨炊動井臼。兒童夜誦聒比鄰。早知閭巷無窮樂。悔不終身一幅巾。

病中排悶

面骨崢嶸鬢雪新。承平版籍有遺民。予生於宣和中。心雖願繼無傳學。力不能支已廢身。開卷眼昏如隔霧。擁爐肺渴欲生塵。老龐亦有兒孫念。付與天公不問人。

季秋已寒節令頗正喜而有賦

霜降今年已薄霜。菊花開亦及重陽。四時氣正無愆伏。比屋年豐有蓋藏。風色蕭蕭生麥隴。車聲碌碌滿魚塘。老夫亦與人同樂。醉倒何妨臥道傍。

此页空白

陸放翁集

劍南詩稿

卷第三十八

秋懷

形骸歲歲就枯朽，意氣時時猶激昂。永遠浮鷗方浩蕩，霜高殘菊更芬芳。人皆有舌是非在，劫未成灰時世長。三百里湖行自復，子孫努力事耕桑。鏡湖磨百七十餘年，故吾鄉多凶，會有復之者。

吳體寄張季長

九月十月天雨霜，江南劍南途路長。平生故人阻攜手，萬里一書空斷腸。人生彊健已難恃，世事變遷那可常。兩家子孫各長大，他年窮達毋相忘。

嘲畜貓

甚矣翻盆暴嗟君，睡得成。但思魚鱉足，不顧鼠縱橫。欲騁銜蟬快，先憐上樹輕。胸山在何許，此族最知名。
俗言貓爲虎舅，教虎百爲，惟不教上樹，又謂海州貓爲天下第一。

立冬日作

室小財容膝，牆低僅及肩。方過授衣月，又遇始裘天。寸積篝爐炭，銖稱布被綿。平生師陋巷，隨處一欣然。
初冬

志士逢秋已自傷。老人況復惜年光。正看溪碓舂粳滑。又見山坡下麥忙。桐落井牀多槁葉。菊殘衫袂尙餘香。讀書有課真當勉。剩貯明膏伴夜長。是日方買油。

醉題

生來避世傲公卿。海內無人識姓名。九節筇邊秋萬里。長明燈下雨三更。心安白髮何勞掃。藥熟黃金固可成。只待蓬壺賦詩罷。卻來京洛看昇平。

新作火閣

旋設篝爐下紙簾。樂哉容膝似陶潛。囊中佩藥無時服。架上堆書信手拈。似玉秋菰殊未老。如雲宿麥不須占。掃空祠祿吾何欠。陋巷箠瓢易屬厭。祠祿止此月。

又

山路霜清葉正黃。地爐火煖夜偏長。中安煑藥膨脝鼎。傍設安禪曲彘牀。木槁不知年自往。雲閑已與世相忘。更闌坐穩人聲靜。時聽風簾響暗廊。

舍北行飯

蔓絡疎籬草滿塘。飽嬉聊復步斜陽。一霜驟變千林色。兩犢新犁百畝荒。野寺僧殘尙鐘鼓。官堤舟過見帆檣。歸來笑補空囊課。寒日誰知亦自長。

遣興

轍迹當年遍九州。晚歸始解臥林丘。愛身每戒玉抵鵠。養氣要如刀解牛。柔觴搖殘天鏡月。短筇領盡石

帆秋儘言未辦常局戶，竟是吾身得自由。

又

出仕纔堪斗大州，初歸便擬築糟丘。虛名大似月蟾兔，榮路久如風馬牛。唧唧悲蛩常弔夜，蕭蕭蠹葉更禁秋。靜觀世事頻興歎，千載前時有許由。

舟中

柂邊潮水落還生，篷底寒燈滅復明。約束長年牢繫纜，報人風雨有鼃鳴。

又

蕭蕭風雨小江秋，不是愁人亦合愁。忽聽疎鐘知寺近，笑尋沙路上牛頭。

又

龕山古戍更漏聲，白塔小市燈火明。六十年間幾來往，依然惻愴路傍情。

雨夜感舊

雨來猛打窗，燈暗猶照壁。老人耿不寐，撫事悲夙昔。風生枯柏渡，馬病金牛驛。裊枝猿下飲，登樹熊自擲。危巢窺鵲栖，深雪見虎跡。至今清夜夢，猶想嶓山碧。廢棄謝功名，老疾輟行役。賦詩雖不工，聊用慰今夕。

夜聞落葉

我行出柴門，初喜春草生。俛仰幾何時，落葉終夜聲。嗟我日益老，抱疾況未平。晨興就盥櫛，顧亦彊支撐。齋中有兩童，熟視不能名。定非張睢陽，大笑頽冠纓。死至人所同，此理何待評。似有一可恨，不見復兩京。

閉門

閉門高臥鏡湖傍。元自無閑可得忙。泛罷杯觴餘菊苦。玩殘指爪帶橙香。燈昏共度空階雨。蛩冷偏依丈室牀。不待衰年宦情盡。未來如雁到衡陽。

祠祿滿不敢復請作口號

今年高謝武夷君。飯豆羹藜亦所欣。參透莊生齊物論。掃空韓子送窮文。心如脫窞奔林鹿。迹似還山不雨雲。猶幸此身強健在。鄉鄰爭看布襦裙。

又

祠庭八載竊榮名。一飽心知合自營。牘後落銜便手倦。月頭鵠俸喜身輕。弊衣不補惟頻結。濁酒難謀且細傾。賴有東臯堪肆力。比鄰相喚事冬耕。

又

白首還山不自存。天書四降海邊村。慚非故將前侯比。誤辱優賢養老恩。龜壽自應能食氣。鶴歸那得更乘軒。從今再草公車奏。惟有挂冠神武門。

過鄰家

扶杖過吾鄰。相誇自在身。年豐稱貸少。酒賤往來頻。羣散雞歸柵。聲喧雀噪囷。丁寧語兒子。切勿厭沉淪。

舍北野望

短景妨遊興。長歌慰作勞。葉凋西埭近。水落北橋高。病每隨時劇。衰難與世鏖。旗亭新釀美。萬事一秋毫。

又

斷壠圍蔬圃。枯桑繫釣查。經行橋獨木。佇立路三叉。野卉棲孤蝶。平川起亂鴉。摺筇無定處。與盡卽還家。

又

溪行通西崦。山蹊繚北村。殘霞明水面。落葉擁籬根。野父編龍具。樵兒習兔園。吾今井蛙耳。敢復慕鵬鯤。

又

早歲遭逢異。中年促召頻。馳驅猶許國。臥起已須人。藥石三秋病。風波萬里身。籬門殘照裏。慘淡易傷神。

書感

常記當年賦子虛。公卿交口薦相如。豈知鶴髮殘年叟。猶讀蠅頭細字書。出處幸逃千載笑。功名從負此心初。荒園落葉紛如積。日暮歸來自荷鋤。

冬夜爐邊小飲

擁爐可使曲身直。飲酒能回槁面紅。若使金丹真入手。飛騰亦在立談中。

龜堂獨酌

幅巾蕭散餞餘齡。江左諸賢可乞靈。護枕小屏圖紫閣。映窗矮卷寫黃庭。曠懷與世元難合。幽句何人可遣聽。一酌蘭溪遺萬事。時看牆底臥長瓶。偶得蘭溪十餘樽。清醇醜烈殆不可名。

又

一盞蘭溪自獻酬。徂年不肯爲人留。巴山頻入初寒夢。江月偏供獨夜愁。越石壯心雞喔喔。子卿歸信雁

悠悠天生我輩初何用。病骨支離又過秋。

冬夜作短歌

飢鼠窺殘燈。寒犬踏枯葉。小室擁燎爐。清笳下危堞。老人素多疾。舉動常畏怯。衣裘視寒煖。日夜自調燮。食必按本草。下箸未嘗輒。體安疾自去。藥石無此捷。敢學李輕車。灞亭夜遊獵。況如馬新息。萬里聽鳶跼。欲求神氣住。先戒事物接。寧爲子光瘡。不效嗇夫喋。明晨一杯粥。趺坐橫白氈。無魚何足道。爲爾歌長缺。

病愈

倦榻呻吟每自哀。占著來告一作吉。出餘災。自能洗研拂書几。時亦折花尋酒杯。久類寒蛟潛岫穴。忽如老馬噴風埃。霜晴爛熳東窗日。一笑山坡訪早梅。

自遣

枳籬茅屋枕孤峯。偃盡初來手種松。睡少未成千里夢。愁深先怯五更鐘。中天日月逢真主。數畝桑麻伴老農。世事古今誰料得。不堪陂水照衰容。

感舊

君不見資中名士有李石。八月秋濤供筆力。初爲博士不暖席。晚補臺郎俄復斥。諸公熟睨亦太息。摧壓至死終不惜。生前何曾一錢直。沒後遺文價金璧。後之視今猶視昔。此事誠非一朝夕。山城舊廬暗荆棘。羸然諸孫守墳籍。撫孤我負朋友責。萬里詩成淚空滴。

又

君不見蜀師渾甫字伯渾，半身高臥慕頤村。才不得施道則尊，死已骨朽名猶存。文章落筆數千言，上友離騷下招魂。望之眉宇何軒軒，高談浩若洪河翻。范尹敬如綺與園，方飾羔雁登衡門。小人謗傷實不根，妄指拱壁求瑕痕。窮通在公豈足論，浮雲終散朝陽暎。安得此老起九原，入贊國論蘇黎元。范至能帥成都欲以遺逸起之，幕客有沮之者，遂不果。

寒雨中偶賦

鬢毛蕭颯齒根浮，徂歲翩翩肯暫留。窮巷多泥誰問疾，空階滴雨又經秋。自營可笑誇三窟，善守寧須築百樓。但使胸中機事盡，一樽隨處送悠悠。

又

暮年心事與誰同，到處飄然一病翁。斷夢淒涼燈影裏，殘詩零落雨聲中。莫驚顏鬢渾非昨，略數朋儕已半空。祠祿上還猶負媿，何功班綴冠仙蓬。子官視祕書監。

壽考如富貴

壽考如富貴，初亦不自知。邂逅偶不死，亦或至期頤。予少多疾恙，五十已遽衰。齒搖頰鬢白，蕭然蒲柳姿。俛仰忽二紀，臥病實半之。富貴不可求，壽亦豈汝私。萬事付自然，孰爲樂與悲。惟當老益學，易簣以爲期。

午飯

我望天公本自廉，身閑飯足敢求兼。破裘負日茆簷底，一碗藜羹似蜜甜。

又

民窮豐歲或無食。此事昔聞今見之。吾儕飯飽更念肉。不待人嘲應自知。

題王仲信畫水石橫幅

王郎書逼楊風子。畫亦憑陵蜀雨孫。豈是天公憎絕藝。一生憔悴向衡門。

冶圃

槁蔓殘蕪滿幽圃。多具鉏耰課僮豎。非惟吾圃要翦除。亦恐爾輩成惰窳。老桂盤壑飽風霜。修篁當軒弄煙雨。一松孤立信豪傑。兩槐對植如賓主。珍禽揀枝春欲動。蠹穴掃空吾甚武。醜蕪芽蘖已暗長。甘菊根芽亦潛吐。山薑潤蒲乃微草。露葉參差看仰俯。世間安得有遺才。位置要須令得所。

冬日感興十韻

霧雨天昏曠。陂湖地阻深。蔽空鴉作陣。暗路棘成林。有客風埃裏。頻年老病侵。夢魂來二豎。相法欠三壬。舊憤開孤劍。新愁感斷砧。唐衢惟痛哭。莊舄正悲吟。瘦跨秋門馬。寒生夜店衾。但思全舊壁。敢冀訪遺簪。樓上蒼茫眼。燈前破碎心。長謠傾濁酒。慷慨壓層陰。

冬日出遊十韻

吳會寒常薄。冬深略未冰。荒郊觀雉鬪。大澤見魚騰。釣艇頻容借。籃輿漸可乘。有時穿密篠。隨處倚枯藤。金石秦遺刻。衣冠禹舊陵。叢祠祈臘雪。小市試春燈。問路鉏畬叟。爭橋乞供僧。疎狂違俗久。衰疾與年增。千祿雖知恥。懸車媿未能。階官有微俸。醉髮任鬢鬢。

思蜀

園廬已卜錦城東，乘驛歸來更得窮。只道驩驩開道路，豈知魚鳥困池籠。石犀祠下春波綠，金雁橋邊夜燭紅。未死舊遊如可繼，典衣猶擬醉鄆筒。

又

二十年前客錦城，酒徒詩社盡豪英。才名吏部傾朝野，意氣成州共死生。吏部郎字文紹奕衰自成州守字文子震子友，廢苑探梅常共醉。遺祠訪柏亦俱行，卽今病臥寒燈裏，欲話當時涕已傾。

又

譚侯才氣敵文園，國子監丞譚季壬德稱。日日銀鞍畫戟門，奇句入神聞鬼泣。巨觥如海看鯨吞，一官胄監能令死。萬里銘旌忍更論，湖上秋來頻入夢。憑誰詞翰與招魂。

作雪

雪雲寒不動，林鳥噤無聲。病起衰何劇，囊空醉不成。中原亂方作，弱虜運將平。臺省多賢俊，常談媿老生。

又

荒村雪欲作，老叟病無聊。樹暝鳥爲集，茆深雉免驕。溪灘觀趁渡，嶺路數歸樵。卽死無它憾，終身負聖朝。

戲詠山家食品

牛乳抨酥淪茗芽，蠶房分蜜漬棕花。舊知石芥真尤物，晚得萋蒿又一家。疎索鄉鄰緣老病，團欒兒女且喧嘩。古人不下藜羹糝，斟酌龜堂已太奢。

耕罷偶書

新漑東臯畝一鍾。烏犍麤足事春農。灑橋風雪吟雖苦。杜曲桑麻興本濃。老大斷非金谷友。生存惟冀酒泉封。莫嘲野餉蕭條甚。箭茁蓴絲亦粗一作且供。

雨夜

末路蕭條客子心。不堪徂歲更沉陰。低簷雨滴睡眠少。敗壁燈殘感慨深。不辦典衣謀盡醉。尙能擁鼻作微吟。交朋一散如天遠。試向今宵夢裏尋。

菴中晨起書觸目

山重永復怯朝寒。一卷窗間袖手看。朱擔長瓶列雲液。絳囊細字坼龍團。數峯移自侏儒國。一研來從黠淡灘。要識放翁頑鈍處。胸中七澤著猶寬。雲液揚州酒名近淮帥餉數十尊。營道小山及劍硯。得自張季長。張仲欽適在案間。

又

暉暉初日上簾鉤。漠漠清寒透衲裘。雪棘並棲雙鷓鴣。金環斜絆一猿愁。廉宣臥壑松楠老。王子穿林水石幽。戲事自憐除未盡。此生行欲散風漚。唐希雅畫鷓。易元吉畫猿。廉宣仲老木。王仲信水石。皆菴中所挂小軸。

又

賦形不使面團團。聳膊心知剝骨寒。晏子元非枕鼓士。杜生那有切雲冠。時扶遷客桄榔杖。日厭詩人苜蓿盤。賴是平生憎阿堵。今年初解侍祠官。

又

初歸誓墓老鄉邦，手結茆茨近小江。北渚露霑行藥屐，東廂日射勘書窗。孤忠自信丹心折，萬事成雲鬢雙。長媿宗人白崖老，贈行期我鹿門龐。予自成都召還，禱射洪白崖陸使君祠，使君以杜詩爲籤，予得全家隱鹿門之篇。

三山杜門作歌

我生學步逢喪亂，家在中原厭奔竄。淮邊夜聞賊馬嘶，跳去不待雞號旦。人懷一甃草間伏，往往經旬不炊爨。嗚呼亂定百口俱得全，孰爲此者寧非天。

又

高宗下詔傳神器，嗣皇御殿猶揮涕。當時獲綴鷓鴣行，百寮拜舞皆獻歎。小臣疎賤亦何取，卽日趨召登丹陛。嗚呼橋山歲晚松柏寒，殺身從死豈所難。

又

中歲遠遊踰劍閣，青衫誤入征西幙。南沮水邊秋射虎，大散關頭夜聞角。畫策雖工不見用，悲吒那復從軍樂。嗚呼人生難料老更窮，麥野桑村白髮翁。

又

晚入南宮典牋奏，濫陪太史牛馬走。忽然名在白簡中，一權還家傾臘酒。十年光陰如電雹，綠蓑黃犢從鄰叟。嗚呼古來骯髒例倚門，況我本自安丘園。

又

寬恩四賦仙祠祿。每忍慚顏救枵腹。五秉初辭官粟紅。一瓢自酌巖泉綠。天公乘除不負汝。宿疾微平歲中熟。嗚呼字字細讀逍遙篇。此去八十有幾年。

老境

白髮短欲盡。人嗤心尙孩。埋盆池漱澀。累瓦塔崔嵬。輒飯三春米。醇醪九醞醅。忽然拈筆起。記著早梅開。

又

今日霜殊重。衰翁老可憐。朝晡兩炊火。覆藉一牀氈。人客容稱疾。兒童不攪眠。雲開見殘日。更愛小窗妍。

記戊午十一月二十四夜夢

街南酒樓粲丹碧。萬頃湖光照山色。我來半醉躡危梯。坐客驚顧聞飛屐。長緡短帽黃緇裘。從一山童持藥笈。近傳老仙嘗過市。此翁或是那可識。逡巡相請或稽首。爭獻名樽冀餘瀝。我欲自言度不聽。亦復軒然爲專席。高談方縱驚四座。不覺鄰雞呼夢破。人生自欺多類此。撫枕長謠識吾過。

六經示兒子

六經如日月。萬世固長懸。學不趨卑近。人誰非聖賢。馬能龍作友。螭乃衮爲天。我老空追悔。兒無棄壯年。

舍北晚步

漠漠炊煙村遠近。瑟瑟儺鼓隸西東。三叉古路殘蕪裏。一曲清江淡靄中。外物已忘如棄屐。老身無伴等羈鴻。天寒寂寞籬門晚。又見浮生一歲窮。

對酒

老子不堪塵世勞。且當痛飲讀離騷。此身幸已免虎口。有手但能持蟹螯。牛角挂書何足問。虎頭食肉亦非豪。天寒欲與人同醉。安得長江化濁醪。

夜坐求酒已盡喟然有賦

澹月微霜夜漏徂。披裘不睡附寒爐。清笳嫋嫋已三弄。殘火熒熒纔一銖。報國無期心欲折。讀書自力眼將枯。麴生作態年來甚。不受閑人折簡呼。

食粥張文潛有食粥說謂食粥可以延年予竊愛之。

世人箇箇學長年。不悟長年在目前。我得宛丘平易法。只將食粥致神仙。

寒夜

堅冰塞川厚莫測。斷雁叫羣聲可哀。草圍小甕酒未熟。霜壓瘦枝梅不開。稗子忍寒守蠹簡。老夫忘睡畫爐灰。低頭就世吾所諱。千載伯鸞安在哉。

梅花

五十年間萬事非。放翁依舊掩柴扉。相從不厭閑風月。只有梅花與釣磯。

又

山村梅開處處香。醉插烏巾舞道傍。飲酒得仙陶令達。愛花欲死杜陵狂。

又

一花兩花春信回。南枝北枝風日催。爛熳卻愁零落近。丁寧且莫十分開。

又

廣寒宮中第一仙。情深不礙韻超然。勸君莫作兒女態。但向花前傾玉船。

又

秣歸江頭煙雨昏。客舟夜繫梅花村。相逢萬里各羈旅。不待猿啼已斷魂。

又

青羊宮前錦江路。曾爲梅花醉十年。豈知今日尋香處。卻是山陰雪夜船。

三山卜居今三十。有三年矣屋陋甚。而地有餘數世之後。當自成一村。今日病少間。作詩以示後

人

印累累。綬若若。換君朱顏君不覺。冠如箕。劍挂頤。蒼頭廬兒笑君癡。不如短褐歸鄉舍。上畢租庸下婚嫁。橫陂引水蒔禾黍。高陸犁荒種桑柘。比鄰畢出觀夜場。老稚相呼作春社。雞爭舂米茅簷底。犬吠行人權籬罅。數椽幸可傳子孫。此地它年名陸村。藜藿一飽能世守。殊勝養牛并上尊。

又

再見封侯未爲快。一擲成盧安用再。世間得意固多矣。堪笑窮人事常敗。我生出仕四十年。寸進恰如船上棹。即今臥病茅簷裏。回首窮通竟何在。荆山之下玉抵鵠。南京春齋論斤賣。蘇秦煌煌佩六印。尼父栖栖厄陳蔡。玄傑美官輒見思。東野出門常有礙。躬耕至老豈不佳。子孫當以吾爲戒。

南園觀梅

小嶺清陂寂寞中。綠梅歲晚與君同。高標賴有詩人識。絕豔真窮造物工。正喜參差橫夜月。又驚零落付春風。老諳世事寧多歎。身自人間一轉蓬。

歲盡苦寒

曉寒無賴透重裘。三日江雲暝不收。歲月推移吾輩老。交朋零落此生浮。東臯苦潦猶中熟。舊疾雖存亦小瘳。禹廟蘭亭俱在眼。剩沾春酒破春愁。

己未新歲

餞歲愁雖劇。迎年喜亦深。桃符帶草寫。椒酒過花斟。車馬久無迹。兒孫聊慰心。更欣春意早。處處有鳴禽。

歲首書事

東風入律寒猶劇。多稼占祥雪欲成。雲陰作雪彌旬。至開歲雪意愈濃。明日戊初立春。猶可爲臘雪也。鬱壘自書誇腕力。屠蘇不至歎人情。今歲無餽屠蘇者。呼盧院落譁新歲。鄉俗歲夕聚博。謂之試年。庚賣困兒童起五更。立春未明相呼賣春困亦舊俗也。白髮滿頭能且健。剩隨鄰曲樂昇平。

又

扶持又度改年時。耄齒侵尋敢自期。中夕祭餘分餽飴。鄉俗以夜分畢祭享。長幼共飯其餘。又歲日必用湯餅。謂之冬餽。餽年餽飴。黎明人起換鍾馗。春盤未抹青絲菜。今年正月二日立春。壽學先酬白髮兒。聞道城中燈絕好。出門無日歎吾衰。客來多言府中今歲上元燈甚盛。

初春

元日人日來聯翩。轉頭又見試燈天。且欣一雪壓災瘴。不怕連陰咽管絃。陌上漸多酤酒舍。岸邊初理下湖船。紫姑擬卜元無事。只問今春幾醉眠。

菴中獨居感懷

身愈龍鍾髮愈稀。流年冉冉迫殘暉。讀書十紙勤雖在。上樹千回事已非。仗馬曾鳴宜取斥。牧羝雖乳亦忘歸。餘生自笑知何似。萬里遼天老令威。

又

自閉菴門不點燈。惰耕村叟罷參僧。一生已是膠黏日。投老安能夏造冰。頑面敢辭乾汝唾。蔬餐聊得曲吾肱。高春睡熟無多笑。那有禪師解放鷹。

又

無錢溪女亦留魚。有雨東家每借驢。藜粥數匙晨壓藥。松肪一椀夜觀書。黃紬被暖閑無厭。白布衫長樂有餘。南陌東阡春事動。放翁作計未全疎。

戲作貧詩

垂老貧彌甚。虛教遇太平。竈閑無馬穴。釜冷有魚生。妾病常停織。兒飢屢輟耕。癡頑惟此老。未廢浩歌聲。

又

左券頻稱貸。西成少蓋藏。苦飢炊稻種。緣病賣桑黃。土焙憐煙煖。藜羹愛糝香。君看首陽叟。窮死亦何傷。

春日園中作

杏花開過尙輕寒。盡日無人獨倚闌。久別名山憑夢到。每思舊友取書看。塵埃幸已賒腰折。富貴深知欠面團。老去逢春都有幾。一杯行復送春殘。

中春連日得雨雷亦應候

誰言白首意低摧。老子逢春亦樂哉。犁畔方吹社公雨。壠頭又轉阿香雷。睡餘支枕聽鶯語。醉裏題窗記燕來。更有山家堪喜事。吾孫上樹欲千回。德孫幼病足。今已行步健甚。

雨後微陰光景益奇復得長句

結轍軒車已掃空。揮犀談笑與誰同。日消淺醉閑吟裏。春在輕陰薄靄中。百尺遊絲喜風定。一雙新燕說泥融。天工只費須臾力。開遍東闌半丈紅。

春日小園雜賦

久矣雲霄鏃羽翰。小園聊得賦春寒。魯望有春寒賦。風生鴨綠紋如織。露染猩紅色未乾。不向山丘歎零落。且從兒女話團圞。人言麥信春來好。湯餅今年慮已寬。

又

市塵不到放翁家。繞麥穿桑野徑斜。夜雨長深三尺水。曉寒留得一分花。悶從鄰舍分春瓮。閑就僧窗試露芽。自此年光應更好。日驅秧馬聽纒車。

簡鄰里

今年意味報君知，屬疾雖頻未苦衰。獨坐空齋如自訟，三舍法行時嘗上書言事者，屏置一齋曰自訟。小
鐫殘俸類分司。樂天詩猶被妻孥教漸退，莫求致仕且分司。閑撐野艇漁蕩溼，亂插山花醉帽欹。有興行
歌使終日，逢人那識我爲誰。

客叩門多不能接，往往獨坐至晚戲作

貧舍久疎羅酒漿，客來不復倒衣裳。宦情已盡詩情在，世味無餘睡味長。紅練帶飛穿柳去，錦熏籠暖撲
簾香。蕭然自笑渾無事，漁唱聲中又夕陽。

園中偶題

綠衣粲粲味微丹，映葉穿枝立畫欄。莫戀主人驚不去，五陵年少有金丸。

又

春深無處不春風，數樹桃花乃爾紅。鶯蝶紛紛自常事，不應也著白頭翁。禽名。

又

憶向彭州取牡丹，蠟封馳騎露初乾。如今歷盡人間事，縱有姚黃亦懶看。

又

九日春陰一日晴，不堪風駕浪花生。畫船欲解還歸臥，寂寂窗扉聽鳥聲。

北窗偶題

兩叢香百合，一架粉長春。堪笑龜堂老，歡然不記貧。

又

曉晴林鵲喜。晝暖蜜蜂喧。我老詩情盡。逢春亦一言。

又

簾外燕翩翩。歸時在社前。不辭飛渡海。來看賽豐年。

又

煙波兩鵝鷗。宜爲放翁來。菰米猶能給。蒼顏得屢開。

沈園

城上斜陽畫角哀。沈園非復舊池臺。傷心橋下春波綠。曾是驚鴻照影來。

又

夢斷香消四十年。沈園柳老不吹綿。此身行作稽山土。猶弔遺蹤一泫然。

此页空白

陸放翁集

劍南詩稿

卷第三十九

戲贈園中花

橫風疾雨爲花厄。霧日暄風又不禁。我欲小施調燮手。酌中寒暖半晴陰。

春思

兀兀治蠶酒未醒。霏霏潑火雨初晴。愁看入戶桃花片。閑聽爭巢燕子聲。百疾侵陵成老大。一春轉盼又清明。蘭亭禹廟渾如昨。回首兒時似隔生。

贈燕

燕來我何喜。感此中春時。燕去亦何有。無奈凋年悲。四序如循環。萬物更盛衰。我亦寓斯世。如客會當歸。驪車已在門。戀戀終何爲。達人付無心。欣厭兩俱非。豈有天壤間。會合無別離。對花不爛醉。燕子笑汝癡。

雨悶示兒子

東吳春雨多。略無三日晴。濛濛平野暗。淅淅空階聲。百花雨中盡。三月未聞鶯。重裘坐奧室。時序真強名。亦欲借驢出。泥淖沾衣纓。撫事每累歎。濁醪聊獨傾。景運今方開。關輔一日平。我家本好疇。瀟灑可躬耕。買酒新豐市。看花下杜城。會當與汝輩。藉草作清明。

陸放翁集

劍南詩稿

卷三十九

一

(二四三)

讀晉書

諸公日飲萬錢廚。人乳蒸豚玉食無。誰信秋風雒城裏。有人歸棹爲蓴鱸。

春晚苦雨

垂老臥村墅。餘寒欺病身。雞猶未忘旦。雨欲不容春。忽忽花時過。茫茫草色勻。蓴絲已上市。一飯未傷貧。

燕

春晝花明映柳纖。燕歸勝事始能兼。爭梁諍語驚幽夢。掠地斜飛避畫簾。雛食得蟲應自喜。巢泥經雨更頻添。去來要是知時節。常怪人嘲作附炎。

夜雨

空階雨聲夜轉急。壁竦窗破淒風入。一燈嫋嫋吹欲滅。老生獨傍書架立。取書欲讀輒復休。卻行出門搔白頭。市樓賣酒日千斛。衆人皆樂君胡憂。

寒食日九里平水道中

曉雨絲絲熟食時。泥深轍斷客行遲。亂雲重疊藏山寺。野水縱橫入稻陂。馬鬣松陰封舊隴。龜趺道左立新碑。扶衰此出知能幾。清淚臨風不自持。

春晴自雲門歸三山

乍行春野眼增明。漸減春衣體倍輕。人賣山茶先穀雨。鴉隨幡祭過清明。柳塘水滿雙鳧戲。稻隴泥深一犢行。晚到三橋泛舟去。掩關不復畏重城。

予數年不至城府丁巳火後今始見之

陳迹關心已自悲。劫灰滿眼更增歎。山川壯麗昔無敵。城郭蕭條今已非。窄塔招提俱昨夢。祝融回祿尙餘威。故交減盡新知少。縱保桑榆誰與歸。

晚自北港泛舟還家

舒嘯蓬籠底。經行略約西。水深鵝唼草。雨細犢掀泥。醉倚乾坤大。閑知物我齊。衡門觸冠過。聊得賦幽棲。

書懷

羸馬常愁趁早朝。斥歸幸復侶漁樵。青黃未勝溝中斷。宮徵何殊爨下焦。心樂箪瓢同鼎食。身安山澤謝弓招。數間茅屋誰知處。煙雨濛濛隔斷橋。

初夏

淡靄輕颺入夏初。一窗新綠鳥相呼。出門易倦常歸臥。著句難工但自娛。花徑蝶閑無墮蕊。酒樓人散有空墟。閩川茶籠猶霑及。肺渴朝來頓欲蘇。閩中貢餘茶。初至。

小築

放翁小築寄江郊。屋破隨時旋補茅。暮看白煙橫水際。曉聽清露滴林梢。生來啜不猩猩酒。老去那營燕燕巢。目斷鹿門三太息。龐公千載可論交。

喜雨

幽人睡覺夜未央。四簷懸溜聲浪浪。樂哉甘澍及時至。九衢一洗塵沙黃。明朝鄰曲各驩喜。賽廟沽酒封

豬羊不勞纏。鞦韆蹋龍骨。轉盼白水盈。陂塘呼兒掃地設。菅席與汝一醉歌時康。豈惟磨鎌待收麥。小甑已覺吳粳香。

晨起

天公擇地養衰殘。著向桑村麥野間。曉色入簾初滉漾。幽禽窺戶已閒關。酒徒散去稀中聖。詩思衰來媿小山。一炷沉煙北窗底。曲肱臥看不勝閑。

五月初病體益輕偶書

世事紛紛了不知。又逢燕乳麥秋時。經年謝客常因醉。三日無詩自怪衰。乘雨旋移西嶮藥。留燈重覆北窗棋。但將生死俱拈起。造物從來是小兒。

己未重五時已請老

門楣束艾作神人。團糴盤中節物新。安用丹書禳赤口。風波雖惡不關身。

五月七日拜致仕勅口號

剡曲東歸日。醉眠冰銜屢忝武夷仙。恩如長假容居里。官似分司不限年。一札疏榮馳廐置。兩兒扶拜望雲天。坐糜半俸猶多愧。月費公朝二萬錢。

又

黃紙東來墨未乾。孤臣恩許挂朝冠。小兒扶出迎門拜。鄰舍相呼擁路觀。白首奉身歸畎畝。清宵無夢接鷓鴣。從今剩把花前酒。憂患都空量自寬。

致仕後卽事

休官拜命不勝榮。墨溼黃新照眼明。絡繹交親來作賀。羊腔酒擔擁柴荆。

又

敕過鸞臺鳳閣來。清晨初拆驛書開。繡箱香案迎門拜。身著朝衫止此回。

又

山村處處晴收麥。鄰曲家家午曬絲。正用此時身得謝。十分壽酒不須辭。

又

白髮三朝執戟郎。賜骸偶值歲豐穰。村東已種千畦麥。舍北新添百本桑。

又

老民一日脫朝衣。回首平生萬事非。赤脚婢沾村釀去。平頭奴馭草驢歸。

又

一生病鶴寄樊籠。此去鴻冥萬里空。未論蓴羹與羊酪。新秔要勝太倉紅。

又

沉緜分已餞餘生。造物苛留未遣行。今日下牀還健在。一編來就小窗明。

又

清靜全勝欲界天。逍遙不減地行仙。衆中莫怪人嫌老。十五年前本命年。

又

一盂麥飯掩柴關。坐久不堪腰脚頑。拖得瘦藤閑信步。小橋東北望螺山。

又

問門前客元無迹。諛墓中人本不工。猶有鄰僧能送米。未妨竊比玉川公。

又

歸耕所願雜民編。乍脫朝衫喜欲顛。但得吾兒能力穡。不請半俸更超然。

又

湘湖蓴菜勝羊酪。項里楊梅敵荔枝。八帙開來今過半。一杯引滿若爲辭。

又

不嫌雞瘦濁醪酸。草草杯盤具亦難。食指忽搖方竊喜。小兒來請賽鄱官。

又

飯中白飯出新春。釜裏黃齋細菜葱。一飽坐兼南北美。始知造物念衰翁。

又

多事車前要八騶。老人惟與一藤遊。未教變化爲龍去。更踏人間萬里秋。

讀後漢書

賃春老子吾所慕。垂世文章寧在多。詩不刪來二千載。世間惟有五噫歌。

又

季英行年九十八，猶灌園蔬授六經。我欲圖之置齋壁，世無顧陸善丹青。

新裁道帽示帽工

故帽提攜二十霜，別裁要作退居裝。山人手段雖難及，老子頭圍未易量。花插露霑那暇惜，塵侵鼠齧卻須防。裏時嬾復呼兒問，一匣菱花每在傍。

新製道衣示衣工

良工刀尺製黃絁，天遣家居樂聖時。著上朱門應不稱，裁成烏帽恰相宜。客撐小艇招垂釣，僧掃虛窗約對棋。寶帶貂冠雖看好，定知不入野人詩。

兩翁歌

君不見塞上失馬翁，馬去安知不爲福。又不見新豐折臂翁，臂廢身全老鄉國。陸翁多難類兩翁，著書滿屋身愈窮。十年力耕遇水旱，老不能耕年始豐。人言翁窮可閔笑，霍食鶉衣天所料。翁方自謂實幸民，對人抱膝惟清嘯。卽今羣公佐明主，長劍挂頤來接武。向非老病又不才，縱欲歸休寧見許。

五月中連夕風雨氣候如高秋枕上有賦

擁被微吟短鬢秋，孤燈殘漏共悠悠。雨聲不貸三更夢，酒力寧禁萬里愁。身寄湖山鄰剡曲，心遊河嶽過關頭。世間可恨知多少，虛弊當年季子裘。

前詩感慨頗深，猶吾前日之言也。明日讀而悔之，乃復作此，然亦未能超然物外也。

身世今如一老僧。病餘殘髮雪鬚鬢。湖桑墟下漁舟雨。道樹山前野店燈。澗水潺湲供洗鉢。松風蕭颯入行滕。世人欲覓何由得。覲面相逢喚不應。

雨後過近村

賦罷淵明歸去來。紵衣桐帽一時裁。歲華新筍初成竹。天氣停雲未斷梅。江路醉歸常嵬峨。僧窗閑過即徘徊。老人剩有凋年感。寄語城笳莫苦催。

銘座

天下本無事。庸人實擾之。吾身本無患。衞養在得宜。一毫不加謹。百疾所由滋。人生快意事。噬臍莫能追。汝顧不少忍。殺身常在斯。深居勿妄動。一動當百思。每食視木草。此意未可嗤。賦詩置座右。終身作元龜。致仕後述懷

又

彈冠紹興末。解組慶元中。灑澗危塗過。邯鄲幻境空。閑傳相牛法。醉挾鬪鷄翁。衝雨歸來晚。山花滿笠紅。壯歲江湖去。還朝六十餘。輩流俱已盡。勳業固知疎。遽走寧黔突。長閑祇荷鋤。如今更何憾。終作愛吾廬。

又

生理雖貧甚。胸中頗浩然。常辭問字酒。屢卻作碑錢。寧有駱堪鬻。尙無車可懸。小須梅雨霽。散髮醉江天。

又

昔自臺郎斥。頻年困負薪。四叨優老祿。十送故鄉春。衰瘁寧知活。蕭條敢厭貧。惟思逢樂歲。擊壤學堯民。

又

韋布還初服。蓬蒿臥故廬。所慚猶火食。更恨未巢居。叱叱驅黃犢。行行跨白驢。交親各強健。不必問何如。

又

店店容賒酒。家家可乞漿。白陂時雨足。綠樹午陰涼。病爲休官減。門緣謝客荒。今朝遇鄰叟。滿意說豐穰。

蝶

庭下幽花取次香。飛飛小蝶占年光。幽人爲爾憑窗久。可愛深黃愛淺黃。

戲贈酒榼

老去臥湖海。白髮朝朝新。賴有小道士。時來中聖人。形模雖簡古。風味絕清真。何當秋雨夕。傾倒見情親。

題菴壁

破屋颼颼雀鼠穿。邇來四壁愈蕭然。錢多孰謂可使鬼。人衆何嘗能勝天。秃尾驢遊雲外寺。長鬚奴引竹間泉。更餘一事猶當勉。讀易從今十絕編。

又

孤村寂寂潮生浦。小院昏昏雨送梅。蔬食一簞宜面槁。畏塗九折自心灰。古人骨朽有書在。今雨泥多無客來。散髮陽狂非寄傲。世間萬事本悠哉。

泛舟澤中夜歸

無窮煙海接空濛。秦望稽山醉眼中。虹斷已收千嶂雨。鶴歸正駕九天風。漁舟容與橫沙際。水鳥號鳴傍

葦叢興盡還家忽三鼓。半輪殘月斗杓東。

書嬾

此身不覺老侵尋。殘髮蕭蕭雪滿簷。那有新詩書觸目。亦無閑話問安心。塞垣西戍茫如夢。省戶東歸病至今。一嬾便知生世了。午窗酣枕敵千金。

晨起

清晨推枕起。盥面吾事足。豈無掃灑役。出市待歸僕。小殮亦已省。尙進藥盈掬。整衣登北堂。危坐巾一幅。徐行梧楸陰。愛此雨餘綠。幽鳥東山來。鏘鳴若琴筑。靜聽興未闌。穉子報飯熟。欣然往從之。寧計食不肉。

夜坐

仲夏苦鬱蒸。旣夕熱未解。浴罷坐柴門。汲井痛掃灑。覆野天穹穹。垂地星磊磊。明河落無聲。北斗低飲海。三更缺月升。草木盡光彩。漁舟在何許。斷續聞欸乃。百憂集老境。坐歎雙鬢改。誰能擁雕戈。遺虜何足醜。白樂天詩云。倦倚繡牀愁不動。緩垂綠帶鬢鬟低。遼陽春盡無消息。夜合花前日又西。好事者畫之爲倦繡圖。此花以五六月開。山中多于茨棘人殊不貴之。爲賦小詩以寄感歎。

王室東遷歲月除。兩京漠漠暗胡沙。繡牀倦倚人何在。風雨漫山夜合花。

蜉蝣行

蜉蝣至細能知時。春風禮雨占無遺。蜻蜓滿空乃不知。庭除一出無歸期。樂哉蜻蜓高下飛。蜉蝣未盡何憂飢。簷間蜘蛛亦伺汝。吐絲織網腹如鼓。

望雲

夜雨勿厭空堦聲。天公欲作明朝晴。明朝甲子最畏雨。榜舟入市聞古語。今年雨暘俱及時。麥已入倉雲四垂。雨來不駛亦不遲。大點如菽細如絲。徐徐雲開見杲日。晚禾吹花早禾實。但令有米送官倉。豆飯藜羹甘似蜜。

久雨路斷朋舊有相過者皆不能進

今年風雨多。平陸成沮洳。吾廬地尤下。積水環百步。客從城市來。熟視卻復去。僮奴笑欲倒。繖屐知無路。計其各還家。對竈燎衣袴。嗟予久退藏。蓬藿生庭戶。誰如數子賢。裹飯肯來顧。清言雖不接。亦足慰遲暮。

散步至三家村湖桑埭西村名

人情簡朴古風存。暮過三家水際村。見說終年常閉戶。仍聞累世自通婚。罾船歸處魚殮美。社瓮香時黍酒渾。記取放翁扶杖處。渚蒲煙草溼黃昏。

村東晚眺

興來信步過東陂。最愛村東物象奇。藤杖穿雲秋望處。葛衣霑露夜歸時。殘聲淒斷蟬移樹。孤影荒寒鵲遶枝。自揣今年還得飽。一川新稻已離離。

又

飽食無營過暮年。筇枝到處一蕭然。清秋欲近露霑草。新月未高星滿天。遠火微茫沽酒市。叢蒲窸窣釣魚船。哦詩每恨工夫少。又廢西牕半夜眠。

露坐

星稀避月明。河白映天青。入夜蟬逾急。先秋葉自零。花枝栖露蝶。簾罅度風螢。欲喚鄰翁坐。漁舟醉不醒。

又

落月無留照。殘河亦已傾。墜枝雙鶻鳥。黏草一螢明。暑令忘三伏。涼颼逼五更。爲憐荷瀉露。故起繞池行。

致仕後歲事有望欣然賦詩

聖時恩厚賜餘生。日與鄉閭樂太平。已棄胡牀無長物。尙攜拄杖有同行。新裁烏帽人爭看。小摘青蔬手自烹。買得水車無用處。絕知造物相歸耕。

夜聞姑惡

湖橋東西斜。月明高城漏鼓傳。三更釣船夜過掠沙際。蒲葦蕭蕭姑惡聲。湖橋南北煙雨昏。兩岸人家早閉門。不知姑惡何所恨。時時一聲能斷魂。天地大矣汝至微。滄波本自無危機。秋菰有米亦可飽。哀哀如此將安歸。

村舍雜書

我本杞菊家。桑苧亦吾宗。種藝日成列。喜過萬戶封。今年夏雨足。不復憂螟蟲。歸耕殆有相。所願天輒從。

又

中春農在野。蠶事亦隨作。手種臨安青。桑名可飼蠶。百箔累累繭滿簇。繹繹絲上簞。老子雖安眠。衣帛可無忤。

又

舍北作蔬圃。敢辭灌溉勞。輪囷瓜瓠熟。珍愛敵豚羔。晨飧戒廚人。全項淨去毛。雖云發客笑。亦足慰老饕。

又

舍南種胡麻。三日幸不雨。晨起親按行。已見青覆土。窮人如意少。喜色漏眉宇。兒童勿惰偷。造物不負汝。

又

五月新麪成。六月甘瓜熟。作麪及良時。火見金始伏。懸知桑落後。醅面醴如粥。再拜謝天公。無功叨美祿。

予家釀用宛丘瓜麪法。

又

折蓮釀作醯。采豆治作醬。開曆揆日時。汲井滌瓮盎。上奉時祭須。下給春耕餉。咨爾後之人。歲事不可曠。

又

東山石上茶。鷹爪初脫鞵。雪落紅絲禮。香動銀毫甌。爽如聞至言。餘味終日留。不知葉家白。亦復有此不。

又

逢人乞藥栽。鬱鬱遂滿園。玉芝來天姥。黃精出雲門。丹苗雨後吐。綠葉風中翻。活人吾豈能。要有此意存。

又

我居大澤中。一舟不可無。短篷挾兩漿。疾若波中鳧。來往菰蘆村。按行瓜芋區。浮家亦可樂。何必愛吾廬。

又

軍興尙戎衣冠帶謝褒博禿巾與小褰顧影每懷忤及今反士服始覺榮天爵出入阡陌間終身有餘樂

又

讀書乃一癖我亦不自知坐書窮至老更欲傳吾兒吾兒復當傳百世以爲期君看北山公太行尙可移

又

爵祿九鼎重名義一羽輕人見共如此吾道何由行湖山有一士無人知姓名時時風月夕遙聞清嘯聲

消暑小飲熟睡至暮

桑落香浮榭葉杯甘瓜綠李亦佳哉虛堂頓解汗揮雨高枕俄成鼻殷雷靜聽風聲生檻竹徐看日影轉

庭槐晚涼更動扁舟興北渚紅蕖已半開

又

槐影桐陰欲滿廊綸巾羽扇自生涼新菟玉濯陳雙榼平展風漪可一牀馳騎遠分丹荔到大盆寒浸碧

瓜香湖邊誰謂幽居陋也愛迢迢夏日長

夜坐庭中達旦

老矣常嗟去日適病來更覺此生浮庭花無影月當午簷樹有聲風報秋足倦獨行驚蹉跎髮稀久坐怯
颼颼雞號日出閑無事又向清溪弄釣舟

讀前輩詩文有感

我無前輩千鈞筆造物爭功謝不能已分文章歸委靡可憐意氣尙憑陵鸞旗廣殿晨排仗鐵馬黃河夜

踏冰此事要須推大手。蟬嘶分付與吳僧。

自嘲

天公大度一河奇。養此無能老白癡。窗疾閑愁俱掃盡。美餐甘寢更無時。蛙鳴庭草何曾問。水半門扉亦不知。道似嬰兒猶有恨。小軒風月獨哦詩。

余讀元次山與灑溪鄰里詩意甚愛之。取其間四句各作一首。亦以示予幽居鄰里。

峯谷互回映

北起成孤峯。東蟠作幽谷。中有十餘家。蘆藩映茆屋。土肥桑柘茂。雨飽麻豆熟。比鄰通有無。并稅先期足。煙中語相答。月下歌相續。兒童不識字。未必非汝福。張芸叟過鄭公故莊詩曰。兒童不識字。耕稼鄭公莊。

誰家無泉源

泉聲百步聞。泉脈高下通。潺湲亂雲外。屈曲明月中。八月稻登場。引之作機舂。羨流灌蔬畦。全家飽芥菘。洗沐及澣濯。蚤莫靡不供。斗水百憂寬。悲哉杜陵翁。

夾路多修竹

黃芴持覆屋。溪石運作垣。桑麻有餘地。家家養龍孫。春雷初起蟄。切玉俱盤飧。一朝解風籜。纓韃蒼雲屯。我來倚拄杖。恐是辟疆園。千畝倘可致。封君何足言。

扁舟皆到門

千錢買輕舟。不復從人借。樵蘇晨入市。鹽酪夕還舍。豈惟載春秋。亦足穫秋稼。有時醉村場。老稚相枕藉。

常侵落月行。不畏惡風嚇。無爲詫軒車。此樂予豈暇。

東山避暑用輓轡體

避暑穿林隨所之。一奴每負胡牀隨。望秋槁葉有先隕。未暮赫日無餘暉。輪囷巖奇澗松古。鉤輅格磔蠻禽悲。北巖竹間最慘慄。清獻倚石真忘歸。

喜雨六月二十七日

去年禹廟歸梅梁。今年黑虹見東方。巫言當豐十二歲。父老相告喜欲狂。插秧正得十日雨。高下到處水滿塘。六月欲盡日杲杲。造物已命摧驕陽。夕雲如豚渡河漢。占書共謂雨至祥。南山雷車載膏澤。枕上忽送聲淋浪。猛思濁酒大作社。更想紅稻初迎霜。六十日白最先熟。食新且領晨炊香。六十日白。稻名。常以六月下旬熟。

得故人書偶題

小築稽山下。狂歌剡曲傍。鄉鄰共雞黍。童穉學農桑。白首餘年促。青編後日長。此心誰復許。三歎付書囊。

喜雨歌

不雨珠。不雨玉。六月得雨真雨粟。十年水旱食半菽。民伐桑柘賣黃犢。去年小稔已食足。今年當得厭酒肉。斯民醉飽定復哭。幾人不見今年熟。

老學菴井

老學菴北井。六月寒如冰。大旱不涸雨不增。凜如人以常德稱。日濟千人不驕矜。置而不汲渠自澄。輓轡

三丈青絲繩。對之已足涼肺膈。使我終日臥曲肱。顧謂此井真良朋。蕩除炎歎卻塵垢。宜有鬼神來護守。嗚呼涇水一石泥。數斗正使逢時亦何有。

長歌行

我無四目與兩口。但在人間更事久。死生元是開闔眼。禍福正如翻覆手。消磨日月幾繡屐。陶鑄唐虞一杯酒。既非狗馬要蓋帷。那計風霜悴蒲柳。竈突無煙今又慣。龜蟬與我成三友。判知青史無功名。只用忍飢垂不朽。

七月二日夜賦

鄙人志趣在漁樵。四十年來負聖朝。本恥彈冠良易挂。未嘗刻印敢煩銷。盈盈微月生江渚。嫋嫋清笳下郡譙。衰病逢秋真一洗。井牀桐葉已先飄。

自述

二畝新蔬圃。三間舊草堂。病除身小健。秋近夜微涼。薄酒時醒醉。殘書半在亡。老懷常自笑。無事忽悲傷。

又

睡美不知旦。氣衰先覺秋。有時浮小艇。隨意宿滄洲。未恨名風漢。惟求拜醉侯。更須多種竹。搔首送悠悠。

項羽

八尺將軍千里騅。拔山扛鼎不妨奇。范增力盡無施處。路到烏江君自知。

曹公

二袁劉表笑談無。眼底英雄不足圖。赤壁歸來應歎息。人間更有一周瑜。

陸放翁集

劍南詩稿

卷第四十

夜雨

濃雲如潑墨。急雨如飛鏃。激電光入牖。奔雷勢掀屋。漏濕恐敗書。起視自秉燭。移牀願未暇。盆盎苦不足。不如卷茵席。少忍待其復。飛螢方得意。熠熠相追逐。姑惡獨何怨。菰叢聲若哭。吾歌亦已悲。老死終碌碌。昔人有畫醉僧。醉道士。醉學究者。皆見于傳記及歌詩中。予暇日爲各賦一首。

醉僧

殘雪覆枯顱。手扶短柳栗。送酒無蘇州。一醉未易得。青旗獵獵秋風吹。長瓶一吸亦足奇。但辦道傍常醉倒。不須解作藏真草。

醉道士

落托在人間。經旬不火食。醉後上江樓。橫吹蒼玉笛。大口如盆眼如電。九十老人從小見。曾攜一鶴過岳陽。滿城三日聞酒香。

醉學究

聖師飲百觚。儼然常齋莊。弟子習禮餘。兕觥躋公堂。至今遺風被洙泗。諸生雅歌老儒醉。衣冠簡朴未可

輕安知中無魯二生。

次季長韻回寄

野人蓬戶冷如霜。問訊今惟一季長。舊好自均親骨肉。新知何怪薄心腸。開書字字論疇昔。遣使年年有故常。萬念知公掃除盡。見衰底事獨難忘。

溪上小酌

岸幘出籬門。投竿俯溪瀨。魚聚忽千百。鳥鳴時一再。新涼社瓮香。亦有雉兔贖。歡言洗杯酌。又破止酒戒。

齋中夜賦

高居終日掩齋扉。幽事常多俗事稀。露重叢篁時自瀉。風高脫葉有先飛。秋衣漸製閒砧杵。社肉初分謝蕨薇。卻笑老身閑不得。一燈明滅亂書圍。

讀舊稿有感

我少則嗜書。于道本無得。譬如昌歟麥。乃自性一癖。老來百事廢。惟此尙自力。豈惟絕慶弔。乃至忘寢食。吟哦雜誦詠。不覺日既夕。文辭顧淺懦。望古空太息。世俗不可解。更爲著金石。收斂固已遲。雖悔終何益。君看老農夫。法亦傳后稷。持此少自寬。陶然送餘日。

新秋

秋氣入清笳。旗亭酒可賒。長歌穿小市。短帽插幽花。溪女留新蟹。園公餉晚瓜。誰知閑老子。解作醉生涯。陳阜卿先生爲兩浙轉運司考試官時秦丞相孫以右文殿修撰來就試直欲首送阜卿得予文

卷擲置第一秦氏大怒予明年既顯黜先生亦幾蹈危機偶秦公薨遂已予晚歲料理故書得先生手帖追感平昔作長句以識其事不知衰涕之集也

冀北當年浩莫分斯人一顧每空羣國家科第與風漢天下英雄惟使君後進何人知大老橫流無地寄斯文自憐衰鈍辜真賞猶竊虛名海內聞

書喜

乞得身歸鏡水濱此生真作葛天民眼明身健何妨老飯白茶甘不覺貧
盞酒又簞三斗熟園花時報一枝新挂冠更作黃冠計多事常嫌賀季真

又

已向煙霞著脚深世間萬事不關心舊攜鴉觜供鉏藥新典魚須用買琴
井上引藤初滿架地南移竹漸成陰話行不必須今日五百年間有賞音

幽居

萬家水竹古山陰揀得幽居愜素心梁燕委巢知社近井桐飄葉覺秋深
琴緣廢久塵常積書爲開稀蠹漸侵幸自杜門無一事不須清夜感衣砧

雜興

病養精神過服藥貧知儉約勝營生
臯夔事業今何有且與心君致太平

又

東家飯牛月未落。西家打稻雞初鳴。老翁高枕葛幮裏。炊飴熟時猶鼾聲。

又

暮年常草睡爲祟。好事新分安樂茶。更得小瓢吾事足。山家風味似僧家。曾召南提幹近送安樂茶來。

又

蛟鱷垂涎歷畏塗。如今歡喜去搆鋤。一生患難休回首。雅似元符會上書。

贈鷺

雪衣飛去莫匆匆。小住灘前伴釣篷。禹廟蘭亭三十里。相逢多在暮煙中。

贈鵲

爲梁星渚自何年。毛羽摧傷不怨天。知我齋餘常施食。翩然飛下北窗前。

東堂睡起

置身事外息吾黥。猶臥空堂一榻橫。簷影漸移知日轉。樹梢微動覺風生。每從山寺開經帙。問就園公辨藥名。若論胸中淡無事。八珍何得望藜羹。

五鼓起坐待旦

睡覺初聞雞一鳴。披衣危坐待窗明。殘軀已向閑中老。癡夢猶尋熟處行。南北迢迢悲往事。古今莽莽歎浮生。伯倫一錘君休笑。家象祁連亦已平。

功名

少年妄意慕功名，老眼看來一髮輕。金甲雖如朝邑尉，羊裘終媿富春生。連娟落月依山盡，寂寞寒潮蘸岸平。要識放翁新得意，蓼花多處釣舟橫。

搔首

玩畫無餘易，聞歌已盡詩。古人不可作，此理孰能推。白髮秋風裏，青燈夜雨時。初心竟當負，搔首歎吾衰。

小雨釣歸

雨點鳴叢葦，雲頭冒遠山。兒曹出籬望，老子榜舟還。潤入園畦裏，涼生窗戶間。秋陽方可畏，徙倚一開顏。

曉賦

八月江湖風露秋，時聞脫葉下梧楸。離離斗柄西南指，爛爛天河今古流。人語正謹過古埭，湖桑埭五鼓聞挽船聲。喧甚角聲三弄下，譙樓百城已共豐年樂。一老猶懷卒歲憂。

急雨父老謂雲逆風則必雨驗之信然

雲從西南興，風自東北至。老農占雨候，速若屈伸臂。亂點俄打窗，新涼已生袂。經旬苦肺渴，得此亦少慰。呼兒持故襦，買酒具一醉。薄言萑園蔬，雉兔未可議。

遣興

幾看人間歲月新，釣船猶繫鏡湖濱。會穿高帝乾元仗，卻作山陰版籍民。留病三分嫌太健，忍飢半日未全貧。早知畫繡能爲祟，翁子終身合負薪。

又

湖海元爲汗漫遊，誤恩四領幔亭秋。掃空薄祿始無媿，閉上衡門那得愁。湯嫩雪濤翻茗椀，火溫香縷上衣篝。牀頭亦有閑書卷，信手拈來倦卽休。

又

掃盡衣塵喜不勝，村居終日醉騰騰。閑投鄰父祈神社，戲入羣兒鬪草朋。幽徑有風偏愛竹，虛堂無暑不憎蠅。悠然又見江天晚，隔浦人家已上燈。

又

久矣微官絆此身，柴車歸老亦逢辰。阮咸臥摘孤風在，白墮閑傾一笑新。萬里馳驅曾遠戍，六朝涵養忝遺民。清閑卽是桃源境，常笑淵明欲問津。

讀林逋魏野二處士詩

君復仲先真隱淪，筆端亦自幹千鈞。閑中一句終難道，何況市朝名利人。

紙墨皆漸竭戲作

官庫誰能餉陟釐，漢宮無復賜險麋。不如掃盡書生事，閑伴兒童竹馬嬉。

讀隱逸傳

終南處士入都門，少室山人補諫垣。畢竟只供千載笑，石封三品鶴乘軒。

泛舟至東村

野水如天遠，漁舟似葉輕。颼颼風漸冷，淡淡月初生。沙際樵蘇路，籬間語笑聲。還家已薄暮，燈火照柴荆。

自詒

健忘閑何害。貪眠老正宜。本心惟泥酒。餘習略存詩。未廢春農業。猶堪幼學師。微官何所戀。請老五年遲。

野興

荷鋤通北澗。腰斧上東峯。秋水清見底。曉雲深幾重。蓁蓁傳社鼓。渺渺度樓鐘。歸覓村橋路。詩情抵酒濃。

讀書

平生愛客如愛書。力雖不逮意有餘。門前車馬久掃迹。老病又與黃卷疎。人情冷暖可無問。手不觸書吾自恨。今年入秋風雨頻。燈火得涼初可近。年過七十眼尙明。天公成就老書生。舊業雖衰猶不墜。夜窗父子讀書聲。

客有見過者既去喟然有作

鬢毛俱白盡。事不補秋毫。去死今無幾。歸耕何足高。已如陶止酒。徒勸屈鋪糟。惟有滄溟去。揚帆觀雪濤。

又

永日安耕釣。餘年迫耄期。研朱點周易。飲酒和陶詩。帶箭歸飛鶴。搘牀不瞑龜。此生君看取。死是出門時。

秋陰

淡日披朝霧。輕雲結暮陰。菰蒲溪路暗。松竹草堂深。妙墨雙鈎帖。奇聲百衲琴。古人端未遠。一笑會吾心。

八月九日晚賦

薄晚悠然下草堂。綸巾鶴氅弄秋光。風經樹杪聲初緊。月入門扉影正方。一世不知誰後死。四時可愛是

新涼從今覓醉其當勉。酒似鵝兒破殼黃。

燕坐

赫日曛曛湧海門。黃流混混汜河源。功成一日書仙籍。鍊骨成金不足言。

村飲

不來東舍卽西家。野老逢迎一笑譁。試說暮年如意事。細傾村釀聽私蛙。

又

無念無營飽卽嬉。老翁真箇似嬰兒。昏鐘未動先酣枕。日上三竿是起時。

又

買來新兔不論錢。釣得鮮鱗細柳穿。野店渾頭更醇醖。一杯放手已醺然。

又

淡煙孤榜繫村橋。疊疊沙痕印落潮。最是一年秋好處。踏泥沽酒不辭遙。

秋雨益涼寫興

秋氣蕭蕭暑已歸。晚雲更送雨霏微。牀收珍簟敷菅席。笥疊織絺換熟衣。遣醉縱橫馳筆陣。乘閑談笑解棋圍。出門未免流年歎。又見湖邊木葉飛。

薪米偶不繼戲書

仕宦不諧農失業。敗屋蕭蕭書數篋。藜羹不糝未足嗟。囊竈無薪掃枯葉。丈夫窮空自其分。餓死吾肩未

嘗脅世間大有乞墦人。放翁笑汝驕妻妾。

牧牛兒

溪深不須憂。吳牛自能浮。童兒踏牛背。安穩如乘舟。寒雨山陂遠。參差煙樹晚。聞笛翁出迎。兒歸牛入圈。

與兒子至東村遇父老共語因作小詩

桑竹穿村巷。衡茅隔土垣。海氛成物象。秋氣肅川原。豆芋行將熟。雞豚亦已繁。豐凶歲所有。農事更深論。

微雨午寢夢憇道傍驛舍若在秦蜀間慨然有賦

吳中秋晚雨冥冥。自笑閑愁又爾馨。身世已歸南北陌。夢魂猶寄短長亭。濁醪可釀樽餘綠。明鏡無情鬢失青。賴有釣船堪送老。一汀鷗鷺共忘形。

晨起對鏡

雙鬢成絲高頰頹。曉窗臨鏡意茫然。朱顏豈是一朝去。暗鑠潛消五十年。

村思

揣分新辭祿。扶衰又度秋。已將窮博健。更賴學忘憂。船護煙陂鴨。欄歸草徑牛。作勞何以慰。茅店問新菑。

秋夜

倦叟投牀早。昏燈落燼頻。鵲翻驚缺月。犬吠逐行人。未喪詩書業。猶存老病身。菊花行可醉。作意插烏巾。

醉中書懷

既老心愈空。新涼體差健。登山每曠扶。對案亦強飯。平生百事嬾。惟酒不待勸。迨此桑落時。一醉適我願。

羸然雲水身。本非朱紫楨。少猶恥枉尺。老敢欺方寸。但令死瞑目。餘事何足論。不見鹿門翁。全家事潛遜。

次韻鄭盱眙見寄并簡其甥劉君

衣上空嗟京洛塵。故交半作白頭新。衆中初得見吾子。東觀已疑無若人。仗馬極知非久斥。沙鷗要時孰能馴。兩章英妙同時到。趙壹囊中却未貧。

書齋壁

平生憂患苦縈纏。菱刺磨成芡實圓。俗謂困折多者謂菱角磨作雞頭。天下不知誰竟是。古來惟有醉差賢。過堂未悟鍾將覺。睨柱寧知壁偶全。自笑爲農行沒世。尙如驚雀落空弦。

一老

太平一老醉騰騰。南陌東阡喜不勝。民力農桑家自足。士崇名節道方興。騎鯨仙去時猶遠。射虎歸來氣頗增。莫道幽棲交舊絕。月中亦有打門僧。

戲用方外語示客

紅粟青錢一掃空。箴籬行賣學龐翁。身居本地風光裏。愁擲它方世界中。剩欲劇談明不二。誰能太息賞無同。踞牀一喝君聞否。三日猶應覺耳聾。

秋晚

西山破曉兩眉青。南浦無風一鏡平。食盡不容添鶴口。身閑且免負鷗盟。霜前草樹已無色。雨到菰蒲先有聲。只怪勝遊頻入夢。今朝蜀客話青城。故人范中立巨山自青城來見勗。

又

辭祿始知貧有味。杜門不覺老相催。寒鴉已占雁前到。黃菊猶須霜後開。團扇塵埃高掛壁。短檠書史亂成堆。羸軀自笑癡頑甚。撐拄新寒又一回。

又

世事無窮似奕棋。不如常采故山芝。蕭蕭雞犬三家聚。莽莽風煙十里陂。幸有濁醪從客醉。常憂黠鬼笑人癡。清秋樂處君知否。庭下幽花漸可移。

次金溪宗人伯政見寄韻

道義流聞意已傾。豈知晚歲託齊盟。六經日月未嘗蝕。千載源流終自明。汝水家家書有種。吾宗世世士知名。讀君長句還增氣。俗耳那聞韶護聲。

新寒

碧蝶飛飛過短籬。山薑石竹有殘枝。誰知老子閑眠處。恰是新寒細雨時。

又

安石榴房初小坼。南天竺子亦微丹。新寒漠漠偏欺老。睡起無風怯倚欄。南燭草本。俗謂之南天竺。李端叔取以名僧軒。蓋用俗語也。

村鄰會飲

陸子白首安耕桑。樂事遽數烏能詳。長羅家家雪作麵。畫楫處處青分秧。迎荻船歸潮入浦。祈蠶會散月

滿廊。有時鄰曲苦招喚。茅簷掃地羅壺觴。堆盤珍膾似河鯉。入鼎大臠勝胡羊。披縣黃雀麴糝美。斫雪紫蟹椒橙香。老人飽食可無患。摩挲酒盞與飯囊。兒孫扶侍遞相送。笑語無間歌聲長。人間哀樂不可常。掠剩有鬼在汝傍。常憂水旱虞螟蝗。力行孝悌招豐穰。

試筆

烹葵飯豆飽還休。弄筆翻書歲又秋。靈府湛然如止水。擬將何地著閑愁。

又

紅絲玉斗紫毫銛。歲晚相從味更長。不似樂天歸老日。柳枝駱馬兩堪傷。

孤村

老寄孤村裏。悠然臥曲肱。算貧先放鶴。嫌鬧併疎僧。古戍高秋笛。寒窗半夜燈。平生羞詭遇。多獲豈吾能。
絕祿以來衣食愈。不繼小兒力圖之。殊未有涯。予謂不若痛節用。爾示以此詩。

處世吾傷拙。營生汝亦疎。如謀道邊舍。似信枕中書。甕牖居疑泰。藜羹食敢餘。安嬰元學墨。勿負此心初。
子宿疾多已失去。獨氣痛時作賦詩自寬。

疾久難全去。扶持度歲年。垣牆完罅隙。匕筯禁芳鮮。漸減觀書課。常儲買藥錢。鄉人多不識。誰與問沉綿。
秋懷十首末章稍自振起亦古義也。

皇天本無心。萬物各有時。飛鴻何預人。南翔每如期。仰看霜露墜。俯歎草木衰。英英籬下菊。秀色獨滿枝。
豈無一樽酒。相與斟酌之。蓋老天所佚。行歌復何疑。

又
暑退財幾時。忽已迫霜露。西風一何厲。落葉紛滿路。老翁衰可笑。日夜念墮戶。衣裘先關懷。膏火亦當具。酒尤不可緩。傾聽糟牀注。供槃柿栗耳。何敢議雉兔。

又

雨滴大梧葉。風轉孤蓬窠。秋色固悽愴。二物感人多。日月行黃道。倏過如飛梭。大計百年間。貴賤俱銷磨。東家及西舍。更代哭與歌。若無杯中物。如此搖落何。

又

身如行脚僧。放包卽爲家。家如道邊店。蕭然寄天涯。居室如小舟。風扉艣謳啞。坐傍陳琴書。庭下栽雜花。儉陋雖可笑。在我則已奢。何以善吾生。念念思無邪。

又

遇酒幸一醉。遇飯幸一飽。成遇空無時。豈復有他巧。鄉鄰哀其窮。叩戶餽糜粲。欣然出舍傍。菘韭青落爪。飢羸曾未起。吟諷已稍稍。袖手北窗前。枯腸困搜攪。

又

秋高天薄寒。夾衣已出笥。團團素紈扇。時至自當棄。明年機中練。與我亦何異。宮妾感物悲。此豈丈夫事。吾曹一出門。所遇皆有義。夷齊死千年。高風邈難嗣。

又

辟塵當以屣。濯纓當以水。龜堂一炷香。世念去如洗。人生天地間。太倉一稊米。哀哉不自悟。役役以至死。孰能從我遊。趺坐燔柏子。夜半清磬聲。悠然從定起。

又

改朔甫再宿。月見西南隅。織織一銀鈎。掛空疑有無。我行青楓岸。遠水浮雙鳧。新寒入短衣。感此風霜初。頗欲呼小艇。東村行芋區。衣薄且言歸。煙火望吾廬。

又

短蓑榜輕舟。時過野僧舍。長衫挂數珠。亦入法華社。平生無揀擇。生死均早夜。餘年猶幾何。久已付造化。常嫌樂天佞。卻肯退之罵。君看佛骨表。自是無生話。

又

我昔聞關中。水深土平曠。涇渭貫其間。沃壤誰與抗。桑麻鬱千里。黍林高一丈。潼華臨黃河。古出名將相。淪陷七十年。北首增慘愴。猶期垂老眼。一覩天下壯。

九月七日子坦子聿俱出斂租穀雞初鳴而行甲夜始歸勞以此詩

仲秋穀方登。螟生忽告飢。艱難糞一飽。俯仰事已非。貸糧助耕耘。客主更相依。一旦忽如此。欲語涕屢揮。共斂螟之餘。存者牛毛稀。吾兒廢書出。辛苦幸庶幾。夜半聞具舟。憐汝露濕衣。既夕不能食。念汝戴星歸。手持一杯酒。老意不可違。穠瘦酒味薄。食少雞不肥。頗聞吳中熟。多稼徹王畿。亦欲就飽處。無羽能奮飛。官富哀我民。榜笞方甚威。渠亦豈得已。撫事增獻歎。

醉題隸西酒家

陣陣新寒入布裘。偶乘小醉得閑遊。丹楓落日野橋晚。斷雁溼雲江路秋。馬得一鳴何恨斥。金經百鍊豈容柔。不知千載塵埃裏。更有吾曹強項不。

又

桑麻蒙翳不通鄰。耽酒頹然一老民。遣客方眠那是醉。有衣可典未爲貧。曬翎斜日鷗來熟。印跡平沙雁到新。君看此間何境界。癡人猶說吐車茵。

秋晚

庭草猶殘綠。溪楓已半丹。誰知此翁健。又見一年寒。幻境槐安夢。危機竹節灘。如今渾過盡。摩腹且加餐。

省事

省事漸捐書。甘貧學藝蔬。心安閑夢少。病去俗醫疎。兀爾遊方外。超然到物初。此身猶是幻。況復愛吾廬。晨起頗寒飲。少酒作草數幅。

衣食無多悉自營。今年真箇是歸耕。屏居大澤羣鷺息。乍得清寒百體輕。橋北潦收波淺碧。隸西霜近葉微頹。一杯弄筆元無法。自愛龍蛇入卷聲。

往事

海內橫流日。吾猶及建炎。衆醫雖共視。久疾固難砭。黠虜方觀釁。行宮未解嚴。時平逾五紀。話此涕常霑。步至東莊

澤國寒雖晚。霜天已迫冬。麴花雪無際。稻米玉新春。身已風中葉。人方飯後鐘。兒能哀老子。努力事春農。

秋思

門巷蕭條秋色深。黃花始欲慰孤斟。久貧自笑不妨樂。過足固知非所欽。琴調已忘還漸省。詩聯未穩更常吟。吾兒西上無多日。安得相從老故林。時子處將調官臨安。

又

日落江城聞擣衣。長空杳杳雁南飛。桑枝空後酷初熟。豆莢成時兔正肥。徂歲背人常冉冉。老懷感物倍依依。平生許國今何有。且擬梁鴻賦五噫。

讀退之人不知古今馬牛而襟裾之句有感

書生獨占世間癡。過計私憂無已時。知盡古今成底事。空將血淚向人垂。

病愈看鏡

鏡中稍復舊朱顏。一笑衰翁乃爾頑。三百銚齋消未盡。不知更著幾年還。舊傳貧士死。見陰吏爲言當還魂。有三百銚齋祿料未盡。

讀韓致光詩集

渺莽江湖萬里秋。玉峯老子弄孤舟。猶勝宿直金鑾夜。凜凜常懷潑酢憂。

逆旅書壁

驢鞍懸酒榼。僮背負衣囊。但說市朝變。不知岐路長。下程先施藥。拂榻靜焚香。明旦又西去。河橋秋葉黃。

又
騎驢萬里行。歲一過秦城。下杜賈春酒。新豐聞曉鶯。綠槐新巷陌。白骨幾公卿。欲覓曲江水。連雲禾黍生。

初寒老身頗健戲書

一身百病老難支。病減身輕偶此時。窗暖不妨聊假寐。囊空久已罷招醫。山爐巉絕香生岫。鑿研坡陀墨滿池。箇裏生涯君莫厭。癡人至死不曾知。

又

過雁聲悲落葉稠。孤村景物更禁秋。窮諳客路風塵惡。老判人間歲月遒。酒號賢人真古語。疾爲豎子豈吾憂。山房幸有初寒備。且傍篝爐擁褐裘。

子龍求煙雨軒詩口占絕句

烏柏迎霜已半丹。哦詩終日合憑欄。霜高木落應尤好。長挂西窗更怕寒。

又

規模正似釣魚菴。把酒纔容客二三。若比東偏參倚室。此中猶自覺耽耽。參倚蓋子聿書室名也。

此页空白

陸放翁集

劍南詩稿

卷第四十一

居室甚隘而藏書頗富。率終日不出戶。

掩關小室動經旬。蠹簡如山伴此身。百億須彌藏粒芥。大千經卷寓微塵。危機已過猶驚顧。惡夢初回一欠伸。此段神通君會否。聽風聲雪待新春。

又

椰子微軀有百窮。平生風際轉枯蓬。豈知蟬腹龜腸後。更寄蜂房蠹穴中。學儉久判羹不糝。憚煩惟欲寐無聰。積書充棟元無用。聊復吟哦答候蟲。

無酒歎

不用寒黃河。不用出周鼎。但願酒滿家。日夜醉不醒。不用冠如箕。不用印如斗。但願身強健。朝暮常飲酒。造物不少恕。虐戲逐段新。坐令古銅槥。經月常生塵。平生得酒狂。無敵百幅淋。瀉風雨疾。造物欲以醒。困之此老醒。狂君未知。

讀書

古人已死書獨存。吾曹賴書見古人。後之視今猶視古。吾書未泯要有取。賈生痛哭漢文時。至今讀之有

餘悲魏徵嘻笑封德彝。生亦豈責絳灌知。窮秋風雨臥孤館。萬世悠悠百年短。垂死成功亦未晚。安知無人歎微管。

醉賦

霜楓照茅屋。露菊插紗巾。今古無窮事。江湖未死身。直令依馬磨。終勝拜車塵。我亦輕餘子。君當恕醉人。

掩扉

久臥空山獨掩扉。迂疎不恨世相違。新霜巷陌烏鳥樂。小雨園畦菘芥肥。驥病極知當伏櫪。鷗閑誰與共忘機。一編蠹簡從吾好。又見西窗掛夕暉。

六經

六經聖所傳。百代尊元龜。諄諄布方冊。一字不汝欺。抱書入家塾。自汝兒童時。老乃幸不驗。愚哉死何悲。

又

秦人燔六經。非與經爲仇。方其勇決時。亦爲子孫謀。斂金鑄巨人。豈復畏鉏耰。千載惡名在。尙與黃河流。

舟中作

沙路時晴雨。漁舟日往來。村村皆畫本。處處有詩材。炊黍孤煙晚。呼牛一笛哀。終身看不厭。岸幘興悠哉。

秋晚

門巷清如水。情懷淡似秋。詩吟唐近體。談慕晉高流。託命須長鑱。浮家只小舟。江南煙雨岸。何處不堪留。

又

木落寺樓出。江平沙渚生。牛羊下殘照。鼓角動高城。寒至衣猶質。憂多夢自驚。羣胡方鬪穴。河渭幾時清。

西窗獨酌

卻掃衡門歲月深。殘骸況復病交侵。平生所學爲何事。後世有人知此心。水落枯萍黏破塊。霜高丹葉照橫林。一樽濁酒西窗下。安得無功與共斟。

冬初薄霜病軀益健欣然有賦

古服追隨野老歡。豎裁布褐縮縫冠。霜清頓洗肺肝熱。木落更知山澤寬。斗酒敢言嫌魯薄。杯羹聊得學吳酸。一貧自是書生分。忍媿看人卻似難。

一錢

萬是紛紛不足論。滿庭枯草閉柴門。一錢留得終羞澀。持買餽餽引福孫。

燈下讀書戲作

吾生如蠹魚。亦復類熠燿。一生守斷簡。微火寒自照。區區心所樂。那顧世間笑。閉門謝俗子。與汝不同調。

遊近山

羸病知難賦遠遊。尙尋好景送悠悠。亂山孤店雁聲晚。一馬二童溪路秋。掃壁有僧求醉墨。倚樓無客話清愁。殘年敢望常強健。到處臨歸爲小留。

示兒子

祿食無功我自知。汝曹何以報明時。爲農爲士亦奚異。事國事親惟不欺。道在六經寧有盡。躬耕百畝可

無飢最親切處今相付熟讀周公七月詩

寄溧陽周丞文璞周寄詩卷殊可喜

滿握珠璣何自來晴窗初喜拆書開信哉天下有奇作久矣名家多異才隔閭經年如許進超騰它日若爲陪山陰道上霜天好安得相從賦早梅

旅思

支遁山前看月明葛洪井上聽松聲廢亭草滿青驪健野店燈殘寶劍鳴萬事竟當歸定論寸心那得媿平生悠然酌罷無人語寄意孤桐一再行

東村步歸

野渡霜風冷茆簷夕照明催科醉亭長聚學老書生山果紛丹漆村醪任濁清路回家忽近柳外小橋橫

又

風陣鴉翻黑霜林葉半丹筋骸欣小健裘褐戒初寒代步雞栖足充飢鶴料寬平生自如許況已掛吾冠

觀方外書

司馬遺書有坐忘顛翁止觀略相當龜堂閉戶常終日時得相從一炷香

午睡初起

曲腰桑上午雞鳴喔喔還如報五更睡起展書摩病眼油窗喜對夕陽明

又

舍中未報壓新醅。閑弄流塵榭葉杯。得醉固佳醒亦好。了無一事到靈臺。

暮秋遣興

改盡朱顏白盡頭。杜門亦復弊貂裘。斷鴻影外玉關月。病驥嘶中青海秋。孤坐向空書咄咄。閑吟隨處送悠悠。如虹壯氣終難豁。安得雲濤萬里舟。

又

平生南地慣羈遊。放浪常同不繫舟。鼃作夜風經沌口。鶴鳴秋雨宿航頭。方傾意氣輕秦俠。俄困悲傷類楚囚。買屋數間聊作戲。豈知真用作菟裘。

種蔬

老翁老去尙何言。除卻翻書卽灌園。處處移蔬乘小雨。時時拾礫繞頽垣。江鄉地暖根常茂。旱歲蟲生葉未繁。四壁愈空冬祭近。更催穉子牧鷄豚。

起晚戲作

睡到僧廊響木魚。莊周蝴蝶兩蘧蘧。數聲林下華亭鶴。一卷牀頭笠澤書。雲子甌香炊熟後。露芽甌淺點嘗初。若論身逸心無事。臺省諸公恐不如。

老歎

八十未滿七十餘。山巔水涯一丈夫。長鳴未免似野鶴。生意欲盡如枯株。臨安宮闕經營初。銀鞍日日醉西湖。不須細數舊酒徒。當時兒童今亦無。

新治暖室

小堂穩暖紙窗明。低幌圍爐亦已成。日閱藏經忘歲月。時臨閣帖雜真行。詩才退後愁酣戰。酒量衰來喜細傾。從此過冬那復事。夜深時聽雪來聲。

暖閣

裘軟勝狐白。爐溫等鴿青。宮中供爐炭。用胡麻文鴛鴦青。紙屏山字樣。布被隸書銘。養目簾稀卷。留香戶每扃。日晡濃睡起。盥濯誦黃庭。

自詠

朋舊凋零盡。乾坤偶脫遺。食新心竊喜。話舊語多悲。泥醉醒常少。貪眠起獨遲。閉門誰共處。枕藉樂天詩。
王元之自言在商州讀老莊外。枕藉白樂天詩。

夜坐

白首仍多病。青燈獨掩扉。雲低聞雁過。雨急待兒歸。

初冬有感

衰髮蕭蕭滿鏡絲。情懷非復似平時。風霜十月流年感。砧杵三更游子悲。閩嶠故人消息惡。傳聞方伯謨病卒。蜀江遺老素書遲。張季長居唐安歲常通書。一簞豆飯休嫌薄。賦分羈窮合自知。

又

峨冠本願致唐虞。白首那知墮腐儒。碌碌不成千載事。駸駸又見一年徂。無僧解輟齋廚米。有吏頻徵瘦

地租。要信此翁頑到底。只持一笑了窮途。

題酒家壁

智若禹行水道。如了解牛。遠籟幾春夢。泛泛一虛舟。事定憂何益。狂來醉始休。青帘誇酒美。且復共登樓。

冬初出遊

風聲如雨曉颼颼。萬葉丹楓滿瓦溝。西望牛頭三十里。一枝柔艣作閑遊。

又

蹇驢渺渺涉煙津。十里山村發興新。青旆酒家黃葉寺。相逢俱是畫中人。

早飯後戲作

湯餅滿盃肥豸香。吏留餘地著黃梁。解衣摩腹西窗下。莫怪人嘲作飯囊。

又

髻鬢主簿方用事。冰壺先生來解圍。蠻童取火炷香椀。不讀南華誰與歸。

擬古

牛跡可使圓。羊角可使直。惟使剛者柔。造物不可得。世方貴軟熟。剛實不可爲。爲剛死道傍。已矣何所悲。

又

君看一鈎絲。能得幾日絡。君思幾州鐵。打此一大錯。目前豈不快。後悔將奈何。我非通神明。比汝更事多。

又

寧忍千日飢。野葛不可烹。寧枉百里途。捷徑不可行。自古風俗壞。善事亦淪胥。橘柚禹包貢。後世稱木奴。

又

坐臥北窗下。百事廢不治。脫粟與大布。衣食裁自支。溫飽豈不欲。違道予心悲。地下見先人。所冀尙有辭。

東村

野人知我出門稀。男輟鋤耰女下機。掘得苾菇炊正熟。一杯苦勸護寒歸。

又

野人喜我偶閑遊。取酒忽忽勸小留。舍後攜籃挑菜甲。門前喚擔買梨頭。村人謂小梨爲梨頭。

倚闌

滿庭晴日破朝寒。粥罷披裘小倚欄。殘菊抱叢香欲盡。一株南燭獨如丹。

霜寒不能出戶書

垂老仍多病。濃霜得快晴。猶能按菊醉。今年菊晚。十月末猶有花。但負探梅行。篝火烘裘暖。油窗潑眼明。小兒殊可喜。和我讀書聲。

冬晴與子坦子聿遊湖上

湖邊細靄弄霏微。柳下人家晝揜扉。乘暖冬耕無遠近。小舟日晚載犁歸。

又

村南村北紡車鳴。打豆家家趁快晴。過盡水邊牛跡路。嶺頭猿鳥伴閑行。

又

道邊白水如牛溲。知是山泉一脈來。會挈風爐并石鼎。桃枝竹裏試茶杯。

又

海山山下百餘家。垣屋參差一帶斜。我欲往尋疑路斷。試沿流水覓桃花。

又

老僧八十無童子。禮佛看經終不能。雙手丫叉出迎客。自稱六十六年僧。

又

一榼無時可醉吟。一藤隨處得幽尋。先須挽取銀河水。淨洗人間塵霧心。

夢蜀

夢飲成都好事家。新粧執樂雁行斜。赭肩郫縣千筒酒。照眼彭州百馱花。醉帽傾欹歌未闕。罰觥激盪笑方譁。霜鐘喚覺晨窗白。自怪無端一念差。

歲晚

無窮世事浩難量。歲晚沉綿臥草堂。短褐圻圖移曲折。故書經蠹失偏傍。賣刀擬買春耕犢。挾筴曾亡舊牧羊。點檢生涯還自笑。茱萸殘葉帶新霜。吳中冬蔬常茂。

又

扶藤據几久支離。敢料駸駸迫髦期。面槁自丹天所借。齒搖復住力何施。花前鯨吸猶堪酒。窗底蟬嘶未

廢詩。浮世極知誰不死。比君終校幾年遲。

讀老子

道德五千言。巍巍衆妙門。管窺那見豹。指染僅嘗鼃。正爾分章句。誰歟達本源。蜀莊猶不死。過我得深論。
世傳莊君平不死。時在人間。猶讀老子。

貧病

窮愁病思兩茫茫。衰髮元知合變霜。酒要解醒猶有策。食求祝噎更無方。凋零坐上親朋少。寂寞人間歲月長。默計有時還自幸。幼安垂老始歸鄉。

洪雅葛仙硯探齋中物作題

異硯出漢嘉。濫潤蒼玉質。因形作獸背。得墨如點漆。才高德亦全。終月不更筆。蠻溪大沱輩。皆蜀硯之得名者。烏敢相甲乙。從我歸吳中。略計將萬日。摩拂不去手。有若琴在膝。名晦知者稀。體重盜計窒。惟當草太玄。不污管商術。

冬日讀白集愛其貧堅志士節病長高人情之句作古風

君子亦有慕。不慕要路津。君子亦有恥。不恥賤與貧。風俗未唐虞。詩書非一秦。展轉不能瞑。臥聽雞唱晨。

又

天下不難一。就能凝使堅。自古功已成。或散如飛煙。惟唐用房魏。規模三百年。至今河潼路。過者猶泫然。

又

漢禍始外戚。唐亂基宦寺。小人計已私。頗復指他事。公卿恬駭機。關河入危涕。草茅豈無人。死抱經世志。

又

成童入鄉校。所願爲善士。富貴本邂逅。不遇亦已矣。生輕名義重。固守當以死。堂堂七尺軀。勿使污青史。

又

勁風東北來。茆屋吹欲裂。出門有奇觀。湖上千峰雪。日高炊未具。歲晚衣百結。士豈無一長。所要全大節。

又

吾常慕昔人。石介與王令。挑燈讀其文。奮起失衰病。吾徒宗六經。崇雅必放鄭。人衆何足云。少忍待天定。

又

郊居四十年。草木日夜長。喬松已偃蓋。穉松出蒼莽。儒生學仁義。敢廢自培養。鬱鬱棟梁姿。拔地當百丈。

又

仕如柳柳州。牋奏典儀曹。君恩篤始終。賜骸老東臯。歷觀親黨間。如我亦已遭。世世當斂退。里門不須高。

又

鏡湖有隱者。莫知何許人。出與風月遊。居與猿鳥鄰。似生結繩代。或是葛天民。我欲往從之。煙波浩無津。

又

卜日家祭竈。牲肥酒香清。分胙雖薄少。要是鄰里情。衆起壽主人。一觥激盪傾。氣衰易成醉。睡覺窗已明。

十一月四日夜半枕上口占

小室愔愔夜向分。幽人殘睡帶殘醺。簷間雨滴愁偏覺。枕畔橙香夢亦聞。驚雁數聲投野澤。悲笳三疊上霜雲。年來萬事俱拋盡。自笑詩中尙策勳。

齋中弄筆偶書示子聿

左右琴樽靜不譁。放翁新作老生涯。焚香細讀斜川集。候火親烹顧渚茶。書爲半酣差近古。詩雖苦思未名家。一窗殘日呼愁起。裊裊江城咽暮笳。

飢寒吟

夜寒每達旦。懷抱安得寬。朝飢或過午。忍此良亦難。飢寒誠吾憂。憂有甚飢寒。彈琴不終曲。推去發永歎。大兒破綠襦。三歲待一官。小兒學耕稼。飯牛歌夜闌。老翁垂八十。捫壁行蹒跚。傍觀勿嘲笑。窮死心所安。病愈小健戲作

路入江村跨蹇驢。鞍前分挂兩囊書。興來到處沾新酒。不爲閑愁要破除。

又

入市歸村不跨驢。蠅頭細字夜鈔書。身安自勝閑官職。不是虛名暗折除。

祭竈與鄰曲散福

已幸懸車示子孫。正須祭竈請比鄰。歲時風俗相傳久。賓主歡娛一笑新。雪鬢坐深知敬老。瓦盆酌滿不差貧。問君此夕茅簷底。何似原頭樂社神。

湖水愈縮戲作

瓜壘從來幾邵平。鏡湖復有一玄英。今秋雨少煙波窄。堪笑沙鷗也敗盟。

夜坐

夜永霜濃睡不成。團圞兒女話無生。金蓮妄想消除盡。一椀松肪徹曉明。

夢中作遊山絕句

霜風吹帽江村路。小蹇迢迢委轡行。忽到雲山幽絕處。穿林啼鳥不知名。

又

寺樓已斷暮鐘聲。照佛琉璃一點明。不道溪深待船久。老僧驚怪太遲生。

大姪挽辭前知鬱林州博白縣絳

束髮已青袍。終身州縣勞。一官常骯髒。萬里忽煎膏。竟負昂霄志。空傳擲印豪。君在博白與郡爭辨職事。袖印還之而去。兩疎心不遂。遺恨寄滔滔。

書辛

富貴不可爲。禍機發須臾。貧賤不可爲。飢寒死路衢。我亦貧賤者。死期幸少紓。春雨兩耕犢。西疇破煙蕪。秋風一釣舟。南浦宿菰蒲。辛勤異退之。亦復有屋廬。堂北鑿明窗。可以陳琴書。文章不傳世。自適亦有餘。

又

我身匪兕虎。豈是曠野物。生非洪水時。胡爲在巢窟。向來三入朝。薄命不黔突。未嘗識許史。況敢交平勃。滄波渺黏天。遠逐輕鷗沒。今年君恩厚。幸許賜骸骨。旣逃申公鉗。又異卞和刖。放懷歌嗚嗚。寧暇書咄咄。

退居

溪煙漠漠。弈棊軒。寬水潺潺。種藥園。醫爲疾。平新掃跡。客知睡美。罕敲門。談餘白拂。懸牀角。飲散空樽。臥壁根。賜帛更蒙優老詔。此生何以報君恩。比有詔書。賜致仕官。羊酒粟帛。丁寧甚至。

北望感懷

榮河溫洛帝王州。七十年來禾黍秋。大事竟爲朋黨誤。遺民空歎歲時遒。乾坤恨入新豐酒。霜露寒侵季子裘。食粟本同天下責。孤臣敢獨廢深憂。

白髮

蕭蕭白髮濯滄浪。剡曲西南一艸堂。飲水讀書貧亦樂。杜門養病老何傷。已成五畝扶犁叟。誰記三朝執戟郎。正似籬邊數枝菊。歲殘猶復耐冰霜。

老歎

事與年俱往。心於世轉疎。曼膚銷欲盡。鬢髮變無餘。野店通賒酒。鄰翁伴荷鋤。尙嗟餘習在。夢課吏鈔書。作竹籬成因把酒。其間戲題四十字。

今日偶暄暖。臥聞林鳥呼。雖思大白飲。未免小蒼扶。柳色動籬外。梅花來座隅。夕陽紅滿野。更復倒殘壺。新養白雞毛。羽如玉。殊可愛。

赤幘峨峨玉羽明。籬間新織竹籠成。老人從此知昏曉。不用元戎報五更。

新籬

新籬三面北通門。藤架陰中細路分。天宇淡青成卵色。水波微皺作靴紋。參差村舍穿林出。縹緲漁歌隔浦聞。忽覺楚鄉來眼底。欲題幽句弔湘君。

龜堂雜興

朝來地確玉。新春雞臠豚。肩異味重。便腹摩挲更無事。老人又過一年冬。

又

曳杖東岡信步行。夕陽偏向竹間明。丹楓吹盡鶉聲樂。又得霜天一日晴。

又

閩溪紙被輒於綿。黎峒花紬暖勝氈。一夜山中三尺雪。未妨老子日高眠。

又

三分帶苦檜花蜜。一點無塵柏子香。鼻觀舌根俱得道。悠悠誰識老龜堂。

又

方石斛栽香百合。小盆山養水黃楊。老翁不是童兒態。無奈菴中白日長。

又

少年身寄市朝中。俗論紛紛聒耳聾。清絕寧知有今日。高眠終夜聽松風。

又

二三鄰曲偶相尋。小醉悠然臥竹陰。醒後自看還自笑。溪雲猶未是無心。

又

蒲團安坐地爐溫。無位真人出面門。世上不知何歲月。斷鐘殘角送黃昏。

又

道妙從來亦麤聞。閉門方用十年勤。筆端小技深知悔。舊稿如山欲盡焚。

又

散樸澆淳萬事新。腐儒空有涕沾巾。唐虞不是終難致。自欠臯夔一輩人。

陸放翁集

劍南詩稿

卷第四十二

己未冬至

老人畏添歲。每歎時序速。今朝陽始生。在易得來復。扶衰奉先祭。拜起賴童僕。兒曹亦壽我。魚兔隨事足。歡言爲一醉。家釀及新熟。占年當得稔。冬至後九日。遇壬。注當有年。喜笑動鄰曲。冀從宿麥始。載重車折軸。明年秋社時。處處壓酒肉。

冬至夜坐作短歌

一陽萌生從此日。老人堅坐午達夕。渾渾上泝河流黃。赫赫內視神珠赤。愛如嬰兒未離乳。危若遊絲鳥千尺。君不見宣房塞河百萬人。一旦橫流由蟻隙。

新裁短褐接客以代戎服或以爲慢戲作

世事巧相違。殘年幸許歸。雖云裁兔褐。不擬出漁扉。拂石襟靈爽。揩筇氣力微。朝衣猶挂卻。況遣著戎衣。

冬夜

多病睡眠少。長閑懷抱清。昏燈照殘夢。寒漏下高城。落月澹將沒。棲禽靜復驚。誰言冬夜永。輾轉已窗明。

書感

壯歲功名妄自期。晚途流落鬢成絲。臨風畫角曉三弄。釀雪野雲寒四垂。金鎖甲思酣戰地。皂貂裘記遠遊時。此心炯炯空添淚。青史它年未必知。

書意

頽霜久矣不勝耘。殘髮今年白十分。憂國雖忘嫠婦緯。愛君敢進野人芹。牀頭酒滴空階雨。爐面香橫出岫雲。已向人間齊物我。不教驚起白鷗羣。

試茶

強飯年來幸未衰。睡魔百萬要支持。難從陸羽毀茶論。寧和陶潛止酒詩。乳井簾泉方徧試。柘羅銅碾雅相宜。山僧剝啄知誰報。正是松風欲動時。

對酒懷丹陽成都故人

勞生常羨鬪體樂。死時卻悔生時錯。花前有酒不肯狂。回首朱顏已非昨。君看古來賢達人。終日飲酒全其真。世間萬事竟何有。金樽翠杓差關身。放翁少日無凡客。飛觴縱樂皆豪傑。清歌一曲梁塵起。腰鼓百面春雷發。故人仙去蓬萊宮。鸞絲鳳竹醉春風。石帆山下孤舟雪。一段清愁付此翁。

三山下居三十有四年矣。老身七十有五兒輩亦頗宦學。未爲非吉也。偶作五字示諸兒。

買地不占龜。心知百世宜。西鄰梅福隱。南望項王祠。菴小偷僧樣。陂長按古規。保家無異法。一念勿萌欺。

村興

身老交情見。孫生口數添。園丁上牛米。村婢博蠶鹽。粒粒堆盤白。饑饉出釜甜。閉門君勿誚。衰病正相兼。

枕上

迢遞孤村夜。淒涼半篆香。懷人悲夢短。聽雨怯更長。有術乾盤汞。無方掃髮霜。高吟擬排悶。吟罷更徬徨。

得建業倅鄭覺民書言虜亂自淮以北民苦徵調皆望王師之至

邦命中興漢。天心大討曹。風雲助開泰。河渭蕩腥臊。日避揮戈勇。山齊積甲高。煌煌祖宗業。只在馭羣豪。

雨夜讀書

農家冬少事。無地肆吾勤。急雨生新健。陳編寄一欣。高風感莘渭。善治仰華勳。老死今朝夕。何由誦所聞。

夢中作己未十二月五日夜作所書皆夢中事也

長隄行盡古河濱。小市人稀霧雨昏。樞馬垂頭齧菅草。驛門移路避槐根。斷碑零落苔俱徧。漏壁微茫字半存。催喚廚人燎狐兔。強排旅思舉清樽。

題傳神

雪鬢蕭然兩頰紅。人間隨處見神通。半醒半醉常終日。非士非農一老翁。樞驥雖存千里志。雲鵬已息九天風。嶢嶢骨法吾能相。難著凌烟劍佩中。

紀懷

未斷要離冢畔雲。僧牛得食寄鄉粉。修身本欲善吾死。臨事豈忘尊所聞。時序管寧親饋奠。江山龐老上丘墳。飾巾家簣從來事。萬種悠悠莫苦分。

新作柴門戲書

雖設常關果是麼。開門終日有誰過。從來不省多車轍。此際真宜置爵羅。尙許漁樵時剝啄。偶逢風月亦婆娑。炎炎炙手須臾事。也比柴荆較幾何。

炊飯

米分齋鉢供。薪拾墮巢枝。偶爾成幽事。欣然慰午飢。炊時珠瀉飯。嘗處雪翻匙。欲作明朝計。還須賣漉籬。

愛閑

今日先生病體輕。愛閑猶有舊心情。帖看貞觀行間印。琴記中郎爨下聲。衣焙溫溫香欲透。雪簷滴滴日初晴。客來一笑明窗底。枉道爲農事耦耕。

與子聿讀經因書小詩示之

經中固多趣。我老未能忘。似獲連城璧。如傾九醞觴。信能明孔氏。何暇傲羲皇。努力晨昏事。躬行味始長。

登東山

老慣人間歲月催。強扶衰病上崔嵬。生爲柱國細事爾。死畫雲臺何有哉。熟計提軍出青海。未如喚客倒金罍。明朝日出春風動。更看晴天萬里開。

己未歲暮

七十六年將到時。龍鍾猶復強支持。寒燈照影始知瘦。薄酒作醒方覺衰。春日尙能持冷麩。花時未礙插繁枝。癡頑應有傍觀笑。自課園丁補槿籬。

冬夜讀書示子聿

宦途至老無餘俸。貧悴還如筮仕初。賴有一籌勝富貴。小兒讀遍舊藏書。

又

易經獨不遭秦火。字字皆如見聖人。汝始弱齡吾已耄。要當致力各終身。

又

古人學問無遺力。少壯工夫老始成。紙上得來終覺淺。絕知此事要躬行。

又

簡斷編殘字欲無。吾兒不負乃翁書。絕勝鎖向朱門裏。整整牙籤飽蠹魚。

又

聖師雖遠有遺經。萬世猶傳舊典刑。白首自憐心未死。夜窗風雪一燈青。

又

殘雪初消薺滿園。糝羹珍美勝羔豚。吾曹舌本能知此。古學工夫始可言。

又

讀書萬卷不謀食。脫粟在傍書在前。要識從來會心處。曲肱飲水亦欣然。

又

世間萬事有乘除。自笑羸然七十餘。布被藜羹緣未盡。閉門更讀數年書。

幽興

午倦便高枕。朝飢美小殮。時穿幽圃屐。常掩小菴門。溪憶鷗盟約。花迷蝶夢魂。餘生猶幾許。萬事付乾坤。

寓歎

眼底誰爲耐久朋。倚肩按膝一烏藤。虛名但可欺橫目。薄俗何時復結繩。浮世百年悲冉冉。閑身萬事付騰騰。年來更歎龍鍾甚。欲探梅花病不能。

夢題驛壁十二月二十七日夜

半生征袖厭風埃。又向關門把酒杯。車轍自隨芳草遠。歲華無奈夕陽催。驛前歷歷堠雙隻。陌上悠悠人去來。不爲途窮身易老。百年回首總堪哀。

新春

柳淡春初破。梅寒瘦不禁。羈愁醉後減。睡思雨中深。閑試新收硯。重尋久廢琴。何時見朋舊。細話別來心。

庚申元日口號

數行晴日照青鴛。春入屠蘇斂灑樽。兒報山僧留刺去。未爲無客到吾門。

又

黃紬五丈裁衫穩。黑黍三升作飯香。造物要教無媿怍。一身溫飽出耕桑。

又

南陌東阡自在身。耄年喜見歲華新。洛中九老非吾侶。且作山陰十老人。

又

晚塗初入長生運。新歲仍當大有年。剩與鄉鄰同覓醉。市樓酒賤不論錢。

又

去年迎客已蹒跚。今歲人扶出亦難。堪笑此翁衰到底。重裘絮帽尙言寒。

又

仁和館外列鷓鴣。憶送龍舟幸建康。舍北老人同甲子。相逢揮淚說高皇。

視東臯歸

抱耒新湖封。燒畬古廟墟。宦遊悲骯髒。歸臥困沉綿。日隱啼鴉戍。舟回落鴈天。衰殘知迫死。不忍負青編。

晚步舍東

遇興穿叢竹。尋香折野梅。暮天寒欲雪。幽徑綠生苔。栖雀爭枝噪。歸牛並塹來。高城角聲動。不盡古今哀。

人日東園

歲首未入春。風氣已稍和。我睡意慵起。如此鳴禽何。駕言之東園。落梅亦已多。江南無堅冰。綠池生微波。挹彼蒲萄醅。酌我鸚鵡螺。雖無絲與竹。倚樹自高歌。矯首東南望。稽山鬱嵯峨。兒曹幸力穡。老子得婆娑。

逆旅行

古者謂死爲歸人。此身未死均是客。家爲逆旅身在途。久寓遽歸初不擇。逆旅相看隨薄厚。非意相干寧足責。世間何處無谿山。得酒盡醉當墮幘。傍觀嘲誚亦其宜。東海定非蠡可測。

小雨初霽

歸來偶似老淵明。消渴誰憐病長卿。小雨染成芳草色。好風吹斷畫簷聲。剪燈院落晨猶冷。賣酒樓臺晚旋晴。莫道此翁遊興嬾。蘭亭禹寺已關情。

獨夜

村路泥淹雪。虛簷水結冰。長征荷戈客。暫到放包僧。妖鵬鳴高樹。飢鼯觸闌燈。誰能問良苦。衰病正相乘。

忍窮

短褐財遮骭。孤烟僅續炊。久窮方有味。古語不吾欺。堅坐忘昏旦。殘年迫耄期。尙餘書滿屋。手校付吾兒。

開歲半月湖村梅開無餘偶得五詩以煙溼落梅村爲韻

斷岸通別浦。孤舟入春煙。與梅本無期。忽到醉眼邊。折花插紗帽。花重覺帽偏。居人空巷看。疑是湖中仙。

又

我來梅花村。倚杖久佇立。惜哉風雨餘。零落綠苔溼。往年賦詩人。去袂不可執。明朝梅亦空。感舊百憂集。

又

梅花如高人。妙在一丘壑。林逋語雖工。竟未脫纏縛。乃知尤物側。天下無傑作。老我懷不紓。樽前幾開落。

又

斗柄忽東指。開盡湖邊梅。偉觀天下無。四顧雪千堆。時至當斂退。勿受曉角催。安知桃李輩。於子無嫌猜。

又

昨日春已來。盎盎滿江村。落梅亦多情。點點浮清樽。語離聊一醉。不恨村酒渾。人生共如此。已矣兩忘言。

老病

湖上歸耕一病翁。此心非復少年同。讀書初恨歲時速。聞道始知身世空。匠石不能材社櫟。弋人何意慕冥鴻。新春愈覺支離甚。又付生涯藥裏中。

三二年來夜夢每過吾廬之西一士友家觀書飲酒方夢時亦自知其爲夢也

西鄰好友工談笑。每見明知是夢中。樽酒不空書滿架。何時真得與君同。

又

清言疊疊岸綸巾。久矣吾遊無若人。自怪夢中來往熟。抱琴攜酒過西鄰。

上元雨

城中酒壚千百所。不憂不售惟憂雨。今年上元燈滿城。曲巷深坊鬧歌舞。天公不借一日晴。風吹燈死雨如傾。家家移牀避屋漏。不聞人聲聞屐聲。

雜興

造物乘除理固然。許將窮悴博頑堅。驥衰伏櫪心千里。龜冷搯牀壽百年。好事時供沽酒費。擁途爭笑插花顛。漁村宿願雖償盡。猶恨僧房欠晝眠。

又

散髮林間萬事輕。夢魂安穩氣和平。只知秋菊有佳色。那問荒雞非惡聲。達士招呼同嘯傲。福人分付與功名。一篇說盡逍遙理。始信蒙莊是達生。

初春書喜

我生本癡絕。萬事不繫懷。一朝蛻形去。豈問棄與薶。遊宦三十年。所向無一諧。偶然有天幸。自退非人排。黃紙如鴉字。君恩賜殘骸。剡溪回雪舫。雲門散青鞵。兩犢掀春泥。一鉢隨午齋。更當擁布被。高枕聽鳴蛙。

幽居無一事戲作

長鬚僅有玉川奴。秃尾猶無漫漢驢。萬事已隨春枕斷。故人何啻曉星疎。出乘微雨鉏畬粟。歸傍荒畦插野蔬。一字不看方睡美。任人搜去帳中書。

贈道流

煙雲深處作生涯。回首人間歲月賒。留得朱顏憑綠酒。掃空白髮賴丹砂。七絃指下冷泠久。雙袖風中獵獵斜。他日相尋不知處。會從漁父問桃花。

病中作

牀席呻吟裏。衡茅隱約中。空興年往歎。未著日新功。世遠言猶在。身危道豈窮。但能無媿怍。天地本來公。

病愈偶書

枯蓬萬里寄飄風。晚落江頭號放翁。冉冉流年秋鏡裏。悠悠殘夢曉笳中。掃除藥裏病良已。棄置酒杯愁自空。閑處固應容老子。臥看年少起新豐。

小圃獨酌

少時裘馬競豪華。豈料今爲老圃家。數點霏微社公雨。兩叢閑淡女郎花。詩成枕上常難記。酒滿街頭卻

易賒。自笑邈來能用短。只將獨醉作生涯。

飯罷戲示鄰曲

今日山翁自治廚。嘉穀不似出貧居。白鵝餽美加椒後。錦雉羹香下鼓初。箭茁脆甘欺雪菌。蕨芽珍嫩壓春蔬。平生責望天公淺。捫腹便便已有餘。

春日

開盡梅花柳漸青。東風又滿會稽城。放翁晨起有佳思。姪姪林鶯初試聲。

又

方池潑潑碧波平。曲徑纖纖細草生。席地幙天君但醉。苦無多日是清明。

又

桃花輕薄柳花狂。蛺蝶翩翩燕子忙。惟有龜堂無一事。閉門白日不勝長。

又

巷口東風吹酒旗。老人也惜早春時。雨來三日泥沒踝。過盡梅花渾不知。

又

雪山萬疊看不厭。雪盡山青又一奇。今代江南無畫手。矮牋移入放翁詩。

又

怕見公卿嬾入城。野橋孤店跨驢行。天公遣足看山願。白盡髭鬚卻眼明。

新晴野步

吹盡浮雲旋作晴。郊原高下水縱橫。煙蕪漫漫如添色。谷鳥關關已變聲。迨酒賤時須痛飲。得人扶處儘閑行。隔湖遙指蘭亭路。鄰叟追隨羨眼明。

湖上作

鵝兒涇口曉山橫。蜻蜓港頭春水生。蘭亭之北是茶市。柯橋以西多舫聲。

又

東涇西涇花極望。紅雲照波錦裏山。路似掌平身自倦。酒如土賤篋常慳。

夜行過一大姓家值其樂飲戲作

村豪聚飲自相歡。燈火歌呼鬧夜闌。醉飽要勝飢欲死。看渠也復面團團。

枕上作

水漲池新滿。山寒屋儘低。愁多憎夜雨。睡少喜晨雞。社肉初分胙。春蕪已再犁。明朝尋父老。不怕蹋街泥。

又

山雨蕭蕭過。沙泉咽咽流。夢中無遠道。醉裏失孤愁。貧賣相如騎。寒思季子裘。兒童報新霽。裹飯出閑遊。

悽悽行

悽悽重悽悽。惻惻復惻惻。我媿師曠傍。人誰子思側。與邦在人材。巖穴當物色。如何清廟器。老死山南北。小儒雖微陋。一飯亦憂國。豈無一得愚。欲獻懼非職。

春齋

食案何蕭然。春齋花若雪。從今日老硬。何以供采擷。山翁垂八十。忍貧心似鐵。那須萬錢筋。養此三寸舌。輕炊香秬飯。幸免煩祝噎。一瓢亦已泰。陋巷時小啜。

答客

人生各有營。爲吏最無策。其間小黠者。但肯乘下澤。絕筆光範書。掃迹翹才客。早收畏塗身。未老歸阡陌。嗟予味擇術。誤計真累百。衰病始知悔。泯默每自責。孤舟寄渺莽。尙恨江湖迮。客來勿多談。窮命不禁嚇。

閑中自詠

小艇上時皆綠水。短筇到處卽青山。二十四考中書令。不換先生半日閑。

又

聲名本自不關身。富貴元知與禍鄰。但恨平生閑不足。再來真作臥雲人。

甲申雨

老農十口傳爲古。春遇甲申常畏雨。風來東北雲行西。雨勢已成那得禦。山陰洙湖二百歲。坐使膏腴成瘠鹵。陂塘遺迹今悉存。歎息當官誰可語。甲申畏雨古亦然。湖之未廢常豐年。小人那知古來事。不怨豪家惟怨天。

今歲遊花溼差晚戲作

滿地殘紅點綠苔。花溼弭棹小裴回。春風又作忽忽別。老病無端袞袞來。亦悟百窮緣骯髒。終羞萬事學

低摧吾文自欲忘憂耳。那博人間水一杯。

枕上口占

五十年前詩酒身。山陰風月尚如新。閑愁已是無闌障。一枕春寒更惱人。

又

蹋雨敲門覓季夷。褰牋同和仲高詩。回思五十年前事。恰似今宵夢裏時。

又

五十年間萬事空。嬾將白髮對青銅。故人只有桃花在。惆悵無情一夜風。

贈謝正之秀才

君家麻源第三谷。我在鏡湖分一曲。平生夢亦不相接。忽然懷中瀉珠玉。誠齋老子主詩盟。片言許可天下服。長歌爲君定聲價。賞音但須一夔足。蹋泥過我君豈誤。拱壁何至求凡目。只愁明日遽來索。北窗連夜挑燈讀。

連日往來湖山間頗樂卽席有作

晚春光景亦佳哉。野老蒼顏一笑開。莫問此生猶幾屐。但知相遇且銜杯。偶攜兒女祈蠶去。又逐鄉鄰賽麥回。不信年華如轉轂。城頭君聽角聲哀。

贈猫

鹽裹聘狸奴。常看戲座隅。時時醉薄荷。夜夜占氈毼。鼠穴功方列。魚膾賞豈無。仍當立名字。喚作小於菟。

歎老

小築依林藪。殘年迫耄期。衣寬方覺瘦。步蹇始悲衰。食飲常多忌。方書動自隨。園花幾分在。睡起問吾兒。

殘春

章甫從諸老。今爲兩世人。惟書尙開眼。非酒孰關身。遠水涵清鏡。晴雲蹙細鱗。籬邊花未盡。作意醉殘春。

東村

雨霽山爭出。泥乾路漸通。稍從牛屋後。卻過鶴巢東。泱泱沙溝水。翻翻麥野風。欲歸還小立。爲愛夕陽紅。

晚步舍北歸

昨日海棠開。今朝燕子來。偶行沙際去。卻傍柳陰回。酒是治愁藥。書爲引睡媒。吾生不乏此。外物信悠哉。

記夢

夜夢遊名山。翠壁開巖扉。主人喜迎客。劇談皆造微。下臨萬里空。渺渺一鶴飛。安得棄家去。丹竈常相依。

寄題揚州九曲池

清汴長淮莽蒼中。揚州畫戟擁元戎。南連近甸觀秋稼。北撫中原掃夕烽。茶發蜀岡雷殷殷。水通隋苑月

溶溶。懸知帳下多豪傑。一醉何因及老農。

投老

投老百無成。山林送此生。薄才元易盡。古道竟難行。陋巷牛羊迹。衡門鳥雀聲。新年幸差健。作意事春耕。

茅亭

終日坐茅亭。蕭然倚素屏。兒圓點茶夢。客授養魚經。馬以鳴當斥。龜緣久不靈。詩成作吳詠。及此醉初醒。
貧甚賣常用酒杯作詩自戲

桃李成塵渾不數。海棠也作臙脂雨。清明未到春已空。枝上流鶯替人語。逢春日日合醉歸。莫笑典衣窮杜甫。生時不肯澆舌本。死後空持醑墳土。門前三百里湖光。天與先生作醉鄉。銀杯羽化不須歎。多錢使
人生窟郎

春晚泛湖歸偶賦

十日雨晴湖水深。暖催新綠上橫林。分泥海燕穿花徑。帶犢吳牛傍柳陰。夏近漸低遊舫價。日斜殊費寺樓吟。歸來支枕還無事。一縷微煙看水沉。

陸放翁集

劍南詩稿

卷第四十三

東園小飲

少年萬里走塵埃，歸臥柴荆晝不開。
十事真成九敗意，一春知復幾銜杯。
波清憑檻觀魚樂，風緊鉤簾待燕回。
催喚比鄰同晚酌，旋燒筍筍摘青梅。

又

入東又見幾春風，茆屋蘆藩寂寞中。
道業雖如詩不進，世緣已與夢俱空。
高枝濯濯辛夷紫，密葉深深躑躅紅。
村巷斷無軒蓋到，一樽猶得伴鄰翁。

又

三月園林日漸長，閑從鄰曲答年光。
醅醱獨殿羣芳後，醞醖能令萬事忘。
下豉蓴羹誇舊俗，供鹽梅子喜初嘗。
烏靴席帽知可樂，自古京塵眯眼黃。

又

乞得殘骸老故山，草亭終日對孱顏。
孤雲百尺起江際，幽鳥數聲鳴竹間。
衆死一身今獨健，人忙萬物本常閑。
此心欲語知誰聽，賴有漁樵日往還。

病退頗思遠遊信筆有作

平日身如不繫舟。曾從楚尾客秦頭。風生江浦千帆曉。月落山城一笛秋。萬事只能催白髮。百年終是臥荒丘。扶衰強項君休笑。向憶人間汗漫遊。

春晚閑步門外

病退扶行力尙微。悠然隨意出荆扉。蜂貪釀蜜爭花去。燕喜分泥傍水飛。午渴拆瓶嘗美酒。晴暄開筍換單衣。躊躇已久歸猶嬾。更向溪頭坐釣磯。

嘲布穀

時令過清明。朝朝布穀鳴。但令春促駕。那爲國催耕。紅紫花枝盡。青黃麥穗成。從今可無語。傾耳舜弦聲。

題齋壁

出郭無十里。結廬纔數間。每將窮博健。不遣樂妨閑。賣藥雲邊市。尋僧雨外山。何妨搖櫂去。卻作跨驢還。九日春陰一日晴。回塘閑院愜幽情。小魚出水圓紋見。輕燕穿簾折勢成。今日掩關眞佚老。向來涉世亦遺名。巡簷更有欣然處。新筍初抽四五莖。

龜堂晚興

長干行

裙腰綠如草。衫色石榴花。十二學彈箏。十三學琵琶。寧嫁與商人。夫婦各天涯。朝朝問水神。夜夜夢三巴。聘金雖如山。不願入侯家。鄣袖庭花下。東風吹鬢斜。

養生

受塵故里老爲氓。三十餘年學養生。倩盼作妖狐未慘。肥甘藏毒醜猶輕。忠言何啻千金藥。赤口能燒萬里城。陋巷藜羹心自樂。傍觀虛說傲公卿。

園中觀草木有感

木筆枝已空。玉簪殊未花。棘桐時更晚。春盡始萌芽。老人多感慨。俯仰悲歲華。兩曜如奔輪。疾去不可遮。城頭插雙旗。疊鼓催清笳。兀然一室間。不復過鄰家。午睡或至暮。亂髮垂澎澎。所嗟瘦僧死。莫致茶山茶。茶山僧道省。歲餉新茶今死已再歲矣。

恩賜龜紫

憶昔青衫上赤墀。領間未有一莖絲。豈知晚拜金龜賜。卻是霜髯雪鬢時。

又

已挂朝衣神武門。暫紆紫綬拜君恩。兒孫賀罷還無事。雨笠煙蓑自灌園。

自警

少年不自量。妄意慕管葛。晚節雖知難。猶覩終一豁。悲哉老病馬。解縱誰復秣。旣辭筆轡勞。始愛原野闊。飲澗齧霜菅。亦可數年活。勿復思長途。嘶鳴望天末。

獨夜

一生食太倉。蠹耗均雀鼠。雖云久置散。飢飽尙撐拄。兩年失微祿。始覺困羈旅。傾身營薪米。得食已過午。

人壽不堪憂。意氣終自許。藜羹若大庖。草廬如萬礎。平生師顏原。本自藐晉楚。悠然臥北窗。殘燈翳還吐。

雨夕枕上作

鬢毛日夜雪霜稠。冉冉年光逝肯留。酒力但資愁作祟。雨聲偏與睡爲仇。銘旌官職眼前事。史冊姓名身後憂。畢竟此生何處是。江湖萬里有孤舟。

喜晴

澤國風雨多。春盡尙裘褐。閉門不能出。飽受鳩婦聒。今朝雲忽歸。溝水清活活。偶爲東園行。魚鳥閒何闊。婦女蠶事終。桑柘光如潑。布穀汝勿憂。吾袴真可脫。

觀運糧圖

王師北伐如宣王。風馳電擊復土疆。中軍歌舞入洛陽。前軍已渡河流黃。馬聲蕭蕭陣堂堂。直跨井陘登太行。壺漿箠食滿道傍。芻粟豈復煩車箱。不須絕漠追敗亡。亦勿分兵取河湟。但令中夏歌時康。千年萬年無饑糧。

字文哀。臣吏部。予在蜀日。與之遊。至厚契闊。死生二十年矣。庚申三月。忽夢相從。如平生。愴然有賦。

英姿爽氣字邛州。雖古人中豈易求。六月長途將渴死。一天風雹起龍湫。

阿姥

城南倒社下湖忙。阿姥龍鍾七十強。猶有塵埃嫁時鏡。東塗西抹不成粧。

初夏

雨足移秧後，風和剝繭初。昏昏時就枕，貿貿卻尋書。晚步身須杖，晨興髮廢梳。滿城車馬客，誰復問何如。

讀書

稽古衰猶力，翻書夜達晨。思人頻掩卷，感事忽霑巾。世閱幾春夢，身今一老民。忍窮端已慣，蔬食又經旬。

喜晴

江湖春暮多風雨，點滴空階實厭聽。剩喜今朝有奇事，一窗晴日寫黃庭。

初夏北窗

作墨無聲紫玉池，年光又入放翁詩。風和柳岸吹綿後，雨足瓜畦引蔓時。病酒相如無奈渴，清言叔寶不勝羸。此生豈復功名事，付與城頭畫角悲。

又

水際柴荆晝不開，臥聽微雨雜輕雷。春蠶滿箔眠初起，社燕爭巢去復來。海檜屈蟠依怪石，山榴零落點蒼苔。一樽及此風光美，車下長坡底用推。

書適

老人去健羨，飯足便有餘。此外一壺酒，薦以園中蔬。手種數畦花，時開一編書。近者苦足蹇，復營一柴車。時時訪溪父，亦或遊僧廬。上下山澤間，視身等禽魚。既歸則浩歌，幽抱亦少摅。一笑謂兒子，不須起犂鋤。

幽居初夏

路繚長隄北。家居小市西。陂塘晨飲犢。門巷午鳴雞。婦喜蠶三幼。鄉中謂蠶眠爲幼。兒誇雨一犁。衰翁亦放浪。未怕屐霑泥。

又

梅塢青黃子。草陂紅紫花。雙鵝朝戲浦。羣鴨暮還家。赤腳挑殘筍。蒼頭摘晚茶。出門逢野老。滿意說桑麻。

又

詰曲穿桑徑。謳啞響竹門。疏泉灌藜莧。倚杖牧雞豚。江步橫新舸。茅簷弄幼孫。太平端有象。誰與畫吾村。

又

大耋光陰短。南訛日月長。松枯宜倒壑。龜老慣撐牀。寂寂三升稷。悠悠百本桑。飢寒猶骯髒。何術砭吾盲。

獨醉

老伴死欲盡。少年誰肯親。自憐真長物。何啻是陳人。江市魚初上。村場酒亦醇。頽然北窗下。不覺墮紗巾。

獨立

午醉初醒後。回廊獨立時。斜陽明雨葉。乳鵲裊風枝。違俗雖堪笑。師心頗自奇。傍人疑徙倚。向道是尋詩。

高臥

省戶歸來不計年。悠然高臥鏡湖邊。釣籬每對千峯雨。接竹新分一脈泉。學問誠身元有道。阨窮知我豈非天。虛名自古能爲累。正恐人看直一錢。

趙彥膚修撰挽辭

朝路英聲早。宗盟宿望尊。讜談推醞藉。大筆擅雄渾。許國心猶壯。安邊策具存。淒涼故時客。痛哭望秋原。
讀香奩集詩戲效其體

金鋪一閉幾春風。咫尺心知萬里同。麝枕何曾禳夢惡。玉壺空解貯啼紅。晝愁延壽丹青誤。賦欠相如筆墨工。一事目前差自慰。月明還似未央中。

野步至村舍暮歸

草徑盤紆入廢園。漲餘野水有殘痕。新蒲漫漫藏孤艇。茂樹陰陰失近村。拄杖敲門求小憩。老盆盛酒瀉微渾。興闌卻覓橋邊路。數點歸鴉已帶昏。

述悲

屏居不出門。終歲袖手坐。但怪意氣衰。那覺日月過。故人爲冢丘。老伴餘幾個。天高鬼神惡。回天夷齊餓。遺魂一零落。豈復聞楚些。且當醉濁醪。吾夢行亦破。

江東韓漕晞道寄楊庭秀所贈詩來求同賦作此寄之

三朝巍巍韓侍中。爛然彝鼎書元功。西戎北狄問安否。九州萬里涵春風。子孫繼踵皆將相。我猶及拜西樞公。顧憐通家略貴賤。勞問教誨均兒童。西樞有孫又奇偉。凜然太華摩蒼穹。小試玉節江西東。文書如海到手空。政成蒲鞭亦不用。地上錢流倉粟紅。君持此手上廊廟。折衝禦侮知從容。桑乾不勞尺箠下。榆關正可丸泥封。卻歸故里訪遺老。應記山陰九十翁。

雨夜

陸放翁集

劍南詩稿 卷四十三

七

(一五七七)

麥熟家家喜墮涎。龜堂依舊突無煙。雨中更覺淒涼甚。一點殘燈守蠹編。

小橋

漠漠輕陰隱隱雷。石榴半落點莓苔。小橋西北闌干角。獨岸綸巾待雨來。

自笑

三間茅屋寄滄浪。鳥出樊籠馬脫羶。灑灑陂塘秧水滿。陰陰門巷麥風涼。蔬盤旋采溪毛滑。篷艇新編露箸香。捐盡浮名方自喜。一生枉是伴人忙。

入梅

微雨輕雲已入梅。石榴萱草一時開。碑償宿諾淮僧去。卷錄新詩蜀使回。墨試小螺看斗硯。茶分細乳玩毫杯。客來莫謂兒嬉事。九陌紅塵更可哀。

雨夜

小雨收仍落。孤燈翳復明。衰殘書易忘。憂患夢多驚。熠熠螢矜暗。翻翻雀轉更。閉門行老死。亦足慰平生。

燕

初見梁間牖戶新。銜泥已復哺雛頻。只愁去遠歸來晚。不怕飛低打著人。

午枕

茅簷一杯淡藜粥。有底工夫希鼎餗。書中至味人不知。雋永無窮勝梁肉。老夫享此七十年。每媿天公賦予偏。清泉洗甌煎山茗。滿榻松風清晝眠。

項里觀楊梅

山前五月楊梅市。溪上千年項羽祠。小繖輕輿不辭遠。年年來及貢梅時。鄉俗謂楊梅止日梅。

又

隔歲租園不計錢。楊梅海裏過年年。癡人只競閑名利。那信三山是地仙。

又

溪流曲曲樹陰陰。人語煙中覺塢深。把定山僧同一笑。明年強健更相尋。

又

山中戶戶作梅忙。火齊驪珠入帝鄉。細織筠籠相映發。華清虛說荔枝筐。鄉俗謂選擇楊梅爲作梅。

夜歸

城角傳三弄。桑村喜獨歸。雨多螢滿野。徑狹露沾衣。食儉鹽醯薄。年衰氣力微。青燈對兒女。撫事一歔歔。

五月十一日睡起

病眼慵於世事開。虛堂高臥謝氛埃。簾櫳無影覺雲起。草樹有聲知雨來。茶椀嫩湯初得乳。香篝微火未成灰。翛然自適君知否。一枕清風又過梅。

示客

世間可笑走踈踈。誤認虛空作汝身。已覓餘名潤枯骨。更謀厚積遺何人。風旛畢竟非心境。瓦礫何妨是道真。新藕出泥瓜上市。爲君一醉墮紗巾。

雨中作

雨聲一滴不肯住。客夢欲成還自驚。白水陂邊破茅屋。亂書堆裏老儒生。出行豈復有流輩。未死尙能躬釣耕。十日無魚亦何歎。新菰幸可配吳粳。旬日來溪水泛溢。魚不可得。

舟中遣興

湖海渺雲濤。浮家得養高。方牀展蕪篋。短褐束鄆條。酒裏亦何好。人間聊可逃。酣歌柂樓底。萬事一秋豪。

自嘲

少讀詩書陋漢唐。暮年身世寄農桑。騎驢兩腳欲到地。愛酒一樽常在傍。老去形容雖變改。醉來意氣尙軒昂。太行王屋何由動。堪笑愚公不自量。

齋中雜興十首以丈夫貴壯健。慘戚非朱顏爲韻

成童入鄉校。諸老席函丈。堂堂韓有功。英概今可想。從父有彥遠。早以直自養。始終臨川學。力守非有黨。紛紛名佗師。有泚在其類。二公生氣存。千載可畏仰。

又

士生學六經。是爲聖人徒。處當師顏原。出當致唐虞。斯文陣堂堂。臨敵獨援枹。異端滿天下。一掃可使無。乃知立事功。先要定規模。彼雖力移山。安能奪匹夫。

又

公議在天下。如人有元氣。平居失護養。一旦可勝諱。神丹卒難求。百疾起如蝟。奄奄息僅屬。熟視吁可畏。

大義在春秋。遺跡悲漢魏。君看徐孺子。底物視富貴。

又

昔我自蜀歸。耆舊已凋喪。後來二三公。尙慰天下望。千里一紙書。慙慙問亡恙。嗚呼亦已矣。遺語寄悲愴。我亦迫桑榆。使恐無輩行。夜窗對青燈。力憊心尙壯。

又

餘齡垂八十。雖憊猶強飯。正如老病馬。風沙時一噴。玉關眇何許。道里何啻萬。目中埃歷歷。欲進不能寸。矯首望秋空。徒羨霜鶻健。薤骨亦何悲。吾非麒麟楨。

又

琅琅誦詩書。尙記兩髦髧。誰料七十年。沉滯終坎窞。炊突映茅廬。日暮煙慘慘。忍窮端已熟。撫事空自感。狂言悔噬臍。衆訾驚破膽。尙有愛書心。還如嗜菖歎。

又

去國已酉冬。忽見十頰歷。衰殘口兩齒。困阨家四壁。時看溪雲生。飽聽簷雨滴。悠然度寒暑。何處著欣戚。幽人豈知我。月夕聞吹笛。何當五百歲。相與摩銅狄。湖中風月佳時。每聞笛聲異甚。莫知何人意。其隱君子也。

又

扁舟東下碇。日月去若飛。當時筆硯舊。久已晨星稀。俊逸如伯渾。簡詣如知幾。天高鬼神惡。回首萬事非。

我欲泝黃牛。買屋居青衣。九原不可作。哀哉誰與歸。

又

荷鉏草堂東。藝花二百株。春風一朝來。白白兼朱朱。南列紅薇屏。北界綠芋區。偃蹇雙松老。森聳萬竹臚。餘地不忍莠。插援引瓠壺。何當拂東絹。畫作山園圖。

又

閑居寂無客。柴門晝常關。孤舟小於葉。放浪煙水間。樹暗楊梅村。露下白蓮灣。釣魚樵風涇。買酒石帆山。向來支許輩。恐亦無此閑。道逢若耶叟。握手開蒼顏。

夏五月方閑雨忽大風雨三日未止

海風一夕狂拔木。山雨三朝猛穿屋。向來望雲眼欲枯。雨甚還憂敗嘉穀。今年旱勢連吳中。吾州乃獨勞神龍。稽首龍公要斟酌。收雲歸山水歸壑。

又

五月晝晦天欲雨。街中人面不相覩。風聲撼山翻怒濤。雨點飛空射強弩。一雨三日姑可休。龍其玩珠歸故湫。千里連雲慶多稼。牲肥酒香作秋社。

遣興

外物元知等一塵。浮生何事最關身。江山好處得新句。風月佳時逢故人。有酒一樽聊自適。藏書萬卷未爲貧。聖賢自古無如命。君看居東與在陳。

又

老向人間怯路歧。感今懷昔不勝悲。詩無傑思知才盡。酒有殘杯覺氣衰。縣郭燈疏尋店夜。津亭雨細待船時。筋骸尙給春耕在。便買烏犍亦未遲。

六月一日曉賦

視夜明星高。蟬聲滿庭樹。殘骸幸差健。散髮穿兩屨。巖扉手自開。曳杖得徐步。碧瓦浮青煙。圓荷瀉殘露。草木無俗姿。雞犬共幽趣。兒來問晨炊。一笑揮使去。

露坐

泠泠野水赴橫塘。坐久松風入髮涼。月淡星疏天欲曉。未妨清嘯倚胡牀。

夜賦

月暈知將雨。風聲報近秋。暗廊行熠燿。深樹嘯鴝鷓。老幸傳家事。狂猶爲國憂。相齊雖已矣。且復飯吾牛。

乙夜納涼

幽人新製葛衣成。二寸藤冠覺髮輕。淨掃中庭延月色。緩拖拄杖聽蟬聲。微涼便欲疏紈扇。小醉何妨倒玉罍。八尺風漪真美睡。故應高枕到窗明。

五鼓

夢斷華胥夜艾時。遶廊蕭散曳筇枝。長空漸見明河落。短調猶殘畫角吹。世事又隨朝日出。釣船莫負早秋期。南湖五畝新菰熟。此味惟應老子知。

老態

齒如強留客。雖住無久理。目如新募兵。臨敵烏可使。齒廢疏梁肉。目澀屏書史。浮世真幾何。老態遽如此。啜粥習安坐。用短亦自喜。作詩記吾衰。聊用調稚子。

枕上聞風鈴

毒暑今年倍故常。蟲聲四合欲舛牀。老人不辦搖團扇。靜聽風鈴意已涼。

又

流汗沾衣熱不勝。饑蚊乘勢更縱橫。夢回忽覺南風起。時聽鈔然一兩聲。

寄贈湖中隱者

高標絕世不容親。識面無由況卜鄰。萬頃煙波鷗境界。九秋風露鶴精神。子推綿上終身隱。叔度顏回一輩人。無地得申牀下拜。夜聞吹笛度煙津。

觀畫山水

古北安西志未酬。人間隨處送悠悠。騎驢白帝城邊雨。挂席黃陵廟外秋。大網截江魚可膾。高樓臨路酒如油。老來無復當年快。聊對丹青作臥遊。

六月十八日立秋未旦起行山園口占

北斗離離柄漸西。披衣出戶聽晨雞。豈惟蒲柳先搖落。坐覺風雲已慘淒。斷簡不妨重料理。清樽隨處可提攜。穿林莫惜衣霑露。爽徹靈臺勝寶犀。

新秋

衰髮成絲奈若何。更堪日月疾飛梭。梧桐敗葉飄猶少。蟋蟀雕籠賣已多。歲樂喧呼沽酒市。夜涼淒斷采菱歌。老夫亦動秋風興。欲倩鄰翁買釣蓑。

晨起自山園歸書室

世事苦紛紛。村墟寂不聞。穿林拾蟬蛻。隔浦數鷗羣。搖落初飄葉。高春未散雲。歸來書滿眼。猶足肆吾勤。

初秋小雨

雨來一洗肺肝熱。風過遠吹禾黍香。誰識山翁歡喜處。短檠燈火夜初長。

出遊

舉世誰能伴我閑。出遊隨處一開顏。繫船扛鼎將軍廟。秣塞流觴內史山。小市況經搖落後。高城回望莽蒼間。歸來燈火湖塘晚。指點柴門未上關。

對酒

平生但信緣。作計每不審。春炊官倉粟。一飽輒甘寢。二年棄微祿。溝壑方懷懍。藜藿闕鹽酪。豆飯雜沙糝。偶然餓不死。得酒猶痛飲。振回醜頰。喚省邯鄲枕。

自勉

曩歲讀隱書。妄意慕陶葛。芝房及乳石。日夜躬采掇。飛舉固未能。死籍或可脫。那知事大謬。髮齒將禿豁。神僊豈棄汝。正坐自迂闊。餘年尙努力。勿待燭見跋。

新涼

初卷合風八尺漪，井桐已復不禁吹。蟬聲未用催殘日，最愛新涼滿袖時。

醉中題民家壁

壯歲羈遊厭故棲，暮年卻愛草堂低。交情最向貧中見，世事常於醉後齊。松吹颼颼涼短髮，芒屨策策響新泥。吾詩戲用寒山例，小市人家到處題。

秋景

雨泣蘋花老，風搖稗穗長。昏林喧宿鳥，秋院咽啼螿。舊學成迂闊，初心墮渺茫。頽齡尙餘幾，誰與問蒼蒼。

舟中作

會稽城上角鳴鳴，日落煙村暝欲無。千載虛名笑張翰，一官元不直蓴鱸。

雜興

足弱僅能行齒搖，常欲墮扶持。賴藥物苟幸一日過，事來強酬答。其實惟欲臥，平生許文休。歲晚依馬磨。

又

蘭臺遺漆書，汲冢收竹簡。辛勤萬卷讀，不負百年眼。園座浩縱橫，插架高巉巖。一笑顧吾兒，銀艾何足縮。

又

壽年本偶爾，亦與富貴同。一日復一日，遂作八十翁。几杖稱大耄，貂蟬號三公。信手忽成虛，孰爲拙與工。

又

少年豈知酒。借醉以作狂。中年狂已歇。始覺酒味長。湛湛癭樽綠。酌以紅螺觴。醒醉不可名。兀坐萬事忘。

自詠閑適

殘年鄰曲幸相依。真似遼天老鶴歸。荷浦未疎魚正美。鄉俗謂夏秋魚爲荷葉下魚。豆畦欲暗雉初肥。款門路近時看竹。送酒人多不典衣。最喜夕陽閑望處。數家垣屋鎖煙霏。

近村暮歸

莫笑山翁雪鬢繁。歸休幸出上恩寬。蠶樽恰受三升醞。龜屋新裁二寸冠。蠶樽卽皮鬻美所云詞陵樽也。予近以龜殼作冠。高二寸許。僧閣鬻茶同淡話。漁舟投釣卜清歡。還家欲作諸孫贈。村路纍纍柿未丹。

秋興

扶衰又見素秋過。未死其如造物何。破屋頽垣那敢議。濁醪麤飯已爲多。佩刀但可償黃犢。作字安能博白鵝。龜紫拜恩如夢寐。殘年其實一漁蓑。

讀史有感

不肯低頭就世事。亦不作牋與天公。惟須痛飲以醉死。亂山深處聽松風。

又

昔人識不過十字。富貴封侯渠自如。龜堂閉門萬卷讀。一字不肯供時須。

又

蘇門長嘯不可親。鹿門采藥更絕塵。老死故山雖自許。掩書本免愧斯人。

此页空白

陸放翁集

劍南詩稿

卷第四十四

讀何斯舉黃州秋居雜詠次其韻

造請非所長。一帶每懶束。揖客雖小殊。亦未勝僕僕。正須駕柴車。歸藝東籬菊。故山甘水泉。羣飲友麋鹿。百年不堪玩。萬事要自燭。小人欺屋漏。吾輩當戒獨。

又

少從長者遊。麤聞聖人道。日食雖一簞。頗覺顏色好。辛勤五十年。猶秉後凋操。風俗日已移。令人惡懷抱。紛紛堪一哂。驕我以旗纛。豈知江湖間。世襲散人號。

又

全家寄舴艋。結茅非始謀。江市得煙蓑。不博千金裘。道散俗日薄。老聃出衰周。治身去健羨。如稼必去蟲。吾身一隙塵。斯世一客郵。君能通其說。生死真浮休。

又

衆星麗長空。惟月最爲傑。峨峨大圓鏡。粲粲白玉玦。穿林散珠璣。入戶凜霜雪。世方喜繁華。我獨慘不悅。清光眞可友。肝肺冰欲結。彼哉市朝人。忿慾生內熱。

又
夜靜我欲歌。四座且勿喧。堯舜本得道。富貴何足捐。聖人久不作。學者墮語言。著書各專門。百家散如煙。一身有不知。況察魚與鳶。安得天下士。相與明忘筌。

又
古人處丘園。如彼不嫁女。終身秉大節。敢恨老環堵。嗟予晚乃覺。乞骸歸卒伍。去就講已熟。穴居宜知雨。百尺持汲綆。道長畏天暑。先見雖有慚。愛身亦自許。

又
賦性本剛褊。直欲棲深山。晚乃稍悔悟。自恨不少寬。胡越本一家。禍福環無端。少忍萬事畢。孰爲熱與寒。我友爲我言。冠蓋滿長安。人人不如君。八十猶朱顏。

又
倚牆有鉏耰。當戶有杼軸。雖云生產薄。桑麻亦滿目。況承先人教。藏書令汝讀。求仁固不遠。所要念念熟。喟然語兒子。勿愧藜覓腹。亦勿慕虛名。守此不啻足。

又
人生天壤間。出處本異趣。釋耒入市朝。徒失邯鄲步。昔人亦有言。刻足以適履。奈何不自反。忽已迫霜露。我躬尚不閱。況爲子孫慮。歲晚故山寒。地爐可煨芋。

又

少年去國時。不忍輕出晝。晚歸補省郎。但覺慚列宿。人豈不自揣。幸矣老雲岫。知止詎敢希。要且避嘲詬。誰將有限身。遺臭古今宙。人誅雖或逃。陰陽將汝寇。

讀蘇叔黨汝州北山雜詩次其韻

暑耘日炙背。寒耕泥沒腳。衆人占膏腴。我獨治磽确。力盡功未見。厥土但如昨。豈惟窘糠粃。直恐轉溝壑。今年雨暘時。天如相耕穫。屋傾未暇扶。且復補籬落。

又

舊絮補破襦。生薪續微火。惺孤有凍死。自視亦已過。鄰翁冒風雪。斗酒持飲我。尖團擘霜蟹。丹漆釘山果。欣然共笑語。何止寬寒餓。布被擁更闌。招魂不須些。

又

三山鏡湖上。出郭無十里。結廬非所擇。但取便薪水。間亦出從宦。安能慕園綺。地主卜林塘。亦復異子美。蘧蔭方丈室。僅足容臥起。吾意本扁舟。陸居聊爾耳。

又

祠官粟一囊。不贍軀七尺。前年蒙寬恩。例許乞骸骨。聯翩三兒子。俱作鸛雀碧。賦祿雖尙遠。亦足慰衰白。幅巾茆簷下。稱病謝來客。從今門前路。永掃車馬迹。

又

舍北有漁磯。下臨清溪流。柳陰出朱橋。蓮浦橫蘭舟。蓴絲二三畝。采掇供晨羞。魚蝦雖瑣細。亦足贍吾州。

人生常如此。安用萬戶侯。綠蓑幸可買。金印非所求。

又

寓形百年中。如臂屈伸頃。少壯幾何時。已復墮衰境。老人喜自潔。臨澗漱綠淨。佛龜香事已。僧鉢供羹甍。山茶試芳嫩。野果薦甘冷。不學萬錢廚。長魚取淮穎。

又

巖石著幼輿。風月思玄度。老子放浪心。常恐迫遲暮。安得世人。握手相與語。吾宗甫里公。奇辭賦漁具。高風邈不嗣。徒有吟諷苦。霜風吹短衣。何山不堪住。

又

久病臥江村。髮白面黧黑。艱難念溫飽。日夜積涓滴。聚壤糞園桑。荷鋤耘壠麥。苟失一日勤。農事深可惜。小兒念乃翁。卒歲共欣戚。跂望明年春。社雨泥一赤。

又

德孫秀眉宇。慨然修初服。枯腸貯詩書。十飯九不肉。成童將覓舉。想見袍立鵠。先澤儻未衰。豈無五秉粟。汝能記吾言。併以告阿福。閉門勿雜交。一經萬事足。

又

吾幼從父師。所患經不明。何嘗效侯喜。欲取能詩聲。亦豈劉隋州。五字矜長城。秋雨短檠夜。掉頭費經營。區區宇宙間。捨重取所輕。此身儻未死。仁義尙力行。

新治火閣

老子今朝喜有餘。房櫳新畢得安居。爐紅氈暖不出戶。木落窗明常讀書。浮蟻撇嘗人散後。蹲鴟煨熟雪飛初。頽然自適還終日。殊勝隆中臥草廬。

枕上作

無地容錐四壁空。浩然亦未愴途窮。夢回倦枕燈殘後。詩在空階雨滴中。徂歲易成雙鬢禿。故人難復一樽同。唐安萬里音塵絕。誰爲寒沙問斷鴻。張季長今年尙未通書。

又

蕭蕭白髮臥扁舟。死盡中朝舊輩流。萬里關河孤枕夢。五更風雨四山秋。鄭虔自笑窮醜酒。李廣何妨老不侯。猶有少年風味在。吳牋著句寫清愁。

初睡起有作

喔喔曉雞鳴。迢迢殘漏聲。撥衾幽夢斷。褰幌小窗明。獠婢篝衣暖。山童擁篲行。老夫徐下榻。負火聽鉶笙。
示友

述懷

宦遊輕用不貲身。斂退今爲省事人。睡俟面乾元不校。羹爇手爛更誰嗔。時分鄰瓮雙瓶綠。見張右史詩。永謝官倉五斗陳。最好暮秋溪上路。柴門月色向人新。

枕上

殘燈熠熠露螢明。落葉蕭蕭寒雨聲。堪笑衰翁睡眠少。小詩常向此時成。

又

斷香猶在夢初回。燈似孤螢闔復開。怪底詩情清徹骨。數聲新雁枕邊來。

病足久敗遊山之興。山中道人多見問戲作示之

病侵腰股作蹒跚。九折途生布武間。東姥自無緣見佛。北公那有力移山。買來芒屨真虛費。扶上籃輿亦漸艱。賴有春陵數峯在。虛窗高臥看孱顏。

舟中作

三百里湖新月時。放翁艇子出尋詩。城頭蜃閣煙將合。波面虹橋柳未衰。漁唱蒼茫連禹穴。寒潮蕭瑟過娥祠。祖龍虛負求僊意。身到蓬萊卻不知。

追懷胡基仲墓在雲門顯聖寺後

高潔胡徵士。當時已絕無。門庭謝殘客。薪水斥常奴。遺稿何由見。英魂不可呼。誰憐墓上草。又是一年枯。

十月八日九日連夕雷雨

雨聲聒耳不停點。雲氣冒山殊未開。敢恨終年惟短褐。但驚十月有奔雷。牽蘿且復補茆屋。飯豆何妨羹芋魁。莫笑賦詩無傑句。年來萬事學低摧。

西村

今年四月天初暑。買叢曾向西村去。桑麻滿野陂水深。遙望人家不知路。再來桑落陂無水。閉門但見炊煙起。疑是羲黃上古民。又恐種桃來避秦。

感事示兒孫

人生讀書本餘事。惟要閉門修孝悌。畜豚種菜養父兄。此風乃可傳百世。我聞長安官道傍。至今人指魏公莊。北方俗厚終可憙。一字不識勤耕桑。長安有魏鄭公舊莊。裔孫皆力耕。無識字者。張芸叟嘗過之。

或遺木瓜有雙實者香甚戲作

宣城繡瓜有奇香。偶得竝蒂置枕傍。六根互用亦何常。我以鼻嗅代舌嘗。

十月

十月霜侵季子裘。吾詩又送一年秋。風回斷續聞樵唱。木落參差見寺樓。久已浮雲看富貴。固應華屋等山丘。江邊海際多幽致。擬跨青驃處處遊。

初晴

袖手東窗初日明。殘編未負老書生。不勝多病畏寒雨。正得一霜方快晴。客戶餉羹提赤鯉。莊月以雞魚之屬來餉。謂之送羹。鄰家借碓擣新粳。柴荆莫怪無車馬。恰要無人識姓名。

梅花

造物作梅花。毫髮無遺恨。楚人稱芳蘭。細看終不近。

又

五年作竹梢。十年作梅枝。九泉子廉子。此語今誰知。廉宣仲自言以五年之功作竹梢。十年之功作梅枝。

又

欲與梅爲友。常憂不稱渠。從今斷火食。飲水讀僊書。

又

春信今年早。江頭昨夜寒。已教清徹骨。更向月中看。

又

江上梅花吐。山頭霜月明。摩挲古藤杖。三友可同盟。

對酒戲詠

淺傾西國葡萄酒。小嚼南州豆蔻花。更拂烏絲寫新句。此翁可惜老天涯。

冬夜

北斗挂屋角。西風驚雁羣。山寒歲云暮。人靜夜中分。酒滴糟牀雨。香生紙帳雲。眼花書課減。舊學失鋤耘。

冬晴稍理舊學有感於懷

天公元不吝光陰。付與書生遂本心。老已爲民猶學問。向雖作吏半山林。百年斷稿傳三世。一日晴窗抵萬金。努力更思恢道術。酒杯雖把不須深。

葺小圃及東齋

山翁作園沼。安樂及禽魚。凡草猶當養。芳蘭可得鋤。初非治一室。亦豈愛吾廬。暮境雖云迫。心期故有餘。

讀經示兒子

通經本訓話。講字極聲形。未盡寸心苦。已銷雙鬢青。懼如臨戰陣。敬若在朝廷。此是吾家事。兒曹要細聽。

出遊不果

天柱峯前水亂流。石碁渡口葉飛秋。青鞋已是前身事。縱有籃輿亦懶遊。

夢行秦晉間有作

夜店紬衾暖。晨廚粟飯香。驢肩雙酒榼。童背一琴囊。冰坼河聲壯。郊平塔影長。古今均夢境。不用弔興亡。

聞雞鳴自警

爲善孳孳進德新。雞鳴每念舜何人。此身強健直須勉。一日會當無此身。

嘲子聿

講誦多吳語。鉤提學佐書。夜分燈未徹。晨起髮慵梳。飽食園官菜。少留溪友魚。能憐乃翁病。身自舉籃輿。

馬上口占

大耄光陰豈自期。卽今堪喜亦堪悲。關河隔絕初心負。憂患侵尋舊學衰。羸馬涉溪孤店路。栖鷗滿樹曉霜時。憑鞍殘夢悠然覺。又得浮生一首詩。

幽居

莫笑茅茨陋。岡形接臥龍。連娟鏡湖月。縹渺寶林鐘。閑約魚池釣。眠聽碓舍舂。他年好事客。過此訪遺蹤。

感事

陋巷何須歎一瓢。朱門能守亦寥寥。衲衣先世曾調鼎，野褐家聲本珥貂。若悟死生均露電，未應富貴勝漁樵。千年回首俱陳迹，不向杯中何處消。沈義倫丞相裔孫爲僧，劉仁瞻侍中裔孫爲道人，皆孤身死紹興中，二公之後遂絕。

初寒

逐祿天涯半此生，明時寬大許歸耕。山圍魚市寒無色，雨掠蓬窗夜有聲。白髮青燈身潦倒，殘蕪落葉歲嶢嶢。爾來有喜君知否，買得烏犍萬事輕。

寄題李長飾菴

近詔還中祕，新文記飾菴。主盟君勿讓，賈勇我何堪。木落山容瘦，雲齊雪意酣。何由共杯酒，把蟹擘黃甘。

對食書媿

連年寬水旱，天若相懸車。麤有芋魁豆，併忘熊掌魚。先生飯不足，賢者食無餘。老我知何幸，晨盤厭美蔬。

戲題酒家壁

漫道江南倚寺樓，豈如煙雨弄扁舟。并刀不剪清愁斷，楚練難磨白日留。湖上采菰甘似蜜，街頭買酒滑如油。金丹九轉何時畢，且對梅花一醉休。

又

送了春歸又送秋，人間隨處寄悠悠。百年此際成遺老，萬里當時賦遠遊。筆力日衰慚陣馬，江天歲晚狎冥鷗。清狂自笑無時歇，又犯新寒上市樓。

又

朋舊存亡寂不聞。年年江海愴離羣。時平酒價賤如水。病起老身閑似雲。飽食每慚荒舊學。後生誰可付斯文。案頭清鏡塵昏盡。殘髮知添白幾分。予老甚。髮乃有未白者。

十月二十八日夜風雨大作

風怒欲拔木。雨暴欲掀屋。風聲翻海濤。雨點墮車軸。拄門那敢開。吹火不得燭。豈惟漲溝谿。勢已卷平陸。辛勤甄宿麥。所望明年熟。一飽正自艱。五窮故相逐。南鄰更可念。布被冬未贖。明朝甑復空。母子相持哭。

夜寒燃火有感

墮巢拾稿枝。微火吹孤螢。風火一相得。須臾細煙青。暖焰遂騰上。凜冽回玄冥。君看金鼎火。其初亦熒熒。至理存橐籥。奇功挾風霆。笑談縛三彭。指顧役六丁。超然出塵世。豈獨制頽齡。勸君勿虛死。萬過誦黃庭。

農事休小葺東園十韻

歸老心常逸。新寒體亦康。幸常農事隙。稍治舊園荒。翦關西山出。縈回北徑長。作欄扶弱蔓。換土植孤芳。霜竅篔簹碧。風煙薜荔蒼。蝶來翻小翅。鳥下囀幽吭。疎剔巖泉集。耘鋤藥草香。溪藤裁酒榼。番錦製詩囊。坐久雲生石。歸遲月滿廊。人間胡不樂。拔宅笑君房。

開東園路北至山腳因治路傍隙地雜植花草

清溝東畔翦葳蕤。雖設柴門盡日關。遠引寒泉成碧沼。稍通密竹露青山。幽花泣露開仍落。好鳥穿林去復還。更上橫岡吾所愛。小兒試覓屋三間。

又

魏野林逋久已僊。放翁寄傲鏡湖邊。松根偃蹇支琴石。巖竇潺湲洗藥泉。半祿掃空雖在我。殘年健甚豈非天。遙遙桑苧家風在。重補茶經又一編。

又

憶自南昌返故鄉。移家來就鏡湖涼。鶴雛養得沖霄漢。松樹看成任棟梁。手版永拋貧亦樂。肩輿時上老何妨。平郊東望江城近。隱隱清笳送夕陽。

又

父子追隨一笑傾。東園東畔路初成。夾栽芳草如繩直。前出籬門似砥平。春近野梅香欲動。雨餘溝水細無聲。今朝有意誰能識。不用人扶亦自行。

又

病眼逢人每嬾開。正須此地洗氛埃。數枝梅向林梢出。一脈泉從嶺背來。藤杖有時緣石磴。風爐隨處置茶杯。殘軀自笑如春草。又喜天邊斗柄回。

又

避俗從來恨不深。家園栽種偶成陰。西連幾曲菖蒲澗。東接無窮蒼蘆林。鳥相谷寒迎野步。金沙泉冷洗塵襟。清音可寫吾詩拙。它日君來試抱琴。

連日治圃至山亭又作五字

雍圃課僮奴，爭前不待呼。水泉經雨壯，藜莽得霜枯。高樹鳴雙鵲，清池下兩鳧。暮年惟樂此，餘念一毫無。

又
富貴尋常事，天奚獨汝慳。十分教嬾拙，百倍與清閑。放鶴雲千頃，釣魚溪一灣。此詩雖信筆，它日不須刪。

又
好竹千竿翠，新泉一勺冰。殘蕪襯落日，老木上寒藤。細磴欹難過，危欄曲可憑。歸時忽已暮，點點數漁燈。

又

門開度略約，路盡上坡陔。農隙閑耕犢，樵歸起醉歌。青煙舞鸞鳳，白石伏鼉鼉。剩有筇枝興，窮冬氣已和。

寒夜

敗屋頽垣對短檠，課書聊自限三更。蕭條草木寒無色，窳窳狐狸出有聲。半榼濁醪求火暖，一篇疑義與兒評。未須遽起窮愁歎，明日尋梅雪正晴。

掩卷有感

少年雖讀書，每恨性疎懶。中年頗自勵，已歎歲月短。學不到聖賢，此意終未滿。飯空不憂飢，衣垢不思浣。區區管晏事，端可付一莞。羸然八十翁，風雪臥空館。

閑遊

出雜羊牛牧，歸隨烏雀栖。聊持數匙飯，就乞半盂齋。浩蕩凌原野，崎嶇歷澗溪。閑遊豈不好，客意自淒淒。

野寺

閑行入野寺。僧飯鼓其鐺。慘慘風勢面。暉暉日滿廊。去來元自在。賓主兩相忘。卻下山坡路。樵歌出隴長。

三江

三江郡東北。古戍鬱嵯峨。漁子船浮葉。更人鼓應鼉。年豐坊酒賤。盜息海商多。老我無豪思。悠然寄醉歌。

讀老子

放翁晨興坐龜堂。古銅匱燒海南香。臨目接手精思牀。身如槁木心如牆。八十一章獨置傍。徐起開讀聲琅琅。恍然親見古伯陽。袂屬關尹肩庚桑。孰能試之出毫芒。末俗可復躋羲黃。陰符僞書實荒唐。稚川金丹空有方。人生忽如瓦上霜。勿恃強健輕年光。

新泉絕句二首

掃石陰雙松。岸巾穿萬竹。爾來又一奇。巖泉寒可掬。澗泉可淪茗。就泉可洗藥。楚人曾未知。但謂纓可濯。

風雨

七十年來樂太平。白頭父子事春耕。因思世事悲身事。更聽風聲雜雨聲。四海故人強半死。一襟清淚對誰傾。新春要覓燒丹處。不住青城住赤城。

題菴壁

萬壘青山繞鏡湖。數椽自愛野人居。風來松度龍吟曲。雨過庭餘鳥迹書。小疾不妨尋酒去。豐年偶及挂冠初。有金可散還多事。四壁蕭然計未疎。

又
衰髮蕭疎雪滿巾。君恩乞與自由身。身并猿鶴爲三友。家託煙波作四鄰。十日風號未成雪。一年梅發又催春。漁舟底用勤相覓。本避浮名不避人。

讀僊書作

與世已如風馬牛。松風終日聽颼颼。一爐丹熟定不死。半盞酒香安得愁。腰帶鞞前秋萬頃。香爐峯下水交流。人間事事皆須命。惟有神仙可自求。

讀淵明詩

淵明甫六十。遽覺前途迤。作詩頗感慨。自謂當去客。吾年久過此。霜雪紛滿幘。豈惟僕整駕。已迫牛負輓。奈何不少警。玩此白駒隙。傾身事詩酒。廢日弄泉石。梅花何預汝。一笑從渠索。願以有限身。兒戲作無益。一牀寬有餘。虛室自生白。要當棄百事。言從老聃役。

寒夜枕上

屋老霜寒睡不成。迢迢漏鼓過三更。烏啼林外月初上。犬吠水邊船夜行。市有歌呼知歲樂。亭無枹鼓喜時平。吾詩欲寫還慵起。臥看殘燈翳復明。

新晴出門閑步

一夜風號作快晴。披裘扶杖出門行。青山繞舍雪封盡。丹葉滿街霜染成。廢寺僧寒多晏起。近村農惰闕冬耕。窮人旋畫膨脝計。自買蹲鴟煮糝羹。

聞笛

雪飛數片又成晴。透瓦清霜伴月明。一曲忽聞高士笛。臨窗和以讀書聲。

鳴禽

小徑霜泥結凍時。幽人十時廢筇枝。新晴池館春來早。簾外鳴禽聖得知。

食晚

日高得米喚兒舂。苦雨園蔬久闕供。省事家風君看取。半飢半飽過殘冬。

午坐戲詠

貯藥葫蘆二寸黃。煎茶橄欖一甌香。午窗坐穩摩癡腹。始覺龜堂白日長。

戲詠鄉里食物示鄰曲

山陰古稱小蓬萊。青山萬疊環樓臺。不惟人物富名勝。所至地產皆奇環。茗芽落磴壓北苑。藥苗入饌逾天台。明珠百舸載芡實。火齊千擔裝楊梅。湘湖葦長涎正滑。秦望蕨生拳未開。箭萌蟄藏待時雨。桑蕘菌齏驚春雷。櫻花蒸羹醃醬。薑苗披剝醃糟醅。細研罌粟具湯液。濕裹山蕒供炮煨。老饑自覺筆力短。得一忘十真堪哈。從今置之勿復道。一瓢陋巷師顏回。

歲暮貧甚戲作

得米還求潤底薪。始知天地有窮人。年開八秩寧賒死。官及三兒不救貧。藥盡無如醫偃蹇。囊空那辦酒逡巡。柳條萱草添愁思。不似尋常見早春。

汪叔潛教授挽辭

江南有奇士，英譽早飛騰。未見心先契，相從氣倍增。時煩問字酒，屢共讀書燈。下榻延徐孺，同舟得李膺。百年期永好，一旦失良朋。稚子初何取，龍門亦許登。流光疾於鳥，舊社冷如冰。欲作千言誄，衰遲愧未能。汪給事太夫人程氏挽辭夫人內外二族享壽八九十者至二十餘人。

爵色恩榮盛，鄉閭譽望尊。儒科傳累葉，上壽萃高門。阡茂新栽柏，堂餘舊樹萱。故民何以報，沾灑望秋原。太恭人諭氏挽辭恭人生於紹聖二年，沒於慶元六年，壽九十六，自太孺人至太恭人，皆特恩封。

路乾
耄齒人誰及，高門世共榮。始終膺備福，耨老遇昇平。綸綍褒嘉事，鄉閭惻愴情。吾詩儻傳世，亦足見平生。

日曬霜融步步泥，旬餘不到石泉西。連朝和暖得乾路，喚取鄰翁來杖藜。

寒夜

閉戶歲云暮，翻書夜向闌。足僵知火盡，目鈍覺燈殘。躍浦魚驚獺，穿林犬逐獾。三年納微祿，無媿得心安。

乍晴至園中

藥笈漁竿每自隨，枯筇短帽恰相宜。投林但有窮猿喜，伏檻元無老驥悲。巖溜甘寒通碧沼，野梅清絕隔疎籬。放翁老甚情懷嬾，那辦題詩寄所思。

此
页
空
白

陸放翁集

劍南詩稿

卷第四十五

十二月三日夜橋上看月

常時新月有無間。今夕清暉抵半環。柳外橋高最堪望。憑闌目送下西山。

流年

流年及耄敢前期。浮世如漚只自知。多貯閑愁持抵酒。剩遊好景擬供詩。海東藥到寬衰疾。嶼下書稀館別離。陳明州餉人參。張季長久不得書。約束春盤莫草草。又當梅發兩京時。

山家

風月寬閑地。溪山隱遯身。雲邊安井臼。竹裏過比鄰。洗甬分巖瀑。烹芝束澗薪。柴門敲不應。疑是避秦人。

又
種藥爲生業。彈琴悅性靈。中宵煮白石。平旦誦黃庭。茶熟眠初起。兒扶酒半醒。意行無定處。猿鳥共忘形。

又
長生固非道。得道自長生。書不傳關尹。言誰契廣成。羅浮觀日出。句曲聽松聲。聞說長安好。何妨醉太平。

又

陶葛金丹訣。千年祕不傳。人皆肖天地。世豈乏神仙。擾擾生趨死。悠悠食復眠。微言誰復領。浩歎撫遺編。

又

清絕更誰如。松風小閣虛。氈巾參几杖。鶴毳落琴書。新鑿洵丹井。常攜斷藥鉏。身閑隨處樂。何況是吾廬。

小舟白竹篷。蓋保長所乘也。偶借至近村戲作。

茅簷細雨濕炊煙。江路清寒欲雪天。不愛相公金絡馬。羨他亭長白篷船。

又

雪雲無際暗長空。小市孤村禹廟東。一段荒寒端可畫。白篷籠底白頭翁。

稻飯

買得烏隄遇歲穰。此身永免屬官倉。塘南塘北九千頃。八月村村稻飯香。鏡湖下至海。凡種稻九千頃。

殘臘

殘臘無多寒漸薄。新春已近日微長。棊枰散後軒窗靜。梅塢歸來襟袖香。海霧籠山青淡淡。河堤瀦水白茫茫。鷺飛前導生遊興。笑岸綸巾上野航。

又

殘臘去春纔十日。衰翁告老已三年。乳糜但喜分香鉢。銀勝那思映綵鞭。萬里當時嗟漫浪。一窗此日困沉綿。清泉白石無人到。且結梅花淡淡緣。

書志

著書汗馬牛。不如守道力。賣文取卿相。詎是儒者職。孔光豈不學。千載汗簡冊。通塞本細事。於我奚失得。袁安臥空廬。亦度風雪夕。如何慕溫飽。撓節不自惜。我突無炊煙。或至日中昃。小兒抱遺經。衣短兩脛赤。吟誦何琅琅。聲如出金石。掩卷語乃翁。聖有陳蔡厄。

數日不出門偶賦

衰甚身如作繭蠶。經旬不省出茅菴。老僧遣信分茶串。隱士敲門致酒甌。看鶴松陰賞高潔。疏泉石罅得清甘。地偏心遠無車馬。賴有吾兒與劇談。

又

十二年來一日同。飯疏略似誦經翁。居家不擬依鄰富。報國惟思祝歲豐。冰澗乍通寒溜碧。蘭叢新放露芽紅。閑門萬化俱觀盡。那用瞿曇更說空。

又

湖上蝸廬僅自容。寸懷無奈百憂攻。補衣未竟迫秋露。待飯不來聞午鐘。稚子挾書勤質問。鄰翁釋耒問過從。今朝一笑君知否。滿盞新醅粥面醜。

寄題嚴居厚伴釣軒

人生有至樂。莫若江湖中。千錢買短冊。青箬織孤篷。潮生鼓棹去。煙波浩無窮。長歌送夕陽。回首萬事空。伴釣君已奇。我乃真釣翁。君出羊裘家。散人亦吾宗。一見卽定交。正以氣味同。何時溪莊路。共醉蘆花風。溪莊蓋居厚所居。

寄趙昌甫并簡徐斯遠

我詩非大手。我酒亦小戶。得遊名勝間。獨以用心苦。趙子乃宿士。山立誰敢侮。寓名祝融祠。叢筍臥煙雨。高吟二千篇。一字無塵土。朱先少許可。書每說昌甫。雖云忍飢瘦。得喪亦相補。嗟君與斯遠。文中真二虎。我老日益衰。想像氣如縷。

南園觀梅

幽徑疎籬洗世塵。眼明見此數枝新。橫斜恰受三更月。璀璨先回萬物春。洛浦凌波矜絕態。緱山騎鶴想前身。放翁著句煩君記。畫在生綃卻未真。

老身

老身無處著。登望憶閑遊。白浪浮天遠。黃雲出塞秋。百年殊鼎鼎。萬事只悠悠。歲晚長亭路。寒侵季子裘。

獨處

老夫閉門衰疾嬰。小兒適有南山行。一奴入市暮未返。愔愔不聞烏雀鳴。地爐火死凍腳硬。欲作薄粥愁空鎗。平生遣日賴詩句。久矣無復吟哦聲。但餘一點真正念。照了萬象猶精明。欲論此事向何許。衆中倘遇千人英。

醉中歌

文章日益近衰陋。風節久已嗟陵夷。元祐大蘇逝不返。慶曆小范今誰知。閉門學古人共笑。低頭就俗我卻疑。脫衣幸可買漁艇。爛醉浩歌隨所之。

排悶

人間歲月莽悠悠。老大悲傷只涕流。民瘼糟糠寧細事。俗忘節義更深憂。潦歸宿麥猶難望。雪少同雲未易求。自歎此生真已矣。且偷暇日弄孤舟。

庚申十二月二十一日西和州健步持子布書報已取安康襄陽路將至九江矣悲喜交懷作長句

吳蜀相望萬里程。征鞍忽報近湓城。角巾已入三更夢。老眼先增十倍明。告至徧爲親舊問。勞還深媿里閭情。追思二紀睽離事。熹極翻成涕泗橫。

又

萬里東來雙鯉魚。衰翁悲喜得兒書。聞過峴首已冬至。想到匡廬將歲除。辛苦山行穿雪履。淒涼旅飯嚼冰蔬。此行身歷艱難遍。莫厭東臯共荷鋤。

園中作

幽禽啼不去。紅蕊落還開。意適時時醉。身閑日日來。著書增小品。披句覓糧栽。消息吾兒近。扶衰又上臺。子布約二月初到鄉里。

足疾

足疾惟妨拜。登臨故自如。深知造物意。遣遂此心初。東塢閑看竹。西溪獨釣魚。暮歸猶未倦。把卷遶前除。

歲暮書懷

陸放翁集

劍南詩稿 卷四十五

五

(一五五一)

世事從來不可常。把茆猶幸得深藏。牀頭酒盞寒難熟。瓶裏梅花夜更香。薄命元知等蟬翼。畏途何處不羊腸。詩成讀罷仍無用。聊滿山家骨董囊。

又

憶昔初辭鷓鴣行。慨然誓墓老耕桑。蓼汀夜宿夢魂爽。梅塢暮歸襟袖香。窮巷每多閑日月。小兒時誦古文章。吾儕窮死從來事。敢變胸中百鍊剛。

除夜

守歲全家夜不眠。杯槃狼藉向燈前。相看更覺光陰速。笑語逡巡卽隔年。

修路

雨露道壞困泥塗。木石紛然賴里閭。但使僅堪行便足。我無長戟與高車。

金丹

子有金丹鍊卽成。人人各自具長生。施行要使俗仁壽。收斂猶能心太平。劇飲似鯨身不倦。細書如蠹眼常明。更餘一事君難學。富貴眞同涕唾輕。

平昔

平昔飄然林下僧。更堪衰與病相乘。殘年已任身生死。一念猶關道廢興。皎皎初心質天地。兢兢晚節蹈淵冰。子孫勿厭藜羹薄。此是吾家無盡燈。

二月三日春色粲然步至湖上

不媿衰翁雪鬢新，出門也復整烏巾。
梅花隔水香撩客，野鳥穿林語喚人。
長日難消惟泥酒，災年不死又
違春。吾兒已到新安未，想掬清溪洗客塵。
子布度將至新安。

計子布歸程已過新安入畿縣界

憶昔初登下峽船，一回望汝一凄然。
夢魂南北略萬里，人世短長無百年。
強遣老懷終兀兀，忽聞歸騎已
翩翩。今朝屈指無窮喜，歷盡江山近日邊。

東園觀梅

出世仙姝下草堂，高標肯學漢宮粧。
數苞冷蕊愁渾破，一寸殘枝夢亦香。
問訊不嫌泥濺屐，端相每到月
侵廊。高樓吹角成何事，只替詩人說斷腸。

喜得建茶

玉食何由到草萊，重奩初喜坼封開。
雪霏庾嶺紅絲磴，乳泛閩溪綠地材。
舌本常留甘盡日，鼻端無復甯
如雷。故應不負朋遊意，手挈風爐竹下來。

春雨

細雨吞平野，餘寒勒早春。
未增豪飲興，先著苦吟身。
幽徑萱芽短，方橋柳色新。
閉門非爲老，半世是閑人。

春雨

擁被聽春雨，殘燈一點青。
吾兒歸漸近，何處宿長亭。

又

湖上新春柳，搖搖欲喚人。多情今夜雨，先洗馬蹄塵。

初春感事

馬跡車聲是處忙，經旬無客到龜堂。水初泛溢黏天綠，梅欲飄零特地香。世事紛紛人自老，歲華冉冉日初長。百錢不辦旗亭醉，空愛鵝兒似酒黃。

又

一樹紅梅已半殘，破裘也復敵春寒。忍窮過日卻嗟易，負媿終身良獨難。活火靜看茶鼎熟，清泉自注研池寬。人生樂處君知否，萬事當從心所安。

道室書事

五十餘年讀道書，老來所得定何如。目光焰焰夜穿帳，胎髮青青晨映梳。二事皆紀實，甚畏螻蚋寧斷手。已烹熊掌敢兼魚，春蕪二畝扶犁去。空憶高皇賜對初。

先少師宣和初有贈晁公以道詩云：奴愛才如蕭穎士，婢知詩似鄭康成。晁公文集泣而足之。

仕不逢時勇退耕，閉門自號景迂生。遠聞佳士輒心許，老見異書猶眼明。奴愛才如蕭穎士，婢知詩似鄭康成。早孤遇事偏多感，欲續殘章涕已傾。

春日雜題

梅花三十本，圍以疎竹籬。入春甫十日，開遍南北枝。少年輕節物，老大復苦衰。坐見零落盡，一杯初未持。

又

春雨路易乾。雨止即可行。梅花落無餘。蘭芽亦已生。好鳥何山來。向我飛復鳴。行矣東郊路。藉草作清明。

又

野水如棋枰。所至各成村。炊煙出茆屋。碓聲隔柴門。樹陰同戲兒。多已長子孫。安居無暴斂。何以報國恩。

又

春陰不成雨。正作卯色天。花開路無塵。楊柳搖輕煙。佳哉冷淘時。槐芽雜豚肩。長安墮胡虜。況說野狐泉。

又

客路行無窮。漁唱聽不厭。濤江西限吳。雲岫南入剡。蹇驢過小市。高柳擁孤店。去去望前村。鴉歸煙欲斂。

又

蒲柳深復淡。桃李白間紅。東皇一稅駕。萬物酣春風。煙村在何許。小屏團扇中。一笑喚稚子。相扶上短篷。

春日暄甚戲作

桃杏酣酣蜂蝶狂。兒童相喚踏春陽。老人自笑還多事。預恐明朝雨壞牆。

春日

遲日園林嘗煮酒。和風庭院眼新絲。已過燕子穿簾後。又見鯛魚上市時。排悶與兒聯小句。破閑留客戰枯棋。殘年自覓安排處。除卻歸休總不宜。

書室獨夜

忽忽新春過，悵悵一室幽。銅燈立雁趾，石鼎揭龍頭。老媿人扶拜，貧無食足謀。退居消日月，太半付莊周。

追感往事

太平翁翁十九年，紹興中禁中謂秦太師爲太平翁翁。父子氣焰可熏天，不如茅舍醉村酒。日與鄰翁相枕眠。

又

世事紛紛過眼新，九衢依舊漲紅塵。桃花夢破劉郎老，燕麥搖風別是春。

又

渡江之初不暇給，諸老文辭今尙傳。六十年間日衰靡，此事安可付之天。

又

文章光焰伏不起，甚者自謂宗晚唐。歐曾不生二蘇死，我欲痛哭天茫茫。

又

諸公可歎善謀身，誤國當時豈一秦。不望夷吾出江左，新亭對泣亦無人。

書意

我本三生世外人，幻軀其實強冠巾。稍能閉戶學種菜，時亦長歌行負薪。一醉卻非身外事，百年終是冢中塵。君知夢境無根底，莫信人言想與因。

又

病眼猶堪閱世人。難將雪鬢著烏巾。囊中錢盡罷沽酒。澗底雨寒愁束薪。老子那辭徙牛屋。癡人自喜拜車塵。窮通要是兒嬉事。懶就山僧講宿因。

清都行有序

辛酉二月十四日夜雞初鳴夢與故人查元章竝轡行大道中前望宮闕甚壯麗元章言吾輩當同預大議論予與約勿爲身謀元章拊掌稱善遂覺作清都行一首

積雨初收曉寒重。野人忽作清都夢。宮牆柳色綠如染。仰視修門岌飛動。元章久已葬岷山。安得翩翩竝馳鞚。春光如昔交舊少。肺肝欲寫誰堪共。頗聞天閣有疑事。通明殿下方僉議。約君切勿負初心。天上人間均一是。

春來食不繼戲作

久臥窮閭困負薪。何妨掃盡太倉陳。瘦如飯顆吟詩面。飢似柴桑乞食身。犧象未應殊斷木。江湖底處有窮鱗。大冠長劍人看好。不換茅簷一幅巾。

紹興辛酉子年十七矣距今已六十年追感舊事作絕句

常憶初年十七時。朝朝烏帽出從師。與許子威輩同從鮑季和先生。晨興必具帽帶而出。忽逢寒食停供課。正寫礬書作贖碑。

獨坐視老奴灌園

東窗日晚獨愁予。眼闌年來頗廢書。賴有吾家老阿對。相從引水灌園蔬。

雨晴風日絕佳，徙倚門外。

一雙芒屨伴筇枝，不用兒扶自出嬉。
貪看南山雲百變，舍西溪上立多時。

又

茶醞無端廢午眠，杖藜信步到門前。
青裙溪女結蠶卦，白髮廟巫催社錢。

又

章老三年病方死，吳翁一夕呼不醒。
獨有此身頑似鐵，倚門常看暮山青。
章吳皆鄰人，以去冬死。

春遊

春風堤上草萋萋，草軟沙平護馬蹄。
似蓋微雲纔障日，如絲細雨不成泥。
千秋觀裏逢新燕，九里山前聽
午雞。追憶舊遊愁滿眼，綵船曾繫畫橋西。

春雨

狼藉殘花滿地紅，擁衾孤夢雨聲中。
人生十事九堪歎，春色二分二已空。
但有老盆傾濁酒，不辭衰鬢對
青銅。長貧博得身強健，久矣無心咎化工。

又

藥爐茶竈淡生涯，聽雨猶能惜物華。
蘸岸頓添三尺水，沾泥不貸一城花。
閑摩病眼開書卷，時傍危欄弄
釣車。稚子孤行八千里，喜聞炊熟可還家。
家僮自行在來報子布寒食前可到家，唐人以寒食前一日爲

炊熟。

又

自笑平生嬾是真。閉門高枕動兼旬。海棠千片已隨水。杜宇一聲無復春。綠酒盈樽足忘老。朱櫻上市正嘗新。今朝雨止通溪路。又向沙頭岸幅巾。

書懷

謝客元無疾。深居似有憂。向空書咄咄。對竹送悠悠。出每思安臥。歸還念遠遊。春衣典已慣。斗酒不難謀。

三月十六日至柯橋迎子布東還

江國常年秋雁飛。吾兒遠客寄書稀。道途一見相持泣。鄰曲聚觀同載歸。草草杯盤更起舞。匆匆刀尺旋裁衣。從今父子茅簷下。回首人間萬事非。

又

我似傷禽帶箭飛。更憐汝作雁行稀。異時恐抱終身恨。此日寧知徒步歸。萬里外應勞遠夢。三年前已挂朝衣。斷編蠹簡相從老。絕念功名亦未非。

題施武子所藏楊補之梅

補之寫生梅。至簡亦半樹。此幅獨不然。豈畫橫斜句。

食野菜

野蔌山蔬次第嘗。超然氣壓太官羊。放翁此意君知否。要配吳粳曉飯香。

又

萬里蕭條酒杯。夢魂猶自度邛邛。可憐龍鶴山中菜。不伴峨眉樾脯來。

予十許歲卽往來雲門諸山。今復與諸子來。追念悽然。

經行猶記髣髴初。所至渾如過故墟。橋廢夕陽空鶴表。碑亡春草沒龜趺。荒郊渺渺羊牛下。叢木蕭蕭鳥雀呼。可恨一衰今至此。右攜筇杖左人扶。

雲門道中

度嶺穿林一徑斜。旋篝新火試新茶。箬包粉餌祠寒食。雨溼青鞵上若耶。石罅微泉來滴瀝。溪涯老木臥槎牙。不須苦覓東柯谷。是處雲山可寄家。

龍瑞

多年不蹋陽明路。今日重來院院行。好在千秋馮觀主。修廊一見眼偏明。

禹寺

暮春之初光景奇。湖平山遠最宜詩。尙餘一恨無人會。不見蟬聲滿寺時。

寄題張仲欽左司槃澗

劍谿之南有佳處。山靈尸之不輕付。張公鼻祖晉司空。談笑得地開窗戶。谿光如鏡新拂拭。白雲青嶂無朝暮。伏几讀書時舉頭。萬象爭陳陶謝句。公今仙去有嗣子。關塞崎嶇方叱馭。山城何曾歎如斗。皦皦不受世俗汗。君不見伍文往者勢如山。朝士幾人無汗顏。尊公遺事不須述。但看當時出處間。

園中晚興

世故誰能必，書生妄自期。年光卷中過，心事鬢邊知。零落花隨水，輪囷筍突籬。晚晴山盡出，徙倚獨移時。

送陳希周赴安福令

補吏鶴嶺邊，尊公方玉立。超遙籥風雲，餘子那可及。天高鬼神惡，聞訃三日泣。晚途見嗣子，握手悲喜集。乘桴掠鯨波，信矣勇可習。巉巖風骨峭，颯霧不能襲。謂當上臺省，豈復論等級。如何困無津，俛首臨一邑。顧嗟六朝民，龍鍾垂八十。肯來野水濱，半月解書笈。吾杯僅容龕，安得看鯨吸。佇立送歸鞍，霽日滿原隰。

春晚久雨排悶

積雨暗村墟，幽居雜鼃蚓。泥潦欲升階，几席或生菌。壯年多重腿，況我抱宿疢。下牀躡高屐，顧影輒自哂。客來入我戶，亦復爲歎憫。胡不徙高原，再拜謝不敏。

甲子日晴

澤國春多雨，閱月殊未止。皇天俄悔禍，界以晴甲子。山川相炳煥，桑柘鬱千里。壠麥行可穫，吳蠶亦三起。牀頭醅益香，大杓瀉浮蟻。醉醒日已晡，長歌識吾喜。

三月二十日兒輩出謁孤坐北窗

園林春已空，陂港雨新足。泥深黃犢健，桑老紫椹熟。豐年逋負少，村社壓酒肉。微風吹醉醒，起和飯牛曲。

又

歲月不相貸，布穀忽已鳴。新夏亦自佳，北窗綠陰成。讀書老易倦，披衣繞堦行。摩挲檉榔杖，與汝樂太平。

陳希周自海外歸，送檉榔拄杖一枝。

春盡記可喜數事

微雨洗浮埃，蒼顏一笑開。僧招行藥圃，兒報得琴材。病退初嘗酒，春殘已過災。鄰家賽神會，自喜亦能來。
卜者謂予今春當病，幸不甚驗。

立夏前二日作

晨起披衣出草堂，軒窗已自喜微涼。餘春只有二三日，爛醉恨無千百場。芳草自隨征路過，遊絲不及客愁長。殘紅一片無尋處，分付年華與蜜房。

老民

乞得不貲身，林間號老民。兒因作詩瘦，家爲買書貧。村僕欺謾少，鄰翁語笑真。今朝鹽酪盡，薺糝更宜人。
又

老民無一事，終日臥柴扉。鑿沼觀魚樂，鉤簾待燕歸。架高藤葉密，土潤藥苗肥。休退真吾分，無心學息機。
貧甚自勵

忍病停朝藥，捐書省夜燈。都門下第客，山寺退居僧。天每臨幽隱，人何與廢興。能輕馬千駟，肯慕稷三升。
衡門

小聚風煙外，衡門水竹間。疏溝分北澗，翦木見南山。人笑謀生拙，天教到死閑。猶存拄杖子，遇興卽躋攀。
遊法雲

放船三家村，進棹十字港。雲山互吞吐，水草遙莽蒼。沙鷗下拍拍，野鷺浮兩兩。蕭騷菰蒲中，小艇時來往。

匡山如香爐。藍水似車輞。夢魂不可到。於此寄遐想。瘦僧迎寺門。爲我掃方丈。指似北窗涼。此味媿專享。我笑謝主人。聊可倚拄杖。吾廬已清絕。敢取魚熊掌。

舟中作

短篷搖櫂暮上昏。老怯年華易斷魂。夾港蒲聲知小雨。隔林續火認孤村。奉祠累歲慙家食。謝事終身負國恩。惟有愚忠窮未替。尙餘一念在元元。

貧居

囊空如客路。屋窄似僧寮。得飯多菰米。烹蔬半藥苗。草生初失徑。筍放欲干霄。不道弓旌誤。虞人自畏招。

初夏野興

得意煙霞不諱窮。一菴聊寄寂寥中。山從樹杪參差見。水遶花陰曲折通。閑倚胡牀遡新月。時停團扇受微風。元知夢境無真實。不待邯鄲覺後空。

又

披衣清曉倚闌干。龜屋裁成二寸冠。盆檜雨餘抽嫩綠。研池風過起微瀾。愛書自笑心常在。去死懸知日尙寬。回視前修似無媿。不教一字入長安。

又

扇墮巾欹午夢回。鳴鳩又喚雨絲來。數行褚帖臨窗學。一卷陶詩傍枕開。糠火就林煨苦筍。密甕沉井漬青梅。艾人行復巍然出。老大難堪節物催。

此
页
空
白

陸放翁集

劍南詩稿

卷第四十六

孟夏方渴雨忽暴熱雨遂大作

蒸溽殊未解。雨來那可涯。鵲驚無穩樹。燈暗不成花。處處躍秧馬。家家閑水車。兒童伴翁喜。聚首話桑麻。

小池

荷鋪庭中破嫩苔。清溝一派引泉來。剪刀草長浮萍合。無數遊魚去復回。

衡門

曲徑衡門短短籬。槐楸陰裏倚筇枝。老來百事不入眼。惟愛青山如舊時。

海上作

厭逐紛紛兒女曹。挂帆江海寄吾豪。鯨吞蠃作渾閑事。要看秋濤天際高。

朝飢示子聿

水雲深處小茅茨。雷動空腸慣忍飢。外物不移方是學。俗人猶愛未爲詩。生逢昭代雖虛過。死見先親幸有辭。八十到頭終強項。欲將衣鉢付吾兒。

養氣

養氣安心不計年。未嘗一念住愁邊。才疎屢掃朝中迹。命薄翻成世外緣。耐老尙能消劫石。放狂聊復醉江天。飽知句曲羅浮路。不訪初平卽稚川。

示友

黃卷青燈自幼童。長年頗亦有新功。尙嘲孟顛遲成佛。那計辛毗不作公。學問更當窮廣大。友朋誰與共磨礪。諸君果未捐衰老。鄙語人當致一通。

早涼熟睡

靈臺虛湛氣和平。投枕逡巡夢卽成。屋角鳴禽呼不覺。手中書冊墮無聲。百年日月飛雙轂。千古山河戰一杯。賴有蓮峯遺老在。白雲深處主齊盟。謂陳希夷。

初夏

麥秀微寒後。梅黃細雨前。湖灘初集鷺。堤柳未鳴蟬。琴帶輕陰潤。巾因小醉偏。晚來幽興極。又上釣魚船。

夏雨

忽聞疎雨滴林梢。起看油雲滿四郊。行蟻君臣初徙穴。鳴鳩夫婦正爭巢。築陂處處移新稻。乘屋家家補破茆。堪笑此翁惟美睡。孝先便腹任譏嘲。

倚樓

千里江山入倚樓。高吟聊復寫吾憂。詩書幸有先人業。貧賤初非學者羞。數掩檣籬端可老。一杯藜粥尙何求。東陂未插青秧遍。且與鄰翁卜雨鳩。

晚興

偶扶藜杖過傍村。卻倚禪牀坐小軒。日落鴉栖津樹暗。人歸鶴踏釣船翻。挽弓從笑識丁字。刺繡終勝倚市門。羹芋一杯吾自飽。諸兒強爲置盤飧。是日五郎等置食參倚。

又

身如病鶴謝樊籠。白盡衰髯臉尙紅。蒲葦陂塘新漲後。梧桐門巷夕陽中。遺名要耐千年看。快飲方誇百榼空。造物閔憐君會否。放教折臂老新豐。

晨雨

過雲生谷暗。既雨卻窗明。低燕爭泥語。浮魚逆水行。山川增秀色。草木有奇聲。處處青秧滿。長歌樂太平。
戲作絕句以唐人句終之

雨細穿梅塢。風和上柳橋。山居無曆日。今日是何朝。

又

靜對煎茶竈。閑疏洗藥泉。回頭問童子。今夕是何年。

述懷

情懷猶是昔年人。豈料侵尋八十身。燈下看書方覺老。花前闕酒始知貧。玉非鼠朴何勞辨。魚與熊蹯各自珍。萬事回頭已陳迹。爲君一笑落紗巾。

閒中自詠

鶴羨清癯鷗羨閑。衡門正在水雲間。無求尚恨時賒酒。有癖應緣酷愛山。細繞坡頭行犖角。別分泉脈聽淙潺。三更不睡看江月。恐有高人夜叩關。

晨興

小雨過郊墟。晨興一事無。殘榴重結蕊。新燕續生雛。書細猶能讀。行遲漸要扶。蔬畦恐蕪沒。且復課僮奴。

自詒

愈老愈知生有涯。此時一念不容差。身如病鶴長停料。心似山僧已棄家。高枕時時聞解籜。卷簾片片數飛花。飯餘解帶摩便腹。自取風爐煮晚茶。

又

行年耄及臥蝸廬。山水登臨亦已疎。無可奈何猶食粟。未能免俗學澆蔬。蓬門時接漁樵話。塵几聊存種樹書。強欲入城還自笑。世間那有鶴乘車。

西村

亂山深處小桃源。往歲求漿憶叩門。高柳簇橋初轉馬。數家臨水自成村。茂林風送幽禽語。壞壁苔侵醉墨痕。一首清詩記今夕。細雲新月耿黃昏。

漁父

楚江茫茫新雨霽。殘雲蹙作魚鱗細。老翁短楫去若飛。我欲從之已天際。從之不可況共語。醉眼知渠輕一世。直鉤去餌五十年。此意寧爲得魚計。

放歌行

少年不知老境惡。意謂長如少年樂。朝歌夜舞狂不休。逢人欲覓長生藥。三二十年底難過。屈指朋儕餘幾個。就令未死身日衰。朱顏已去誰能那。人間萬事如弈棋。我亦曾經少壯時。兒曹紛紛不須校。歲月推遷渠自知。

苦貧

老作清時版藉民。深耕迨及故山春。熟思豈是天貧我。妄計還憂鬼笑人。但使甌中餘麥飯。何妨澗底采荆薪。此窮正坐清狂爾。莫向瞿曇問宿因。

晨起至參倚齋示子聿

似仙猶火食。比古未巢居。老子癡全節。小兒能著書。下簾留乳燕。投飯出潛魚。幸好隆中客。無爲起草廬。

夏夜對月

薄雲歸欲盡。殘雨久猶滴。月入疎林間。庭戶粲珠璧。梅天苦蒸鬱。爽氣始此夕。豈無一舴艋。放浪江天碧。散髮黃鶴樓。醉弄白玉笛。眞當舞魚龍。詎止裂金石。

夏夜

酒力初消睡未厭。臥看香縷繞疎簾。月高棲鵲重移樹。風勁流螢自入簷。長夏迢迢秋尙遠。孤愁冉冉病相兼。老人本是山中客。掃迹元非畏楚鉗。

五月十日曉寒甚聞布穀鳴有感

陸放翁集 劍南詩稿 卷四十六

弊袴久當脫。短褐竟未送。吳中諺語曰。未喫端五糲。布襖未可送。俗謂典質曰送。老怯五更寒。重衾擁殘夢。羣蝨方得意。飽血藏衣縫。竹簟何時陳。紈扇殆無用。長夏疊疊來。歲月疾飛鞚。妄懷畎畝憂。太息欲誰控。

老歎

人生易衰老。萬事海濤翻。但恨芳尊迨。寧悲雪鬢繁。諸儒輕古學。遺虜盜中原。有語誰能聽。毋矜舌尚存。

閉戶

收身歸死境。湖傍閉戶悠悠白。日長巷僻斷非容。駟路腸枯那有蹴。蔬羊書生正可蹈。東海世事漫思移。太行睡起不知天。早暮坐看螢度篆。盤香。

長飢

病臥窮閭負聖時。本來吾道合長飢。朝不及夕未妨樂。死何如生行自知。早年羞學仗下馬。末路幸似泥中龜。煙波一葉會當逝。吹笛高人有素期。

山齋書事

山榴子結又重開。巢燕雛飛卻續回。燕有三生雛乃去者。雨足人畦千頃稻。日長風舞一庭槐。浩歌縱酒愁仍在。作意觀書睡已來。常恨流年不相貸。若爲更著暮蟬催。

贈道流

賣藥會稽市。不知今幾年。身常雜庸保。世果有神仙。醉帽簪花舞。漁舟聽雨眠。放翁獨識子。肯向俗人傳。

避暑松竹間

雙松五丈高，萬竹一尺圍。上有林蟬鳴，下有礪鳥飛。正午不見日，我來每忘歸。清詩忽陳前，永與世俗違。直北有異境，煙汀連釣磯。何當霜雪時，散髮櫛葉衣。

連日大雨門外湖水渺然

趁朝把笏著烏鞵，不似歸來買短蓑。尙鄙朱公養魚術，肯爲寧戚飯牛歌。逢時有命求何益，觸事無心得最多。樂處卻嫌兒輩覺，出門十步卽煙波。

午睡

槐楸陰裏綠窗開，天與先生作睡媒。流汗未乾衣上雨，大聲已發鼻端雷。枕鐫松石分琴薦，簟織風漪取笛材。卻起岸巾看汲井，人間車馬正氛埃。

窮居

阨窮心自樂，寂寞道常尊。老病頻辭客，嬉遊不出村。淖糜均列鼎，徒步當華軒。不但終吾世，猶堪遺子孫。

梅雨

殘雨收還滴，低雲去復留。護雛憐弱燕，喚婦笑鳴鳩。碓米春初滑，園蔬摘復抽。誰知泥沒踝，也有客相求。

村居書事

困厄難希飽煖家，未妨隨事作生涯。白鹽赤米已過足，早韭晚菘猶恐奢。鴨放競浮新漲水，牛歸正及暝棲鴉。年逾七十方辭祿，敢望高人挂齒牙。

閒中信筆二首其一追和陳去非韻其一追和王履道韻

我看浮名如脫髮。誓墓收身老巖穴。座延窮鬼心不疑。鑪錘橫財渠自別。樂哉今爲八十翁。神交園綺商山中。烹葵剝棗及時序。爛醉黍酒歌邪風。

又

小江之上千峯立。潮回艇子爭來集。飄風忽起白浪高。急雨橫吹綠蓑溼。歲豐斗酒纔百錢。茆店無人驚醉眠。醒來徑入亂雲去。異日出看東封年。

題齋壁

鏡水西頭破茅屋。紹興初載舊書生。門無車馬終年靜。身臥雲山萬事輕。三釜昔傷貧藉祿。一廛今幸老爲氓。斷蓬不是無飛處。莫與飄風抵死爭。

夏日雜題

疎疎窗似秋蛩室。疊疊書如春鵲巢。大耋何妨尙絃誦。小詩時亦雜談嘲。

又

耿耿醜石巖當道。矯矯長松龍上天。滿地凌霄花不掃。我來六月聽鳴蟬。

又

情懷萬里長征客。身世連牀旦過僧。熟計書空成咄咄。不如任運去騰騰。

又

一枝藜峒桺榔杖。二寸羊城蟬帽冠。萬里來爲老人壽。始知天地不勝寬。

又

天隨手不去朱黃。辟蠹芸編細細香。今夕短檠須暫設。北窗風雨送微涼。

又

身閑欲出無如嬾。酒薄雖傾不敵愁。殘暑從今無一月。剩儲詩思待新秋。

又

憔悴衡門一秃翁。回頭無事不成空。可憐萬里平戎志。盡付蕭蕭暮雨中。

又

衰疾沉綿短鬢疎。淒涼圯上一編書。中原久陷身垂老。付與囊中飽蠹魚。

夏雨歎

蝸舍入門楣觸額。門泥壁作龜兆坼。雨多潦水欲上堦。臥聽鳧鴨聲拍拍。日高糴米奴未回。坐知薄飯未容索。仕羞捷徑耕不力。自取囊空欲誰責。富貴危機復可畏。世間果無第一策。雖然胸中有事在。片言可壽天下脈。

物外雜題

市墟沽斗酒。獨酌復高歌。一笑語觀者。此君更事多。

又

陸放翁集

劍南詩稿 卷四十六

九

(二五七三)

當年下沔鄂。回首幾秋風。景物渾如昨。千帆落照中。

又

曉入姑蘇市。閭門繫短篷。老人元不食。買餅飼山童。

又

送客停山步。尋僧立寺門。青鞵慣泥潦。卻愛雨昏昏。

又

粉堞臨江渚。朱橋枕市樓。長吟策小蹇。又度一年秋。

又

飼驢留野店。買藥入山城。興盡飄然去。無人識姓名。

又

高城今曠野。比屋昔朱門。道上傳呼過。遙遙幾世孫。

又

過市摩雙眼。驚嗟閱盛衰。朱樓倚霄漢。曾見始成時。

過村舍

確舍臨山路。牛欄隔草煙。問今何歲月。恐是結繩前。

晝臥初起書事

歲華病思兩侵尋。靜看槐楸轉午陰。待睡不來聊小憩。煨詩未就且長吟。還山久洗天涯恨。謝事新諧物
外心。忽有故人分祿米。呼兒先議贖雷琴。

夜雨有感

斷虹不隔江郊雨。東方虹見則雨止。俗語謂之隔雨。今歲獨不爾。一釭昏燈夜半時。多感生悲那爲酒。積
衰成瘦錯冤詩。空塔點滴何由止。倦枕淒涼只自知。平日故人零落盡。寄書誰與敘睽離。

偶作夜雨詩明日讀而自笑別賦一首

俗情向者未全忘。洗以縈簾一縷香。得失故應常浩浩。是非正可付蒼蒼。殘蟬不斷知秋近。雙燕歸來伴
晝長。誰識龜堂新力量。東家卻笑接輿狂。

舍西晚眺示子聿

秋濤常記犯靈胥。季子雙髦尙髮如。薄飯不爲明日計。短檠相對十年餘。嗟予久合墮鬼錄。憐汝猶能讀
父書。西望牛頭渺天際。永懷吾祖起家初。牛頭山在小江西北有先太傅讀書堂尙存。

自訟

年少寧知道廢興。搏風變化羨鯤鵬。貪求但欲攀分寸。痛定方慙乞斗升。靈府已能澄似水。俗緣更覺薄
於僧。挂冠且喜身蕭散。二頃寧須退可憑。

讀唐人樂府戲撥思婦怨

一自門前征馬嘶。此心常與斷雲西。雙飛空羨雉朝雊。獨泣忍聞烏夜啼。遼海晝昏塵漠漠。杜陵春到草

萋萋孤愁可爲鄰。說只有臨樽醉似泥。

南堂納涼

環坐列胡牀。兒曹共此涼。風生桐葉墜。露下稻花香。老幸返初服。窮宜歸故鄉。已無纓可濯。清嘯對滄浪。

又

浴罷閑無事。悠然寄一牀。水風涼醉頰。松月上虛廊。岸久烏紗側。薰餘細葛香。今宵一美睡。何止傲羲皇。

中庭納涼

紅映衡門夕。照明翠浮村。巷暝煙生搖搖楸。線風初緊。颭颭荷盤露欲傾。數酌濁醪留客醉。一編疑義與兒評。須臾散去人聲寂。獨數城頭長短更。

又

散髮江天懶出遊。衡門日落鎖梧楸。火雲突兀方蒸暑。銀漢縱橫已報秋。熠熠露螢黏徑草。棼棼漏鼓下譙樓。追涼明日無奇策。聊向林間卜雨鳩。

待旦

東方星磊磊。西舍雞喔喔。萬慮集五更。吾睡無由著。世事如飲酒。不獻自無酢。開窗起危坐。送月西南落。

又

是身如浮煙。久聚要當散。吾年七十七。寒暑凡幾換。夏夜亦自佳。何必厭揮汗。推枕坐南窗。悠然待清旦。

晨興

冬夕宜晚睡。夏日思晨興。磊落明星高。蒼涼朝日昇。正襟坐堂上。有几不敢憑。陳前聖人書。凜如蹈淵冰。平生不苟利。豈獨畏友朋。長飢君勿謂。人各有不能。

又

欲曉不能寐。亟起坐北堂。齋莊對斷簡。左右陳朱黃。湛湛一池墨。鼻鼻半篆香。老生不自逸。幸此夏日長。奇哉長頭兒。好勇不可當。安得數年健。與兒講虞唐。

晚涼述懷

末學常憂墮。吝驕晚知鵬。鸚本逍遙。屏醫卻藥疾良已。破械空囹盜自消。父子終身美藜藿。交遊大半是漁樵。衡門日落清風起。又著藤冠度野橋。

湖塘晚眺

綠樹暗村墟。青山繞草廬。奉祠神禹舊。馳道暴秦餘。浦色沉煙網。蛙聲入雨鉏。清秋又如許。幽憤若爲摅。

又

病起閑無事。時來古渡頭。煙中賣魚市。月下采蓮舟。帆鼓娥江晚。菱歌姥廟秋。長吟無傑句。聊以散吾愁。

小集

烏柏遮山路。紅蕖滿野塘。病蘇身漸健。秋近夜微涼。杯酌隨宜具。漁歌盡意長。兒曹娛老子。團坐說豐穰。

出門與鄰人笑談久之戲作

少時已歎少驩娛。衰病經旬一笑無。今日出門逢父老。欣然隨衆強盧胡。

又

暮靄昏昏半掩扉。偶逢鄰叟荷鋤歸。且令閑說鄉村事。莫問渠言是與非。

又

菽水欣欣每盡歡。仁賢不必襲衣冠。出門邂逅移時語。未害龜堂取友端。

又

屋角時聞黃犢鳴。相逢但可說春耕。一言誤及城中事。議罰應須便酌觥。

魚池將涸車水注之

清波溜溜入新渠。鄰曲來觀樂有餘。試手便同三日雨。滿陂已活十千魚。喜如雷動風行際。快若天開地闢初。萬物但令俱有託。吾曹安取愛吾廬。

一齒動搖已久。然餘皆堅甚。戲作

病齒元知不更全。漂浮杙槿已三年。一朝正使終辭去。大嚼猶能盡彘肩。

晚至新塘

青鞵隨意出柴荆。聊向南塘曳杖行。歸鳥已從煙際沒。斷虹猶在柳梢明。城頭層塔凌空立。浦口孤舟並岸橫。向道有詩渾不信。爲君擁鼻作吳聲。

夜泛湖中

水鴨鷓鴣拍拍飛。菰蒲深處弄煙霏。喚回二十年前夢。半醉姑溪棹月歸。

立秋後作

宋玉悲秋千載後。詩人例有早秋詩。老夫自笑心如石。三日秋風漫不知。

覽鏡

此頭那可著貂蟬。瘦似騎驢孟浩然。一事比渠差省力。閉門無句與人傳。

早秋南堂夜興

水注橫塘藻荇香。候蟲唧唧滿空廊。風前落葉紛可掃。天際疎星森有芒。夜漏漸長愁少睡。秋衣未製怯新涼。明朝卻有欣然處。寫得黃庭又幾行。

菱歌

海內知心人漸少。眼前敗意事常多。問君底事渾忘卻。月下菱舟一曲歌。

聞角

河白如銀天淡青。角聲中有玉關情。早知送老桑麻野。悔失安西萬里行。

湖隄

新月纖纖淡欲無。時聞魚躍隔菰蒲。籃輿小放湖隄上。信有人間白玉壺。

秋旦

將旦溪風急。新秋天宇寬。涼生豎裁褐。爽入縮縫冠。拊翼雞頻唱。爭枝雀正譴。一簞吾已足。芋豆亦加餐。

龜堂晨起

培火螭爐起寶熏。滴泉鑿研聚玄雲。屏圍燕几成山字。簾展涼軒作水紋。絕口不談浮世事。洗心聊策退居勳。老年猶健非無自。一卷丹經受鄭君。

柳橋秋夕

柳疎橋盡見。水落路全通。衣杵家家月。漁舟浦浦風。眼明無俗物。步蹇有枯筇。野逸誰能那。悠然西復東。

道室雜題

早訪丹砂上衲屨。晚提河派泝崑崙。陰符後出君無忽。三百奇文要細論。

又

聞說湖中有釣舟。煙波出沒雜輕鷗。一聲清嘯去已遠。我欲從之何處求。

又

山中有草名長生。丹砂可死金可成。服之刀圭齒髮換。要看東封告太平。

又

勘書窗下松明火。采藥溪頭樹葉衣。只在人間人不識。秋風又見雁南飛。

陸放翁集

劍南詩稿

卷第四十七

儒生

儒生安義命。所遇委之天。用可重九鼎。窮寧值一錢。雖云髮種種。未害腹便便。高臥茅簷下。羹藜法不傳。

秋夜

老病睡眠少。如斯秋夜何。長庚未配月。織女已斜河。莎徑蟲吟苦。柴門葉落多。誰知窮甯戚。不作飯牛歌。

寺閣

三盃初得牧牛童。兩扇新成釣舸篷。偶訪野僧過射的。卻衝微雨上樵風。登山未減青鞵興。到手俄驚綠酒空。自笑此身猶健在。試憑重閣送飛鴻。

秋暑夜興

寂寂空廊絡緯鳴。消搖岸幘近南榮。閑眠篔作波紋冷。新浴衣如蟬翼輕。微雨已收雲盡散。衆星俱隱月徐行。呼童持燭開藤紙。一首清詩取次成。

漁父

千錢買一舟。百錢買兩漿。朝看潮水落。暮看潮水長。持魚換鹽酪。縣郭時下上。亦或得濁醪。不復計瓶盎。

浩歌忘遠近。醉夢墮莽蒼。玄真不可逢。悠然寄遐想。

省事

車馬聲都絕。比鄰迹亦疎。淺傾家釀酒。細讀手鈔書。薄飯惟羹芋。閑遊不借驢。有時還自笑。省事更誰如。

新涼書懷

烏帽圍寬帶眼移。閉目慣忍日長飢。文章雖媿聲名誤。志節寧隨血氣衰。天地無私非困我。聖賢可學有餘師。短檠正歎經時別。涼入郊墟喜可知。

又

藥物扶持病少蘇。殘年不恨老菰蘆。潦收溪澗魚爭售。歲樂村場酒易沽。無日檀林無墜葉。楹木自夏至秋。日有落葉不可勝掃。有時燕戶有新雛。今年燕屢生雛。七月望猶未止。秋風剩起扁舟興。安得州家復鏡湖。

又

鄰曲今年又有年。垂髫戴白各欣然。先輸官庾無逋賦。共賽神祠有社錢。退傳寄聲情續密。連得周丞相書。細字滿幅。晦翁入夢語蟬聯。昨夕夢朱元晦甚款。燈前細與兒曹說。蠹簡猶堪數世傳。

又

山川遺迹晉唐餘。水竹相望許洛居。朱希貞嘗言山陰富水竹。有洛陽許下氣象。一齒屢搖猶決肉。雙眸雖澀尙耽書。郊原夜夜驅耕犢。村店時時秣蹇驢。客問若爲娛老境。吾兒未與短檠疎。

七月十七晚行湖塘雷雨大作

電火雷車下九關。我行暮出郊原間。鬚髻暗樹類奇鬼。突兀黑雲如壞山。江湖默應鰻軸溢。鐵鑊自脫梅梁還。今夕虛簷瀉懸瀑。預知高枕聽淙潺。

七月十八夜枕上作

電掣光如晝。雷轟意未平。亂雲俄卷盡。孤月卻徐行。露草蛩相語。風枝鵲自驚。一涼吾事足。美睡到窗明。

梅市

梅市柯山小繫船。開篷驚起醉中眠。橋橫風柳荒寒外。月墮煙鍾縹緲邊。客思況經孤驛路。詩情又入早秋天。如今老病知何恨。判斷江山六十年。

秋思

利欲驅人萬火牛。江湖浪迹一沙鷗。日長似歲閑方覺。事大如山醉亦休。衣杵相望深巷月。井桐搖落故園秋。欲舒老眼無高處。安得元龍百尺樓。

小舟湖中夜歸追和孟浩然夜歸鹿門歌

山光漸淡川氣昏。急雨亂打荷葉喧。小舟橫掠湖邊村。人家收網半閉門。吾廬未見見堤樹。舟人指點孤燈處。蒲叢姑惡最可哀。衝雨飛鳴背人去。

酒盡

飲酒但飲濕。吾聞之老坡。渠非惜酒錢。無如久窮何。我窮乃過之。空罍倒餘濕。日來彌可笑。濕亦不可得。

平生忍飢多，得飯已有餘。父子茅簷下，清坐談詩書。

燒香

寶熏清夜起，氤氳寂寂中。庭伴月痕小，斲海沉非弄水。旋開山麝取當門，蜜房割處春方半。花露收時日未暝，安得故人同晤語。一燈相對看雲屯。

自述

寄懷魚鳥臥煙汀，結友松筠醉草亭。拜賜龜章紆舊紫，子蒙恩錫服，篋中有守郡時故袍，用以拜命。養成鵝鬢掃除青，遺經在櫝傳家學，大字書牆作座銘。浪迹江湖遂終老，此身何啻一浮萍。

又

意望天公本自廉，甘餐美睡偶容兼。一生憂患如山重，此日安閑抵蜜甜。拙宦雖無齊虜舌，早歸亦免楚人鉗。但餘一味疏慵在，儲藥千斤未易砭。

風雨

風搖北斗柄欲折，雨溢天河浪正生。一盞昏燈北窗下，腐儒未輟讀書聲。

白露前一日已如深秋有感

匹馬曾防玉塞秋，豈知八十老漁舟。非無丈二爻堪請，只恐傍人笑白頭。

又

護塞寧須右北平，拂雲祠是受降城。誰知此志成虛語，白首燈前聽雁聲。

東村晚歸

蜀道還吳鬢已絲。歷年二紀固應衰。寧知秋思沉綿日。又見秋風搖落時。錦雉白魚供野餉。青林紅樹入新詩。東村寂寂風煙晚。酒挂驢肩又一奇。

秋望

快哉一雨洗浮塵。卻喜郊原霽色勻。野火已亡秦相冢。江濤猶託伍胥神。登臨頓覺清秋早。流落空悲白髮新。東望思陵鬱葱裏。老民猶及見時巡。游尙能記高皇建炎巡幸。

郭西

鵲下川原黑。船行浦溆空。橋燈搖水影。樓角散天風。野眺飛埃外。漁歌冷翠中。不須嘲病翼。要是脫樊籠。

舍北

支徑秋原上。衡門夕照中。野煙山半失。溪漲浦橫通。鬢禿難藏老。衣穿可諱窮。浩歌終自得。心事寄冥鴻。

夜坐示子聿

久客誠當去。無心偶小留。掃空閑夢想。閱盡舊朋儔。學術非時好。文章幸自由。蘇黃門贈姪孫元老詩有云。從此文章始自由。不嫌秋夜永。問事有長頭。

柳橋晚眺

小浦聞魚躍。橫林待鶴歸。閑雲不成雨。故傍碧山飛。

秋興

秋風吹我夜，植杖溪橋側。木葉雖未凋，慘澹無顏色。

又

功名不垂世，富貴但堪傷。底事杜陵老，時時矜省郎。

又

秋暑勢已窮，風雨縱橫至。白鷺立清灘，與我俱得意。

又

胸中萬卷書，一字用不著。歸休始太息，竟是爲農樂。

又

酌酒桑陰下，邪風入醉歌。何須繩檢外，名教樂還多。

嘉泰辛酉八月四日雨後殊淒冷新雁已至夜復風雨不止是歲八月一日白露

殘暑方炎忽痛摧，無情風雨亦奇哉。但嗟不爲貧人計，未動秋砧雁已來。

又

仲秋四日雁橫天，閉戶垂帷意已便。方歎今年時候早，夜深風雨更淒然。

近村民舍小飲

秋風吹細雨，蕭然濯炎熾。老夫疾頓平，甘食仍熟寐。春物財幾何，搖落已復至。昔人喻死生，謂若屈伸臂。愚公顧不靈，白首沒榮利。嗟予幸學道，了此直差易。三拜散人號，退志獲早遂。絃歌萬二千，盡力不能崇。

瘦驢骨可數。渺渺入空翠。霜蟹初把螯。絲蓴小添豉。平生笑巨君。老留乾肉糲。異味幸滿前。萬事付一醉。
閑適

飲酒不至狂。對客不至疲。讀書以自娛。不強所不知。一窗袖手坐。往往晝漏移。初非能養生。簡事頗似之。
四時俱可喜。最好新秋時。柴門傍野水。鄰叟閑相期。

又

陸子居山陰。杜門輒經年。有時思出遊。兩屨凌風煙。長鑱斷靈苗。大瓢挹飛泉。眼長不及寸。能著萬里天。
不飲顏常丹。不食腹果然。金丹亦棄置。我是地行仙。

夜歸

今年寒到江鄉早。未及中秋見雁飛。八十老翁頑似鐵。三更風雨采菱歸。

又

茭浦菱陂夜半時。小舟更著疾風吹。青燐一炬楓林外。鬼火漁燈兩不知。

自詠

宦遊疇昔徧天涯。萬里東歸歲月賒。古道泥塗居士屨。荒畦煙雨故侯瓜。園公谿父逢皆友。野寺山郵到
卽家。病思漸輕重九近。又將烏帽插黃花。

老歎

一齒危將墮。雙瞳久已昏。謀生賴蔬圃。養拙閉柴門。多病從來慣。虛名不足論。自憐餘一念。猶欲濟元元。

秋社

雨餘殘日照庭槐。社鼓寥寥賽廟回。又見神盤分肉至。不堪沙雁帶寒來。書因忌作閑終日。酒爲治齏醉一杯。記取鏡湖無限景。蘋花零落蓼花開。

晨起

雞已參差唱。窗纔矓矓明。高林風不止。叢竹露如傾。夢爲多難記。詩緣嬾少成。晨興了無事。散髮遶堦行。

中夜睡覺兩日每有光如初日歷歷照物晁文元公自謂養生之驗予則偶然耳感而有作

人情所願欲。莫若貴與富。是皆有命焉。非力可成就。予昔未有聞。無與發其覆。趨起強干祿。時命適大謬。方行蚺當道。未至葵已噉。適燕乃南轅。之楚顧北首。風波起平地。兩耳厭嘲詬。隴蜀萬里餘。數遍道傍堠。六十歸爲郎。數月草章奏。夫豈或使之。擊去惟恐後。嗟彼亦何心。喜慍出邂逅。還山惟自訟。衡茅屏幽陋。乘除得少健。上下歷巖岫。得飽豈復擇。百口同飯糗。寒龜久猶息。野鶴老益瘦。又如已放馬。寧當夢華廐。造物念途窮。畀以樗櫟壽。雖無熊鳥術。坐空陰陽寇。兩皆若有光。夜視如正晝。物生稟定數。此語聞自舊。置冰鳥覆翼。棄野於菟穀。偶然當後死。鬼錄自遺漏。山坡粟屢收。池水麻可漚。隣父相歡娛。席地醉醇酎。錢道人不飲酒。食肉囊中不畜一錢。所須飯及草屨二物。皆臨時乞錢買之。非此雖強與不取也。萬里飄如不繫船。空囊短褐過年年。食時無飯芒鞋破。只向街頭旋乞錢。

又

誤辱君王賜鏡湖。身隨鷗鷺寄菰蒲。行年八十猶強健。欲伴先生去得無。

枕上

呼兒初夜上門關。怕冷貪眠自笑孱。月色橫分窗一半。秋聲正在樹中間。暮年不復樽前樂。浮世無如枕上閑。鍊句未安姑棄置。明朝追記尙班班。

山園書觸目

山近雲生易。人稀鳥下頻。瘦篁穿石竅。古蔓絡松身。熟摘巖邊果。乾收澗底薪。經過不相識。喚作避秦人。苦貧戲作

五窮作祟不容支。蟬腹龜腸旋過時。客散難求門外轍。衣穿徒有鬢邊絲。兒能解事甘藜藿。婢苦無薪睨屢屣。箕踞浩歌君會否。書癡終覺勝錢癡。

秋曉書感

天公息我半生勞。寄傲江湖亦足豪。淡盡月痕知夜艾。飄殘桐葉喜秋高。讀書時亦挂牛角。對酒正須持蟹螯。縱有故人終自絕。安能從汝望綈袍。

秋夜

抱病齒髮非。閱世城市換。朋儕家纍纍。在者亦雲散。窮居嬾出戶。俯仰秋已半。疎鐘到倦枕。微火耿幽幔。平生疑著處。忽若河冰泮。百年寓逆旅。萬事真旣灌。紛紛彼方廩。袖手不須喚。蘿月忽滿窗。悠然付長歎。

村舍

篠屋楓林下。山中人以篠覆舍。厚密過于茅。柴門茨浦旁。先鳴雞。臚膊。徐上日蒼涼。服藥貧寧輟。觀書老

有常仍須教童穉。世世力耕桑。

又

生理嗟彌薄。吾居久未完。蝶飛窗紙碎。龜坼壁泥乾。小雨牛欄溼。微霜碓舍寒。晚禾蟲獨少。鄰里共相寬。
今年晚禾苦蟲蛀。予鄉獨免。

天涼時往來湖山間有作

萬壑千巖自古傳。青鞋布襪更誰先。泛舟菰脆鱸肥地。把酒橙黃橘綠天。秦篆舊碑荒草棘。禹書遺穴慘風煙。誰知陸子登臨日。已近浮生八十年。

雨夜歎

秋雨何曾住一滴。老夫危坐欲三更。開元貞觀事誰問。溫洛滎河塵未清。豐年猶有餓死慮。破屋自愛讀書聲。刺經作制豈不美。無奈人間痛哭生。

病足晝臥夢中譫語乃誦尙書也既覺口占絕句

唐虞已遠三千歲。每誦遺書涕泗濟。濟濟九官十二牧。我獨不得居其間。

又

人能不食十二日。趙岐柳開皆嘗不食十二日不死。惟書安可一日無。唐虞雖遠典謨在。病臥蓬窗時囁嚅。

新買啼雞

峨峨赤幘聲甚雄。意氣不與其曹同。我求長鳴久未獲。一見便覺千羣空。主人燒神議已決。知我此意遽見從。秋衣初縫惜不得。急典三百新青銅。憐渠亦復解人意。來宿庭樹不待籠。狐狸熟睨那敢犯。蕭蕭清露和微風。五更引吭震戶牖。橫挺無復須元戎。明星已高啼未已。雲際騰上朝陽紅。老夫抱病氣已索。賴汝豪壯生胸中。明朝春黍得碎粒。第一當册司晨功。

幽棲

幽棲少人客。積病得衰殘。身納分司祿。兒須遠次官。新寒換衣典。閑日借書觀。更歎秋來瘦。晨興覺帽寬。

又

自卜幽棲地。頻驚歲月移。鄉鄰崇禮讓。子弟習書詩。喔喔雞鳴樹。狺狺犬吠籬。謀生已過足。富貴亦何爲。

秋日雜詠

都門初出若登仙。弄水穿雲喜欲顛。只恐光陰已無幾。不知又過十三年。

又

五百年前賀季真。再來依舊作閑人。一生看盡佳風月。不負湖山不負身。

又

菰蒲風起暮蕭蕭。煙斂林疎見斷橋。白蟹蟹魚初上市。輕舟無數去乘潮。

又

葉底珍禽不受呼。弄風小蝶點殘蕪。舍南舍北秋光好。到處皆成一畫圖。

又

紅萸如丹照眼明。臥開石竹亂縱橫。騷人見處終然別。只說清秋采落英。

又

桐葉吹殘柳亦稀。溪頭倚杖立斜暉。誰知老子無窮喜。待得吾兒小艇歸。

又

久雨初晴喜欲迷。青鞋踏徧舍東西。忽然來到柳橋下。露溼蓼花紅一溪。

又

十里秋風畫角哀。夕陽光景亦佳哉。正疑白鷺歸何晚。一片雪從天際來。

望永阜陵

龍飛回首尚如新。忽閱人間四十春。聖主已嚴天上駕。孤臣歸作道傍民。傾河尚恨難供淚。衛社何由得致身。獨立秋風吹白髮。感恩肝膽漫輪囷。

排悶

悠然不覺歲時遷。楚水楓林繫釣船。貧悴只如行卷日。衰遲忽過挂冠年。閑遊野寺騎驢去。倦擁殘書聽雨眠。賴有一籌差自慰。小兒筆墨日翩翩。

秋日晨起

翻樹鴉知旦。橫空雁戒寒。但欣蘇肺渴。未暇議衣單。粥鼎湯初沸。香篝火半殘。讀書心漸嬾。顧影一長歎。

出遊暮歸戲作

終年兀兀復騰騰。眼看朱門幾廢興。造物偶容窮不死。衆人共養老無能。逢山自有閑遊侶。入寺寧無淡話僧。莫道歸來卻岑寂。小兒同守短檠燈。

自詒

荒圃風煙入荷鉏。孤村巷陌看騎驢。少年曾縱千場醉。老境惟存一束書。作意買山雖已矣。忍慚乞米獨何歎。所欣肺病秋來減。白髮蕭蕭可自梳。

予出蜀日嘗遣僧則華乞籤於射洪陸使君祠使君以老杜詩爲籤予得遣興詩五首中第二首其言教戒甚至退休暇日因用韻賦五首

我幼入家塾。結髮知苦心。稍長謬聞道。篤守至於今。淡然朱絲絃。三歎有遺音。詎敢負所學。枉尺求直尋。彼哉孔光輩。千載污儒林。

又

童子丹元家。湛然居靈府。世人不少悟。役役徒自苦。江湖豈不廣。魚乃投數罟。是身如璞玉。要經大火聚。萬卷讀丹經。孰能精去取。

又

少壯不自料。慷慨志四方。謝病還故山。始覺白日長。命薄類蟬翼。功名安可望。狐狸不足問。力不當豺狼。惟有臥釣船。仰看白鷺行。

又
孤雲起江郊。萬木酣天風。水鳥何所恨。終夜號菰叢。我興視中庭。北斗挂寒空。誰言秋夜長。明星已生東。丈夫老憂國。百慮蟠胸中。

又

我昔遊青城。萬仞窮躋攀。巢居上官翁。許我分半山。且言牡丹平。可卜茅三間。報國未能忘。承詔遂東還。踴躍意何成。看雲徒汗顏。

悲歌行

有口但可讀離騷。有手但可持蟹螯。人生墮地各有命。窮達禍福隨所遭。嗟予一世蹈謗數。洵如八月秋江濤。尊拳纔奮肋已碎。曹射箭盡弓未弰。形骸骨悴吹可倒。摧拉未足稱雄豪。一身百憂偶得活。殘年幸許歸蓬蒿。時時照水輒自笑。霜顛雪領不可薙。脫身仕路棄衫笏。如病癬疥逢爬擗。見事苦遲已莫悔。監戒尙可貽兒曹。勉騎款段乘下澤。州縣豈必眞徒勞。

秋夜讀書

門前客三千。帳下兵十萬。人生可意事。隨手風雨散。不如一編書。相伴過昏旦。豈惟洗貧病。亦足捍患難。老夫垂八十。巖電尙爛爛。孤燈對細字。堅坐常夜半。吾兒幸能繼。書亦未殘斷。安知不遭時。清廟薦玉瓊。不然老空山。亦足化里閭。我死斯言存。觀者有追歎。

對食戲詠

一飽欣逢歲小穰。時憑野餉誑枯腸。橙黃出白金齋美。菰脆供盤玉片香。客送輪囷霜後蟹。僧分磊落社前薑。秋來幸是身強健。聊爲佳時舉一觴。

懷昔

偶住人間日月長。細思方覺少年狂。衆中論事歸多悔。醉後題詩醒已忘。鼉作鯨吞吁莫測。谷壘山塹浩難量。老來境界全非昨。臥看縈簾一縷香。

偶得雙鯽

今朝溪女留鮮鯽。灑掃茅簷旋置樽。養老不須煩祝鯁。從來楚俗慣魚膾。

又

酒興森然不可回。重陽未到菊先開。一雙鱣刺明吾眼。催喚廚人斫鱸來。

秋懷十首以竹藥閉深院琴樽開小軒爲韻

我非王子猷。賦性亦愛竹。舍外地十畝。不蕪凡草木。長吟雜清嘯。觸目皆此族。更招竹林人。枕藉糟與麴。

又

短裘入重雲。長鑷求靈藥。人篋四體具。狗杞羣吠惡。采實去條枚。摘花棄跗萼。長嘯忽躡空。天台赴幽約。

又

惟王居法宮。玉帛來四裔。一朝啓戎心。邊城或晝閉。養生能體此。皆可閱千歲。利欲喜乘人。日夜勤自勵。

又

飲酒可不病。自酌隨淺深。處世可無患。惟勿欺此心。此心實通天。一念天所臨。子能守吾言。可度豺虎林。

又

吾道久寂寞。不絕如一線。至人隱市廛。我輩何由見。安得世外士。與之共談醺。僧話亦或佳。聊可過竹院。

又

小人方盛時。瓦礫視黃金。及其大勢去。或不遺一簣。郿塢今尚存。遺戒豈不深。所以栗里翁。爲蓄一素琴。

又

世事本何常。賀弔更在門。棄爲溝中斷。亦何羨轎樽。禍福要其終。愚智始可言。君看驪山墓。何若楊王孫。

又

今日天微寒。處處菊花開。永懷杜拾遺。抱病起登臺。古路逢僧過。溼雲聞雁來。我亦秋風客。詩成有餘哀。

又

天鏡環千峯。蒼翠立雲表。漁舟破浪來。泛泛一葉小。雲門若耶間。迨此素秋杪。登覽不可遲。去若孤鴻矯。

又

丈夫素所學。致主齊義軒。恨無同志人。徒欲起九原。痛哭驚世俗。著書成空言。歲月去袞袞。吾其死空村。

示客

枳縛藩籬荆作門。蕭條何以致諸君。歸休正得求吾志。老病猶能誦所聞。紫蟹迎霜徑盈尺。白魚脫水重兼斤。一杯澗澗無辭醉。秋稼登場合策勳。

秋晚村舍雜詠

村巷翳桑麻。蕭然野老家。園丁種冬菜。鄰女賣秋茶。啄木矜奇服。牽牛蔓碧花。一樽雖草草。突語且喧嘩。

又

秋晚年中熟。湖鄉未寂寥。步頭橫畫舫。柳外出朱橋。潮壯知多蟹。霜遲不損麴。家家新釀美。鄰里遞相邀。

臥病累日羸甚。偶復小健戲作。

病忽迫旬日。衰如增十年。難求秦緩藥。空負宋清錢。微火秋先跨。閑房晝亦眠。偶賒書鬼錄。遇酒又陶然。

又

伏枕瀕九死。下牀如再生。幸回蒿里駕。猶作越吟聲。拂几嗟塵積。開書覺眼明。淖糜方自養。未敢憶南烹。

又

行年當大耋。臥病涉高秋。丸藥作奇驗。俶裝仍小留。輕漚元泛泛。破屋已飕飕。尚有江湖興。沙頭問釣舟。

此
页
空
白

陸放翁集

劍南詩稿

卷第四十八

縱筆

莫笑畸翁迫耄期。從來不許俗人知。繫船慣聽巴東雨。畫策曾從渭北師。袖劍客同樓上醉。爛柯人看洞中棋。如今更欲滄溟去。鯨浪浮天信所之。

又

常笑相如賦上林。肯爲子政鑄黃金。心光自發誰能障。踵息無聲不厭深。搖齒復牢堪決肉。枯顛再茁已勝簪。老松澗底雖終棄。霜雪元知不解侵。

又

拖得烏藤到處行。看山看水眼猶明。但期少健遊潼華。豈必長生似老彭。一緇青鞋吾事了。半甌綠酒萬緣輕。安知不作希夷叟。生長兵間老太平。予生于宣和末。遇虜禍。間關東歸。又避地數年。

又

未說無功爵位叨。昔人所畏在功高。印如斗大寧常保。劍挂頤長祇自勞。酒社極知身可隱。獵場猶得氣差豪。世間見透渾無事。狐貉安能詫縵袍。

村興

折花持博酒種菜賣供家。請藥人何壅。爭棋客正譁。漁翁足蹠踈。牧豎手丫叉。短景匆匆晚。橫林又宿鷗。

賽神

歲熟鄉鄰樂。辰良祭賽多。荒園拋鬼飯。高杙置神鵝。村人謂祭神之牲曰神猪。神鵝。人散叢祠寂。巫歸醉臉酡。飢鴉更堪笑。鳴噪下庭柯。

小立

紅樹園廬晚。碧花籬落秋。荒陂船護鴨。斷岸笛呼牛。酒賤村村醉。山寒寺寺幽。聊須岸鳥幘。小立埭西頭。

窮老

窮老寧須歎。吾生得已多。風埃棄朝幘。煙雨弄漁蓑。富屋烏爰止。閑門爵可羅。人生只此是。得酒且高歌。

晚步舍東

籬種花開柿葉丹。土溝東去過牛欄。草煙漠漠天將暮。布褐蕭蕭客正寒。

述野人語

白米乾薪好。井泉甘饗美。睡若登仙。從來不慣嘗鹽酪。席下何須有一錢。

又

重重大布敵風霜。籬外桑陰五月涼。軟飯一盂千萬足。那知世有郭汾陽。

戲答野人

日飲雲根一脈泉。知君骨相自應仙。曲肱閑臥茅簷下。買斷南山不用錢。

又

木葉凋疎天欲霜。老懷多感易淒涼。得君數語開人意。徑就湖橋醉夕陽。湖橋有村店酒甚美。

建安陳希周官海南爲予致兩拄杖其一促節竹其一桃榔也

雨漬嵐侵蘚暈重。石罅樵矢正相同。取從萬里鯨波路。來伴三山鶴髮翁。雪一作雲。上有時留醉草。花前隨處打殘紅。化龍徑去吾何憾。且與人間作歲豐。

排悶

棄官謂道遙。勞苦殊未旣。荒疇須墾闢。破屋欠塗墍。疾深藥難求。食盡穀暴貴。安能作經營。但覺睡有味。秋高霜露逼。更苦薪炭費。雖云未遽死。飢凍亦可畏。頗思從李廣。小獵聊吐氣。復恐灞亭歸。邂逅逢醉尉。

九月十二日折菊

黃菊芬芳絕世奇。重陽錯把配萸枝。開遲愈見凌霜操。堪笑兒童道過時。

表姪江垆種竹名筠坡來求詩

奉常遺緒冷如秋。閉戶知君頗好修。千里可嗟妨晤語。兩書猶喜免沉浮。但令有竹能醫俗。何患無天可寄愁。一事卻須常自勉。勿容凡子得同遊。

微雨

晡後氣殊濁。黃昏月尙明。忽吹微雨過。便覺小寒生。樹杪雀初定。草根蟲已鳴。呼童取半臂。吾欲傍堦行。

秋晚寓歎

荷葉枯已盡。菊花殘更香。帶醒嘗野橘。和夢聽啼螿。鬢畔流年速。燈前舊話長。寒龜且未死。不必恨摻牀。

又

野處仍多病。經年無與遊。僧庸幾市井。醫傲過公侯。不睡愁逢夜。無衣怯到秋。一端聊自慰。問事有長頭。

又

幽夢雞呼覺。孤愁雨滴成。天高那可問。年往若爲情。孱虜猶遺育。神州未削平。登高西北望。衰涕對誰傾。

又

老歎交朋盡。閑知日月長。著書終覆瓿。得句漫投囊。霜樹昏鴉黑。風簾小蝶黃。村醪如水薄。也復答年光。

又

十里丹楓岸。三家小麥村。山多妨極目。秋晚易消魂。火舉船過埭。人行犬吠門。窮愁已如許。那更雨昏昏。

又

行年垂大耋。久矣少朋儔。舊事同誰說。新詩或自酬。廢書眠過日。泥酒醉經秋。遲速皆當死。時來莫預愁。

秋晚湖上

已過西成賽廟期。家家下麥不容遲。夕陽遍野人歸後。秋水生灘鷺集時。靈藥不治懷抱惡。好詩空益鬢

毛衰。從來未識蘇司業。愁絕西風滿酒旗。

縱遊歸泊湖橋有作

西蜀東吳到處遊。千巖萬壑獨吾州。短篷載月娥江夜。小蹇尋詩禹寺秋。村酒可除常痛飲。野人有興即相求。何由喚得王摩詰。爲畫湖橋一片愁。

九月十八日至山園是日頗有春意

烏藤真好友。伴我出荆扉。落葉紛如積。鳴禽暖不歸。露濃松鬣長。土潤尤苗肥。未盡幽尋興。還家趁夕暉。

明日又來天微陰再賦

烏臼赤於楓。園林九月中。天寒山慘淡。雲薄日曛曛。旋摘分猿果。寬編養鶴籠。身閑足幽事。歸臥莫匆匆。

又

河岸風檣遠。村陂牧笛長。短籬圍鹿眼。幽徑繚羊腸。照水鬚眉見。搓橙指爪香。衣裘又關念。礎杵滿斜陽。

雨後至近村

夜雨曉方止。朝雲猶作陰。山餘一寸碧。溪長半篙深。臥泛白鷗渚。行穿黃葉林。老農能共語。真率會人心。

又

年耄身猶健。秋高疾已平。鄰翁思問訊。蔬圃要巡行。竹杖輕無迹。芒鞋捷有聲。相逢無別語。努力事冬耕。

雨復作自近村歸

夜聽蕭蕭未漲溪。朝行漉漉已成泥。可憐鳩取招麾速。誰似雲知出處齊。野菊枝長半狼藉。江楓葉落正淒迷。行人也識龜堂老。小榼村醪手自攜。

雨寒戲作

掃園收榭葉，培地整塲爐。幸有藜烹粥，何慚紙作襦。

衡門晚眺

幽居端似玉川生，茅屋支撐不更營。青旆荒寒增酒興，錦囊零落負詩情。殘蕪色襯斜陽遠，落葉飛如野鳥輕。徂歲崢嶸忽如許，雁來又過會稽城。

不寐

麗譙聽盡短長更，幽夢無端故不成。寒雨似從心上滴，孤燈偏向枕邊明。讀書有味身忘老，報國無期涕每傾。敢爲衰殘使虛死，誓先鄰曲事春耕。

示子虛

好學承家夙所奇，蠹編殘簡共娛嬉。一婚倘畢吾無累，吾今年爲一子自蜀歸者聘婦，無復婚嫁之責。二。釜雖微汝有期。子虛明秋當赴句金。聿弟元知是難弟，德兒稍長豈常兒。要令舟過三山者，弦誦常聞夜艾時。

弊廬

弊廬雖陋甚，鄙性頗所宜。欹傾十許間，草覆實半之。碓聲隔柴門，積糶縛木爲彘牢。附垣作雞埒，黃犢放林莽。蒼鵝戲陂池，傭耕食於我。客主同爨炊，瓦盎設大杓。蘆菹羹園葵，一飽荷鋤出。作勞非所辭，上以奉租賦。下以及我私，有錢卽沽酒，阡陌恣遊嬉。亦有扶持者，婢跣奴髻椎。欲畫恨無人，後世考此詩。予未冠卽交諸名勝，今無復在者，感歎有作。

早歲鄉閭接勝流。老來零落歎山丘。欲尋共語人難得。卻是封侯印易求。數酌不能成兀兀。一枰且復寄悠悠。世間只有身差重。惆悵今年白盡頭。

夜雨

吾詩滿篋笥。最多夜雨篇。四時雨皆佳。莫若初寒天。紙帳白於氈。紙被輒於綿。枕傍小銅匱。海沉起微煙。是時聞夜雨。如絲竹管弦。恨我未免俗。吟諷勤雕鐫。南朝空塔語。妙出建安前。意謂奮造化。百世莫比肩。安知梧桐句。乃復與並傳。夜雨何時無。奇語付後賢。

題嚴州王秀才山水枕屏

我行天下路幾何。三巴小益山最多。翠崖青嶂高嵯峨。紅棧如帶縈巖阿。下有駭浪千盤渦。一跌性命委蛟鼉。日馳三百一鳥騾。雪壓披氈泥滿鞵。驛亭沃酒醉臉醅。長笛腰鼓雜巴歌。大散關上方橫戈。豈料世變如翻波。東歸輕舟下江沱。回首歲月悲蹉跎。壯君落筆寫岷嶓。意匠自到非身過。偉哉千仞天相摩。谷裏人家藏綠蘿。使我恍然越關河。熟視粉墨頻摩挲。

小飲示座中

鏡裏蕭蕭兩鬢衰。閑人正與老相宜。誰知翦燭焚香夜。恰是搓橙破橘時。莫道閉門無逸氣。尙能爲客誦新詩。君看江海寬多少。是處皆堪理釣絲。

搖落吟

素秋欲盡風雨惡。千林如掃俱搖落。年運而往秋復冬。念念元知已非昨。癡人願欲吝此生。放翁憫汝笑。

絕纓髮毛爪齒俱外物。天地大化終無情。我貧無以遺兒子。惟有一言持付爾。仕宦要能當百挫。爲農飢死無遊惰。

插花

有花君不插。有酒君不持。時過花枝空。人老酒戶衰。今年病止酒。虛負菊花時。早梅行可探。家醞綠滿卮。君不强一醉。歲月復推移。新詩亦當賦。勿計字傾欵。

雨過行視舍北菜圃因望北村久之

蔬畦躡屐愜幽情。檢校園丁日有程。得雨尙慳須灌溉。我來時聽桔槔聲。

又

吳牛齧草臥斜陽。烏臼青紅未飽霜。急趁路乾來寓目。十分閑事卻成忙。

居三山時方四十餘今三十六年久已謝事而連歲小稔喜甚有作

自問湖邊舍。衰殘俛仰中。謀身悲日拙。造物假年豐。稅足催科靜。禾登債負空。社醅邀里巷。膳肉飫兒童。衣及霜晨贖。爐先雪夜紅。陂塘趨版築。垣屋訖宮功。盜息時雍象。人淳太古風。退夫無一事。鼓缶伴鄰翁。

幽居

百事徒勞無一成。幽居偶得稱幽情。傍籬叢積寒猶綠。遶舍流泉夜有聲。飢坐炮燔多巨粟。醉歸懷袖有新橙。愛閑自是從來癖。敢竊區區納祿名。予自僱曹罷歸十年不出戶。乃請挂冠。

曉晴肩輿至湖上

多稼如雲穫併空。牛欄樵擔畫圖中。梧桐已逐晨霜盡。烏臼猶爭夕照紅。脫網噉喙奔遠浦。避鷹撲握保深叢。旗亭人語燈初上一醉。何妨野老同。

戲作野興

省事貧猶富。寬懷客勝家。充虛一簞飯。遣睡半甌茶。有興閑垂釣。逢歡醉插花。皋橋亦可死。處處是生涯。

又

擾擾亭中客。悠悠局上棋。所遭元有命。自苦竟何爲。馮衍深尤婦。陶潛過責兒。奇文雖可貴。寢語豈非癡。

又

久已挂吾冠。江邊歲又殘。心惟無媿怍。身取不飢寒。小酌三杯足。安居一席寬。東岡有泉脈。攜杖試尋看。

又

今年病微減。耕稼樂江村。燈火耿破屋。歌呼圍老盆。常時但葵菹。盛饌有雞豚。客散茅簷寂。蹒跚自閉門。

又

出戶語鄰叟。與卿同一愚。逢人卽如舊。臨事不勝迂。髮白花猶插。囊空酒亦沽。同漁五十載。何處有榮枯。

又

有酒皆堪醉。無山不可廬。遂初成近賦。孤憤悔前書。湘寺分經帙。廬山寄藥鉏。江頭霜葉滿。詩興屬騎驢。

道室書事

榻上一琴橫。中函太古聲。丹砂燒已死。芝草種初生。道勝魔軍破。方靈疾豎平。明朝有蜀使。細字報青城。

行飯至潮桑堰東小市

飽食無營是處遊。偶然來到埭東頭。芒鞋也似雙鳧快。漁艇真如一葉浮。樵擔行歌衝暝色。酒旗遮路賣新筍。任朱二老今安在。歎息黃茅擁故丘。任朱皆居堰旁。與予同乙巳生。今死矣。

負日戲作

因來兩臂似膠黏。底怪吳人號黑甜。安得他生不識字。朝朝就日臥茅簷。世傳楊大年見老兵負日不覺曰快活。因問汝識字否。對曰不識。大年曰如此更快活也。

遊西村

昨夜雨多溪水渾。不妨喚渡到西村。出遊始覺此身健。無食更知吾道尊。藥笈可賒山店酒。筇枝時打野僧門。歸來燈火茅簷夜。且復狂歌鼓盎盆。

初冬

平生詩句領流光。絕愛初冬萬瓦霜。楓葉欲殘看愈好。梅花未動意先香。暮年自適何妨退。短景無營亦自長。況有小兒同此趣。一窗相對弄朱黃。

遣懷

寬袂新裁大布裘。低篷初買小漁舟。舊交只有青山在。壯志皆因白髮休。漫道臥龍吞貉子。安能浙米向矛頭。山園芋栗秋方熟。一飽今知本易謀。

策杖

山翁老病入腰膺，坐覺諸兒行步奔。暫出衡門須策杖，千回上樹更堪論。
汲東山下井

從來耽酒須微祿，絕祿三年酒盡疎。百尺轆轤新浚井，一杯聊慰渴相如。

園中作

誰采桃榔寄一枝，北來萬里爲扶衰。風光最愛初寒候，懷抱殊勝未老時。閑引微泉成曲澗，盡除枯蔓補疎籬。花前自笑童心在，更伴羣兒竹馬嬉。

又

病侵衰境類須藥，日漏寒雲旋作晴。幽鳥喚回殘枕夢，蠻童扶下野堂行。書生本自安窮處，豐歲何妨樂太平。新買西村兩黃犢，閑招鄰曲議春耕。

園中

霜凋樺柳枝無葉，風坼安榴子滿房。多日園林元自好，老人懷抱自多傷。

短篷

射的山前繫短篷，快如魚鳥出池籠。試臨清鏡枯顛苗，不待丹砂兩頰紅。遂妄百年真自苦，造微一日有餘功。不須更說岷峨約，已覺蓬壺在眼中。

自適

遠遊思里巷，久困念耕桑。家釀傾醇碧，園蔬摘矮黃。小槽用菘豆，麪矮黃吳中菜名。利名因醉遠，日月爲

閑長今歲雖中熟，吾徒亦小康。

堂東小室深丈袤半之戲作

小室舍東偏，滿窗朝日妍。研池生細浪，香岫起微煙。欲極圖書樂，少須冰雪天。猶勝禪榻上，僅僅占三椽。
禪僧自謂三條椽下，六尺單前。

獨處二首

蓬門終日閉，寂寂少人聲。納祿知身貴，傳家覺責輕。朝餐烹芋糝，夜坐爇松明。刻卻彈棋局，此心如砥平。
白氈敷牀穩，烏藤倚壁斜。灰深惟畫字，燈暗不成花。似客猶居里，如僧未出家。孤村夜無月，何事有啼鴉。

探梅至東村

乞得殘骸已累年，柴車破弊不堪懸。閑愁正要供詩思，小疾何妨省酒錢。忍事漸多心混混，貯書雖少腹便便。今朝偶有尋梅興，春色爭來拄杖前。

讀史

青燈耿耿夜沉沉，掩卷淒然感獨深。恤緯不遑嫠婦歎，美芹欲獻野人心。孤忠要有天知我，萬事當思後視今。君看宣王何似主，一篇庭燎未忘箴。

漁翁

船入蘆花日暮時，雙瞳炯炯鬢如絲。世間豈少礪溪叟，老向煙波人不知。

又

文叔君房兩故人。可憐俱作白頭新。桐江歸伴鄰翁醉。一笑相看意卻真。

寓言

濟劇人才易。扶顛力量難。爲謀須遠大。守節要堅完。氣與秋天杳。胸吞夢澤寬。方知至危地。自有泰山安。

又

出仕謝招麾。還家美蕨薇。深居全素志。大路息危機。世變生呼吸。人情忽細微。牀頭周易在。捨此欲安歸。

又

山海三家市。風煙五畝園。藜羹均玉食。茅屋陋朱門。耕釣此身老。乾坤吾道尊。故交淪落盡。至理與誰論。

夜四鼓睡覺起行齋間觀新作南籬

星斗闌干天宇清。起披短褐繞廊行。葉聲颯颯飛霜重。籬影疎疎落月明。沙冷斷鴻投別浦。風高殘漏下孤城。衰遲自笑猶在。一首新詩取次成。

客去追記坐間所言

征西幙罷幾經春。歎息兒音尙帶秦。每爲後生談舊事。始知老子是陳人。建隆乾德開王業。溫洛榮河厭虜塵。倘得此生重少壯。臨危敢愛不貲身。

疇昔

行路悲疇昔。驅車每戴星。數殘雙隻屐。歷盡短長亭。飛蓋交迎餞。聽歌半醉醒。至今湖海夜。猶夢隴山青。

飲牛歌

門外一溪清見底。老翁牽牛飲溪水。溪清喜不污牛腹。豈畏踐霜寒墮趾。舍東土瘦多瓦礫。父子勤勞藝黍稷。勿言牛老行苦遲。我今八十耕猶力。牛能生犢我有孫。世世相從老故園。人生得飽萬事足。捨牛相齊何足言。

牧羊歌

牧羊忌太早。太早羊輒傷。一羊病尚可。舉羣無全羊。日高露晞原草綠。羊散如雲滿川谷。小童但搯竹一枝。豈必習詩知考牧。

生日子聿作五字詩十首爲壽追懷先親泫然有作十月十七日。

我生尙及宣和末。頽曆頻驚歲月移。負米養親無復日。蓼莪廢講豈勝悲。渡江百口今誰在。抱恨終身祇自知。文字虛名何足道。樽前媿汝十章詩。

園中書觸目

氣候今年晚。濃霜始此回。殘梧未全槁。晚菊有初開。烏柏先楓赤。寒鴉後雁來。西窗夕陽暖。摘橘薦新醅。烏柏未霜而葉丹。寒鴉必得霜乃至。

養生

武丁命傅說治國如和羹。天亦命放翁用此以養生。抑過補不足。輔相其適平。千歲汝自有。不必師廣成。

齋中雜興

八十頽齡安所歸。蕭然終日掩柴扉。清心始信幽棲樂。窮理方知俗學非。山果滿筐猿食足。石泉通竅藥

苗肥衰翁莫道渾無事。掃葉歸來又落暉。

又

倒掩衡門手自關。老身著在亂書間。有詩尙作清宵祟。無事能妨白日閑。薄暮上樓聊試步。經旬止酒自醜顏。兒曹莫笑衰翁嬾。擬遍淮南大小山。

江上

禹會橋頭江渺然。隔江村店起孤煙。冷雲垂野雪方作。斷雁叫羣人未眠。萬里漂流歸故國。一生蹭蹬付蒼天。暮年尙欲師周孔。未遽長齋繡佛前。

追憶征西幕中舊事

大散關頭北望秦。自期談笑掃胡塵。收身死向農桑社。何止明明兩世人。

又

小獵南山雪未消。繡旗斜卷玉驄驕。不如意事常千萬。空想先鋒宿渭橋。

又

憶昨王師戍隴回。遺民日夜望行臺。不論夾道壺漿滿。洛筍河魴次第來。在南鄭時關中將吏有獻此二物者。

又

關輔遺民意可傷。蠟封三寸絹書黃。亦知虜法如秦酷。列聖恩深不忍忘。關中將校密報事宜皆以蠟書

至宣司

冬夜

聽聽黃葉欲辭枝。況著霜風抵死吹。投老難逢身健日。讀書偏愛夜長時。孤村月白聞衣杵。破竈煙青煮芋糜。不是用心希陋巷。爲儒自合耐寒飢。

冬日

室中恰受一蒲團。也抵三千世界寬。上策莫如扃戶坐。苦閑猶復取書看。蔬青飯輒枝梧老。窗白爐新準備寒。堪笑此翁幽獨慣。卻嫌兒女話團圓。

冬朝

風入園林徹夜鳴。曉看黃葉與堦平。篝爐火著衣初暖。爨釜薪乾粥已成。潔己工夫先盥頰。正心事業始冠纓。聖賢雖遠詩書在。殊勝鄰翁擊磬聲。釋氏謂銅鉢爲磬。

冬暮

曉角昏鐘爲底忙。豈容老子更禁當。乘除富貴惟身健。補貼光陰有夜長。臨水小軒初見月。滿庭殘葉不禁霜。巴江尺素何時到。剩著新詩寄斷腸。張梓州書久不至。

風月

鏡中日日鬢毛衰。八十還思七十時。風月不知人意緒。酒醒夢斷又催詩。

落葉

萬瓦清霜伴月明。臥聽殘漏若爲情。無端木葉蕭蕭下。更與愁人作雨聲。

邪風

少學詩三百。邪風最力行。春前耕犢健。節近祭豬鳴。簷日桑榆暖。園蔬風露清。金丹不須問。持此畢吾生。

擁爐不出輒終日自嘲

柴門木落葉成堆。十日元無一再開。書坐藏多爲飽祟。詩緣吟苦作窮媒。兒言山圃當收粟。僧約溪橋共探梅。堪笑此翁推不動。地爐無火畫寒灰。

嘲梅未開

梅蕊如紅稻。中藏無盡香。何時來鼻境。更待幾番霜。

此
页
空
白

陸放翁集

劍南詩稿

卷第四十九

自嘲

僻學論交少。貧居卜地偏。不逢方謝事。垂老旋希仙。兀兀醒如醉。昏昏晝亦眠。卻慚農與圃。一飽餒餘年。

解嘲

一壑棲遲久。多生習氣消。行藏無媿怍。夢覺兩逍遙。倩鶴傳山信。疏泉洗藥苗。晚來幽興極。乘月過溪橋。

野興

晨炊畬粟薦園蔬。默計生涯已有餘。舉世方誇稽古力。滿懷空貯活人書。悶呼赤腳行酤酒。出遣蒼頭旋僦驢。不爲歸休習疎嬾。愛閑元與市朝疎。

枕上

送盡小窗月。數殘孤戍更。清詩時自至。幽夢久方成。衣杵斷還續。燈花落復生。細衾賸得暖。紙帳不知明。

遠遊

老子平生喜遠遊。流塵不惜闢貂裘。江亭吹笛三巴夜。關路騎驢二華秋。但使澄心同止水。自知幻境等浮漚。悠然飽聽松風睡。勾漏丹砂底用求。

晚遊

垣屋參差出溝谿。曲折通。亂鴉空際黑。落日竹間紅。軋軋輿竿語。搖搖屨腳風。吾行本無定。隨意入空濛。

夜坐

流落知聞絕。歸休寵辱空。酒狂寧限老。詩思正須窮。活火生新焰。殘燈委碎紅。平生會心處。正在兀然中。

酒熟醉中作短歌

陸子壯已窮。百計不救口。蜀道如上天。十年厭奔走。還鄉困猶昨。負郭無百畝。雖云飢欲死。亦未喪所守。虛名一畫餅。陳迹幾芻狗。但思從壯士。大獵雲夢藪。長戈白如霜。爛漫載牛酒。箭穿乳虎立。車麟蒼兕吼。歸來數禽獲。毛血灑戶牖。人生貴適意。富貴安可苟。

冬夜讀書有感

落葉殘蕪又一冬。老人光景易忽忽。不論病惰耕桑業。但恨貧分學問功。馬昔騰驤離冀北。鶴今憔悴返遼東。六經未與秦灰冷。尙付餘年斷簡中。

散步湖上至野人家

湖上霜高水落時。一藤信步出尋詩。妄誇強健真堪笑。喚作清閑亦自欺。西埭又隨牛迹去。東村常望鶴巢知。漁翁留客頻辭謝。雞瘦難烹酒味漓。

對食戲詠

櫻櫛傾桑落。毫杯點雨前。冰梨頰似頰。霜栗大如拳。洗瀟烹蔬甲。攜鉏斷筍鞭。餘年只此是。切勿念腥羶。

昨非

溫飽從來與道違。書生只合臥牛衣。老狐五百生前錯。孤鶴三千歲後歸。舌自生肥勝玉食。腰常忘帶況金圍。一官彭澤曾何有。元亮還家悔昨非。

遂初

貧士善用短屏居。常自如。出尋鄰叟語。歸讀古人書。過店亦沽酒。登山時跨驢。非關傲塵世。聊欲遂吾初。小雨偶出鄰里小兒競隨吾。後不知其意何也。

雲生海濞初飛雨。日漏山椒旋作晴。箬笠芒鞋橋下路。兒童爭逐放翁行。

書喜

堪笑龜堂老更頑。天教白髮看青山。家居禹廟蘭亭路。詩在林逋魏野間。略計未嘗三日醒。細推猶得半生閑。今年況展南湖面。朝借樵風暮可還。時方有朝命復鏡湖。

書房雜書

斂版一何久。懸車已後時。狂醒醒始悔。窮獨老方知。世外乾坤大。林間日月遲。猶須采藥去。不媿鹿門期。

又

面槁髮鬢髻。衰殘百不能。夜房侵戶月。晨硯滿池冰。藥債多於酒。蔬餐薄過僧。年深拄杖折。自斫澗邊藤。

寒夕

夜扣銅壺徹旦吟。了無人會此時心。燈殘焰作孤螢小。火冷灰如積雪深。風急江天無過雁。月明庭戶有

疎穢。此身畢竟歸何許。但憶藏舟黃葦林。

讀經

半升粟飯養殘軀。晨起衣冠讀典謨。莫謂此生無用處。一身自是一唐虞。

讀史

民間斗米兩三錢。萬里耕桑罷戍邊。常使屏風寫無逸。應無烽火照甘泉。

讀劉蕡策

志士仁人。一作人人。氣薄雲。唐家惟有一劉蕡。看渠放逐蛇龍手。那肯驅蠅與拍蚊。

雨霰作雪不成大風散雲月色皎然

數間茅屋寄蓬蒿。天遣來歸息我勞。月可一庭陳素練。風酣萬木起驚濤。病侵齒髮才雖盡。酒挾江山氣

尚豪。安得人間掣鯨手。共提筆陣法莊騷。韓文公以騷配莊。古人論文所未嘗及也。

中夜苦寒

困窮全素節。羸老愈剛腸。報國永無日。飯蔬那自傷。布衾如鐵冷。冬夜抵年長。推枕歌梁甫。中庭月似霜。

示子孫

爲貧出仕退爲農。二百年來世世同。富貴苟求終近禍。汝曹切勿墜家風。

又

吾家世守農桑業。一挂朝衣卽力耕。汝但從師勤學問。不須念我叱牛聲。

早梅

東塢梅初動。香來託意深。明知在籬外。行到卻難尋。

縱筆

晨炊躬稼米。夜讀世藏書。俯仰無多慚。心知死有餘。

又

破困供飯足。陋屋著身寬。小蹇勤芻秣。時時一跨鞍。

歲暮雜感

衰髮如枯菅。殘齒如敗屐。取米鬻薄糜。便足度晨夕。欲知死遠近。不必訊龜筮。四序忽已過。如數墮雙隻。發裝陌上亭。具食水邊驛。會當一日歸。豈有終作客。

又

天風吹雪片。大者如飛鷗。豈惟平溝坑。直恐種馬牛。百錢買薪蒸。千錢贖褐裘。雖無狐貉溫。要免溝壑憂。小兒爲我言。幸可具杯甌。園蔬亦復佳。過足翁豈求。

又

歲盡霜雪稠。相望僵萬木。天豈私梅花。獨畀此芬馥。高標我自存。何憾老空谷。人言和羹實。晚或參鼎餼。哀哉世論卑。汗我塵外躅。誰能湔祓之。寫真配修竹。

又

我少雖嗜書。賦性實慵惰。初志略未酬。白髮已無那。吾兒猶好勇。世事如棄唾。呻吟編簡中。徹旦或未臥。爾來愈自勵。日讀易一過。勉終大學功。吾道要負荷。

自責

晨起登堂正幅巾。蕭然聊欲養吾神。凡心未免更詩字。習氣猶思議古人。買屨爲登山寺去。徹燈緣愛月窗新。何時一切消除盡。終作無懷上古民。

懷舊用昔人蜀道詩韻

曩自白帝城。一馬獨入蜀。晝行多水涓。夜宿必山麓。時聞木客嘯。常憂射工毒。蜿蜒蛇兩頭。蹠蹠夔一足。豈惟耳目眩。直恐性命促。稍歷葭萌西。遂出劍閣北。奴僮不敢訴。馬病猶盡力。我亦困人客。一日帶屨束。最憶蒼溪縣。送客一亭綠。豆枯狐兔肥。霜早柿栗熟。酒酸壓查梨。妓野立土木。主別意益勤。我去疲已極。行行求旅店。借問久乃得。溪聲答歌長。燈焰照影獨。村深寒更甚。薪盡燒篔簹。竹須臾風雨至。終夕苦漏屋。於時厭道途。自誓棄微祿。猶幾三十年。始謝祝史職。予四竊祠祿。乃謝事。君恩念篤老。內閣使寓直。亦思秋豪報。力憊藝黍稷。卻尋少時書。開卷有慚色。

出遊

僧院軒窗酒市樓。過門自入不須留。恰來竹下尋棋局。又向沙邊上釣舟。詩放不能諧律呂。書狂猶足走蛟虬。秦碑禹窆風煙外。一弔興亡萬古愁。

辛酉冬至

今日日南至。吾門方寂然。家貧輕過節。身老怯增年。鄉俗謂喫冬至飯即添一歲。畢祭皆扶拜。分盤獨早眠。惟應探春夢。已繞鏡湖邊。

冬至後一日書

霜霰新冬後。年齡大耋時。功名久無夢。文字略存詩。丘壠歸何憾。琴書付有兒。癡人癡到底。更欲數期頤。

客至

何處軒車客。能來桑麥村。一奴先入市。此老自應門。野果嘗皆澀。村醅壓尙渾。殘年亦何恨。治世作黎元。

子聿入城

小硯寒生凍。孤燈翳復明。衰翁守微火。稚子隔重城。日落林無影。舟行水有聲。詩家忌草草。得句未須成。

降魔

老閱人間久。曾降百萬魔。悲憂誠害性。喜悅亦傷和。省事常須勉。忘懷得最多。當年未知此。無奈月明何。

冬日

故里躬耕後。頽齡老及前。開門無客至。得句有僧傳。忽忽身如夢。迢迢日似年。會當乘小雪。夜上剡溪船。

又

客至惟清坐。眞貧不是慳。援琴排遣悶。合藥破除閑。引鶴時穿屐。逢梅一破顏。怪來寒徹骨。夜雪冒南山。

客去

相對蒲團睡味長。主人與客兩相忘。須臾客去主人覺。一半西窗無夕陽。

自勉

妄出真成錯。歸耕惜已遲。褐溫貧始覺。飯美淡方知。身外元無易。情中自有詩。窮源那得止。瞑目以爲期。

又

自信直如弦。殘年偶得全。老猶強佞佛。貧亦諱言錢。旦暮勤鞭策。塵埃痛洗湔。仍須語兒子。此事要家傳。

又

臂弱傳鈔少。心煩記問衰。讀書猶自力。愛日似兒時。章句分無憾。聲形講不遺。明年幸強健。閉戶有餘師。

又

歸老寧常逸。時時學荷鋤。室雖無長物。圃尙有餘蔬。壯志誠衰矣。貧居亦晏如。爲農當世業。安用築門閭。

午晴至園中

老不禁寒起每遲。出門蕭散午晴時。春回九地梅先覺。霜竇千林竹不知。藥圃采苗芒屨溼。石泉照影角巾欹。歸來未過西簷日。袖手悠然獨詠詩。

七姪歲暮同諸孫來過偶得長句

雨墊林宗一角巾。蕭條村路並煙津。四朝遇主終身困。八世爲儒舉族貧。行摘殘蔬循廢圃。臥聞飢雀噪空園。封胡羯末皆佳甚。剩喜團欒一笑新。

苦寒

終日頻添季子裘。經旬不上仲宣樓。摩挲酒榼雖堪喜。疎索梅花未免愁。正苦冰生退吟筆。卻思雪作潤

耕疇。乘除擾擾殊多事。獨擁青氈覓睡休。

閑中書適

棋廢機心息。書捐美睡多。客來時淡話。酒後亦高歌。甚欲江湖去。無如老病何。平羌半輪月。依舊照漁蓑。

又

乞得殘骸久。天涯一秃翁。瓢分春瓮綠。甑絕太倉紅。短褐便冬暖。長歌樂歲豐。老腰那可折。步步賴枯筇。

復湖

世事相尋敗與成。湖中舂鍤浩縱橫。共知陂壞行當復。敢恨臺高旣已傾。小隱山園在湖中。近聞亭觀皆廢。天鏡忽看孤月墮。樵風長送片帆輕。下臨萬頃如雲稼。從此年年有頌聲。

梅花絕句

體中頗覺不能佳。急就梅花一散懷。衝雨涉溪君會否。免教塵土涴青鞋。

又

高韻知難折簡呼。溪頭掃地置芳壺。梅如解語應惆悵。昔日名流一箇無。

又

折得梅花古渡頭。詩凡卻恐作花羞。清樽賴有平生約。爛醉千場死即休。

又

疎枝冷蕊誰能畫。楊叟江西舊擅名。今日東窗閑拂拭。去人一尺眼先明。

跋馮氏蘭亭

堂堂淮陰侯。夫豈噲等伍。放翁評此本。可作蘭亭祖。唐古石刻本。

又

繭紙藏昭陵。千載不復見。此本得其骨。殊勝蘭亭面。中山舊本。山谷有句云。俗書喜作蘭亭面。

十二月二日夜夢與客竝馬行黃河上。憩於古驛。

竝轡徐驅百里中。雲開太華翠摩空。是間合有神靈在。七十餘年墮犬戎。

又

河濱古驛關重門。雉兔紛紛黍酒渾。吾輩豈應徒醉飽。會傾東海洗中原。

倚樓初三日

暮雲細細鱗千疊。新月纖纖玉一鈎。歎息化工真妙手。衝寒來倚水邊樓。

讀書

先親愛我讀書聲。追慕慈顏涕每傾。萬事到前心盡嬾。一編相向眼偏明。致君正使違初志。爲己猶當畢此生。更祝吾兒思早退。雨蓑煙笠事春耕。

讀史

夜對遺編歎復驚。古來成敗浩縱橫。功名多向窮中立。禍患常從巧處生。萬里關河歸夢想。千年王霸等棋枰。人間只有躬耕是。路過桑村最眼明。

閑遊

已破梅花一兩枝。並溪穿塢每歸遲。老軀健似中年日。鄉俗淳如太古時。上疏清狂非復昔。據鞍矍鑠欲誇誰。一端尙被鄰翁笑。無事長吟費撚髭。

日暮

樸學無關道廢興。更堪衰與病相乘。眼看白日西南去。繩繫膠黏總不能。

省事

老去終年臥草廬。事皆省盡略無餘。塵留鼠跡猶噴拂。風作瓢聲固不除。興發舊醅何害醉。詩成拙筆亦堪書。投牀睡美悠然覺。作計今知本不疎。

雪中作

鬢毛無奈歲華催。一笑登臨亦樂哉。平地忽成三尺雪。遶湖何啻萬株梅。雲山疊疊朝憑閣。簾幕沉沉夜舉杯。節物鼎來方自此。酥花綵勝待春回。

夢韓无咎王季夷諸公

積雪欲照夜。老雞方唱晨。諸公逝已久。幽夢忽相親。話舊慙慙意。追歡見在身。悠然又驚覺。撫枕一悲辛。

晴窗讀書自勉

今日雪始晴。遶舍烏鳥樂。老來少睡眠。雖病亦早作。豈無案上書。可與共寂寞。弦歌始風雅。次第窺灑灑。高明仰河漢。曲折窮脈絡。唐虞誠未遠。洙泗亦如昨。委佩聞都兪。避席承博約。膏肓幸施砭。幽悶欣納鑿。

天全魯壁藏不墮秦火虐吾生百世餘其敢負所託

冬夜讀史有感

短檠膏涸夜將殘。感世懷人興未闌。酌酒淺深須自度。圍棋成敗有傍觀。斷糲作飯終年飽。大布裁袍稱意寬。世上閑愁千萬斛。不教一點上眉端。

大寒

大寒雪未消。閉戶不能出。可憐切雲冠。局此容膝室。吾車適已懸。吾馭久罷叱。拂塵取一編。相對輒終日。亡羊戒多岐。學道當致一。信能宗闕里。百氏端可黜。爲山儻勿休。會見高峯嶽。頽齡雖已迫。孺子有美質。滿梳晨起髮凋零。亭午柴門未徹扃。萬事忘來尙憂國。百家屏盡獨窮經。楠枯倒壑雖無用。龜老搯牀故有靈。夢裏騎驢華山去。破雲曉絕數峯青。十二月十二夜夢實有此故識之。

晚興

斲芋挑蔬自鬻羹。雪簷收滴暮寒生。不嫌終日無來客。時聽荒園斲木聲。

雪後寒甚

日破重雲出。春從淺步來。未融樓北雪。先綻水南梅。屏護清吟硯。缸鳴乍熟醅。平生羨李愬。入蔡夜銜枚。雪晴步至舍傍

雪消還似雨。冰釋旋成泥。視菜荒陂北。尋梅小塢西。牆陰新犢臥。庭際午雞啼。幽興殊無極。歸來日已低。

訪隱者

湖曲有隱者。時時容叩門。人如釣渭叟。地似避秦村。笑語囂塵遠。衣冠古製存。山寒歸路晚。相與盡瓢樽。

村野

村野易過日。閉門心自欣。一身猶逆旅。萬事固浮雲。病厭詩爲祟。閑憑酒策勳。灌園雖舊業。隨事不須勤。

初夜

初夜多幽興。危闌偶獨憑。月陞星盡沒。風勁雪重凝。身似遊邊客。心如退院僧。奇寒不可耐。歸對北窗燈。

雙松父老言紹興中所植

東岡天矯兩蒼龍。千尺蟠空黛色濃。六十餘年松若此。誰知我更老於松。

兀兀

兀兀孤村客。悠悠兩世人。夢忘身潦倒。醉覺膽輪囷。故里簪纓換。都門巷陌新。聞臨安火後。興葺漸畢。餘

年猶有幾。撫事一傷神。

殘曆

殘曆不盈紙。苦寒侵弊裘。歲猪鳴屋角。儻鼓轉街頭。未死猶當學。長貧肯復憂。雪晴農事起。且復議租牛。

戒言

饒舌憂患始。銘膺勸戒深。談空摩詰默。對酒子光瘡。久已忘齊語。何嘗解越吟。悠然嫌未足。更撫絕絃琴。

聞松風有感

重位每憂身後罵。虛名不救眼前飢。直須采藥名山去。日夜松風無歇時。

遣興

侯印從來非所圖。赤丁子亦不容呼。著低怯對新棋敵。量減愁逢舊酒徒。生世豈能常役役。酣歌且復和鳴鳴。扁舟到處皆吾境。莫問桐江與鏡湖。

又

家住城南剡曲傍。門前山色蘸湖光。三朝執戟悲年往。二頃扶犁樂歲穰。名姓已隨身共隱。文辭終與道相妨。子孫勉守東臯業。小甑吳粳底樣香。

有道流過門留與之語頗異口占贈之

萬里縱橫自在身。偶然來看剡溪春。取將月去閑娛客。攜得雲歸遠寄人。縮地不妨遊汗漫。移山隨處對嶙峋。須君更出囊中劍。一爲關河洗虜塵。

閑記老境

謝事久懸車。爲農嬾荷鋤。破裘寒旋補。殘髮短猶梳。槁木忘榮謝。閑雲任卷舒。心知老當逸。先罷夜觀書。

又

嫌鬧不入市。怕寒稀出門。擁爐愁兀兀。投枕睡昏昏。柳色新如染。梅花香滿村。猶嗟未免俗。薄酒誑空樽。

小飲梅花下作

脫巾莫歎髮成絲。六十年間萬首詩。予白年十七八學作詩。今六十年得萬篇。排日醉過梅落後。通宵吟

到雪殘時。偶容後死寧非幸。自乞歸耕已恨遲。青史滿前閑卽讀。幾人爲我作著龜。

門外野望十二月二十五日

野迴浮煙碧。門深反照紅。柳邊雙鷺浴。天際萬鴉風。僧唄家禳疫。神船社送窮。豐年隨處樂。忘卻鬢如蓬。
自題傳神

識字深村叟。加巾下版僧。檐挑雙草屨。壁倚一烏藤。得酒猶能醉。逢山未怯登。莫論明日事。死至亦騰騰。
僧頌云今日騰騰任運。明日任運騰騰。

歲暮貧甚戲書

阿堵元知不受呼。忍貧閉戶亦良圖。曲身得火纔微直。槁面持杯祇暫朱。食案闌干堆苜蓿。褐衣顛倒著天吳。誰知未減麤豪在。落筆猶能賦兩都。

晚晴閑步鄰曲間有賦

湯沐身輕念出遊。近春原野霧煙浮。樓陰雪在玉三寸。雲罽月生銀一鈎。窮巷客稀常足睡。暮年詩退不
禁愁。鄉鄰無事冬耕罷。獨倚籬門數過牛。

誦書示子聿

乃翁誦書舍東偏。吾兒相和山之巔。翁老且衰常早眠。兒聲夜半方泠然。楚公著書數百編。少師手校世
世傳。我生七十有八年。見汝任此寧非天。

又

易傳三聖至仲尼。炎炎秦火乃見遺。經中獨無一字疑。正須虛心以受之。世衰道散吁可悲。我老欲學無碩師。父子共讀忘朝飢。此生有盡志不移。

十二月二十九日夜半雨雪作披衣起聽

臘雪瑞豐登。春雨相發生。二者皆可賀。愛此打窗聲。披衣起靜聽。蕭蕭亂疎更。豈惟肺渴蘇。耳目爲一清。孤燈不結花。相對翳復明。明朝遂除夕。歲月驚崢嶸。

辛酉除夕

衰境遇白雞。自分墮幽墟。造物偶見寬。俯仰復歲除。駸駸迫耄期。凜凜無根株。孰知尙堅頑。壯者有不如。銅瓶垂碧井。手自浸屠蘇。松煤染兔穎。秉燭題桃符。登梯挂鍾馗。祭竈分其餘。僮奴歎我健。卻立不敢扶。新春無五日。節物傾里閭。羅旛插紗帽。一醉當百壺。

除夕

六聖涵濡作幸民。明朝七十八年身。門前西走都城道。臥看無窮來往人。

陸放翁集

劍南詩稿

卷第五十

開歲

綠襦新畫衛門扉，賀剌相欺可累歎。賣困不靈仍喜睡，送窮無術又來歸。相尋蠶市人何在，爛醉蟆頭津事亦非。惟有禹祠春漸好，從今剩判典春衣。蠶市成都正月初故事。蟆頭津在眉山，亦邦人正月宴遊之所。

箕卜

孟春百草靈，古俗迎紫姑。廚中取竹箕，冒以婦裙襦。豎子夾扶持，插筆祝其書。俄若有物憑，對答不須臾。豈必考中否，一笑聊相娛。詩章亦間作，酒食隨所須。興闌忽辭去，誰能執其祛。持箕畀竈婢，棄筆臥牆隅。几席亦已徹，狼藉果與蔬。紛紛竟何益，人鬼均一愚。

梅花絕句

幾年不到合江園，說著當時已斷魂。只有梅花知此恨，相逢月底卻無言。

又

當年走馬錦城西，曾爲梅花醉似泥。二十里中香不斷，青羊宮到浣花溪。

又

聞道梅花圻曉風。雪堆遍滿四山中。何方可化身千億。一樹梅前一作花。一放翁。

又

小亭終日倚闌干。樹樹梅花看得殘。只怪此翁常謝客。元來不是怕春寒。

又

亂篔桐帽花如雪。斜挂驢鞍酒滿壺。安得丹青如顧陸。憑渠畫我夜歸圖。

又

紅梅過後到緗梅。一種春風不並開。造物無心還有意。引教日日放翁來。

立春前一日作壬戌開歲四日立春

開年化日已舒長。漸見風和鳥變吭。冒土萱芽抽嫩綠。拂橋柳色弄輕黃。重溫壽酒屠蘇醖。探借春盤餅餌香。不入城門今幾歲。遙知車馬正匆忙。

立春日

日出風和宿醉醒。山家樂事滿餘齡。年豐臘雪經三白。地暖春郊已遍青。菜細簇花宜薄餅。酒香浮螳瀉。長瓶湖村好景吟難盡。乞與侯家作畫屏。

送子龍赴吉州掾

我老汝遠行。知汝非得已。駕言當送汝。揮涕不能止。人誰樂離別。坐貧至於此。汝行犯胥濤。次第過彭蠡。波橫吞舟魚。林嘯獨脚鬼。野飯何店炊。孤糴何岸穢。判司比唐時。猶幸免笞箠。庭參亦何辱。負職乃可恥。

汝爲吉州吏。但飲吉州水。一錢亦分明。誰能肆讒毀。聚俸嫁阿惜。擇士教元禮。我食可自營。勿用念甘旨。衣穿聽露肘。履破從見指。出門雖被嘲。歸舍卻睡美。益公名位重。凜若喬嶽峙。汝以通家故。或許望燕几。得見已足榮。切勿有所啟。又若楊誠齋。清介世莫比。一聞俗人言。三日歸洗耳。汝但問起居。餘事勿挂齒。希周有世好。敬叔乃鄉里。豈惟能文辭。實亦堅操履。相從勉講學。事業在積累。仁義本何常。蹈之則君子。汝去三年歸。我儻未卽死。江中有鯉魚。頻寄書一紙。

正月五日出遊

久作閑人不慣愁。新春天氣更清柔。未爲遼海千年別。且繼斜川五日遊。細柳拂頭穿野徑。落梅黏袖上漁舟。此身定去神仙近。倚遍江南賣酒樓。

六日雲重有雪意獨酌

遍遊數澤一漁舫。盡歷風霜只緼袍。天爲念貧偏與健。人因見嬾誤稱高。地連海澨濤聲近。雲冒山椒雪意豪。偶得名罇當痛飲。涼州那得真蒲萄。

閑甚戲作

酒盡枵樽腹。書拋委架塵。漸能閑過日。始覺老催人。玉塵王夷甫。金龜賀季真。若論方外事。終媿葛天民。

莫笑

莫笑窮閭叟。人生亦已稀。衆中容後死。險處得先歸。初服還韋布。晨飧美蕨薇。牀頭周易在。捨此復疇依。

初春雜興

戲續春寒賦。閑廣午醉詩。煎茶小石鼎。酌酒古銅卮。曝日龜浮沼。營巢鵲墮枝。村深無客過。幽興與誰期。

又

水長鷗初泛。山寒茗未芽。深林聞社鼓。落日照漁家。渡遠呼船久。橋傾取路斜。客愁慵遠眺。不是怯風沙。

又

問途來野店。秣蹇憩山郵。何處無詩思。平生慣旅愁。翩翩下鷗鷺。點點散羊牛。傳入王孫畫。千金未易酬。

又

故歲愁聽雨。新春剩得晴。暖催紅蕊鬧。漲入綠池平。遊馬行爭路。華燈賣滿城。江村獨無事。戶戶及時耕。

又

老病倦遊陟。偶尋溪友期。殘冰擁魚笱。新暖入桑枝。山崦巨然畫。煙村摩詰詩。何人爲收拾。媿我不能奇。

春曉

喔喔雞號野。昏昏月挂樓。夢隨殘漏斷。愁伴宿醒留。壯志看清鏡。春寒著弊裘。拂窗新柳色。最憶錦江頭。

書感

投老羈孤久。臨觴感慨頻。關河疎舊友。風雨敗新春。事固少如意。天終能勝人。所悲頭上髮。不與柳條新。

壬戌正月十四日

老子居然健。上元如許晴。湖平波不起。天闊月徐行。散髮漁舟穩。臨風野笛清。安能擁笳鼓。萬里將幽并。

十五日

誰推圓鏡上天東。桂影婆娑滿鏡中。天宇更無雲一點。譙門初報鼓三通。兒童草草杯盤喜。鄰曲紛紛笑語同。逐祿豈能無聚散。明年誰復伴衰翁。

高枕

高枕閑看古篆香。世間萬事本茫茫。偶亡塞馬寧非福。太察淵魚恐不祥。每與諸兒論今古。常思百世業耕桑。危機正在黃金印。笑殺初心繆激昂。

送施武子通判

初入修門鬢未秋。安期千里接英遊。退歸久散前三衆。邁往欣逢第一流。只道升沉方異趣。豈知氣類肯相求。龍鍾不得臨江別。目斷西陵煙雨舟。

老學菴自規

堯德被四表。其本在身修。江河水稽天。發源乃涓流。人忍於搏蝨。習熟且解牛。象箸與玉杯。漆器實其由。斯須失兢畏。惡名溢九州。始乎爲善士。終可蹈軻丘。孰置汝太山。孰擠汝污溝。降福孰汝私。得禍孰汝讎。聖狂在一念。禍福皆自求。易簣汝所知。垂死勿惰偷。

雨夜

斷岸輕煙著柳條。孤村小雨夜蕭蕭。荒雞隔浦聲相續。短燭無風焰自搖。朴學元知糜歲月。殘生竟是老漁樵。最憐鬢畔千莖雪。日日春風吹不消。

子聿以剛日讀易柔日讀春秋常至夜分每聽之輒欣然忘百憂作長句示之

朱顏已去鬢絲稠。知復人間幾歲留。正可牀頭著周易。安能車上說春秋。齋鹽日映從兒好。弦誦更闌解我憂。時發一言常中理。絕勝問事不能休。

記夢

信命從來不問天。經旬無酒亦陶然。夢爲估客揚州去。水調聲中月滿船。

夜賦

八十衰翁久挂冠。今年無酒敵春寒。亂雲入戶雨方急。斷雁叫羣燈未殘。蠹簡幸存隨意讀。蝸廬雖小著身寬。支離自笑心猶壯。憂國憂家慮萬端。

杜叔高秀才雨雪中相過留一宿而別口誦此詩送之

久客方知行路難。關山無際水漫漫。風吹欲倒孤城遠。雪落如從野寺寒。暮挈衣囊投土室。晨沽村酒挂驢鞍。文章一字無人識。胸次徒勞萬卷蟠。

曉賦

雞晨非一唱。鴉旦每三鳴。萬物各有役。吾生何所營。書編猶未掩。窗紙已微明。稗子勇過我。琅琅誦易聲。

雪後龜堂獨坐

丈夫自重如拱壁。安用人看一錢直。簞食豆羹不虛受。富貴那可從人得。讀書萬卷行媿心。幽有鬼神爲君惜。龜堂樂處誰得知。紅日滿窗聽雪滴。

又

兩手龜坼愁出袖。閉戶垂帷坐清晝。朝陽破雲雪漸消。點滴無窮聽簷溜。士生百行雖相補。第一要能安飯糗。詩書幸可教兒童。勿使後人憐晚謬。

又

牙齒欲落何足惜。爛嚙藜羹自堪食。屋穿不害氣吐虹。客至從驚瘦如腊。天公鑄汝亦已至。春風裂面雪三尺。濁醪傾罷仰屋歌。尙友孫侔與徐積。

又

閉門屋漏不可居。出門雪泥深尺餘。興闌已回剡溪楫。路滑罷借東家驢。竹窗兀兀無與語。澆愁賴有酒一壺。眼花耳熱睡至夜。吹火起讀殘編書。

二月一日作

浪藉梅花委道傍。山櫻已復占年光。簷消積雪時聞滴。衣覆殘爐賸得香。老馬已衰寧識路。寒龜未死且搯牀。柴荆終日無來客。賴有陶詩伴日長。

過東鄰歸小憩

籃輿過鄰曲。綠野喜新晴。暖日生花氣。豐年入碓聲。築陂鄉竭作。買犢戶深耕。歸舍還尋睡。殘書傍枕橫。

寄呂子和南廂

聖代多名德。君家不乏公。還看短袍綠。來蹋軟塵紅。小忍便無事。力行方有功。官閑能念我。時寄尺書東。

自述

藜藿安貧陋。柴荆俯莽蒼。露著朝筮易。掃地晝焚香。美睡天教嬾。長歌客恕狂。歡然送餘日。醉死亦何傷。

呂氏子蘊郎求詩

乃祖身兼將相崇。諸孫玉立有家風。此郎已復塵埃外。它日相期氣類中。行已勤勤須自省。讀書聲聲要新功。果能哮吼如獅子。一瓣香應嗣放翁。

新晴

兼旬不雨亦常陰。一日新晴抵萬金。浦面波紋春穀細。橋頭柳色麴塵深。關山滿眼愁千斛。歲月催人雪一簪。猶有強寬懷抱處。午窗睡起聽鳴禽。

晚步湖堤歸偶作

酒盡知難折簡呼。出門仍苦要人扶。殘梅委地香誰惜。歸雁穿雲遠欲無。日落牛羊猶被野。農閑畚鍤正開湖。還家寂寞西窗晚。旋燎枯枝擁地爐。

春來食不足戲作

飢臥誰能羨屬餒。高懷飽食豈容兼。分司祿在終難取。卿監致仕當得分司祿。須自請乃給。遂置之束帛。恩深獨不霑。頃有敕令。賜致仕者粟帛。羊酒郡獨格不行。衰謝形容無藥駐。奔馳日月欠膠黏。兒童拍手看翁醉。山杏溪桃簇帽簷。

散步湖隄上時方濬湖水面稍渺瀰矣

老覺人間萬事輕。不妨閑處待閑行。西山鳥沒暮雲合。南浦隄平春水生。孤操不渝無鶴怨。淡交耐久有

鷗盟先民幸處吾能勝。生長兵間老太平。邵堯夫自謂生於太平。老於太平。爲太平之幸民。彼豈知幸哉。若予生於亂離。乃老於太平。真可謂幸矣。

老學菴

老學衡茅底。秋毫敢自欺。開編常默識。閉戶有餘師。大節艱危見。真心夢寐知。唐虞元在眼。生世未爲遲。

春曉

強尋殘夢苦難成。推枕搯藤繞舍行。新漲生波漁艇活。晨曦送暖客衣輕。烟迷芳草蒼茫色。鵲占高枝囀啾聲。老病自憐猶嗜學。誦書家塾羨諸生。新館一客。諸孫長興入學。誦書頗盛。

龜堂雨後作

澤國春多雨。龜堂病少惊。雖名舊朝士。其實老耕農。一點葦間火。數聲煙外鐘。詩材故不乏。處處起衰慵。

書感

我欲哭窮途。所懼世俗驚。出門復入門。掩淚且吞聲。唐虞邈難繼。周孔不復生。承學百世下。我輩責豈輕。楊墨斥已殫。釋老猶縱橫。拔本塞其源。力盡志未平。吾道如皦日。薄食終必明。一木雖獨立。可支大廈傾。夷風方變夏。孰能作長城。卓哉易簣公。垂死猶力行。

後書感

貧賤終身志不移。閉關涵泳賴書詩。唐虞未遠如親見。周孔猶存豈我欺。力學正須忘寢食。少年誤計事文辭。爾來朋友皆雲散。考質從誰盡所疑。

村居書喜

紅橋梅市曉山橫。白塔樊江春水生。花氣襲人知驟暖。鵲聲穿樹喜新晴。坊場酒賤貧猶醉。原野泥深老亦耕。最喜先期官賦足。經年無吏叩柴荆。

中春偶書

鄰曲祈蠶候。陂塘浸種時。春寒薪炭覺。雨霽鼓鐘知。驢瘦衝泥怯。魚驚食釣遲。衰翁一味嬾。耕養媿吾兒。

夜泊

小聚近江干。中春尙爾寒。釣船隨鷺宿。烟月伴鐘殘。冉冉歲時速。茫茫天地寬。推蓬一搔首。無處著悲歡。

東岡櫻桃已過殊不知

病著寒侵怕出門。蕭蕭煙雨暗江村。一樽闕與梅花別。過盡櫻桃不足言。

別嚴和之

器之魂逝已難招。尙有和之慰寂寥。今夜月明空歎息。想君孤棹泊溪橋。

又

千里風烟行路難。旅舟應過子陵灘。人間富貴知何物。莫負君家舊釣竿。

齋中雜題

湖水日益長。柳色日益深。好鳥西山來。飛鳴過前林。年華挽不留。陳迹曠難尋。花開少共賞。酒熟惟孤斟。王謝今編氓。曲水空山陰。一樽欲弔古。已矣予何心。

又

屯雲失南山。三日吹細雨。歲月不貸人。鼉聲遽如許。一年復一年。老至不可禦。下溼病在脾。餘息僅如縷。枯皮裹瘦骨。半屬松下土。屋壞要當顛。安能強撐拄。

又

書生每苦飢。得飯已可賀。黃齏三百瓮。自是天所破。有時尙不繼。得米無暇簸。昨者雪塞門。烟絕但僵臥。雖云迫溝壑。老學不敢惰。夜分喚鄰翁。我歌爾當和。

又

西窗日過中。飢坐生眼花。援筆課小詩。墨燥字傾斜。須臾忽滿紙。翩翩若風鴉。雖無古人法。簡拙自一家。乃知雨漏壁。未媿錐畫沙。俄報豆飯熟。投筆喜莫涯。呼童拾澗薪。試我家山茶。

春晚

萍葉青浮水。蛙聲鬧徹明。川雲時聚散。天氣半陰晴。杏子爭梅結。鳩巢後鵲成。吾儕亦有役。過社更深耕。

社日小飲

人生當惜老年時。醉插山花壓帽欹。世事恰如風過耳。微聾自好不須治。

山茶

雪裏開花到春晚。世間耐久孰如君。憑闌歎息無人會。二十年前宴海雲。成都海雲寺山茶開。故事宴集甚盛。

春夜

寂寂春將暮，迢迢夜未央。膏殘燈焰短，杵急藥塵香。困思棲雙睫，羸軀寄一牀。養慵新有味，初志悔軒昂。

春遊

右軍不復見清真，賞會猶須我輩人。幽夢斷時雞唱曉，短章成處鳥呼春。出山茶筍村墟鬧，上市蓴鱸匕

北窗睡起

杏梢紅溼晝初長，睡過窗間半篆香。久厭客遊歸自好，本無才術老何傷。依蒲不去羣魚樂，點草還驚小蝶忙。堪笑放翁無一事，強將詩句占年光。

北窗懷友

中年妄意慕軻雄，白首終希尺寸功。落落要居流俗外，兢兢恐墮異端中。仰天俯地猶多媿，飯豆羹藜已過豐。幸有北窗堪講學，故交零落與誰同。

舟中作

娥江西路石帆東，身寄鷗波浩蕩中。疊疊沙痕留浦岸，疎疎日影透漁篷。詩人無復同盟在，酒債何時一洗空。已迫耄年宜易感，人生五十卽稱翁。

又

晤語無人與遣愁，出門聊復弄輕舟。山穿煙雨參差出，水赴陂塘散漫流。隔葉雄雌鳴谷鳥，傍林子母過

吳牛數家清絕如圖畫。炊黍何妨得小留。

湖村春興

桑柘相望雨露新。桃源自隱不緣秦。稻陂正滿初投種。蠶子方生未忌人。酒借鵝兒成淺色。魚憑雲母作脩鱗。賽神歸晚比鄰醉。一笑猶關老子身。

鄰餉

結隊同秋穫。連牆聽夜舂。薄持聊共飽。熱啜卻煩供。炊玉吳粳美。浮蛆社酒醲。時平多樂事。莫厭數從容。

久雨

風雨連旬日。屢空猶晏如。敢言苔及榻。僅免釜生魚。薺糝朝供鉢。松肪夜照書。百年如此過。作計未全疎。

登山

困厄身垂老。登臨意未平。暮煙迷草色。宿雨壯溪聲。往古飛鴻沒。浮名脫髮輕。平生五字律。自笑尙關情。

讀易

大易中含造化機。王何元未造精微。乾坤要自吾身看。臥聽雞鳴起索衣。

村居書事

四十餘年食太倉。賜骸恩許返耕桑。長絲出繡尊羹美。白雪翻匙稻飯香。酒戶知貧焚舊券。醫翁憐病獻新方。春殘睡足東窗下。聞道長安依舊忙。

又

藥物枝梧病漸蘇。門前野老笑相呼。春深水暖多魚婢。雨足年豐少麥奴。小飲杯盤隨事具。閑行巷陌倩人扶。題詩非復羌村句。誰與丹青作畫圖。李伯時有羌月圖傳於世。

春晚書村落間事

千古會稽城。閭閻樂太平。豐年觀米價。霽色聽禽聲。俗儉憎浮侈。民淳力釣耕。幽詩有七月。字字要躬行。

雜興

秦漢區區了目前。周家風化遂無傳。君看八百年基業。盡在東山七月篇。

又

羲和分職授人時。斷自唐虞意可知。獸舞鳳來餘事耳。西成東作要熙熙。

又

老無添處仍逢病。春欲殘時未減寒。架上漢書渾忘盡。牀頭周易卻常看。

又

一身逋負愁賒酒。滿眼關山悔上樓。子細推來惟合睡。五更風雨已如秋。

又

面顏日瘦口眼大。氣血頓衰鬢髮禿。不用凌煙寫冠劍。一篝烟雨事春耕。

又

故交零落形弔影。陳迹淒涼口語心。辛苦一生成底事。祈招空解誦愔愔。

南堂獨坐

晨坐南堂雙眼明。南山山色滿柴荆。片雲忽過失簾影。急雨初來聞竹聲。鸚鵡螺深生酒興。蟾蜍滴古助詩情。野人頻約天台去。幾緇青鞋了此行。

春雨示鄰曲

春來天氣苦蕭森。如縷雲升便作霖。寒溜何曾住一滴。綠陰忽已遍千林。蓴絲箭茁垂垂老。蓼浦菱塘澗澗深。聞道南山花尚在。約君攜酒試同尋。

讀書

堯庭君相都俞盛。闕里師生博約深。我讀殘編食忘味。朱紘三歎有遺音。

新晴賞牡丹

杜門睡榻長蒼苔。滿眼新晴亦樂哉。小市忽逢蓴菜出。曲欄初見牡丹開。不嫌雨後泥三尺。且趁春殘醉幾回。自揣明年猶健在。東箱更覓茜金栽。茜金。近出牡丹名。

對酒

神仙豈易學。富貴不容求。百歲儻未盡。一樽差可謀。鐘鳴上方晚。桂發小山秋。處處多幽趣。攢眉勿浪愁。

病起遇晴有作

十日春雨霑百疾。投間作呻吟。雖甚苦。飲啗尚自若。筋骸則已疲。正氣亦消鑠。行年垂八十。所恃豈在藥。魔軍累百萬。指顧可盡縛。君看仁義師。何至用韜略。川雲忽破散。平地見日腳。無人畫此翁。縹緲立孤鶴。

定命

定命元知不可移。更兼狂疾固難治。履穿衣弊窮居日。齒豁頭童大耋時。耕釣詩多悲境熟。功名夢少感年衰。今朝雨歇春泥散。剩伴兒童鬪草嬉。

假山小池

鑿池容斛水。壘石效遙岑。鳥喜如相命。魚驚忽自沉。風來生細籟。雲度作微陰。便恐桃源近。無人與共尋。

又

蓮嶽三峰峙。桃源一路分。池偷鏡湖月。石帶沃洲雲。魚隊深猶見。禽聲靜更聞。巖幽林箐密。疑可下湘君。

春欲盡天氣始佳作詩自娛

浮雲飛盡見青天。拄杖閑拈瘦倚肩。漸喜綠秧分穰稷。又看畫柱坼鞦韆。雞豚雜遝祈蠶社。鼓笛喧譁競渡船。惟有此翁無一事。閉門贏得日高眠。

自詠

生草覆蝸廬。長鬚駕鹿車。貧猶思施藥。老不廢觀書。登覽攜童稚。歌呼和里閭。躬耕亦何得。聊以遂吾初。

西村勞農

川雲散盡十分晴。繚出溪頭信意行。片片飛花隨步遠。離離芳草上牆生。村深日暖單衣爽。路轉沙平兩屨輕。腩肉芬香坊酒醞。因來聊得餉春耕。

題廬陵蕭彥毓秀才詩卷後

詩句雄豪易取名。爾來閑澹獨蕭卿。蘇州死後風流絕。幾許工夫學得成。

又

法不孤生自古同。癡人乃欲鏤虛空。君詩妙處吾能識。正在山程水驛中。

舍北溪上垂釣

大耄還家萬事非。垂竿好在綠苔磯。風和山雉挾雌過。村晚吳牛將犢歸。春漲新添塘瀲灩。夕雲仍帶雨霏霏。此生自笑狂顛足。依舊人間一布衣。

三月二十二日作

雨過草爭出。溪湍魚逆行。輕舟摘蓴菜。小市聽鶯聲。萬事已無夢。一樽猶有情。吾兒能講學。不必說無生。

此
页
空
白

陸放翁集

劍南詩稿

卷第五十一

書感

頭顱已可知。牙齒今復落。十步或再休。啜粥不及勺。身依一蒲團。壁挂兩芒屨。對客輒坐睡。有問莫能酢。念昔少壯時。心慕宦遊樂。初登平津館。晚入征西幙。雨暗駱谷烽。霜清散關柝。登高望中原。氣已吞雍雒。寧知事大謬。憔悴理征橐。單車去梁益。健席下沔鄂。還朝見故人。大馬黃金絡。後來固多士。鸛鷺照臺閣。婆婆郎吏間。祇自取嘲噓。歷思從來事。無鐵可打錯。幸得還故園。快若解束縛。閭里通有無。情厚不爲薄。泥行事春耕。日曝畢秋穫。隔牆喚鄰翁。濁酒聊共酌。

寒食

小市禁煙餘。東郊展墓初。桐陰覆碧井。泉脈入清渠。貧悴停遊舫。龍鍾廢荷鋤。西窗斜日在。且復勘殘書。
鄉人貧甚者。每自謂不能下湖。則其貧可知。

西村暮歸

天氣清和修禊後。土風淳古結繩前。村村陂足分秧水。戶戶門通入郭船。亭障盜消常息鼓。坊場酒賤不論錢。行人爭看山翁醉。頭枕槐根臥道邊。

舍外彌望皆青秧。白水喜而有賦。

此地天教著放翁。舍傍煙樹晚空濛。一無可恨得歸老。寸有所長能忍窮。東作已趨堯舊俗。南薰方詠舜遺風。謝安勳業能多少。枉是忽忽起剡中。

寄題太和陳誠之秀才遠明樓

宦遊再有江西役。南望廬陵每慨然。未見高樓出雲雨。但驚妙語雜風烟。諸公何止元和盛。獨我初非正始賢。筆力深知太遼絕。此詩它日勿同編。樓有榜。廷秀大蓬所作記。及周丞相以下諸公題詠。

蝸舍

蝸舍茨生草。龜腸飽淖糜。麥因多雨損。蠶遇閏年遲。徒義憂無勇。求仁戒自欺。此生雖欲盡。吾志未應衰。

東岡

東岡竹千竿。大者圍過尺。微風生其間。蕭蕭夏寒碧。我閑適一到。散髮坐磐石。萬事不累心。清獻遂至夕。此君本傲世。獨我有夙昔。老惰恐作疎。時來寓琴弈。

首夏

亂山深處著柴荆。岸幘披衣露氣清。宴坐有書聊作伴。出遊無客獨題名。陰陰密樹花初盡。灑灑方池水已平。幾許人間堪笑事。今朝百舌頓無聲。

贈曾溫伯邢德允

髮似秋蕪不受耘。茶山曾許與斯文。回思歲月一甲子。游獲從文清公時。距今六十年。尚記門牆三沐熏。

卷裏聖賢能覩面。人間富貴實浮雲。二君才氣俱超絕。豈待衰翁誦所聞。

自述

古井無由浪浮雲。一掃空。詩書修孔業。場圃嗣幽風。懼在飢寒外。憂形寤寐中。吾年雖日逝。猶冀有新功。

又

舊業還耕釣。殘年迫耄期。筋骸衰後覺。力量夢中知。客約溪亭飲。僧招竹院碁。未爲全省事。終勝宦遊時。

又

屏迹歸休後。頽生寂寞中。忍貧辭半俸。學古得全功。西埭村醅釀。東陂小約通。經行有佳趣。稚子也能同。

示客

一點昏燈兩部蛙。客來相對半甌茶。典衣未贖身饒蝨。治米無工飯有沙。每爲采菱浮野艇。時因賣藥宿

山家。青鞋到處堪乘興。不獨雲門與若耶。

對食戲作

香粳炊熟泰州紅。萱甲蓴絲放箸空。不爲休官須惜費。從來簡儉作家風。

又

米如玉粒喜新春。菜出煙畦旋摘供。但使胸中無媿怍。一餐美敵紫駝峯。

對酒戲作

杖頭高挂百青銅。小立旗亭滿袖風。莫笑村醪薄無力。衰顏也得暫時紅。

又

亂插醪釀壓帽偏。鵝黃酒色映鱗船。醺然一枕虛堂睡。頓覺情懷似少年。

夏初湖村雜題

市遠村深客到稀。草堂終日掩柴扉。釀成新蜜蜂兒靜。分盡殘泥燕子歸。

又

嫩日輕風夏未深。曲廊倚杖得閑吟。地偏草茂無人迹。一對菱雞下綠陰。

又

寒泉自換菖蒲水。活火閒煎橄欖茶。自是閑人足閑趣。本無心學野僧家。

又

日落溪南生暮煙。幅巾蕭散立橋邊。聽殘賽廟琴琴鼓。數盡歸村隻隻船。

又

胎髮茸茸漆不如。夏初安健勝春初。雙瞳嬾看公卿面。却解燈前讀細書。

又

從來抵死愛湖山。敢料天教半世閑。杜曲桑麻雖苦薄。灞橋風雪如相關。

又

幽禽兩兩已成巢。新竹森森漸放梢。稻壠作陂先蓄水。野堂防漏卻添茅。

又

門巷蕭條長綠苔。經旬清坐罷傳杯。麴生風味那忘得。少待吾家芍藥開。晉鄉有陸家芍藥其品甚高。

溪上露坐

水際風生爽拂裾。比鄰自集不勞呼。昏鴉杳杳飛初定。遠樹離離望欲無。新竹出林時解籜。小荷翻露已成珠。橋東一徑蒼苔滑。歸舍還須稚子扶。

北齋書志示兒輩

初夏佳風日頽然。坐北齋。百年從落魄。萬事忌安排。徐仲車聞安定先生莫安排之教。所學益進。鄉俗能尊老。君恩許賜骸。飢寒雖未免。何足繫吾懷。

作盆池養科斗數十戲作

小小盆池不畜魚。題詩聊記破苔初。未聽兩部鼓吹樂。且看一編科斗書。

枕上

風竹無時靜。月窗終夜明。時時聽鶯鶯。一一數殘更。吳楚民猶困。燕齊虜未平。功名天所命。吾志固難成。

晨起

終夜厭姑惡。經春無秣歸。今歲不聞杜宇。溪雲生慘慘。林日澹暉暉。物外孤懷勝。人間百慮非。鄰翁剡中去。爲我買漁衣。

喜晴

葛衣初著喜新晴。寂寂虛堂一榻橫。乍坼孤花藏葉罅。晚歸雙燕拂簾旌。舞空不斷游絲直。掠地還飛落絮輕。剩欲倚闌尋好句。清笳已復動高城。

讀夏書

巨浸稽天日沸騰。九州人死若丘陵。一朝財得居平土。峻宇雕牆已遽興。

幽栖

何處是幽栖。城南路少西。楊花穿戶入。燕子避簾低。碁局聊相對。茶爐亦自攜。溪頭雲易合。晚雨又成泥。

閑詠園中草木

剪刀葉畔戲魚回。幌子花頭舞蝶來。領略年光屬閑客。一樽自勸不須推。

又

麝香萱草移東郭。錦子葵花買上原。兒喚乃翁閑一看。欣然曳杖出籬門。

又

一樹山櫻鳥啄殘。懸鈎半舍亦甘酸。兒童采得爭來餉。應念衰翁舌本乾。

又

綠侵小徑蔓衣草。青絡疎籬鬼帶藤。未暇開編尋本草。且將名品問山僧。

又

日高未辦續晨炊。一椀村醅且療飢。槃箸索然君勿笑。桑間紫椹正纍纍。

又

仲夏園中百草靈。風吹露拆各青青。勸君辦取金鴉觜。不問昌陽與豨苓。

夜雨

初夏雨淋浪。鶯聲繞四廊。感深頭易白。睡少漏偏長。紅捲簾旌溼。潤生衣焙香。清吟欲排悶。三歎不成章。

晨起

海燕翻將乳。戎葵粲已繁。魚船初入市。蓴擔未過門。年耄停朝課。家貧省小飧。近以病後晨。廢讀書。又以廩粟不繼。遂罷食粥。所欣行樂處。秧稻遍村村。

放翁

拜賜頭銜號放翁。家傳不墜散人風。問年已過從心後。遇境但行無事中。馬老豈堪空冀北。鶴飛猶得返遼東。道傍跌宕煩君看。閱盡時人臉尙紅。

過鄰家

老病在臂蹠。終日不喜動。溪雲忽過前。袖手以目送。今晨光景佳。霽色入鳥哢。駕言出柴荆。暫作湖山夢。東村望鶴巢。西阜過蘿峒。父老意欣然。爲我撥春瓮。豈惟澆舌燥。亦用輒脚痛。形骸去繩檢。談笑得少縱。吳蠶初上簇。陂稻亦已種。端五數日間。更約同解纜。

東園

晨起東園去。消磨夏日長。隨鋤泉眼出。上爪藥苗香。琴挂山齋壁。龜拈道室牀。始知彭澤令。眞足傲羲皇。

曉出至湖桑隸

殘年孤寂不堪言。時喚平頭駕短轅。老氣猶能作罷臥。壯懷誰復記鴻軒。權歌縹渺城西路。煙樹參差隸北村。堪笑怪奇消未盡。夜來還夢屬橐鞬。

雨夜觀史

讀書雨夜一燈昏。歎息何由起九原。邪正古來觀大節。是非死後有公言。未能劇論希捫蝨。且復長歌學叩轅。它日安知無志士。經過指點放翁門。

雨後作

今日雲歸恰喜晴。小池忽見水紋生。窗昏又輟讎書課。臥聽蕭蕭打葉聲。

園中

稚竹侵簷綠。新桐覆井涼。閑身少羈束。隨處得徜徉。山鵲惺惚語。藤花掩冉香。吾詩有餘思。小復立西廂。

湖上遇道翁乃峽中舊所識也

大罵長歌儘放顛。時時一語卻超然。掃空百局無碁敵。倒盡千鍾是酒仙。巴碛相逢如昨日。山陰重見亦前緣。細思合辱先生友。五十年來不負天。

老學菴北作假山既成卽雨彌月不止

古者封禪歲。乾封輒枯旱。不言絕民食。徒欲曬日觀。我今作小山。纔及仞有半。下澗數斗水。草木稍葱蒨。叢爾何足言。造物亦幽贊。冥冥一月雨。陰翳迷昏旦。芳草爭抽萌。珍木亦擢榦。龜魚出復沒。鳥雀聚仍散。

彼大初何私。遺我耳目玩。遂令閭巷間。日厭鶉鳩喚。淖深樵蘇絕。有米不能爨。爲小乃害大。未可以理斷。憂懼塞胸中。當食屢興歎。培塿固易平。荷鍤媿吾懦。

苦雨

儘道迎梅雨。能無一日晴。窗昏愁細字。簷滴亂疎更。未怪蛙爭席。真憂水冒城。何由收積潦。簫鼓賽西成。

又

煙水茫無際。空堦滴不休。一窗閑隱几。四月澹如秋。箔冷蠶遲績。泥深麥未收。家貧村酒薄。曷解老農憂。

五月初作

鄰舍春新麥。家人拾晚蠶。推移逢夏五。賦與歎朝三。遣日須棋局。忘憂賴酒饌。幽居有高致。多取未爲貪。

游西村贈隱者

水清沙淨見遊魚。槐柳陰陰五月初。人似登仙惟火食。俗如太古欠巢居。熟聞高臥常扃戶。剩欲頻來共荷鋤。從此夢遊端有地。淵明不獨愛吾廬。

彷徨

家世由來出楚狂。湖山垂老得彷徨。讀書坐嬾常中廢。得句因衰已旋忘。萬化隨緣寓蟲臂。百年何處異羊腸。忍飢到死知無恨。免使人嘲作飯囊。

碌碌

碌碌初何取。悠悠信所之。安貧無鬼笑。守道有天知。暑服黃縑製。晨飧赤米炊。今朝潦水退。村路得遨嬉。

讀陳蕃傳

莫笑書生一卷書。唐虞事業正關渠。漢廷若有真王佐。天下何須費掃除。

夏日晨起

華胥歸路萬山青。拈得烏藤繞舍行。兩皆尙餘殘睡美。一襟初受曉涼生。陰陰院落新桐影。寂寂房櫺乳燕聲。已罷小殮停卯酒。龜腸蟬腹不勝清。

醉舞

短帽簷花舞道傍。年垂八十尙清狂。茸茸胎髮朝盈櫛。炯炯神光夕照梁。令尹閱人三仕已。太山在我一豪芒。藥苗麥飯初何欠。全取愚儒百鍊剛。

北窗微陰

露滴林梢花送香。風吹池面雨輸涼。蠹書一卷作老伴。麥飯半盂支日長。學道莫如心自肯。杜門真與世相忘。君恩不報雖知媿。穉米安能益太倉。

夏夜

乞骸安晚節。養疾臥空村。月暗梟鳴樹。船歸犬吠門。藜羹加糲美。黍酒帶醅渾。稚子能勤學。燈前與細論。

村居

鶉鷄穿林語。鳴鵝並水鳴。餽漿憐道暍。裹飯助鄰耕。零落橋危斷。欹斜屋半傾。君毋笑偷惰。猶足盡吾生。

晚興

羸病時時劇。歡悰日日疎。睡憑書紹介。愁賴酒驅除。小蹇追涼處。輕衫出浴初。無人堪晤語。且復狎樵漁。

溪上

散髮倚胡牀。風生水面涼。單衣縫白紵。雙屨織青芒。道家有青芒屨。荷葉猶微赤。藤花已半黃。歸來村路晚。漁火耿蒼茫。

貧甚戲作長句示鄰曲

百屋堆錢四壁空。人生志願孰能同。蕭條齒髮難藏老。冷落杯盤可諱窮。斷筍不思鄴夏日。典衣那計禦霜風。知心幸有鄰翁在。一笑相從草莽中。

縱筆

冉冉殘年迫耄期。肱雖三折未成醫。北山愚公世方笑。東郭順子吾所師。萬里元非破賊手。一生無奈造物兒。梅雨初晴湖水滿。未妨把酒細哦詩。

入都

葵萸登盤酒可除。豈知扶病又離家。朝行打岸濤頭惡。夜宿垂天斗柄斜。不恨山林淹歲月。但悲道路困風沙。鄰翁好爲看耕隴。行矣東歸一笑譁。

開局

八十年光敢自期。鏡中久已髮成絲。誰令歸蹋京塵路。又見新開史局時。予三作史官。皆初開局。舊吏僅存。多不識。殘編重對只成悲。免朝愈覺君恩厚。閑看中庭木影移。

感舊

四十三年夢今朝。又喚回。平橋穿小市。細雨壓輕埃。老喜詩情在。慵愁史課催。時時還自笑。白首接鄒枚。

贈陸伯政

夜窗燈火老徒勤。自憫何時可策勳。未喪斯文天壽我。豈無餘子我思君。約通殘譜言猶在。細讀新詩筆欲焚。早晚皇恩許歸去。相呼同臥石帆雲。

雨夜

暮雨濯殘熱。史官非坐曹。忍慙靡粟帛。偷暇近詩騷。屋老孤燈闇。風顛萬木號。明朝有奇事。江閣看秋濤。

自局中歸馬上口占

幼輿只合著山巖。誤被恩光不蓋慙。人怪衰翁煩尺一。心知造物賦朝三。飛騰豈少摩雲鶴。蹙縮方同作繭蠶。安得公朝閱枯朽。早教歸臥舊茆菴。

秋雨

久占煙波弄釣舟。業風吹作鳳城遊。不知苑外芙蓉老。但見牆陰苜蓿秋。黃把裹書俄復至。朱顏辭鏡不容留。晚窗又聽蕭蕭雨。一點昏燈相對愁。

秋夜

庭院蕭條夜氣清。臥聽宮漏下宮城。旅懷生怕還鄉夢。留取殘燈伴雨聲。

求月桂

重重汗簡擁衰翁。百里家山夢不通。病眼可令常寂寞。煩君爲致數枝紅。

秋思

烏帽翩翩九陌塵。杖藜誰記岸綸巾。遺簪見取終安用。弊帚雖微亦自珍。廊廟似聞憐老病。雲山漸欲屬閑身。牆隅苜蓿秋風晚。獨倚門扉感慨頻。

又

霜露初侵季子裘。山川空賦仲宣樓。夢回最怯聞衣杵。病起常憂負酒籌。日月往來雙轉轂。乾坤成壞一浮漚。書生事業無多許。二寸毛錐老未休。

史院書懷

後死與斯文。猶能讀典墳。雖慙千載事。要是一生勤。石磴霏霏雪。銅爐裊裊雲。扶衰又秋晚。何以報吾君。

楚辭所謂桂數見於唐人詩句及圖畫間。今不復見矣。作二絕句屬山僧野人試求之。

又

小山桂枝今所無。一生到處問樵夫。細思不獨人間少。月裏何曾有兩株。

又

丹葩綠葉鬱團團。消得姮娥種廣寒。行盡天涯年八十。至今未遇一枝看。

雨夜

細雨催扃戶。昏燈照擁衾。倦知秋漏永。瘦怯曉寒深。林鶻依簷宿。莎蟲入戶吟。此時搔短髮。誰會欲歸心。

九月初作

陸放翁集 劍南詩稿 卷五十一

一三

(一六六三)

菊佩饅饅節物催。老懷撫事一悠哉。年光半付殘編去。詩句時從倦枕來。零落朋儔今孰在。寂寥事業世方哈。兩叢月桂門前買。自下中庭破綠苔。

又

九月都門凜欲霜。羸軀恩免立鵷行。細書付吏贍初稿。和藥呼兒對古方。陋巷閉門常謝客。高齋掃地獨焚香。此生自計終何取。似有山林一日長。實錄有初稿二稿。

又

碧海仙蓬感舊遊。暮年心事轉悠悠。登高此去無多日。扶病重來又過秋。十里樓臺迷巷陌。萬家礎杵戒衣裘。平生剩欠觀書債。四庫留人未許休。

又

富貴功名未足云。平生一飯不忘君。哦詩高韻淒金石。把釣幽情渺水雲。落葉打窗秋已暮。歸鴉泊樹日將曛。欲知老病常多感。革帶今年減幾分。

暮秋

十日都門雨。風煙已暮秋。甌香新菽粟。篝煖故衣裘。意氣臨書健。形骸顧影愁。何時刻中路。秣蹇憩山郵。
重九不出遣懷

人生各自適。飛潛魚腹熊蹯豈得兼。並舍晚風傳藥杵。小窗殘日射書籤。昏睡但怪花爭墜。衰鬢應無白可添。采菊泛觴終覺懶。不妨閑臥下疎簾。

暇日

身健官閑荷主恩。蕭然不異在家園。一池新墨生吟思。半篆殘香入夢魂。舊友無書知獨冷。小兒有命會孤騫。藜羹麤足餘何事。鍾動三茅又斂昏。

憶三山

柳橋南北弄煙霏。門不常關客自稀。遣僕遠馱黃鸞出。呼兒閑取白鷗歸。片雲忽起迷丹竈。潦水初生沒釣磯。一出可憐時屢變。又看刀尺製秋衣。

示子聿

故山誰伴隱茅茨。幸有吾家大耳兒。雨暗小窗分夜課。雪迷長鏡共朝飢。名場未捷寧妨學。史限雖嚴不廢詩。我死汝應傳鉢袋。勉持愚直報明時。

車中作

秋天近霜霰。吳地少風塵。時駕小車出。始知閑客真。新交孰傾蓋。往事漫霑巾。處處皆堪隱。桃源莫問津。

初寒偶出

霜氣凋關樹。晴光入市樓。閑人無造請。佳日亦遨遊。湖白方新出。淮臈亦易求。秋來幸無病。作意試新籜。

史院晚出

已乞殘骸老故丘。誤恩重作道山遊。龍津雨過橋如拭。鳳闕煙消瓦欲流。直舍小眠鐘報午。歸途微冷葉飛秋。心知伏櫪無千里。縱有王良也合休。

贈洞微山人

我年六十四，獲譴輸鬼薪。束書出東門，揮手謝國人。笑指身上衣，不復染京塵。時有一老翁，祝我當自珍。卻後十五年，迎君浙江濱。我笑語是翁，豈說他生身。事果不可知，邂逅如隔辰。鶴髮無餘鬢，鶉衣仍苦貧。秋風旱河頭，握手一笑新。買酒烹雞豚，往事得具陳。試數同朝舊，零落增悲辛。與翁雖俱老，肝膽猶輪囷。千里亦命駕，何況託近鄰。秋高佳風月，相過莫厭頻。

九月十四日夜雞初鳴夢一故人相語曰我爲蓮華博士蓋鏡湖新置官也我且去矣君能暫爲之乎月得酒千壺亦不惡也旣覺惘然作絕句記之

白首歸修汗簡書，每因囊粟戲侏儒。不知月給千壺酒，得似蓮華博士無。

初寒對酒

晨起常教置一壺，色如鵝氄滑如酥。侍郎取榼不須笑，司業與錢還復酤。霜路預愁騎款段，雪舟每憶釣菰蒲。寒花滿帽君無笑，醉倒偏宜稚子扶。

午晴試筆

葉脫園林夜夜霜，風和巷陌日猶長。軒車但怪容孤鶴，糲米安能益太倉。此去得非窮李廣，向來元是老馮唐。明窗攬筆聊揮灑，颯颯驚蛇又數行。

夜吟

似睡不睡客欹枕，欲落未落月挂檐。詩到此時當得句，羈愁病思恰相兼。

又
六十餘年妄學詩工夫深處獨心知
夜來一笑寒燈下始是金丹換骨時

此
页
空
白

陸放翁集

劍南詩稿

卷第五十二

閑詠

身似地行仙，心非欲界天。輿竿聲軋軋，巾角影翩翩。買菊穿苔種，懷茶就井煎。歸來書遶坐，隨處一欣然。

又

久入春農社，新腰老衲包。紙裁微放矮，硯斲正須顛。髯簿能爲祟，方兄任絕交。吾詩無傑句，聊復當談嘲。

遊張園

冷局歸差早，名園得緩行。穿林山驟出，度峽路微平。霜近柳無色，風生蒲有聲。出門還愴怳，滿路夕陽明。

客至

官閑身自得，客至眼殊明。靜算棋生死，閑分酒濁清。悠然劇談罷，偶爾小詩成。但恨桑麻事，無人與共評。

客去

客來粘麈尾，客去拂牀眠。孤夢歸湖上，殘書墮枕邊。幽禽窺戶語，落日傍窗妍。暫爾名朝士，終然是地仙。

無客

今日了無客，愴然塵柄閑。硯涵鴝鵒眼，香斲鷓鴣斑。木落風初勁，雲低雨尙慳。西湖未暇到，臥看曲屏山。

次韻黃宮教見贈景說

士固未易料。世乃有若人。高標與曠懷。豈復容疎親。邂逅京塵中。握手一笑新。我雖讀古書。妙處媿斷輪。敢學狂接輿。歌鳳笑泣麟。空持鼻端聖。庶幾遇郢斤。獨立臨洪流。欲濟茫無津。君其幸教之。勿棄老病身。

書直舍壁

三黜媿公議。再來仍冷官。志無重奮發。身有轉衰殘。加飯支餘息。添衣禦早寒。歸休應漸近。不是強心寬。

又

道山西下路。杳杳歷重廊。地寂聞傳漏。簾疎有斷香。渠清水馬健。屋老瓦松長。欲出重欹枕。無何見故鄉。

韓太傅生日

珥貂中使傳天語。一片驚塵飛輦路。清霜粲瓦初作寒。天爲明時生帝傅。黃金飾奩雕玉觴。上尊卻食傳恩光。紫旄之峯玄熊掌。不數沙苑千羣羊。通天寶帶連城價。受賜雍容看拜下。神皇外孫風骨殊。凜凜英姿不容畫。問今何人致太平。縣地萬里皆春耕。身際風雲手扶日。異姓眞王功第一。

懷故山

老怯京塵化素衣。無端拋擲釣魚磯。碧雲又見日將暮。芳草不知人念歸。萬事莫論羈枕夢。一身方墮亂書圍。岷山學士無消息。空想燈前語入微。張季長祕閣久不得書。

西齋遣興

桐葉秋先賈菊。花寒更香。酒邊聊兀兀。身外本茫茫。小憩元非睡。長吟偶似狂。忽然思把卷。一笑就窗光。

雨夜作

十月多蚊蚋，昏昏氣未平。正須三日雨，卻用一霜晴。閑館蕭條意，空塔點滴聲。鐘殘撫枕歎，歸夢幾時成。

掩戶

蔗漿那解破餘醒，一讀南華眼自明。香縷映窗凝不散，墨丸入硯細無聲。太山蟻垤初何有，佛國魔宮本亦平。此段光明誰障得，曠懷還與老書生。

臥疾

舊疾乘衰作，長貧與嬾宜。羈愁惟付酒，史課未妨詩。雨入殘更滴，霜逢閏歲遲。新春真耄及，不用卜歸期。

晚歸

無事經秋別鏡湖，詩囊隨處累奚奴。樓頭寒日低將盡，陌上殘泥踏欲無。軒冕豈容關喜慍，簞瓢亦未費枝梧。畫橋綠浦歸來晚，一盞昏燈得自娛。

寂寂

接客厭紛紛，客去喜寂寂。今朝下簾坐，疎雨時一滴。地爐擁破褐，自笑嬾無敵。新春儻得歸，更面九年壁。

獨坐有懷杜伯高

畫橋通小市，深院欲黃昏。愛月先移燭，留香每閉門。李侯有佳句，樂令善清言。老病貪搢枕，何由共一樽。

李允蹈判院送酒四斗予答書乃誤以爲二斗作小詩識媿

冷官誰顧雀羅門，一紙惟君肯見存。堪笑放翁昏至此，乘壺誤寫作朋樽。

感舊贈超師

一聲清蹕出行宮，百尺黃旗繡戲龍。我赴文場君受戒，道邊曾共望高宗。

雜書

世味漸闌如嚼蠟，惟詩直恐死方休。四時風月元無盡，萬里江山更擬遊。

又

一身頂踵無非病，兩飯齏鹽亦闕供。正可清言學夷甫，不須豪氣似元龍。

又

枳籬莎徑入荆扉，中有村翁百結衣。誰識新年歡喜事，一雞一犬伴東歸。雞犬皆實事。

又

身似匡廬老病僧，閉門一衲坐騰騰。雨聲驚斷長安夢，惆悵西窗夜半燈。

送子虞赴金壇丞

與汝爲父子，忽逾五十年。平生知幾別，此別益酸然。念汝髮亦白，執手河橋邊。西行過臨平，想汝小繫船。悠悠蕩蕩路，渺渺雲陽川。京江昔所遊，想像在目前。今茲兩使君，幸有宿昔緣。汝雖登門晚，世好亦牽聯。顧於賞罰間，其肯爲汝偏。夙夜佐而長，努力忘食眠。醇如新豐酒，清若鶴林泉。棠宜使可愛，蒲正不須鞭。

今日史課偶少暇戲作五字

仲夏入都門，堂瓦忽已霜。史館方掄才，我亦廁其傍。三日敗一筆，手胝視芒芒。吏來督日程，炙冷不及嘗。

今辰偶少靜。掃地欲焚香。市聲塞我門。驪呼過我牆。鄙性不耐喧。愴意欲欲狂。天生兩窮耳。只堪聽啼螿。

入局

殘年困簡牘。靜坐憶漁樵。鄙意慙輕出。殊恩免早朝。微霜凋綠樹。寒日滿朱橋。悵望滄波友。弓旌豈易招。鏡湖西南有隱士。人不可得而見。

縱筆

胸中略無一點事。眼底常展數行書。半飢半飽便可爾。衣食何須求有餘。

又

小兒讀書耕且養。老夫入朝仕易農。明春史成許歸去。父子相逐歌年豐。

又

晝倦夜常成美睡。病多老卻未全衰。歸從册府猶披卷。了卻官書更賦詩。

又

坊遠不聞宮漏聲。三茅鐘殘窗欲明。山童睡熟呼不應。添水拂書翁自行。

送襄陽鄭帥唐老

鄭侯骨相非復常。伏犀貫額面正方。聲名赫奕動天子。家世富貴連椒房。武能防秋北平道。文合落筆中書堂。畿西謀帥國大事。當宁久弄黃金章。一朝丹詔自天下。兩班仰首看騰驤。鄭侯此行端可羨。繡旗卓轟戈如霜。三更傳令出玉帳。平旦按陣來毬場。宿兵萬竈盡貔虎。牧馬千羣皆驪驪。酒酣賦詩幕府和。縱

橫健筆誰能當。雖然鄭侯志意遠。虎視直欲吞北荒。榆林雁門塞垣紫。孟津砥柱河流黃。出師有路吾能說。直自襄陽向洛陽。

掩門

身瘦不勝笏。官閒常掩門。漢廷雖好老。楚澤未招魂。硯潤蟾疎滴。香殘鴨尚溫。箇中殊會意。恨欠阿戎言。

又

籟籟落高槐。陰陰長綠苔。只言門晝掩。不道客誰來。足痺思尋壑。愁生欠撥醅。吾兒能問事。梨栗且炮煨。

又

舉手可及屋。積書高挂頤。忽聞疎雨滴。恍記故山時。點染聊成字。呻吟僅似詩。不關才思盡。碌碌本亡奇。

又

寡求忘市遠。易足任囊空。院吏催呈史。家僮笑認窮。鬢毛驚盡白。倉粟餽陳紅。賴有三錢夢。時時到枕中。

自嘲

野老家風子未知。天教甫里出孫枝。遍遊竹院尋僧語。時拂楸枰約客棋。是處登臨有風月。平生歎歷半宮祠。即今簡事渾如昨。喚作朝官卻自疑。予仕宦幾五十年矣。歷崇道玉局武夷。今又忝佑神之命。

乍晴出遊

八十山翁病不支。出門也賦喜晴詩。小樓酒旆闌街處。深巷人家曬練時。本借微風欹帽影。卻乘新暖弄鞭絲。歸來幸有流香在。剩伴兒童一笑嬉。流香蓋賜酒名。

送客至湖州市

偶駕雞栖送客行。迢迢十里出關城。誰知小市蕭條處。剩有豐年笑語聲。聊借野風吹醉頰。更憑陂水濯塵纓。故廬想見春回近。鄰曲家家已遍耕。

題史院壁

命薄謀常拙。年衰力轉微。鷓飛元合退。羝乳偶成歸。汗簡慙靡日。流塵怯染衣。無端霜夜月。應照舊苔磯。

又

槁木忘榮謝。閑雲任卷舒。慵爲繞枝鵲。寧作蠹書魚。羈旅心常折。親朋夢亦疎。溪頭釣船在。恐負此心初。

又

白髮無餘鬢。蒼顏失故丹。旅遊多敗意。大屋每饒寒。出畏霜侵褐。歸乘日暖鞍。若非時得句。何以慰衰殘。

又

苦整平分路。銅環半掩扉。殘蕪寒不死。敗葉落還飛。責重何由塞。愁生但念歸。非無茅一把。世事苦相違。

寄二子

大兒新作鶴林遊。仲子經年戍吉州。日日望書常至暮。時時入夢卻添愁。得官本自輕齊虜。對景寧當似楚囚。識取乃翁行履處。一生任運笑人謀。

訪客至北門抵暮乃歸

北郭那辭十里遙。上車且用慰無聊。九衢浩浩市聲合。四野酣酣雪意驕。清鏡新磨臨綠浦。長虹橫絕度

朱橋歸來熟睡明方起。臥聽鄰牆趁早朝。

恩除祕書監

羣仙鶴駕去難追。白首重來不自知。才藝荒唐癡獨絕。功名蹭蹬老如期。海邊鄭叟窮耽酒。吳下韋郎晚學詩。扶上木天君莫笑。衰殘不似壯遊時。

寄題儒榮堂朝散大夫徐夢莘著北盟錄上之除直祕閣訓辭有儒榮之語因以名堂來求賦詩

軍容基禍廟謀疎。尙記文登遣使初。只道大功隨指顧。至今遺種費銖鋤。還朝不遣參麟筆。寓直空聞上石渠。剩辦殺青君記取。龍庭焚盡始成書。

夙興

鐘已樓頭動。燈猶帳外殘。霜濃愁枕冷。病起覺衣寬。鶴怨憑誰解。鷗盟恐已寒。君恩等天地。應許納微官。

館中書懷

流落逢明主。恩光集晚途。題名驚手戰。拜閣藉人扶。枉辱三華組。國史實錄及策府。凡忝三職。終歸一腐儒。庫書時取讀。猶足補東隅。

雜興十首以貧堅志士節病長高人情爲韻

仕宦徧四方。每出歸愈貧。寒暑更質衣。笑倒鄰里人。今年作史官。坐糜太倉陳。無如思歸何。日夜望絕麟。區區牛馬走。齷齪蟻蝨臣。恩深老不報。肝膽空輪囷。

又

孟子闢楊墨。吾道方粲然。韓愈排佛老。不失聖所傳。伐木當伐根。攻敵當攻堅。坐視日月食。孰探天地全。一木信難恃。要憂大廈顛。安得孟韓輩。出爲吾黨先。

又

聖人固多能。藝乃以不試。嗟予少貧賤。日月成坐棄。矧今耄已及。甘食而美睡。道衰朋友散。斯文凜將墜。閉戶輒竟日。孰與講仁智。厭厭生意盡。何暇議李志。

又

少年喜結交。患難謂可倚。寧知事大謬。親友化虎兕。出仕五十年。危不以讒死。始畏囊中錐。寧取道傍李。老來多新知。英彥終可喜。豈以二三君。遂疑天下士。

又

昔我遊廬山。夜遇東林雪。灰深火正熟。膏滅燈半滅。童驚林虎過。僧惜澗松折。至今每追想。可解肺肝熱。那知蓬山夢。忽繼此清絕。殊勝蘇子卿。餐氈持漢節。

又

觀人如觀玉。拙眼喜譏評。得失顧在人。玉固非所病。慶曆嘉祐間。人才於斯盛。王回僅一招。石介棄不聘。乃知天下士。成敗各有命。願君姑安之。天定豈不勝。

又

兩山如峨眉。一水若車輞。吾昔廬其間。百里臨莽蒼。少年手藝木。條榦日夜長。噉啞駕獨轅。迢遞搖兩漿。

平生會心地。今乃寄夢想。何時喚鄰翁。煙水行布網。

又

貨財不可居。祿位不可饜。我爾本一家。何至臯蘭塵。小夫謀人國。紛紛曰煎熬。或謂性本惡。或謂經無裒。誤人方自此。孰如飲醇醪。清言亦自佳。遺事非徒高。

又

魯山粹而博。韶美曠且真。石渠東觀中。久矣無若人。飛仙驂鳳鸞。豈久混世塵。空餘文章在。常與日月新。我雖不足數。疇昔忝交親。尙想秋燈下。對影歛幅巾。陳山魯山劉儀鳳韶美。

又

君子尙大節。又甚惡不情。魯連故可人。用意終近名。千載高夷齊。采薇忘其生。周公述易象。所以貴幽貞。去聖雖已遠。江左見淵明。我讀飲酒詩。朱弦有遺聲。

送任夷仲大監元受之子

往者江淮末。徹兵丹陽邈。逅識耆英。叩門偶綴諸公後。倒屣曾蒙一笑迎。敢意癡頑成後死。相從髣髴若平生。小詩話別初。何有一段清愁伴鷗聲。游昔在京口。與陳應求馮園仲查元章張欽夫諸人從先提刑遊。今三十九年矣。

謝韓實之直閣送燈

玉作華星綴絳繩。樓臺交映暮天澄。東都父老今誰在。腸斷當時諫浙燈。

又

舊友年來不作疎。華燈乃肯寄蝸廬。寧知此老蕭條甚。二尺檠前正讀書。

道山直舍

身世從來一蠹魚。討論猶記八朝初。自憐報國無他技。又領蘭臺四庫書。

館中營繕方一新而右文殿生芝草甚異

丹碧參差盛一時。殿楹三秀見金芝。漢庭漫道多才傑。天馬何勞作頌詩。

戲述淵明鴻漸遺事

桑苧柴桑一世豪。區區玩物亦徒勞。品茶未及毀茶妙。飲酒何如止酒高。

雪夜

雪屋透窗明。風簾撮夜聲。披衣擁爐坐。忘卻在都城。

直舍獨坐思成都

錦城花絮送吳船。屈指東歸又幾年。羣玉峯頭身老矣。百花潭上夢依然。青衫尙記稱狂客。白髮寧知作

老仙。所恨酒腸非復昔。閑遊空負杖頭錢。

歎老

鏡裏蕭蕭白髮新。默思舊事似前身。齒殘對客豁可恥。臂弱學書肥失真。漸覺文辭乖律呂。豈惟議論少

精神。平生師友凋零盡。鼻聖揮斤未有人。

冬曉

恩免宵興趁曉班。養慵終覺媿吾顏。浮名半世虛催老。高臥何時復得閑。兩岸夕陽漁浦市。數峯寒靄沃洲山。扁舟來往無窮樂。此事天公豈所慳。

有懷梁益舊遊

土壥纍纍復雙。悠然殘夢對寒缸。亂山落日葭萌驛。古渡悲風枯柏江。虎印雪泥餘過跡。樹經野火有空腔。四方行役男兒事。常笑韓公賦下瀧。

孤坐無聊每思江湖之適

世上元無第一籌。此身只合臥滄洲。鱸搖漁浦蒼茫月。帆帶松江浩蕩秋。有酒人家皆可醉。無僧山寺亦閑遊。老來閱盡榮枯事。萬變惟應一笑酬。

夢韓无咎如在京口時既覺枕上作短歌

隆興之初客江臯。連棹結駟皆賢豪。坐中无咎我所畏。日夜酬倡兼詩騷。有時贈我玉具劍。間亦報之金錯刀。舊遊忽墮五更夢。舉首但覺鐵盞高。樽前美人亦黃土。吾輩鬼錄將安逃。死生一訣信已矣。所恨膏火常煎熬。平生不愛葱嶺話。方術亦陋葛與陶。但當東歸棄百事。爛醉海上觀雲濤。

出東城竝江而歸

上車容假寐。出郭當閑遊。遠笛臨風起。高帆到岸收。人歸花市路。客醉酒家樓。徑就東窗臥。孤燈欲話愁。子聿欲暫歸山陰。見乃翁作惡。遂不行。贈以此詩。

鐘鳴豈復夜行時。文字相娛賴此兒。欲去復留知汝孝。未言先泣歎吾衰。兩篇易象能忘老。百畝山翁可免飢。但報家僮多釀酒。一欄紅藥是歸期。明年春晚。史院奏書必得歸矣。

題趙生畫趙生名廉宣和未得幸廉宣仲爲予言

東都畫手排浮萍。天子獨賞一趙生。幅縑尺紙皆厚賜。衆史妬媚都人驚。爾來一筆不復見。好事往往空聞名。奇哉此獨出劫火。論價直恐千金輕。老廉博士最別識。一見自謂雙眼明。老夫寓居旱河上。矮軸正向幽窗橫。飯餘捫腹看不厭。林外重閣高崢嶸。憑誰喚住兩禪客。水邊共聽煙鐘聲。

題宣律師畫像

秀目大頭顱。英姿舉世無。平生一瓦鉢。何處有天廚。

暇日弄筆戲書

天地爲我廬。江山爲我客。北斗以酌酒。恨我飲量窄。人生但閉戶。烏用分菽麥。贈君玉函方。憤憤無皂白。

又

草書學張顛。行書學楊風。平生江湖心。聊寄筆硯中。龍蛇入我腕。疋素忽已窮。餘勢尙隱鱗。此興嗟誰同。

又

胸懷幾雲夢。形骸一槁木。雖客長安城。未始忘退縮。古來豪傑士。強半死空谷。耐事勿動心。貧賤豈汝獨。

立春前後連日風雨

河岸春生綠。齋扉雨送昏。手鈔書半淡。巾漉酒微渾。餅餌連春日。歌呼近上元。所嗟今夕夢。不在石帆村。

武林

皇輿久駐武林宮，汗雘當時未易同。廣陌有風塵不起，長河無凍水常通。樓臺飛舞祥煙外，鼓笛喧呼明月中。六十年間幾來往，都人誰解記衰翁。紹興癸亥，予年十九，以試南省來臨安，今六十年矣。

立春後十二日命駕至郊外戲書觸目

身兼老病常歸臥，天半陰晴偶出遊。鸚鵡碧籠當戶外，鞦韆畫柱出牆頭。年華冉冉飛雙翼，夢境悠悠寄一漚。旅食都門那可久，少留應爲賦春愁。

又

宮雲縹渺漏聲遲，夢裏華胥卻自疑。春淺風光先盎盎，時平節物共熙熙。畫簾不捲聞人語，玉勒徐行避酒旗。閱盡輩流身獨健，恍如隨計入都時。

又

丹成不服怕升天，豈料乘風到日邊。九陌樓臺生細靄，萬家絃管送流年。香車寶馬沿湖路，繡幕金罍出郭船。折簡亦思招客醉，不堪春困又成眠。

春夜

客向燈前老，愁從枕上生。雨聲添好睡，花氣散餘醒。舊事談誰聽，新詩鍊不成。惟當速歸老，鄰父待同耕。

訪客至近郊

訪客西郊路，停車小苑門。閑雲寧有雨，淡日不成暄。鷺下青蘋浦，鴉啼綠樹村。還家未索寞，隨分具魚膾。

車中作

雨過未生塵。寒輕不著人。斷雲飛苑路。高柳暗天津。憔悴非平日。呻吟又一春。絲毫寧有補。空負耦耕身。

倦飛

倦飛何意閉樊籠。冉冉年光過眼空。酒盞不妨沾巷口。詩成多是在車中。曾腰白羽心猶壯。不養丹砂頰自紅。所歎暮年交舊盡。燈前情話與誰同。

遣興

馬跡車塵不到門。暮年萬事付乾坤。讀書浪苦只取笑。識字雖多誰與論。骨相元非金馬客。夢魂空繞石帆村。濁醪幸有鄰翁共。莫厭從來老瓦盆。

癸亥正月十日夜夢三山竹林中筍出甚盛欣然有作

新春身不到家園。東崦西村役夢魂。一夜四山雷雨起。滿林無數長龍孫。

此
页
空
白

陸放翁集

劍南詩稿

卷第五十三

謝徐志父帳幹惠詩編

平生聞若人，筆墨極奇峭。相望二千里，安得接談笑。一朝獲其詩，驚喜踰素料。夜窗取吟諷，寒燈耿相照。春容清廟歌，縹緲蘇門嘯。蹴天浙江濤，照野楚山燒。每篇十過讀，玩味頭屢掉。正如啜名酒，雖愛不忍酌。看君亦華髮，氣壓萬年少。予昔從茶山，辱賞三語妙。文章老不進，顛顛今可弔。誰知牛車鐸，黃鐘乃同調。願君時來過，勿恤俗子誚。

河橋晚歸

曲巷連新市，層樓近小橋。青帘猶滴雨，綠浦恰通潮。簾影晴方見，笙聲冷未調。斜陽覓歸路，偏愛玉驄驕。

謝王子林判院惠詩編王從楊廷秀甚久

文章有定價，議論有至公。我不如誠齋，此評天下同。王子江西秀，詩有誠齋風。今年入修門，軒軒若飛鴻。人言誠齋詩，浩然與俱東。字字若長城，梯衝何由攻。我望已畏之，謹避不欲逢。一日來叩門，錦囊出幾空。我欲與馳逐，未交力已窮。太息謂王子，諸人無此功。騎驢上灞橋，買酒醉新豐。知子定有人，詎必老鈍翁。紹興癸亥，余以進士來臨安，年十九。明年上元，從舅光州通守唐公仲俊招觀燈，後六十年嘉泰。

壬戌被命起造朝明年癸亥復見燈夕遊人之盛感歎有作

隨計當時入帝城。笙歌燈火夜連明。寧知六十餘年後。老眼重來看太平。

出謁晚歸

萬卷縱橫眼欲盲。偶隨尺一起柴荆。淵魚脫水知難悔。野鶴乘車只自驚。苑路落梅輕有態。御溝流水細無聲。紅塵朝暮何時了。促駕歸來洗破觥。

思歸示子聿

平生愛山水。遊陟老不厭。此外惟讀書。垂死尙關念。方昔少壯時。萬里攜一劍。自從還故山。日夜就收斂。豪恩置三館。寒灰忽光焰。龍鍾氣纔屬。筆力安得贍。同舍多賢豪。揣分無乃玷。春來百疾作。沉痾困鍼砭。思歸入夢寐。歷歷數過店。問津始胥濤。繫纜望禹窾。小江齋餅美。梅市將酒釀。雲破山嶙峋。雨足湖潏灑。二月柳勝槎。三月花如染。拄杖幸可扶。吾生尙何欠。更當與稚子。晨暮事鉛槧。天爵古所尊。榮名勿多占。

上元後連數日小雨作寒戲作

呼兒取酒敵春寒。病起飈裘剩覺寬。萬事不妨高枕臥。始知老子耐悲歡。

又

春風催暖入園林。一片雲生又作陰。留得梅花三日住。誰云造物本無心。

又

煙籠天闕青鴛溼。水漲官河畫鷁浮。解賦春陰三十首。不應惟有宋鄜州。

又

擬撥殘書出郭行。浮雲忽已敗春晴。窮閭今雨無車馬。臥聽深泥濺履聲。

出湧金門

出湧金門一黯然。初來猶是紹興前。都人百萬今誰在。惟有西湖似昔年。

書志示子聿

誤上蓬山亦已叨。所悲故里隔胥濤。還家未失屠羊業。報國元無汗馬勞。載筆敢言宗史漢。閉門猶得讀莊騷。小兒願與翁偕隱。正恐聲名未易逃。

入春念歸尤切有作

六朝覆育忝遺民。扶櫬歸來雪鬢新。對酒無歡翻作病。愛詩何得但窮人。腰錢自昔妨騎鶴。絕筆何時到獲麟。鄉俗嬉遊重端五。剩烹糲糗喚比鄰。笠者言予五月可還故山。

書房雜詠

賦性無他嗜。傳家但古書。堯咨洪水際。羲畫結繩餘。異學方攘斥。浮文亦掃除。挑燈北窗下。聊得遂吾初。

又

久客思鄉井。殘軀怯歲年。家能常食粥。口固不言錢。鐵補曾穿硯。韋聯屢絕編。臥聞兒講學。起坐失沉懸。

獨立思故山

谿水初生與岸平。橋頭新柳已藏鶯。詩緣遇興玲瓏和。酒爲逢知爛熳傾。青箬買來衝雨釣。烏犍租得及

時耕今朝獨立東風裏。歎息無人會此情。

寓歎

俗心浪自作琴絲。世事元知似弈棋。舊業蕭然歸亦樂。餘年至此死何悲。古人可作將誰慕。造物無心豈汝私。已決殘春故溪去。短葦垂釣月明時。

後寓歎

貂蟬未必出兜鍪。要是蒼鷹憶下鞲。彭澤往歸端爲酒。輕車已老豈須侯。千年精衛心平海。三日於菟氣食牛。會與高人期物外。摩挲銅狄灑城秋。

新歲頗健寄青城故人

驕氣年來痛自鋤。似能略契度關書。神光出背夜穿帳。胎髮滿頭晨映梳。吾道元知非土苴。此身那可付丘墟。岷山幸有丹爐在。青壁何時其結廬。

新年七十有九

中歲抱沉痾。詎敢望七十。造物偶脫遺。俯仰耄已及。寧知辱弓旌。扶憊去鄉邑。受恩不知報。懷抱空快悵。天門邈難覓。地芥亦懶拾。隨身一詩囊。副以兩藥笈。何當復得謝。浩蕩脫維繫。擘浪畫楫飛。穿雲青鞵溼。餘年尙有幾。登覽當汲汲。狂吟題寺廊。大筆醲墨汁。

春日訪客於逆旅及郊寺感而有賦

底事經年客帝鄉。風光淡沲日初長。野歌作氣老猶壯。花氣撩人醒亦狂。店壁拂塵尋舊字。寺樓極目送

斜陽告歸不過殘春事。杜曲桑麻亦未荒。

二月二日夢中作

零落薔薇委道傍。更堪微雨漬殘香。象牀玉尺人何在。腸斷新裁錦一方。

對酒作

羨門安期何在哉。河流上泝崑崙開。白雲不與隱居老。孤鶴自下遼天來。春江風物正閑美。綠浦潮平柁初起。暮吹長笛發巴陵。曉挂高帆渡湘水。世間萬變更故新。會當太息摩銅人。脫裘取酒藉芳草。與子共醉壺中春。

西湖春遊

靈隱前。天竺後。鬼削神剝作巖岫。冷泉亭中一尊酒。一日可敵千年壽。清明後。上巳前。千紅百紫爭妖妍。瑟瑟鼓聲鞠場邊。鞦韆一蹴如登仙。人生得意須年少。白髮龍鍾空自笑。君不見。鬪亭耐事故將軍。醉尉怒訶如不聞。

春晚用對酒韻

吾今歸哉復歸哉。草堂正對湖山開。座銘漆園養生主。屏列柴桑歸去來。一閑可敵八珍美。驪駒在門端可起。不緣老病日日增。世味從來淡如水。故人誰非白頭新。況復眼中無故人。但餘一恨未免歎。掩關睡過今年春。

題館中直舍壁

幾年顛顛去清班。敢辱君恩誤賜環。但厭軟塵隨倦馬。不愁弱水隔神山。下帷寢飯羣書裏。退食雍容衆
雋間。行矣東歸竟何補。低回未免媿吾顏。

春晚懷故山

吾廬煙樹間。正占湖一曲。遠山何所似。鬢髻千髻綠。近山更可人。連娟兩眉蹙。澗蟠偃蓋松。路暗圍尺竹。
海棠雖妍華。態度終不俗。最奇女郎花。宛有世外躡。雖云嬾出遊。閉戶樂事足。年來殊失計。久耗太倉粟。
淖糜不救口。斷簡欲滿屋。兀兀不知春。青燈伴幽獨。

春社日效宛陵先生體

社雨

開歲纔幾時。春社忽已及。茫茫草色深。蕭蕭雨聲急。扶犁行白水。不惜芒屨溼。村童更可憐。赤脚牛背立。
社鼓

酒旗三家市。煙草十里陂。林間鼓鼕鼕。迨此春社時。飲福父老醉。嵬莪相扶持。君勿輕此聲。可配豐年詩。

社酒

農家耕作苦。雨暘每關念。種黍踢麴麩。終歲勤收斂。社瓮雖草草。酒味亦醇醲。長歌南陌頭。百年應不厭。
社肉

社日取社豬。燔炙香滿村。飢鴉集街樹。老巫立廟門。雖無牲牢盛。古禮亦略存。醉歸懷餘肉。霑遺徧諸孫。

局中春興

天知病眼困風沙。借與蓬山閱物華。微暖已迎新到燕。輕陰猶護欲殘花。幽窗寂寂書圍座。倦枕時時夢過家。立馬庭前還小駐。不妨閑試半甌茶。

久客

顛顛閑坊底。蕭條久客心。燕歸知社過。葉密覺春深。燈火愁殘史。塵埃歎素琴。餘生猶有幾。去日苦駸駸。

幽居

花過鶯初嬾。泥新燕正忙。病餘猶止酒。睡起獨焚香。拄杖嫌園窄。棋枰喜日長。北窗元可樂。不是傲羲皇。

春日絕句

吏來屢敗哦詩興。雨作常妨載酒行。忽見家家插楊柳。始知今日是清明。

又

二十四番花有信。一百七日食猶寒。眼中不是無春色。歎息衰翁自鮮歡。

又

門前喚擔買芳菲。白髮猶堪插一枝。舊厭蛙聲今喜聽。牆陰特地作盆池。

又

故園蛺蝶最多種。百草長時花亂開。窮巷春風元不到。一雙誰遣過牆來。

又

桃李吹成九陌塵。客中又過一年春。餘寒漠漠城南路。只見鞦韆不見人。

又

便恐東皇促駕回。小軒無事且啣盃。不知何處桃花落。一片飛從屋角來。

又

介亭南畔排衙石。剝蘚剜苔覓舊題。讀罷南豐數行字。滿山煙雨共淒迷。

又

楊家園裏醉殘春。醉情傍人拾墮巾。紅紫飄零不須歎。東君渠自是行人。

歎老

晨起梳頭滿鏡霜。豈堪著脚少年場。酒徒分散情疎索。棊敵憑陵意頽頽。寓世極知均醉夢。餘生只合老耕桑。石帆山下蓴絲長。待我還東泊野航。

春雨中偶賦

老子年來百事慵。不妨詩課尙能供。殘花已覺胭脂淡。煮酒初嘗琥珀濃。羸病不堪連日雨。孤愁偏怯五更鐘。舊交只有烏藤在。且伴禪牀莫化龍。

戲詠落花

終年栽接待新春。一日隨風委路塵。愁殺主翁渠不管。爭如只作看花人。

思歸示兒輩

睡味甜如蜜。人情冷似漿。流年垂及耄。客子固多傷。興發雞豚社。心闌翰墨場。吾兒姑力穡。莫羨笏堆牀。

東軒花時將過感懷

小軒風月得婆娑。盡付流年與嘯歌。細數一春今過半。正令百歲亦無多。還家常恐難全璧。閱世深疑已爛柯。只欲閉門搗倦枕。晚風無奈落花何。

又

社雨晴時燕子飛。園林何許覓芳菲。江山良是人誰在。天地無私春又歸。殘史有期成汗簡。修門即日挂朝衣。人生念念皆堪悔。敢效淵明歎昨非。

江亭

千載濤江上。書生誦所聞。鑄形尊越蠡。抉眼悼荆員。高鳥衝煙沒。輕舟壓浪分。何由從此逝。揮手謝諸君。

對食

天賦元無滿谷羊。不煩梁肉汗龜腸。忽逢客釜純羹美。遙憶山廚麥飯香。正有一簞元自足。縱嘲三韭亦何傷。江邊煙岫參差路。便喚漁舟莫治裝。

飽食

飽食無功媿汗青。燈前顧影歎伶俜。馬衰猶養疑知路。龜久當捐爲不靈。腰下徒誇綬若若。鏡中何止髮星星。石帆回首初非遠。要及清秋斲茯苓。

記夢

旅夢遊何地。分明禹廟傍。不嫌村餉薄。但愛野蔬香。筍市連山塢。菱歌起夕陽。一簞元所樂。枉道嬾衣裳。

初夜暫就枕

街鼓寥寥欲斷時。官閑惟與睡相宜。褰帷臥看初升月。轉枕重思未穩詩。偃仰少安真得策。欠伸徐起頓忘疲。悠然已在羲皇上。莫遣兒曹取次知。

次林伯玉侍郎韻賦西湖春遊

西湖一別不知年。陳迹重尋麥嶺邊。山遠往來雙白鷺。波平俯仰兩青天。殘骸自覺難支久。一笑相從亦宿緣。旅食京華詩思盡。羨公落筆思如泉。

湖中微雨戲作

搓罷青梅指爪香。一盃聊復答年光。莫言老子無人顧。猶得西施作淡粧。

與兒輩泛舟遊西湖一日間晴陰屢易

逢著園林卽款扉。酌泉鬻筍欲忘歸。楊花正與人爭路。鳩語還催雨點衣。古寺題名那復在。後生識面自應稀。傷心六十餘年事。雙塔依然在翠微。

贈呂次翁杖

君得金丹雖未仙。放翁邂逅與忘年。空能處處誇詩句。不解時時贈酒錢。馬駿極知生翼土。鶴飛會見上遼天。爾來筆硯塵埃滿。剩欲相從乞一聯。

得子聿到家山後書

日日春陰愁出戶。汝今恰遇十分晴。桑林紫葢纍纍熟。稻壠青秧漫漫平。夢好定知行路健。書來深慰倚

門情。柯橋道上山如畫。早晚歸舟聽鷓聲。

題齋壁

小屋閑坊旋卜居。老人也看作吾廬。客知貪睡多留刺。兒未來歸自檢書。草賦萬言那直水。屬文三紙尙無驢。京塵日念家山樂。況值腰鎌割麥初。

又

殘髮蕭蕭不滿簪。衰年亦自惜光陰。作碑諛墓已絕筆。紬史藏山猶苦心。穿破綠錢多稗筭。驚飛紅雨有幽禽。北窗睡起摩挲眼。更覺清風直萬金。

又

一櫂秋風去已遲。釣竿恐失野人期。朝回補睡尋幽夢。客去偷閑練近詩。浮世本知緣苦薄。頽齡已與志俱衰。平生所慕孤山老。剩欲懷茶奠舊祠。

小飲

門生嘲喜眠。官長罵耽酒。人生自適爾。嘲罵亦何有。蒸我乳下豚。翦我雨中韭。盃盤雖不豐。吾兒起爲壽。車馬滿長安。誰肯顧衰朽。作詩付汝藏。千金珍弊帚。

贈傳神水鑑

寫照今誰下筆親。喜君分得臥雲身。口中無齒難藏老。頰上加毛自有神。誤遣汗青成國史。未妨著白號山人。它時更欲求奇迹。畫我溪頭把釣緡。

春晚

新綠成陰小雨時。幅巾蕭散與閑宜。燕歸赴訴經年別。鶯晚分疏出谷遲。曉枕呼兒投宿酒。暮窗留客算殘碁。翛然此意風塵表。正恐羲皇未必知。

天竺曉行

三茆聽徹五更鐘。二竺穿窮九里松。無復官樓沽酒美。但煩湖水照衰容。

又

筍輿咿軋水雲間。慙愧忙身得暫閑。堪笑風中一黃葉。知看天外幾青山。

初見石榴花

吳中四月尙餘寒。細雨霏霏怯倚闌。老子真成興不淺。榴花折得一枝看。

夢遊

太華峯頭秋氣新。醉臨絕壁岸綸巾。世間萬事惟堪笑。禹跡茫茫九片塵。

又

九秋風露洗頭盆。萬里雲煙腰帶鞵。小盃松醪知己熟。與君爛醉不須醒。

又

客途幽夢苦淒淒。滿眼山川意卻迷。條華朝驅雲外騎。河潼夜聽月中雞。

江亭晚思

本自無閑況有忙。遠坊兀兀送年光。太空不礙雲舒卷。高枕寧論夢短長。山破霽煙千萬疊。鳥橫潮浦兩
三行。年來自笑詩情減。愁絕奚奴古錦囊。

上章納祿恩畀外祠遂以五月初東歸

身似霜松老不枯。乞骸猶得侍清都。百錢濁酒渾家醉。六月飛蟲徹曉無。美睡不愁閑客攪。出遊自有小
兒扶。買山尚恐巢由笑。敢問君王覓鏡湖。

又

黃紙淋漓字似鴉。即今真箇是還家。園廬漸近湖山好。鄰曲來迎鼓笛譁。饔飧傍籬收豆莢。盤蔬臨水采
芹芽。皇家養老非忘汝。不必青門學種瓜。

又

羣玉峯頭孤夢斷。五雲溪上野舟回。傍人鷗鳥自然熟。到處藕花無數開。麥飯不壓常面槁。柴門閑掩自
心灰。雨來正作盆山地。不怕冥冥半月梅。

又

身是風前一斷蓬。經年竊食竟何功。倚天青嶂迎船出。撲馬紅塵轉眼空。網戶餉魚勝丙穴。旗亭送酒等
鄆筒。死前幸作扶犁叟。免使淮南笑發蒙。

又

此身惟有一躬耕。乞得餘年樂太平。東觀並遊收昨夢。西湖重到付來生。一堤草露明晨照。半浦荷風颭

晚晴歷歷歸途皆勝事。江亭先聽櫂歌聲。

江亭

旅食京華興已闌。喜扶衰體出重關。江波蘸岸綠堪染。山色迎人秀可餐。濠上觀魚非至樂。管中窺豹豈全斑。此行便問天台路。剩采靈芝換病顏。

題三茆邵道士雲隱

興盡當年句曲秋。卻歸菴畫弄扁舟。有時信脚來沙際。拾得殘雲補破裘。

又

尙嫌勾漏養丹砂。況種劉郎去後花。菴畫溪頭雲萬頃。不知何處是君家。

受外祠敕

放浪江湖迹已陳。今朝剩喜結銜新。讀騷未敢稱名士。拜賜猶應號散人。歸去還騎款段馬。醉顛重岸接離巾。行行漸近雲門寺。愈信人生有宿因。

感寓

人生難控搏。古謂七十稀。壽夭雖小異。要亦同所歸。君看衡山日。耿耿有餘暉。投牀方息偃。晨起復求衣。萬家同一役。負水關門扉。知叟與愚公。畢竟孰是非。

又

老氏有至言。所貴知我稀。鄙夫急自銜。豈復擇所歸。君看珠在淵。草木借光輝。所以古達人。懷玉被褐衣。

吾廬大澤中。歲苦水半扉。朱門固自好。我亦未必非。

肉食

平生愛枯淡。老病未免肉。殺戒苦難持。貧境則易熟。鄙夫五鼎少。達士一瓢足。紛紛刀机間。斷者豈復續。習聞謂當然。乍見可痛哭。長安多貴人。得此試一讀。

贈成封州籙

綠髮臨邊固已奇。不應顛顛客京師。極知自有封侯骨。但要無忘耕壟時。意氣覆甌書捷布。風流橫槩賦新詩。平生每恨相從少。滿眼關山又語離。

予以壬戌六月十四日入都門癸亥五月十四日去國而有閏月蓋相距正一年矣慨然有賦三百六十日扶衰得出都略無新伎倆仍是舊形模世事蠻攻觸人情越事吳勿言萑菜老櫟權醉湘湖

又

一百七十里。我行誰謂賒。期年初去國。度宿即還家。事似談春夢。身如寄客槎。石帆村好在。重理舊桑麻。

雨中別同朝諸公

今日別交舊。街泥盈尺深。極知當作惡。追恨闕相尋。笑語關幽夢。江山入苦吟。新秋纔一月。留句待清砧。

又

兩點萬珠落。水聲羣馬奔。纔能脫危歸。未遽定驚魂。一掃枕中夢。卽歸江上村。村醪莫嫌薄。隨事有雞豚。

出城

鸛枕不成寐，羸驂曉出城。驛門深閉草，苑樹密藏鶯。老病安閑散，疎慵負聖明。津亭凝望久，惟是待潮平。

宿北錢清

晡時理舟楫，甲夜泊錢清。蠶餅依然美，店家齋麵有名。已六十年矣。漁燈特地明，酒旗闌道出，風浪拍船鳴。未說鄉閭喜，江山亦有情。

老伶

老伶頭已白，相識不論年。時出隨童稚，猶能習管絃。煙林梅市路，風幔放翁船。餘酒堪同醉，君無惜醉眠。

舟行錢清柯橋之間

逾年夢想會稽城，喜挂高帆浩蕩行。未見東西雙白塔，先經南北兩錢清。兒童鼓笛迎歸艦，父老壺觴敘別情。想到吾廬猶未夜，竹間正看夕陽明。

寓蓬萊館

道山方夢斷，稅駕復蓬萊。海上瓶應乳，遼東鶴已回。客驚添鬢雪，自笑久心灰。底事妨人睡，樓頭暮角哀。

乍自京塵中得歸故山作五字識喜

門巷如秋爽，軒窗抵海寬。初還綬若若，已覺面團團。引睡拈書卷，偷閑把釣竿。人生快意事，五月出長安。

初歸雜詠

雪滿漁蓑雨墊巾，超然無處不清真。胸中那可有一事，天下故應無兩人。騎馬每行秋棧路，喚船還渡暮江津。酒樓僧壁留詩徧，八十年來自在身。

又

齒豁頭童儘耐嘲。即今爛飯用匙抄。朱門漫設千盃酒。青壁寧無一把茅。偶爾作官羞問馬。頽然對客但稱貓。此身定向山中死。不用磨錢擲卦爻。磨錢擲卦爻。蜀龍昌期語也。

又

八十可憐心尙孩。看山看水不知回。輕炊香甑桃花飯。淺酌清尊竹葉醅。平地本知多陷阱。羣兒隨處覓梯媒。曠懷只待秋風起。十丈蒲帆海上開。

又

換盡朱顏兩鬢皤。流年如此奈君何。早從學問求開益。晚悟文章要詆訶。每憶壯遊成獨笑。間逢老伴亦高歌。更餘一恨君知否。千載涪溪石未磨。

又

窗下初收剝啄基。疎簾窳地晝陰移。下巖石潤揮毫後。正焙茶香落磴時。癯老入朝元是錯。期年決去已爲遲。天公賦予誰能測。只吝功名不吝詩。

又

小園五畝翦蓬蒿。便覺人間迹可逃。盡疏珍禽添爾雅。更書香草續離騷。藥苗可斲攜長鑊。黍酒新成壓小槽。老入鷓鴣行方徹悟。一官何處不徒勞。

又

乞得身歸且浩歌。蕭然生世寄漁蓑。茶甘半日如新啜。墨妙移時不再磨。山寺蹋雲頻獨往。鄰家穿竹自相過。棊枰勝負能多少。堪笑傍人說爛柯。

陸放翁集

劍南詩稿

卷第五十四

湖上急雨

谿煙一縷起前灘。急雨俄吞四面山。造化等閑成壯觀。月明卻送釣船還。

夏日獨居

平生本清淨。垂老更蕭然。已罷客載酒。亦無僧說禪。空庭朝下鵲。密樹晚鳴蟬。長日君無厭。新秋近眼邊。

溪上夜釣

少時妄意學金丹。八十谿頭把釣竿。露溼菱叢姑惡哭。煙深沙渚鷺鷥寒。登臨每歎乾坤大。強健猶應歲月寬。作意清吟未須厭。如山殘稿後人看。

幽事

曳杖驚林鵲。投竿冒澗花。若非詩滿卷。只道夢還家。開士分朝飯。鄰翁喚午茶。悠然吾事足。歸路竝山斜。

夙興

幽夢回千里。高城轉五更。窗虛送月落。竹動喜風生。自笑行安往。猶思坐待明。郊居少僮僕。手自闢柴荆。

文章

文章在眼每森然。力弱才疎挽不前。前輩不生吾輩老。恐留遺恨又千年。

閑遊

觸熱辭行在。扶衰返故丘。亂蟬催落日。病葉報新秋。秣塞投山驛。尋詩倚寺樓。不因行萬里。那信此生浮。

又

剡縣有佳處。吾行無定期。橫塘供晚釣。孤店具晨炊。約客同看竹。留僧與對碁。人生得自在。更老未爲遲。

又

我出亦何急。輟行還悵然。輕裝幸已具。老健更誰先。野飯聊支日。山蔬不直錢。此生終樂死。何以報皇天。

又

已破京塵夢。還尋剡曲遊。戴星離古戍。衝雨憇山郵。壁認曾題字。門橫昔渡舟。經行固多感。隨處寄悠悠。

夏日

赫赫炎威日正中。冰紈笛簟欲無功。一心願伴沙頭鷺。百計難呼木杪風。纖手削瓜刀似水。小罍分酒盞如空。洗心幸有高樓月。少待寒光出海東。

蜻蜓浦夜泊

風雨忽如秋已深。短篷今夜繫楓林。溪翁那問市朝事。蔬食不生盃炙心。橫截煙波飛健鶻。遠投沙渚落羈禽。斯遊誰道傷幽獨。猶有殘鐘伴苦吟。

幽興

微官那得繫疎慵。幽興渾如社酒濃。掃盡塵埃無一點。洗空幻翳有千重。百年到處俱羈客。萬里從來付短筇。身在有餘真妙語。盃羹何地欠秋菘。

避暑近村偶題

乞得身歸荷聖時。登臨筋力未全衰。楚祠草舍三叉路。項羽廟在項里。隋寺苔侵半折碑。安隱院也。孤店不妨乘月宿。扁舟頻爲看山移。紅塵冠蓋真堪怕。還我平生白接巵。

南堂夜坐

老來日月駛。秋令俄更端。蟬號晚愈壯。螢火流空園。西風吹衣裳。蕭然謝炎官。飽食一事無。散髮坐前軒。河漢西南流。北斗何闌干。坐久光彩變。缺月涌金盆。欲睡復躊躇。草棘露已溥。徂歲何足道。死生付乾坤。立秋前夕作

憶昔

螢度梧楸徑。鳥鳴蒲葦洲。寧知八十老。又見一年秋。賀監稱狂客。劉伶贈醉侯。吾身會兼此。已矣尙何求。憶昔西遊兩鬢青。卽今鏡裏雪千莖。蛾眉風月猶關念。濯錦鶯花已隔生。避暑有時移枕簟。畏人終日閉柴荆。此懷恨欠詩千首。且寄秋泉一再行。

自嘲

外澤裏常粗。元知似瓠壺。仕因無援困。學爲背時孤。軒蓋愁城市。風煙落道途。它年遊萬里。不必念歸吳。夜坐庭中

大澤秋初到，荒庭夜自明。風雲生有候，河漢落無聲。病得新涼減，詩因少睡成。高枝有烏鵲，栖穩若爲驚。

養生

稟賦本不强，四十已遽衰。藥裹不離手，對酒盤無梨。豈料今八十，白間猶黑絲。咀嚼雖小艱，幸未如牛同。昔雖學養生，所遇少碩師。金丹既茫昧，鸞鶴安可期。惟有庖丁篇，可信端不疑。愛身過拱壁，奉以無缺虧。擊不患天作，戚惟憂自貽。攣覺豈不苦，害猶在四支。二豎伏膏肓，良醫所不治。衣巾視寒燠，飲飲節飽飢。虎兕雖在傍，牙爪何由施。老人不妄語，聊賦養生詩。

飲酒近村

放翁睡多少，行人扶往赴。鄰里集，痛飲山花插鬢紅。醉歸棘露霑衣溼，紗巾一幅何翩翩。庭中弄影不肯眠，莫欺此老今衰甚。曾見高皇狩越年。

遊山

蕭散湖山路，天教脫鞵羈。蟬聲入古寺，馬影度荒陂。樵唱時傾耳，僧談亦解頤。偏門燈火鬧，不敢恨歸遲。

偏門會稽城西南門名。

又

久客喜歸舍，況逢秋氣新。聊乘行藤子，閑覓住菴人。道士青芒屨，高僧白氎巾。更須苦井水，一爲濯京塵。

又

病退行猶倦，山坡每少休。高枝聞鵲語，淺瀨見魚游。偶有堪乘興，元無可遣愁。悠然又終日，爭路有歸牛。

又

古寺不來久。入門空歎嗟。僧亡猶見塔。樹老已無花。世事雖難料。吾生固有涯。慙慙一梳月。十里伴還家。

聞蛩

又

稽首周公萬世師。小儒命薄不同時。秋蟲卻是生無憾。名在幽人七月詩。

入秋遊山賦詩略無闕日。戲作五字七首識之以野店山橋送馬蹄爲韻。

束髮初學詩。妄意薄風雅。中年困憂患。聊欲希屈賈。寧知竟鹵莽。所得纔土苴。入海殊未深。珠璣不盈把。老來似少進。遇興頗傾瀉。猶能起後生。黃河吞鉅野。

又

我昔西遊邊。萬里持一劍。風飡不自恤。露宿未嘗厭。棧危餘漢燒。山斷有秦塹。敢誇胡羊美。但懷巴酒醞。回首四十年。遠遊每關念。秋風跨蹇驢。尙喜道傍店。

又

周南太史公。道家蓬萊山。塵凡不可料。亦復居其間。屢秦乞骸骨。寬恩許投閑。羽衣碧玉簡。尙綴仙官班。黃精掃白髮。面有孺子顏。簡寂吾家舊。飄然時往還。

又

我行剡中路。茆店連谿橋。驢弱我亦飢。解鞍雨蕭蕭。投牀得小憩。炊黍烹藥苗。舉手謝主人。去路盤山腰。沃洲在何許。秋葉紅未凋。遊僧不可逢。聊須問歸樵。

又

怕事真驚癡。老作入都夢。頭顱今何似。尙復堪自送。聯裾預登瀛。策馬從上雍。年衰當亟去。恩大容力控。雖言解朝藉。尙予侍祠俸。明年卽八十月。難把弄著書則已矣。努力謀社益。

又

吾才如蹇人。何計逐奔馬。吾文如醜女。惟藉粉黛假。向來已歸休。畢志向林下。塊然一愚公。初不繫用捨。國恩定難報。衰涕時一灑。人本不勝天。豈復論衆寡。

又

驢病比已損。秋風輕四蹄。朝遊支遁寺。莫涉千吉谿。青嶂環孤村。綠波溢橫隄。吾行本無定。所至窮攀躋。細推亦何樂。正類好鍛嵇。自今當務本。春蕪飽鉏犁。

村居

白首歸來亦灌畦。任教鄰里笑栖栖。道心寧感兩雌雉。生計惟存五母雞。不恨閑門可羅爵。本知窮巷自多泥。暮聞鼓角猶人境。更欲移家入剡溪。

又

游子從來念故鄉。我歸仍得值豐穰。粗繒裁製襜褕暖。肥粳烹調鱠飴香。對客不妨依几杖。呼兒時與話。

耕桑卻慙未解真齊物。猶揀山村靜處藏。

又

青藜杖出氛埃外。白版扉開水竹邊。造物與閑仍與健。鄉人知老不知年。齋居每袖持螯手。妄想寧流見麴涎。昨夜小庭風露冷。菊花消息已先傳。

又

石帆山下樂誰如。八尺輕舸萬頃湖。能饒人家分小楹。愛棊道士寄新圖。條枚積地樹雞柵。溝港接筒澆芋區。父子還家更何事。斷編燈下講唐虞。

六藝示子聿

六藝江河萬古流。吾徒鑽仰死方休。沛然要似禹行水。卓爾孰如丁解牛。老憊簡編猶自力。夜涼膏火漸當謀。大門舊業微如綫。賴有吾兒共此憂。

七月十七夜五更起坐至旦

秋容淡如水。昨暮到江城。世事違高枕。年華入短檠。書中固多味。身外盡浮名。倚壁方清嘯。蓬窗已送明。

書懷

不飢不寒萬事足。有山有水一生閑。朱門莫管渠癡絕。自愛茅茨三兩間。

又

老人舉動須扶掖。跛婢椎奴少得閑。從此漸須都畫斷。正如避難在空山。

又

蝸廬自稱野人居。三尺明窗已有餘。從此要當常省事。時時小葺欲何須。

又

苜蓿堆盤莫笑貧。家園瓜瓠漸輪囷。但令爛熟如蒸鴨。不著鹽醃也自珍。

湖上秋夜

湖上山銜落月明。釣筒收罷葉舟橫。不知身世在何許。一夜蕭蕭蘆荻聲。

書感

俗學方譁世。遺經寢已微。斯文未云喪。吾道豈其非。拔本寧餘力。迷途幸識歸。新涼起衰疾。燈火耿郊扉。

示兒

得道如良賈。深藏要若無。冶金寧輒躍。韞玉忌輕沽。儒術今方裂。吾家學本孤。汝曹能念此。努力共枝梧。

書適

北崦千梢竹。東軒八尺牀。徧行欣老健。熟睡領新涼。海石陳書几。陶詩貯藥囊。時時一到眼。亦足傲羲皇。

海石英石也。東坡詩云。海石來珠浦。

又

心清絕慾早。才薄去官多。月下時閑釣。雲邊每浩歌。野堂青草覆。山市白驢過。也有成功處。新降百萬魔。

放慵

往者耕仍養。中間仕易農。屢辭身老病。每荷上矜從。進媿門三戟。歸無畝一鍾。扶持得良藥。更放幾年慵。
登臨

儘道羈懷惡。登臨亦解顏。健嫌山路淺。狂恨猶尊慳。親友多疎索。漁樵自往還。有詩仍嬾記。零落水雲間。
寓歎

有位方憂失。無家豈念歸。賢愚竟誰得。今昨兩皆非。世事無長算。人情忽駭機。細思如意處。惟有釣魚磯。
居家

爲吏心雖嬾。居家力尙餘。刈茅支屋漏。栽棘補籬疎。就井磨樵斧。持錢鍛藥鉏。毋勞歎徒步。野鶴豈堪車。
舟中作

野老元無事。乘閑偶一來。微風市樓笛。落日寺街槐。梨大圍三寸。鱸肥疊四腮。鄰船不識面。呼與共銜盃。
築舍

築舍水雲鄉。蕭然似淨坊。粥鎗菰米滑。羹釜藥苗香。素壁圖嵩華。明窗讀老莊。與人元淡淡。不是故相忘。
雜感

孔欲居九夷。老亦適流沙。忠信之所覃。豈間夷與華。況我州閭間。相視等一家。老稚各自力。勉蹈思無邪。
又

十月可釀酒。六月可作醬。兒曹念乃翁。左右日供養。比鄰有老疾。亦復致一餉。老老以及人。此義古所尙。
又

肉食養老人古雖有是說修身以待終何至陷饕餮晨烹山蔬美午漱石泉潔豈役七尺軀事此膚寸舌

又

一氣不遽變雨霽皆有符死非一旦至小疾爲前驅人能謹察之豈有倉卒虞哀哉不知此雖悔良難圖

又

養生孰爲本元氣不可虧秋毫失固守金丹亦奚爲所以古達人一意堅自持魔鬼雖百萬敢犯堂堂師

送陳懷叔赴上臬酒官卻還都下

奇才初試發硎刀疋馬秋風到上臬地近雖同三輔重時平無復五陵豪極知穩步煙霄路卻要微知郡縣勞歸去平津開首燕吐茵應復忤西曹

歸三山入秋益涼欣然有賦

藥物扶持美食眠鏡湖仍遇素秋天一年強起歸猶健百口相看喜欲顛碧瓦朱臺無傑屋烏篷畫楫有新船道山頂上雖清絕萬頃煙波始是仙

子聿至湖上待其歸

舍北犬吠迎歸航老翁待兒據胡牀碧雲忽起欲吞日黃葉自凋非賈霜十風五雨歲則熟左飡右粥身其康豈無深谷結茅屋父子讀易消年光

晚行舍後

略約東邊一徑深杖藜行飯當登臨稷山竝海出遙碧禹穴生雲成暮陰殘歲自興遊子感少年誰解老

人心歸來燈火參差夜。倦倚胡牀續短吟。

秋夜讀書有感

妄意斯文力弗勝。苦心猶欲付雲仍。數編魯壁家傳學。一盞吳僧夜講燈。南犬固應多吠雪。夏蟲那得解知冰。但令吾道常無墜。飲水何妨枕曲肱。

又

齒髮凋殘志有餘。一編聊復遂吾初。老來每恨無同學。夢裏猶曾得異書。家世偏憎慕青紫。兒童切莫話龍豬。正令世世皆農圃。廉讓何妨化里閭。

治圃

小圃漫經營。栽培抵力耕。土鬆宜雨點。根稚怯鉏聲。紅菓方當熟。清陰亦漸成。每來常竟日。聊得暢幽情。

村醉

髮已凋零齒已疎。飽諳成敗更誰如。貴人豈得常金屋。丞相那知起草廬。久泛江湖知釣術。晚歸壠畝授農書。一尊徑就村翁醉。未肯英雄許本初。

病臥

蕭條風雨又經旬。病臥真成不覲鄰。跨馬難酬四方志。耽書空盡百年身。碧花引蔓緣疎竹。黃雀呼羣啄破囷。君見此時風味否。肯辭人笑橐裝貧。

書悔

衣食須耕稼。無端浪出遊。客途南北雁。世事雨晴鳩。蓬轉何時已。灰寒善自謀。江湖千萬里。何處欠漁舟。

杭海

我老臥丘園。百事習慵惰。惟有汗漫遊。未語意先可。或挂風半帆。或貯雲一舸。趁潮亂鳴榔。過磧細扶柁。近輒凌煙海。自笑一何果。邂逅得奇觀。造物豈付我。古湫石蜿蜒。孤島松磊砢。雁蕩大龍湫。石如騰龍東。海縣境有巨松。傳爲堯舜時物。湘竹閔娥祠。淮怪深禹鑠。鬼神駭犀炬。天地赫龍火。瑰奇窮萬變。鯤鵬尙么麼。紛紜旋或忘。追記今亦頗。作詩配齊諧。發子笑齒瑳。

黃犢

賣刀買黃犢。用以事耕稼。淒風山北秋。缺月溪西夜。小童搯竹枝。相呼聊一跨。秋來作欄成。參差出林罅。青煙起草積。微火近茅舍。未言東作功。此景已可畫。

秋夜

老覺人間歲月遒。愔愔窗戶一燈幽。讀書已廢虛長夜。護塞無期負盛秋。病齒何堪食梁肉。殘軀惟念製衣裘。重陽臥看登高侶。滿把茱萸只自愁。

目昏頗廢觀書以詩記其始時年七十九矣

少時業詩書。慕古不自量。晨暮間弦誦。左右紛朱黃。積書山崇崇。探義海茫茫。同志三四人。辯論略相當。落筆輒千言。氣欲吞名場。忽焉六十年。綠鬢久已霜。食必觀本草。不療病在牀。今秋又病目。始覺閑味長。車馬既不至。亦無書在傍。一坐漏十刻。甚倦則倚牆。蝴蝶吾前身。華胥吾故鄉。童子亦聽睡。不復呼燒香。

假山擬宛陵先生體

疊石作小山埋瓮成小潭。旁爲負薪徑。中開釣魚菴。谷聲應鍾鼓。波影倒松楠。借問此何許。恐是廬山南。

秋興

拒霜慘淡數枝紅。石竹凋零不滿叢。小蝶一雙來又去。與人都在寂寥中。

又

足力蹒跚少迎客。目視昏短常廢書。賴是門前秋水長。沙鷗未遠與人疎。

湖上夜歸

滿鏡新霜奈老何。扁舟日日醉顏酡。樂如逐兔牽黃犬。快似麾兵卷白波。霜近菊花猶未見。雨餘橙子已堪搓。湖桑小市人無數。爭看山翁擊楫歌。

晨起

戒婢篝衣徹屣屨。呼兒滌硯作除塵。須臾開卷東窗下。卽是先生無病時。

飯飽晝臥戲作短歌

爲農得飯常半菽。出仕固應甘脫粟。藜羹自美何待糝。況復畏人嘲苜蓿。今年還東已八十。視聽雖存鬢先禿。安能賣藥謀助道。道流賣藥自給名。曰助道。但有知分堪養福。水車轆轤鄰餽魚。社鼓琴琴衆分肉。可憐老子暫膨脹。午睡窗邊自捫腹。里中車蕩取魚舊例以所得分遺。

孤學

孤學雖違俗。猶爲一腐儒。家貧占力量。夜夢驗工夫。正復安三徑。寧忘奏六符。殘年知有幾。自怪尙區區。

自嘲

儒生窮事業。老去轉荒唐。長日中分睡。殘年有底忙。書常嬾終卷。詩亦少成章。忽棄蓬窗去。花前又一觴。

試筆

清談數語猶疑過。平地徐行亦慮危。酌酒淺深須在我。更衣單複要隨時。

秋思

烏柏微丹菊漸開。天高風送雁聲哀。詩情也似并刀快。翦得秋光入卷來。

又

水際柴門一扇開。白頭羸病亦堪哀。阿誰得似桄榔杖。肯爲閑人萬里來。

又

蒼顏莫怪少曾開。觸目人情但可哀。死去肯爲浮世戀。此身元自不應來。

晨起偶得五字戲題稿後

推枕悠然起。吾詩忽欲成。雖云無義語。猶異不平鳴。有得忌輕出。微瑕須細評。平生五字句。垂老媿長城。

野步

場圃農功畢。村鄰醉叟多。野風吹慘澹。海氣起嵯峨。婦女窺籬看。兒童拾穗歌。身閑不自樂。如此暮年何。

喜晴

一夜霜風掃積陰。檐間喚起有鳴禽。滿窗零亂梧楸影。鄰巷蕭條雞犬音。文史漸宜精討閱。湖山仍得飽登臨。園丁也解娛翁意。蓰果移花已滿林。

自箴

帶寬非復昔年腰。頰上餘丹日日消。切勿更爲兒戲事。解猿放鶴各消搖。

自喜

身閑仙不遠。食足富何加。庭臥長生憤。園開手種花。狂歌聲跌宕。醉草筆橫斜。八十明年是。衰殘豈復嗟。

自詒

病中看周易。醉後讀離騷。不解書驢券。安能問馬曹。身隨遊宦困。氣爲屏居豪。清旦南堂坐。稽山秋更高。

又

莊語畏如俳。端居要若齋。清虛集心腑。枯槁見形骸。自計愚無用。何傷老不諧。人生須廣大。勿作井中蛙。

對酒示坐中

綠橙丹柿鬪時新。一笑聊誇老健身。大度乾坤容縱酒。多情風月伴垂綸。初生京洛逢時泰。幼度江淮避

虜塵。八十年間窮不死。猶能澗底束荆薪。

秋晚衰疾稍平聊識喜懷

世事紛紛博局中。豈知造物貸衰翁。短筇倚壁知身健。小甌炊粳喜歲豐。霜近平郊多雁落。雨頻斷港有

船通。更餘一事生詩興。烏柏新添數葉紅。

偶出至近村

神爽無酣寢。身閑有劇棋。說詩橫柳栗。賒酒挈鷗夷。寺古殘香冷。溪深獨木危。往來元信步。不是赴幽期。

書宛陵集後

突過元和作。巍然獨主盟。諸家義皆墮。此老話方行。趙璧連城價。隋珠照乘明。粗能窺梗槩。亦足慰平生。

鄉居

客問鄉居事。久居君自知。度橋徵士悔。過社旅人悲。社散家分肉。農閑衆築陂。牆東新洗竹。我亦補藩籬。

重九無菊有感

重陽未見一枝菊。它日菊開生我愁。高興亭中香滿把。令人北望憶梁州。高興亭在南鄉子城西北正對南山。

陸放翁集

劍南詩稿

卷第五十五

記東村父老言

原上一縷雲。水面數點雨。夾衣已覺冷。秋令遽如許。行行適東村。父老可共語。披衣出迎客。芋栗旋烹煮。自言家近郊。生不識官府。甚愛問孝書。請學公勿拒。我亦爲欣然。開卷發端緒。講說雖淺近。於子或有補。耕荒兩黃犢。庇身一茅宇。勉讀庶人章。淳風可還古。

試筆

用筆如用人。利鈍烏可常。必欲責其全。無乃廢所長。宣城與晉陵。聲價略相當。不知今何年。森然集龜堂。和墨若鑿黑。擣紙如銀光。心手適調一。運此紫毫鋒。前卻俱稱意。六驥馳康莊。聊復取一快。詎必師鍾張。曠懷

曠懷何啻等沙鷗。外物相挺劇火牛。若信本心無一事。始知平地起閑愁。每逢達士惟長歎。欲棄浮生尙小留。今日微霜好風日。短筇且領鏡湖秋。

夢行小益道中

棧雲零亂馱鈴聲。驛樹輪囷樺燭明。清夢不知身萬里。只言今夜宿葭萌。

又

樺柳林邊候吏迎。血塗草棘虎縱橫。分明身在朝天驛。惟欠嘉陵江水聲。

秋樹

秋風一夜吹橋樹。明日來看已非故。吳中九月霜尚薄。落葉半隨飛鳥去。老人心事感凋零。只欲逢秋醉不醒。范寬用意真難解。偏寫丹楓作畫屏。

雜感

鶴乘軒車已堪歎。狐戴鬪體何可親。勸君一笑掃除盡。來作人間百歲人。

又

讒口安能作禍基。吾曹興廢豈無時。向來何事令公怒。問著渠儂自不知。

又

艱危寧度瘦驢嶺。奔走莫隨肥馬塵。困阨終身元自好。可憐癡子恨無津。瘦驢嶺在施黔間。前輩或有作驢瘦嶺蓋誤也。

又

一尊易致蒲萄酒。萬里難逢鸛鵲樓。何日羣胡遺種盡。關河形勝得重遊。

又

老境睡多行立少。浮生會少別離多。安得此身重壯健。一盃朋舊共高歌。

又

苦熱惟憂不復涼。轉頭忽已見清霜。道人若悟無寒暑。墮指流金總道場。

柳橋秋夜

帝青萬里月輪孤。掃盡浮雲一點無。正是吾廬秋好夜。上橋渾不要人扶。

訪隱者不遇

秋高山色青如染。寒雨霏微時數點。蘭亭在眼久不到。每對湖山輒懷歎。雅聞其下有隱士。漠漠孤煙起松嶼。獨攜拄杖行造之。枳籬數曲柴門掩。笛聲尙近人已遯。日啜薄糜終不貶。何如小住共一尊。山藜野芋分猿噉。

蒼檜

北風捲野天晝晦。雨如弩鏃穿屋背。老夫下牀行躡屐。稚子抱書坐持蓋。豈無長楸與巨竹。幹折枝摧共顛沛。孰能不動安如山。屹立庭前獨蒼檜。

農家歌

村東買牛犢。舍北作牛屋。飯牛三更起。夜寐不敢熟。茫茫陂水白。纖纖稻秧綠。二月鳴搏黍。三月號布穀。爲農但力作。瘠鹵變衍沃。腰鎌卷黃雲。踏碓舂白玉。八月租稅畢。社瓮醴如粥。老稚相扶攜。閭里迭追逐。坐令百世後。復覩可封俗。君不見朱門玉食烹萬羊。不如農家小甑吳粳香。

君子非好異

君子非好異。本意亦從衆。居然迫所媿。難復趨一閔。孟軻遇齊王。夫豈不欲用。萬鍾養弟子。乃似以利動。惟其有辭受。百世尊道統。豈惟聖賢哉。學者固所共。

獨登東巖

早慕功名已絕癡。晚耽筆墨愈無奇。牧羝未乳身先老。化鶴重歸語更悲。朋舊在亡成斷夢。山河興廢入孤吹。悠悠獨倚闌干笑。又過簪萸泛菊時。

灌園

八十身猶健。生涯學灌園。溪風吹短褐。村雨暗衡門。眼正魔軍怖。心安疾豎奔。午窗無一事。梨棗弄諸孫。
晨起

龜堂

老尙貪書課。黎明卽下牀。不驚天乍冷。更覺意差強。蟾滴初添水。螭爐旋炷香。浮生又一日。開卷就窗光。
莫笑龜堂老。殘年所得多。賦詩傳海估。說法度天魔。天矯竹如意。鱗皴松養和。拈來示諸子。無事數相過。

蜀漢

蜀漢崎嶇外。江湖莽蒼中。冷官家世事。獨立古人風。已老學猶力。久窮詩未工。悠悠千載後。此意與誰同。

客有言太山者因思青城舊遊有作

我登青城山。雲雨顧在下。月色縞巖谷。欲睡不忍捨。明朝下半嶺。頗怪哀湍瀉。山麓雲未歸。平地泥沒踝。乃知宿處高。所恨到者寡。有客談泰山。昔嘗宿石室。夜分林采變。鳴谷看浴日。九州皆片塵。盛夏猶慘栗。

我聞思一往。安得飛仙術。但願齊魯平。東封扈清蹕。

遊近村

度塹穿林脚愈輕。憑高望遠眼猶明。霜凋老樹寒無色。風掠枯荷颯有聲。泥淺不侵雙草屨。身閑常對一
棊枰。蒹葭蔬飯歸來晚。已發城頭長短更。

疎雨

檐間秋雨時一滴。絕似漢嘉方響泉。不聽此聲三十載。夢回搔首一淒然。

秋曉

菅席多年敗見經。布衾木枕伴殘更。嚙嚙天際雁初度。喔喔舍傍雞亂鳴。貸米未回愁竈冷。讀書有課待
窗明。一秋最恨空塔雨。滴破羈懷是此聲。

癸亥初冬作

開歲忽八十。古來應更稀。我存人盡死。今是昨皆非。愛酒陶元亮。還鄉丁令威。目前尋故物。惟有釣魚磯。
兀坐久散步野舍。

澗洞風號木。蕭條雨滴堦。忽思穿兩屐。聊用散孤懷。赤脚舂畬粟。平頭拾澗柴。先師有遺訓。萬事忌安排。
胡翼之先生教徐節孝曰莫安排。

法雲寺

不到法雲久。秋高初一來。廚供菰白美。池蘸水紅開。橋畔逢遊衲。雲邊數過桅。同遊恨歸早。珍重約尋梅。

小徑登東山。繚行自西北。至溪上是夕子。事置酒。

行穿磴。確度谿。飭小立。風中客袖斜。衰草雙雙點。飛蝶長空一一送。栖鴉荻洲薄。暮收魚網。苒舍初寒響。緯車誰道老人多感慨。未妨尊酒樂年華。

美睡

老來胸次掃嵒嶮。投枕神安氣亦平。漫道布衾如鐵冷。未妨鼻息自雷鳴。天高斗柄闌干曉。露下雞螭膺膊聲。俗念絕知無起處。夢爲孤鶴過青城。

逆旅

秋晚南山行。小窳就店秣。我亦念少休。無奈市兒聒。嗟爾亦坐飢。錙銖苦爭奪。其心計亦厭。陷溺無自脫。我欲救其本。汝勿謂迂闊。要傾江海大。一洗錐刀末。人生顧須幾。卒歲惟一褐。有地即可耕。何山不堪活。

東園

今日天。實霜。又見一日晴。晴寒病良已。扶杖東園行。瓦鼓息我倦。靜聽幽鳥鳴。花菓四十株。手自培養成。疎密無行列。東園蓋強名人。看不滿笑。聊用適我情。

雜感

買薪貸粟不曾知。一事無營盡日嬉。耄老卻如童稚日。早眠晏起食無時。

又

古言忍字似而非。獨有癡頑二字奇。此是龜堂安樂法。大書銘座更何疑。

又

平生所聞宋華子。病忘乃與知道鄰。老夫歷盡世間事。始覺此公真可人。

又

羲皇一晝開百聖。學者卽今誰造微。文詞害道第一事。子能去之其庶幾。

渡頭

蒼檜丹楓古渡頭。小橋橫處繫孤舟。范寬只恐今猶在。寫出山陰一片秋。

小飲賞菊

菊得霜乃榮。性與凡草殊。我病得霜健。每卻稚子扶。豈與菊同性。故能老不枯。今朝喚父老。采菊陳酒壺。舉輿舞翩僂。擊缶歌烏烏。秋晚遇佳日。一醉詎可無。

與兒輩小集

老子秋來樂事稠。吳粳新擣酒新篘。矮黃不待園官送。小白每煩溪女留。頓飽可憐頻夢與。半酣自喜有兒酬。不如意事何窮已。且放團欒一笑休。

舍北晚眺

平野沉寒日。遠村生暮煙。離離立紅樹。點點散烏鸢。暫出不逾歲。告歸仍一廛。江湖初見雁。著眼送雲邊。書室獨處欣然有詠

鑿空學道本無師。歇盡狂心頗自奇。閑坐始知冬日永。高談未覺老年衰。治棺準備膏肓日。釀酒枝梧雨

雪時常笑祖龍癡到底。一生辛苦覓安期。

冬初至法雲

曉日曛曛露未乾。東中十月始微寒。牛閑處處農功畢。米賤家家酒盞寬。煙浦白鷗迎鼓枻。漁村紅樹入憑闌。歸舟莫恨無人語。手把陶詩側臥看。

感憤

形勝峭潼在。英豪趙魏多。精兵連六郡。要地控三河。慷慨鴻門會。悲傷易水歌。幾人懷此志。送老一漁蓑。

記老農語

霜清楓葉照溪赤。風起寒鴉半天黑。魚陂車水人竭作。麥壠翻泥牛盡力。碓舂玉粒恰輸租。籃挈黃雞還作貸。歸來糠粃常不饜。終歲辛勤亦何得。雖然君恩烏可忘。爲農力耕自其職。百錢布被可過冬。但願時清無盜賊。

村舍

剝啄敲村舍。丫叉揖主人。新牆拆龜兆。疎瓦斷魚鱗。紅粒炊畚粟。青煙鬱澗薪。得牀思熟睡。寒犬苦狺狺。

自述

偶策青驢出。還將白鶴隨。鍊丹留日觀。采藥上天池。送客清秋棹。留僧靜夜碁。從來閑姓字。不遣世人知。

泊舟湖橋酒樓下

縹緲雲邊罨畫樓。空濛雨外木蘭舟。誰知老子清狂甚。獨占城南十里秋。

菴中雜書

蒲龕坐久暖如春。紙被無聲白似雲。除卻放生并施藥。更無一事累天君。

又

謀生安用苦區區。豆飯藜羹未遽無。若使天年猶合活。不妨自有穀於菟。

又

萬物竝作吾觀復。衆人皆醉我獨醒。走徧世間無著處。閉門鋤菜伴園丁。

又

茅茨一室有餘樂。轍環四海誰知心。輟耕壠上鴻鵠志。長嘯山中鸞鳳音。

連日暴下。爾然不支。戲作

老子心如行脚僧。秋風久已辦行藤。紙衾夜夜江湖夢。小復遲留待判懲。

大風

風大連三夕。衰翁不出門。兒言卷茅屋。奴報徹蘆藩。狼籍鴉擠壑。縱橫葉滿園。乘除有今日。紅日上東軒。

野興

掃盡紅塵閉是非。舍傍好在舊苔磯。壺中春色松肪酒。江上秋風櫛葉衣。一片共知雲偶出。千年誰識鶴重歸。勿言野外無供給。雪後連山藥草肥。

又

樓蘭助業竟悠悠。聊作人間汗漫遊。半谷雲霞丹竈熟。一天雷雨劍池秋。徜徉藥市經旬醉。問訊巢仙數夕留。卻過故廬應一歎。岸邊猶繫采菱舟。

若耶村老人

昔聞若耶村。意象乃物外。僂然阡陌間。來往幾貽背。無論百歲翁。甲子數至再。我來親見之。殊未輟耕耒。曩事一一言。多聞雜諄誨。回頭指丁壯。此是曾玄輩。有翁又過我。家有孫五代。指呼取斗酒。山果雜細碎。願我使之年。慙縮不能對。恭惟大父行。不覺投杖拜。養生惟一齋。此在吾術內。翁能信踐之。成就乃爾大。我今纔耄及。耳目已憤憤。長庚雖餘輝。敢與明月配。

霜曉

霜有連甍白。林無一葉青。紙衾圍栗烈。風響送東丁。酒盡尊餘滴。灰深火撥星。蓬窗了無事。默坐養黃庭。

山澤

我本山澤人。散誕傲簪裳。宦遊五十年。天遣還農桑。東阡南陌間。吾亦愛吾鄉。楚祠坐秋社。隋寺觀夜場。醉迷采蒼耳。旅飯炊黃粱。自疑太古民。百年樂未央。有時閑暇時。頗復誦老莊。亦嘗遊岷峨。略聞度世方。氣爲東道主。主安客自長。卻後五百年。見我瀟城旁。

遠遊

姓字不須通。從來號放翁。月明登暑雪。木落過秋風。成都武擔山。暑雪堂。歸州巴東縣。江上秋風亭。皆絕景。處處題僧壁。時時臥釣篷。始知侯萬里。未必是英雄。

北窗

破屋頽垣嘯且歌。一窗隨處寄婆娑。閱人每歎同儕少。遇事方知去日多。雲溼沙洲秋下雁。雨來荻浦夜鳴鼃。何時更續扁舟興。剩載鄆筒醉綠蘿。綠蘿溪在夷陵。

醉題

目光炯炯射車牛。何至隨人作浪愁。身處江湖如富貴。心親魚鳥等朋儔。孤帆滅沒三湘曉。野店荒寒二華秋。醉墨不容塵土汗。憑君試訪寺家樓。

幽居

練褐藤冠物外裝。下簾留住欲殘香。瀟湘客過誇漁具。澗皖僧來說藥方。詩未遽衰逾跌宕。書雖小退亦軒昂。不緣厭靜尋幽事。老去無如白日長。

連陰欲雪排悶

先生經句甌坐塵。藜羹不污白氈巾。魯連敢謂天下士。摩詰要是山中人。王維自稱山中人。溪從灘瘦愈刻厲。山自木落增嶙峋。雲重惟愁雪欲作。梅花忽報一枝春。

示子聿

古學尊皇極。淫辭斥異端。人才如爾少。老健及吾難。身退桑榆暖。家貧菽水歡。人生粗足耳。衣食不須寬。項里溪上見珍禽。曰溪鵲相隨數十步。不去。

涉溪來過東溪老。斷枝槁葉紛如掃。忽逢溪鵲昔未識。言語惺惚羽毛好。異哉馴狎若可呼。迹雖甚疎情

有餘。上穿蒼煙立高樹。下踏白石窺遊魚。老夫日日溪頭行。見此不妨雙眼明。定交物外從今始。豈獨沙鷗可與盟。

冬夜對書卷有感

人生如夢終當覺。世事非天孰可憑。萬卷雖多當具眼。一言惟恕可銘膺。所聞要足敵憂患。吾道豈其無廢興。白髮蕭蕭年八十。依然父子短檠燈。

項王祠

項里溪水聲潺湲。溪上青山峨鬢鬢。煙村人語墟市合。石橋日落漁樵還。堂上君王凜八尺。大冠如箕熊豹顏。築祠不知始何代。典祀千載誰敢刪。蕭清亭障息剽奪。掃蕩螟螣囚神奸。范增玉斗久已碎。虞姬粧面留餘潛。小人平生仰遺烈。近廟欲結茅三間。時時長歌拔山曲。醉倒聊慰窮途艱。

入城

宿凍迷車轍。晨霜縞瓦溝。路長休小驛。風勁透重裘。貿貿殘軀健。芒芒去日遒。親交喜握手。隨處小遲留。

出城

病鶴寒彌瘦。孤松老不枯。非關畏軒冕。本自樂江湖。古錦溪詩句。羸驂入畫圖。兒孫候門久。喚取倒殘壺。

不入城半年矣作短歌遣興

我居城西南。渺渺水雲鄉。舟車皆十里。來往道豈長。今夏我來時。天風吹荷香。再來已孟冬。慘然天霽霜。市南兩株柳。葉盡萌已黃。乃知多事人。歲晚虛悲傷。名藍墮劫火。鞠爲瓦礫場。河橋比一新。華表照康莊。

成壤莽相尋，推理海茫茫。疾豎造物兒，吾手扼其吭。砥柱天下險，一葦乃可杭。養氣倘能全，斯言豈荒唐。
先大父以元祐乙亥寓居妙明僧舍，後百餘年，當嘉泰癸亥，游復假榻一夕，感歎成詠。
楚公仙去幾秋風，巷陌蕭條舊隱空。遺老卽今無處覓，斷香殘照淚痕中。

志學

聖門志學豈容差，山立方當斥百家。早忝授經聞博約，晚羞同俗陷浮華。風勢槁面寒無褐，雷轉飢腸飯
有沙。漫道衰慵貪睡美，五更和夢聽城笳。

晚行舍北

逆旅將歸客，扶衰取次行。霜濃木葉盡，水落岸痕生。鳧雁浮寒浦，牛羊滿晚晴。東村隔煙寺，杳杳送鐘聲。

幽居述事

曾會蘭亭醉墮簪，後身依舊住山陰。琴傳數世漆文斷，鶴養多年丹頂深。滌硯灘頭無漬墨，吹簫月下
遺音。小詩戲述幽居事，後有高人識此心。

又

頽然掩戶不妨奇，又賦幽居第二詩。大藥鼎成令虎守，精思牀穩用龜揅。壺中自喜乾坤別，局上元知日
月遲。更就羣童閑鬪草，人間何處不兒嬉。

又

落葉平溝日滿廊，幽居又賦第三章。喜無俗事干靈府，恨不終年住醉鄉。上樹榜船雖老健，疏泉移竹亦

窮忙山僧欲去還留話。更盡西齋一炷香。

又

舴艋東歸喜遂初。頻拈枯筆賦幽居。細燒栢子供清坐。明點松肪讀道書。蒼爪嫩芽開露茗。紅根小把淪煙蔬。年來自許機心盡。頗怪鸞鷗自作疎。

十一月五夜風雪寒甚燃薪取暖戲作五字

束薪從澗底。及此不時求。力比鵝黃酒。功如狐白裘。分才具糜粥。餘事煖衾稠。復恐成驕惰。三更起飯牛。

魯墟先太傅舊宅

魯墟無復壞垣存。偶榜舟來入亂雲。杜曲桑麻猶鬱鬱。桃源雞犬亦欣欣。青圍舊墅千峯立。綠引官河一脈分。我卜數椽差不遠。得歸何以報吾君。

曉雪

遠湖誰琢玉爲屏。換卻南堂萬疊青。老子醉狂還自笑。待竿畫字滿中庭。

又

觀雪剡溪天下勝。題詩常恨不能奇。未應便許凝之語。此興何曾有盡時。

養生

西遊曾受養生書。晚愛煙波結草廬。兩皆神光穿夜戶。一頭胎髮入晨梳。邀雲作伴遠忘返。與鶴分窠寬有餘。占盡世間閑事業。任渠千載笑迂疎。

夜讀鞏仲至閩中詩有懷其人

詩思尋常有偏於客路新。能追無盡景始見不凡人。細讀公奇作都忘我病身。蘭亭盡名士逸少獨清真。獨意

酒似交情薄。愁隨夜漏長。常貧且撐拄。多病不禁當。偶讀書終卷。閑臨帖數行。翻憐市朝客。擾擾爲誰忙。

十一月十三日夜作

風雪正相乘。蕭然一點燈。擁爐蒙衲被。就壁倚枯藤。火降神方王。河潮腦自凝。鄰雞太多事。三唱請晨興。故人趙昌甫久不相聞。寄三詩皆傑作也。輒以長句奉酬。

海內文章有阿昌。數能著句寄龜堂。就令覲面成三倒。未若冥心付兩忘。道義極知當負荷。風波那得易禁當。相思命駕應無日。且約陶然寓醉鄉。

夢中賦早行

夜分秉炬治裝賫。千里霜風入馬蹄。擁褐卻尋孤驛夢。垂鞭時聽近村雞。荒煙漫漫沉殘月。宿莽離離上古隄。天色漸分寒更力。道傍沽酒坵官泥。

兀兀

兀兀初何有。俛俛不自知。偶然登耄及。便欲數期頤。把釣秋風夕。騎驢晚雪時。江湖遊已徧。更作灞城期。

哺猿

有書常嬾讀。有酒常嬾醉。惟有默坐佳。又以睡爲祟。不如捨之起。扶杖來東園。摘此幽澗菜。哺我高枝猿。

食菓飲清泉。猿計亦何闕。但恐夜霜時。腸斷巴山月。

與子坦子聿元敏犯寒至東園尋梅

北風吹人身欲僵。老翁畏冷晝閉房。梅花忽報消息動。意氣山立非復常。二兒一孫奉此老。瘦藤天矯凌風霜。幽禽白頰忽滿樹。似與我輩爭翱翔。溝絕無聲凍地裂。耿耿寒日青無光。歸來相視不得語。小榼一寫鵝兒黃。

示諸孫

蝸舍鶉衣老可哀。衰顏時爲汝曹開。朱門莫羨養羊脚。糲食且安羹芋魁。家塾讀書須十紙。山園上樹莫千回。但令學業無中絕。秀出安知有後來。

題齋壁

皤皤太平民。堂堂大耋身。乾坤一旅舍。日月兩車輪。義貴超三品。蔬甘敵八珍。明年真耄矣。爛醉海山春。

又

力穡輸公上。藏書教子孫。追遊屏裘馬。宴集止雞豚。寒士邀同學。單門與議婚。定知千載後。猶以陸名村。

雜言示子聿

福莫大於不材之木。禍莫慘於自躍之金。鶴生於野兮。何有於軒。桐爨則已兮。豈慕爲琴。古今共戒玉自獻。卷舒要似雲無心。廬室但取蔽風雨。衣食過足豈所欽。我今餘年忽八十。歸耕幸得安山林。逢人雖歎種種髮。入塾尙憶青青衿。吾兒殆可守孤學。相與竭力窮幽深。

夜坐聞大風

天曠穹廬覆。風豪野戰酣。詩成飛醉墨。棋罷縱高談。奇怪空堪笑。低摧亦未甘。東浮雲海去。會載酒千甌。

歸老

歸老何妨駕鹿車。平生風雪慣騎驢。鬢毛白盡猶耽酒。目力衰來轉愛書。止足極知于道近。癡頑更喜與人疎。著身莫怪無閑處。地肺天台儘有餘。

懷舊

扇子峽中有隱士。清江一曲照柴荆。當時船急失一見。至今空憶暮猿聲。

又

青城之西谿谷深。道翁巢居獨鼓琴。一盃松麩留我宿。夜半虎嘯風生林。

又

剡溪百里徹底清。石闌千裏眞人行。大丹一粒擲溪水。禽魚草木皆長生。

此
页
空
白

陸放翁集

劍南詩稿

卷第五十六

道室雜詠

烏化雙鳥杖化龍。雲山回首不知重。藥園夜嘯丹臺月。酒市秋聽紫閣鐘。豈但煙霄隨步武。故應冰雪換形容。小童開戶驚奇事。野鶴來巢砌下松。

又

莫怪先生閱事多。人間何處不經過。天山八月霜枯草。陽谷三更日浴波。酒熟春風歸掌握。丹成神物共誰何。散人本帶江湖號。四百年來一釣蓑。

又

身是秋風一斷蓬。何曾住處限西東。棋枰窗下時聞雹。丹竈巖間夜吐虹。采藥不辭千里去。釣魚曾破十年功。白頭始悟頤生妙。盡在黃庭兩卷中。

偶與客飲客去戲作

多泥窮巷破茆屋。人不堪愛心自足。有時負日向門前。手把南華日中讀。若教開門與客游。擾擾依前懷百憂。平生自計亦已熟。惟有釣魚湖水頭。舊聞仲長子光可。與友瘡不能言。但耽酒。安得此友常過門。一

語不交傾數斗。

故里

故里淳風比結繩。歸耕況遇歲豐登。已侵鐘漏行安往。略有園廬退可憑。萬事寧容媿天地。一心常若蹈淵冰。區區僻見君無怪。人固終身有不能。

齟齬

人生天地間。本非金石堅。況復歷歲久。蠹壤無復全。齟齬雖小疾。頗解妨食眠。昨暮作尤劇。頰輔相鉤聯。欲起懶衣裳。欲睡目瞭然。恨不棄殘骸。蛻去如蛇蟬。或當學金丹。揮手凌雲煙。逢師定悠悠。丹成在何年。

冬夜

悠悠孤夢伴餘醒。窗下寒燈黯闇明。雪意欲成風正惡。漁舟忽過雁羣鳴。志衰但有徂年感。身沒應無後世名。猶幸耄期身粗健。天公元不負書生。

枕上

鐘鼎初何有。山林亦足雄。行思絕大幕。歸但醉新豐。雁過荒寒外。燈殘寂寞中。蒼顏無鏡對。那覺是衰翁。

寒暑

寒暑侵陵日夜衰。坐令齒髮不支持。愛憎徇物去忘反。神氣養形誰復知。布帔九條晨入靜。柏牀五尺夜精思。舊交勿恨江湖別。雲海神山會有期。

長溪東山容老索月谷幽賞詩

人間底處無明月。只要青山爲發揮。林裏枝寒無鵲立。水邊路白有僧歸。

右月谷

清泉白石君家物。美竹名花可旋移。幽賞定知隨處勝。更須時展放翁詩。

右幽賞

梅

若耶溪頭春意慳。梅花獨秀愁空山。逢時決非桃李輩。得道自保冰雪顏。僊去要令天下惜。折來聊伴放翁閑。人中商略誰堪比。千載夷齊伯仲間。

歲晚幽興

梅出疎籬柳拂池。流年已迫早春時。壯心卓犖猶欺酒。老業呻吟未廢詩。眼暗觀書如棘澀。齒疎噉飯似牛呵。風爐欲試蒼鷹爪。自向林間拾墮枝。

又

殘年欲遂迫期頤。追數朋儔死已遲。卜塚治棺輸我快。染鬚種齒笑人癡。近聞有醫以補種墮齒爲業者。野梅墮地草生後。街柳拂鞍冰泮時。滿眼雲山不須買。剩傾新釀賦新詩。

又

萬里風波行路難。君恩尙許綴祠官。中庭鬱鬱藥苗長。絕壁颼颼松吹寒。泥巷有人尋杜甫。雪廬無吏問袁安。清晨對鏡增幽致。龜屋新裁二寸冠。

又

短鬢元知不久青。況開九帙數餘齡。全家共保一忍字。累世相傳三住銘。時泛孤舟過梅市。卻穿雙屨上蘭亭。擁爐莫恨無僧在。滿院松風要細聽。先太傅親受三住銘于施肩吾先生。授游曰。汝其累世相傳。毋忽。因卽以傳聿虞諸子。

寄題胡基仲故居

憶昔公來一束書。蕭然不復畜僮奴。浮雲每歎成蒼狗。空谷誰能繫白駒。才氣沙塵埋巨闕。文章林壑吼於菟。旅墳三尺雲門寺。又見離離長綠蕪。

雪夜

雪聲如飛沙。風聲如翻濤。三更天地闇。雪急風愈豪。頗疑虛空中。鬼神戰方塵。勝負要一決。利兵未肯囊。我如墮重圍。百計無由逃。僵縮不能寐。起坐擁故袍。自歎老益貧。庭草常不薶。惟酒不憚費。貸券如山高。園蔬甘且柔。味不減豚羔。醉此風雪夕。聊慰抱瓮勞。

聽雪爲客置茶果

病齒已兩旬。日夜事醫藥。對食不能舉。況復議盃酌。平生外形骸。常恐墮貪著。時時鄰曲來。尙不廢笑譔。青燈耿窗戶。設茗聽雪落。不飭栗與梨。猶能烹鴨脚。

獨夜

燈花寒自結。雪片夜方深。瘦影參危坐。清愁入苦吟。江湖身汗漫。藥石病侵尋。朋舊凋零盡。何人識此心。

寄題王才臣山居

王子自少無他娛。求佳山林結草廬。頭童齒豁已衰矣。衣弊屢空常晏如。出遊恥懷襍衡刺。歸臥盡讀倚相書。他日叩門傾白墮。要看著句到黃初。

夜賦

練色亭臯月。江聲木杪風。開書燈煜煜。傳漏鼓寥寥。流落諸生老。呻吟四壁空。生涯君勿笑。談話有兒同。

雪後

雪後晴初快。春前日漸長。菊根萌已動。梅蘊意先香。禽語驚幽枕。冰消漲野塘。衰殘難出戶。不是嬾衣裳。

又

冰開地沮洳。雲破日曛曛。鴻入青冥際。草生殘燒中。方欣畢公稅。已復始農功。稻壠牛行處。泥翻夕照紅。

寒夜讀書

老去無他嗜。書中獨有欣。月窗雞喔喔。霜野犬狺狺。雖歎吾何適。猶尊昔所聞。從今倘未死。一日亦當勤。

對食戲作

霜餘蔬甲淡中甜。春近靈苗嫩不蘇。采掇歸來便堪煮。半銖鹽酪不須添。

又

白鹽赤米了朝餽。拗項何妨煮瓠壺。一種是貧吾尚可。鄰家稗飯亦常無。

又

春前臘後物華催。時伴兒曹把酒盃。蒸餅猶能十字裂，餛飩那得五般來。

又

枿欄子嫩供香飯。早筴芽新簇冷淘。常使先生飽捫腹，其餘萬事一秋毫。

又

冰壺欲著先生傳。髯簿卑凡豈得書。常恨當年定交晚，枉教渴死老相如。

又

黃昏來扣野人扉。笑語欣欣意不遲。封火正紅煨芋美，不妨秉炬雪中歸。

甲子立春前二日作

頭風初愈喜身輕。書卷時開覺眼明。養熟犬雞隨坐起，性靈烏鵲報陰晴。韭菘釘餠春盤好，芝朮篔和臘藥成。自笑衰殘殺風景，燈時不擬入重城。

家居自戒

又

曩得京口俸，始卜湖邊居。屋財十許間，歲久亦倍初。蓺花過百本，嘯詠已有餘。猶媿先楚公，終身無屋廬。

平居少愧怍，動以直自遂。雖墮虎兇羣，我已無死地。神仙果可學，道藏有神仙。可學論吾輩，恐差易。勿言聞道晚，努力補黥劓。

又

世人無奈愁。沃以盃中酒。未能平磊塊。已復生堆阜。治水不治源。九載亦何有。不如讀周易。一卷常在手。

疾病當治本。神醫古難遭。哀哉有限身。日與利慾磨。大嚼徒爲貪。劇飲豈足豪。淡薄以養壽。亦非慕名高。

又

饑寒陷侵暴。其實可憐傷。一事百自反。忿心冷如霜。恕物學者心。省事慮亦長。吾過固多矣。責彼何暇詳。

又

霜嚴雞報晨。月落犬警盜。遺粒與棄糠。每媿不足報。椎奴事樵汲。跣婢勤爨竈。有過姑教之。箠楚置勿道。

感貧

經歲無兼味。窮冬止破裘。翁將貧博健。兒以學忘憂。士固安天命。吾寧爲食謀。八荒如可望。時亦上高樓。

鄰曲

濁酒聚鄰曲。偶來非宿期。拭盤堆連展。淮人以名麥餌。洗脯煮黎祁。蜀人以名豆腐。烏犍將新犢。青桑長嫩枝。豐年多樂事。相勸且伸眉。

送客

有客相與飲。酒盡惟清言。坐久饑腸鳴。殷如車輪翻。烹栗煨芋魁。味美敵熊蹯。一飽失百憂。抵掌談羲軒。意倦客辭去。秉炬送柴門。林間鳥驚起。落月傾金盆。

夜寒起坐待旦

懽悅不成寐。攬衣寒夜中。青燐煨芋火。鞞鞞鼓簾風。巷犬聲如豹。見王維與裴迪書。山童首似蓬。悠然束書坐。徐待日生東。

信手翻古人詩隨所得次韻

病起瘦可驚。陵嶺夜窗影。八十遂當至。何止踐衰境。食簞幸能盡。藥裹亦已屏。汲泉煮日鑄。舌本味方永。士苦不自晦。常若錐見穎。叔度獨何人。長陂渺千頃。

右夜坐

孔門春服成。弟子從沂浴。老氏坐中庭。莊生記新沐。古聖自潔清。如日浴陽谷。豈比流俗人。蟻蝨生桎梏。老人喜時節。良夕當爆竹。未濯三生垢。湯沐意亦足。豈惟寓蕭散。亦以洗榮辱。悠然獨酌罷。投枕睡已熟。右除夜沐浴

甲子歲元日

飲罷屠蘇酒。眞爲八十翁。木憂緣直死。卻喜坐詩窮。米賤知無盜。雲露又主豐。一簞那復慮。嬉笑伸兒童。開歲微陰不雨。法當有年。

初春書懷

六十餘年慕古人。卽今方近葛天民。見人各是元非恕。遇事皆安豈怨貧。小圃鉏耰聊過日。扁舟煙雨尙關身。出門未覺龍鍾在。禹廟蘭亭又見春。

又

毫及光陰古更稀。自今惟有數期頤。食觀本草雖多事。醉讀離騷自一奇。物外有人閑始見。山中可樂老方知。武陵好在桃千樹。短櫂相尋亦未遲。

又

數掩蘆藩並水居。一家全似業樵漁。春寒例謝常來客。老病猶貪未見書。馴雀正緣拋食慣。芳蘭肯爲礙門鋤。藥苗滿鉢無人共。賴有溪僧爲破除。

又

甫及初春日已長。偶同鄰曲集山房。囊盛古墨靴紋皺。箬護新茶帶胯方。老境不嫌來冉冉。流年直恐去堂堂。清泉冷浸疎梅蕊。共領人間第一香。

又

底處人間無駭機。超遙且喜謝招麾。千年澗底孤松秀。萬里天邊獨雁歸。服氣昔常憎火食。遊山近已製荷衣。青城況有幽人約。會守丹爐隱翠微。

又

納祿貧如筮仕初。歸來依舊臥蝸廬。半池墨瀋臨章草。一盃松肪讀隱書。長鑱僅供饑子美。清江不療渴相如。耄期自許詩情在。雪裏猶能跨蹇驢。

又

愚公不解計安危。行盡人間惡路岐。難似車登蛇退嶺。險如舟過馬當祠。平生憂患常難測。送老安閑敢

自期一事不成應有命，惟將知止報明時。

初春紀事

窗櫺無日影，庭樹無風聲。微雲淡天宇，非陰亦非晴。美哉豐年祥，入我屠蘇觥。父老亦共喜，驩言叩柴荆。一飽已有期，惟當力春耕。遣兒牧雞豚，作社賽西成。

又

經多少雨雪，所至苦水涸。園蔬葉多蠹，山步船半閣。入春一再雨，喜氣滿墟落。又聞湖邊路，已破小桃萼。一尊儻可攜，父子自醺醉。

送子虞吳門之行

相送何由插羽翰，淡煙微雨暗江干。孤懷最怯新春別，病骨難禁昨夜寒。尊酒汝寧嫌魯薄，釜羹翁自絮吳酸。此詩字字俱愁絕，忍淚成篇卻怕看。

法雲僧房

八十衰翁有底忙，水邊山際亦佺佺。清溪橋斷舟橫岸，小塢梅殘雨漬香。數點青燈經野市，一爐軟火宿僧房。自嫌尙有人間念，卻爲春寒怯夜長。

陌上

陌上長歌任笑狂，此生得喪略相當。天將耄齒償貧悴，身坐虛名掇謗傷。溪水漸生朱舫活，野梅半落綠苔香。新晴快上蘭亭路，莫待春殘始一觴。

獨立

白髯蕭颯一愚公。獨立濛濛細雨中。羊踏寒蔬新少夢。魚生空釜久諳窮。殘編幸有聖賢對。閑話豈無鄰曲同。銜鬻才名非老事。小詩信筆不能工。

春陰

數間茅屋傍楓林。常負平生萬里心。老去逐年增老病。春來無日不春陰。麴塵蘸岸波初漲。猩血團枝色已深。欲到東園還懶起。卻和殘睡聽鳴禽。

閑味

身似枯禪謝世塵。豈容收斂強冠巾。庾郎三韭不妨飽。晏子一裘何恨貧。栖冷每憐雞唱早。雲開初見月痕新。閑中有味君知否。熊掌駝峯未是珍。

聞虜亂代華山隱者作

滿谷松風枕石眠。中原戰血又成川。但思秦鑄銅人日。不記齊成柏寢年。大藥一爐噉晚日。孤桐三尺寫秋泉。何妨狂舞旗亭下。乞與人間畫醉仙。

春日

車馬閑中絕。衣襦病後寬。改詩消晝永。賒酒敵春寒。柳細搓難似。花新染未乾。歸鴻與來燕。各自管悲歡。

寄子虞

十里城南路。蕭然一秃翁。舊書衰易忘。新句嬾難工。山色春寒淡。溪流宿雨通。街頭有良醞。思汝一尊同。

送子坦

老境寧容別。諸兒仕爲貧。一春多臥病。幾度送行人。五斗方須祿。千金且愛身。長安雖可樂。憐汝正思親。

送子適初欲赴春銓以兄弟皆出故輟行

隔一濤江路。豈遙躊躇不覺欲魂銷。寄書勿遣過三日。發渡何曾無兩潮。睡少不關茶作祟。愁多卻賴酒時澆。柯橋西畔斜陽岸。誰爲離人惜柳條。

醉眠初起書事

身世元知似斷蓬。流年分付酒盃中。饑寒未解士先老。風雨欲收花已空。泥補舊巢梁燕喜。水生支港釣船通。睡魔正費驅除力。隔竹敲茶賴小童。

見蜂采檜花偶作

來禽海棠相續開。輕狂蛺蝶去還來。山蜂卻是有風味。偏采檜花供蜜材。

對酒戲詠

不管詩人太瘦生。但念酒徒稀醉眠。憑誰爲畫畢吏部。縛著鄰家春蠶邊。

又

長安市中多美酒。一斗財當三百錢。堪笑書生消幾許。有錢十萬醉經年。

夜興

鼻呼作人聲。月出如野燒。推枕中夜起。殘燈尙餘照。難從公榮飲。獨效孫登嘯。八十推不僵。平昔豈所料。

空廊病馬臥。枯草老牛噍。明朝語俗人。與汝不同調。

老甚自詠

殘年真欲數期頤。一事無營飽卽嬉。身入兒童鬪草社。心如太古結繩時。騰騰不許諸人會。兀兀從嘲老子癡。亦莫城中買鹽酪。菜羹有味淡方知。

又

羨生常笑古人癡。俛仰那知迫耄期。鏡裏鬢無添白處。尊前顏有暫丹時。客瞋終歲常稱疾。兒訝經旬懶賦詩。枉卻愁過強健日。身閑何往不熙熙。

夜過魯墟

晡時發柯橋。申夜過魯墟。燈出籬落間。七世有故廬。門低不容駟。壁壞亡遺書。高樹宿羈鳥。廢沼跳驚魚。移船過古埭。水面涵星疎。安得病良已。畢世澆春蔬。

園中小飲

造物伏我老。畀以江湖寬。俯仰六年間。得請兩挂冠。鬢毛雖蕭颯。脚力未蹶跚。記書過十張。噉飯空一簞。開歲忽兩月。感此春事殘。杏曆笑牆頭。鶯聲入雲端。掃地設菅席。相與勸加餐。村酒瀉濁清。野果嘗甘酸。鄰里語蟬聯。兒孫話團欒。雖無萬錢筭。浩歌有餘歡。

幽居春晚

雲歸禹穴賞新晴。酒買蘭亭散宿醒。竹帶鞭移俄盛出。鶴全窠買已長鳴。故山雖媿收身晚。外物元如脫

髮輕只恐村鄰成間闊。杖藜隨處叩柴荆。

又

老廢讎書病廢詩。晝閑惟與睡相宜。未尋內史流觴地。又近龐公上塚時。花發遊蜂喧院落。筍長馴鹿入藩籬。石帆山下春如許。野老來招不用辭。

梅花過後遊西山諸菴

乞得身歸喜滿顏。柴門雖設不曾關。無如梅作經年別。且就僧分半日閑。樵斧曉穿雲外去。釣船夜向月中還。君看老子無窮樂。一笑知非造物慳。

梅仙塢花溼觀桃李

妖妍天遣占年華。歎息人間有許花。十里織成無罅錦。半天留得未殘霞。欲題直恐無才稱。不見何由信客誇。醉後又驚春事晚。湖隄煙柳已藏鴉。

家園賞花

白首扁舟返舊邦。逢春直欲倒千缸。紅雲夾路薔薇障。翠羽成層薜荔幢。鶯語枝頭常盡日。蝶迷葉底不成雙。閑人爛醉尋常事。中聖先判臥北窗。

聞金谿陸伯政下世

久矣望來使。澗然開計書。兩家通絕譜。千里泣靈車。亦悟古皆死。所悲天祝余。泉扃生氣在。故不羨曹蜍。一春風雨太半有感

忽忽春將老。寒暄尙未齊。雨昏雞唱晚。風惡鵲巢低。寫物才殊退。尋芳思欲迷。餘年不須較。只是死秦稽。

山行贈野叟

垂白衰翁住道邊。突間猶喜續炊煙。壁如龜筮難占卜。瓦似魚鱗不接連。幼學及時兒識字。官租先衆吏無權。與君俱長宣和日。握手相看一悵然。

又

莫笑孤村生理微。茅茨煙火自相依。客來旋掃青苔榻。日在先關白版扉。婦女憂蠶租葉去。兒童耘麥荷鋤歸。散人世襲江湖號。剩欲溪頭借釣磯。

雲門道中

川靄霖霖翠欲浮。散人心事寄沙鷗。暮投野店孤煙起。曉涉清溪小蹇愁。嶺路窮時縈細棧。山形缺處起重樓。釣游陳迹渾如昨。一念悽然不自由。

讀書有感

洙泗諸生尊所聞。豈容兀者亦中分。焚經競欲愚黔首。亡史誰能及闕文。吾道固應千古在。幾人虛用一生勤。世間倚相何曾乏。會與明時誦典墳。

六言雜興

世界菴摩勒果。聖賢優鉢曇華。但解折衷六藝。何須和會三家。

又

夢裏明明周孔胸中歷歷唐虞欲盡致君事業先求養氣工夫

又

語道無如孔孟佛莊雖似非同倘有一人領會何須客滿坐中

又

失馬詎知非福亡羊不妨補牢病裏正須周易醉中卻要離騷

又

舉足加劉公腹引手捋孫郎鬚士氣日趨委靡賴有二君掃除

又

廣平作梅花賦少陵無海棠詩正自一時偶爾俗人平地生疑

又

瘦馬羸僮道路清泉白石山林常得有衣換酒不愁無法燒金

又

一夜雨來可佈五更雲散無餘傳舍僧窗雖異不妨隨處觀書

又

熟讀大小止觀精思內外黃庭直使超然有得豈若淵源六經

春晚出遊

風急名花紛絳雪。土鬆香草出瑤簪。且呼野艇西村去。未必微雲便作陰。

又

王孫草生與階齊。女郎花發乳鶯啼。街頭賣酒處處賤。信脚覓醉無東西。

又

柳暗人家水滿陂。放翁隨處曳筇枝。村深麥秀蠶眠後。日暖鳩鳴鵲乳時。

又

禹吾無間聖所歎。治水殆與天同功。三千年事一炊頃。窳石嵯峨煙靄中。

又

岌岌高丘近道邊。寂寥翁仲臥荒煙。生前意氣今何在。寒食無人挂紙錢。

又

鳴機裂素製春衣。煮酒香清雁鷺肥。倒社相呼共行樂。三搗鼓近是船歸。

此页空白

陸放翁集

劍南詩稿

卷第五十七

北窗

老人日夜衰，臥起常在背。窗間一編書，終日聖賢對。東臯客輸米，粲粲珠出礩。南山僧餉茶，細細雪落磴。吾兒亦解事，稀甲自鈕菜。一饑既退舍，百念皆卷旆。閑身去俗遠，澄念與道會。宿痾走二豎，美睡造三昧。挂冠反布章，上印謝銀艾。庭中石蒼然，此客真度外。

幽居雜題

開歲頻風雨，清明氣始和。遊山書半廢，耽酒睡常多。客去孫登獻，牛疲甯戚歌。餘生猶有幾，盡底付漁蓑。

又

雅意元知止，過歸喜遂初。久閑棋格長，多病釣徒疎。漬藥三升酒，支頭一束書。兒曹看翁嬾，切勿厭蝸廬。

又

忽忽年光逝，悠悠世事非。曉猶明續火，晝永啓漁扉。施食禽魚熟，疏溝杞菊肥。寂寥何所歎，父子自相依。

又

獨往成初志，安居謝世紛。名書硬黃紙，古硯熨焦紋。雨作古琴薦，風來散鷺羣。豈無朝市事，塞耳未曾聞。

題旅舍壁

泥淖停牛屋。風埃坐簟牀。絳人難諱老。楚客自嫌狂。浪迹江湖大。回頭日月長。村村有餅餌。正可不費糧。

又

地曠風號木。天高日脫雲。村名步頭換。縣界驛前分。蒿艾春侵路。雞豚暮識羣。敲門就炊爨。一飯敢忘君。

出行湖山間雜賦

老入新年健。春逢小雨晴。偶因尋酒去。又作繞村行。塘水蒼鵝戲。郊原黃犢鳴。閑身有樂事。倚杖看農耕。

又

新釀學鵝黃。幽花作蜜香。客邀閑卽去。病起醉何傷。野寺無晨粥。村伶有夜場。吾心靜如水。隨事答年光。

又

徑繞茶岡北。橋連芡浦東。蟲饅烏柏葉。露溼豨薟叢。燒地春蕪綠。漁扉夕照紅。君恩那可報。惟是祝年豐。

又

魚市樵風口。樵風溪港名。茶村穀雨前。柳邊煙掩苒。堤上草芊眠。墓掃鴉銜肉。人歸鷺導船。東風吹短髮。得句爲誰妍。

上巳

殘年登八十。佳日遇重三。簾幙低新燕。房櫳起晚蠶。名花紅滿舫。美醞綠盈甌。春事還如昨。衰懷自不堪。

筍絕句

列仙閱世獨清耀。雪谷冰谿老不枯。輸與錦棚孩子輩。千金一束入天廚。

贈蘇召叟

蘇子出儔輩。翩如天際鴻。才華刮眼膜。文字愈頭風。豈止千人見。真當四海空。老夫雖耄矣。此論不妨公。

贈趙去華

趙子毫端萬斛珠。眼前百輩不枝梧。盛名豈待他年見。公論何曾一日無。我老杜門惟足睡。君豪折簡固難呼。此詩強欲相題目。堪笑衰翁膽滿軀。

道室述懷

養心功用。在還嬰。肯使秋毫有妄情。二寸藤冠。狂道士。一編蠹簡。老書生。狐妖從汝。作人立。金價在吾如土輕。地肺終嫌近朝市。明年泝峽上青城。

春晚雨中作

冉冉流年不貸人。東園青杏又嘗新。方書無藥醫治老。風雨何心斷送春。樂事久歸孤枕夢。酒痕空伴素衣塵。畏途回首濤瀾惡。賴有雲山著此身。

晚行湖上

飽來捫腹繞村嬉。北陌東阡信所之。女手采餘桑鬱鬱。煙蕪生遍冢累累。高林日暮無鶯語。深巷人歸有犬隨。東走郡城逾十里。好風勞送角聲悲。

欲卜菴居未有勝地作詩識之

破裘百結鬢垂蓬。旋過流年旋已空。魔眷屬如雲盡散。性光明似日方中。極知萬事不勞問。欲住一菴誰與同。會向巢居明月夜。五弦橫膝寫松風。

東窗遣興

東窗徙倚常閑遊。水長池魚自滿溝。花氣襲人渾欲醉。鳥聲喚客又成愁。百年光景輸欹枕。萬里風煙入倚樓。欲寫烏絲還嬾去。詩名老去判悠悠。

獨酌

一榼芳醪手自斟。從來戶小怯杯深。已於醉醒知狂聖。又向淳漓見古今。濡首固非吾輩事。達生猶得昔人心。醪醑欲過香差減。且據胡牀坐綠陰。

舟中作

誤長僂蓬不滿年。恩容歸老白雲邊。草枯病馬停朝秣。予已納禱。水冷鰥魚廢夜眠。混俗豈須名赫赫。耐嘲唯可腹便便。柯橋梅市花俱好。且典春衣醉放顛。

衰疾

衰疾憐新鬼。狂豪尙故吾。甚常先客著。行不許兒扶。硯潤閑蟾滴。香殘冷鴨爐。自憐風味在。尙欲泛江湖。

示兒

聞義貴能徙。見賢思與齊。食嘗甘脫粟。起不待鳴雞。蕭索園官菜。酸寒太學齋。時時語兒子。未用厭鉏犁。

野興

溪漲侵菴路。山光壓釣磯。荒畦荷鋤去。小艇載犁歸。世態那堪看。吾言可自違。從今謝人事。終日掩荆扉。

閒遊

遊徧名山日月長。結廬獨占水雲鄉。醉中卽是逃名地。閑外應無度世方。檜蜜滿脾餘小苦。木苗汜露有奇香。肺腸自與人間別。堪笑醅缸與飯囊。

又

高會揮金媿二疎。食貧只似布衣初。終年老健緣儲藥。隨分窮忙爲著書。弔古何時過梁宋。題詩且欲徧衡廬。不須更擬乘風去。水有煙帆陸筍輿。

又

過盡僧家到店家。山形四合路三叉。清明漿美村村賣。穀雨茶香院院誇。困臥幽窗身化蝶。醉題素壁字棲鴉。夕陽不盡青鞋興。小立風前鬢腳斜。

又

夙興蓐食戒山行。策蹇迢迢過故城。露葉未乾明曉日。風蒲初勁借秋聲。綠陰渡口孤鶯語。白水陂頭兩犢耕。遙望炊煙疑可憩。試從行路問村名。

炊米不繼戲作

敢羨晨興費萬錢。口邊縱理信前緣。高年雖獲殿諸老。一飽常如登九天。架上有書吾已矣。甌中無飯亦陶然。蓬門一閉還旬日。實怕閑人攬晝眠。

暮行

志士能輕萬戶封，野人自愛一枝筇。行窮綠岸呼船渡，糴得黃粱就碓舂。林外人家明遠火，月邊僧閣下疎鐘。江村不用愁孤絕，小店茅簷儘見容。

小雨

小雨過巖扃，殘雲傍野亭。花光相映發，鶯語苦叮嚀。舉酒和神氣，彈琴悅性靈。索居朋友絕，得句遣誰聽。

又
急雨方侵幔，斜暉忽滿廊。塵清添草色，衣潤省篝香。婦織將收繭，農功已下秧。諸孫入家塾，親爲授三蒼。

送辛幼安殿撰造朝

稼軒落筆凌鮑謝，退避聲名稱學稼。十年高臥不出門，參透南宗牧牛話。功名固是券內事，且葺園廬了婚嫁。千篇昌谷詩滿囊，萬卷鄴侯書插架。忽然起冠東諸侯，黃旗皂纛從天下。聖朝仄席意未快，尺一東來煩促駕。大材小用古所歎，管仲蕭何實流亞。天山挂旆或少須，先挽銀河洗嵩華。中原麟鳳爭自奮，殘虜犬羊何足嚇。但令小試出緒餘，青史英豪可雄跨。古來立事戒輕發，往往讒夫出乘罅。深仇積憤在逆胡，不用追思灞亭夜。

初夏

白白養筒美，青青米果新。蜀人名粽爲養筒，吳中名粗糲爲米果。衰遲重時節，薄少遍鄉鄰。梅市花成幌，蘭亭草作茵。極知歡意盡，強起伴遊人。

自警

放翁原憤憤。徂歲復駸駸。社櫟終無用。秋蟲漫苦吟。拍蛟違殺戒。引水動機心。老耄誰規我。忠言抵萬金。

枕上

病叟少安枕。驚禽無穩棲。慵占賈誼鵬。空感祖生雞。野勢風號北。窗痕月過西。元非破賊手。只合架牛犁。山中惟鼻鳴。終夜雞三鳴。後聞架犁則且矣。

野步至近村

耳目康寧手足輕。村墟草市徧經行。孝經章裏觀初學。麥飯香中喜太平。婦女相呼同夜績。比鄰竭作事春耕。勿言野饑無鹽酪。筍蕨何妨淡煮羹。

書懷示子適

平生山林幾編屐。何意隨人戴朝幘。口言報國直妄耳。斷簡圍坐晨至夕。道山堂東直廬冷。手種疎篁半窗碧。但虞風波起平地。豈有毫髮能補益。成書朝奏暮請老。入耳幸免煩言噴。東望故山百餘里。父老歡忻來接跡。白羊綠酒爭下擔。長笛腰鼓紛如織。迢迢梅市過魯墟。觀者所至空巷陌。爾來呻吟又春盡。周視室中惟四壁。但令糲飯麤撐拄。猶勝朱門常蹴踏。小兒助我理孤學。終歲伏几心如石。問看飲酒詠離騷。何似焚香對周易。

三月三十夜聞杜宇

斗轉春歸不自由。韶華已逐水東流。子規獨抱區區意。血淚交零曉未休。

夜大雨連明晨起乃知之

黃紬被穩枕慵移。夜雨淋漓了不知。水長壞陂初復後。鳩鳴去婦卻還時。芳蹊入夏多青子。白髮今年有黑絲。剩欲披衣湖上去。滿村芳草正離離。

聞虜亂次前輩韻

中原昔喪亂。豺虎厭人肉。輦金輸虜庭。耳目久習熟。不知貪殘性。搏噬何日足。至今磊落人。淚盡以血續。後生志撫薄。誰辨新亭哭。藝祖有聖謨。嗚呼寧忍讀。藝祖嘗爲大宋一統四字。賜大臣。今藏祕閣。

壯士吟次唐人韻

士厭貧賤思起家。富貴何在髮已華。不如爲國戍萬里。大寒破肉風卷沙。誓捐一死報天子。兜鍪如箕鎧如水。男兒墮地射四方。安能山棲效園綺。塞雲漠漠黃河深。涼州新城高十尋。風飈露宿寧非苦。且試平生鐵石心。

衰疾

衰疾猶能飯一簞。葦絲菰首亦加餐。舊叨刻印俄銷印。老媿彈冠亟挂冠。自怪稽康如許嬾。人憐范叔不勝寒。得錢剩買青芒屨。采藥名山興未闌。

書日用事

左右數書冊。朝夕一草堂。家貧自能儉。病愈不求方。盛饌豚肩美。常庖筍苗香。園丁報花坼。亦復命壺觴。

又

一裘良已暖，半菽可無飢。養氣戒多語，端居如有思。私心須自勝，已過遣誰知。耄齒尤當勉，常愛寸晷移。

初夏出遊

去去衝朝霧，行行弄夕霏。移秧晴竭作，坐社醉扶歸。細草迷行徑，殘花點釣磯。犂牛將犢過，雄雉挾雌飛。野寺煙鐘遠，村墟積火微。諸孫殊可念，相喚候柴扉。

初夏晝眠

好景逢初夏，閑身得晝眠。書橫竹架上，冠墮素屏前。葱蒨小山桂，潺湲幽竇泉。危巢出乳燕，高樹集新蟬。強健關天命，逍遙近地仙。晚窗思茗飲，自取雪芽煎。

農事稍閒有作

架犁架犂喚春農，布穀布穀督歲功。黃雲壓檐風日美，綠針插水霧雨濛。年豐遠近笑語樂，浦漲縱橫舟楫通。東家築室窗戶綠，西舍迎婦花扇紅。我方祭竈徹豚酒，盤箸亦復呼鄰翁。客歸我起何所作，孝經論語教兒童。教兒童莫忽忽，願汝日夜勤磨礱。烏巾白紵待至公。

夜雨

暮雨蕭蕭集瓦溝，空階點滴送清愁。何由乞得須臾睡，直到窗明滴未休。

朝晴

宿雨初收雲四歸，小山草木麗朝暉。翩然雙鵲從簷下，言語分明訴溼衣。

北窗

簾影參差午漏前。盆山綠潤雨餘天。詩無傑句真衰矣。酒借朱顏卻悵然。海燕理巢知再乳。吳蠶放食過三眠。名泉不負吾兒意。一掬丁坑手自煎。子虞寄惠山泉丁坑蓋日鑄流亞也。

遊山戲作

晚境頻辭祿。窮居旋學耕。量衰添酒敵。才盡減詩名。風月成交友。溪山管送迎。登車雨先止。天豈相吾行。

遣興

聒聒鳴鳩莫笑渠。百年我亦旋枝梧。病知藥物難爲驗。老覺人間不足娛。茆屋何妨度寒暑。蔬餐且可遣朝晡。釣船一出無尋處。千頃江邊雪色蘆。

又

老荷君恩許醉眠。散人名號媿妨賢。久叨物外清閑福。麤識詩中造化權。風月四時隨指顧。乾坤一氣入陶甄。新秋更欲浮滄海。臥看雲帆萬里天。

細雨

細雨重雲漸入梅。陰陰門巷長新槐。壯心已與年俱逝。脫髮應無術可栽。美睡常嫌鶯喚起。清愁卻要酒闌回。年來百事非平昔。信手題詩嬾剪裁。

初暑

槐陰清潤麥風涼。一枕閑眠晝漏長。山鵲喜晴當戶語。海桐帶露入簾香。酒綠久病常辭酌。茶爲前銜偶得嘗。雲北雲南動遊興。速呼小豎治輕裝。

夙興

夙興短蓬髮。幽步豁煩襟。翠碧停闌角。鷺黃語柳陰。書殘頻補緝。琴廢細追尋。未是全無事。猶堪養道心。

新堂

湖上新堂氣疎豁。三面嵐光翠如潑。都門歸來病相屬。鄰里怪我問何闊。蓴絲作羹飯雕胡。廚人斫鱸藝絕殊。何由喚得左元放。銀盤釣出松江鱸。

卽席

釋荷出水榴花開。長笛圓葦送舉杯。村鄰相樂君勿笑。要是安健無凶災。

又

醉中起舞遞相屬。坐上戴花常作先。要知吾輩不凡處。一吸已乾雙玉船。

又

長魚腹腴羊臂臠。饑想久矣無秋毫。今朝林下煨苦筍。更覺此君風味高。

又

小山榴花照眼明。青梅自墮時有聲。柳橋東岸倚筇立。聊借水風吹宿醒。

生涯

久矣冥行墮嶮巖。樂哉偶得謝招麾。放懷身世相忘地。夙駕山林獨往時。縱老豈容妨痛飲。更慵亦未廢新詩。超然自喜生涯別。始歎龜堂見事遲。

落花

桃李擅春事。除穠爲之殿。豈不欲周旋。過日如掣電。大風連三月。吹盡無餘片。留之豈有策。佇立情眷眷。空令腸九回。竟欠語一轉。流年付芳草。樽酒孤勝踐。鶯聲入碧雲。簾影滿深院。消搖綠陰間。風流屬團扇。

四月二十二日微雨中次前輩韻

語訛覺齒疏。冠倒感髮稀。屢爲曼容免。遂賦淵明歸。今日天氣佳。雨絲弄斜暉。起居惟所適。單複時易衣。出遊叩僧廬。歸臥掩漁扉。一笑顧兒子。正爾良未非。

夜雨

點滴茅檐雨。長宵不肯晴。殘缸待雞唱。倦枕厭鳥鳴。已踐衰殘境。況兼羈旅情。晨興亦何事。椎髻繞廊行。

夏日

入戶桐陰漸覆牀。乍敷笛簟北窗涼。筠枝倚壁知身健。衣焙殘香覺日長。雨霽斷雲時聚散。風來織草久低昂。蝶衣粉溼猶飛嬾。小駐闌干就夕陽。

久雨

梅子青青苦未黃。經旬積雨欲頽牆。蠹生書帙時須火。潤入衣篝剩得香。鄰舍相逢驚問闊。通宵不寐聽淋浪。定知又發韓公笑。有底鳴蛙兩股長。

又

梅天一日幾陰晴。對酒無聊醉不成。巧曆莫能知雨點。孤桐那解寫溪聲。林深鳥爵來無數。草茂鋤耒去

卽生。明日雲開天萬里。御風吾欲過青城。

舟中

青楓湖上村綠。蓑舟中客。雲興山疊見。海近地勢圻。悠然滄洲趣。宛與塵世隔。雖云食不足。麤免婚嫁責。渥丹未辭鏡。衰白幸滿幘。明當鼓枻行。放浪窮七澤。

繫船

高樹滴殘雨。叢蘆生夕風。惰遊貧有自。老鈍學無功。歲月詩編裏。江湖旅色中。煙村繫船處。邂逅得漁翁。

復雨

催喚兒童掃綠苔。長歌清嘯興悠哉。林間子墮知梅熟。水面痕生驗雨來。往事已成孤枕夢。故人誰共一樽開。自憐未負年華在。素扇團團月樣裁。

書適

清和巷陌單衣後。綠潤軒窗午餉餘。曲曲素屏圍倦枕。斜斜筠架閣殘書。松陰坐石閑看鶴。山寺尋僧晚跨驢。此段家風君試看。京塵撲帽獨何歟。

村社禱晴有應

叢祠牲酒走村村。賴是龍歸爲解紛。爽氣收回騎月雨。俗謂二十四五間有雨。往往輒成霞潦。謂之騎月雨。快風散盡滿天雲。數峯縹緲如屏面。一浦漣漪作簟紋。猶勝楚人簫鼓裏。九歌哀怨下湘君。

題北窗

陸放翁集

劍南詩稿 卷五十七

一三

(二七六七)

東擔還山讀舊書。斷編終日見唐虞。千莖白髮年華速。一點青燈夜漏徂。厚價異時空市骨。大呼從昔不成慮。細思天賦原非薄。跬步門前萬頃湖。

又

不墮人作腐儒看。斷簡堆中興未闌。更事愈懷憂國切。苦心始覺著書難。流泉激激人聲遠。修竹蕭蕭暑令寒。四海諸公常共處。北窗何地著身寬。

晝坐聞牆外人聲殊敗幽思戲作

老人氣衰凋髮齒。歲月翩翩來有幾。晨興食米不一溢。日課讀書猶十紙。雖云喧寂無二觀。終嫌蝸蝻喧吾耳。亟起振衣欲出門。赤日當空汗如洗。撥灰未炷瓦爐香。汲井先換銅匱水。也勝太史落南時。短檠夜對屠牛机。黃魯直自言遷宜州時。夜寓市中。直屠牛之机。用雞毛筆作字。

晨起行園中

老病厭囂煩。晨興步小園。草深移舊路。竹茂失頽垣。未暇從魚樂。惟思與石言。人家尋每得。拄杖印苔痕。
葺舍

次韻林伯玉登臥龍

一紙臨門喜欲顛。詞源滾滾瀉長川。旗旄外闔新元帥。風月名山古洞天。自笑屏居依近郭。每煩登望指孤煙。雄篇三復空興歎。窮乃工詩似不然。

道室雜詠

精神有限惟當奮造化無心不汝私。此事安須知決擇。雞鳴勿後老人期。

又

黃褐長條七尺身。袖中一劍隱紅塵。城門萬屢日來往。衆裏安知無此人。

又

冰霜難與夏蟲語。晦朔豈容朝菌知。忿忿至前能小忍。人人券內有期頤。

又

萬法元須一理通。長生極治本同功。廣成千歲無它術。祇在唐虞二典中。

又

莫緣侯印學陰謀。生世惟須一釣舟。輕用鑿鏘終折缺。善刀何止解千牛。

又

放翁耄齒猶朱顏。一物不留方寸間。已吞八九雲夢澤。更著百億須彌山。

湖塘夜歸

漁翁江上佩笞簪。一卷新傳范蠡經。鬱鬱林間桑椹紫。芒芒水面稻苗青。雲邊築舍分南北。陌上逢人半醉醒。莫恨西村歸路遠。行前點點有飛螢。

東軒

僻巷地無喧。閑人慮不煩。刺舟回北渚。岸幘倚東軒。乳鵲行苔徑。馴驪觸筍藩。作勞憐野老。喚取倒清樽。

夏日

例謝門前客。深藏篋裏書。衣穿但重補。飯足不求餘。山溜鳴庭際。藤陰接屋除。何勞厭三伏。俯仰卽秋初。

斫脰

玉盤行膾簇青紅。輪與山家淡煮菘。要識坐堂哀黻觥。試來臨水看嶮啣。

野飯

六十日白可續飯。三千年清何與人。堪笑此翁頑似鐵。還山又食一番新。

村酒

亂山落日漁歌長。平疇遠風粳稻香。酒旗搖搖截官道。歸家未遲君試嘗。

避雨

雲如壞山欲塞海。樹似奇鬼將搏人。急投民家雨隨至。燎衣不覺雞唱晨。

雨中短歌

昨夕雨大如車軸。今日雨細如牛毛。人言愈細愈澤物。天公爲此非徒勞。泥深入市路欲絕。壞簷敗壁風蕭騷。豈惟鼃黽矜得意。坐覺藜莠無由薶。剝牀供饜嗟婢子。持傘上學憐兒曹。村場酒貴賒不得。且解布囊尋弊袍。

散懷

少年已遂遯山林。何況霜毛兩鬢侵。習氣尙存詩入夢。病根未去藥關心。猿知秋近啼先苦。鶴閱年多頂漸深。不忍頓疏風月在。麤能扶杖卽登臨。

南堂

空堂寂寂暑氣清。祇有燕雀無人聲。雲頭忽移簾影失。雨點亂集荷盤傾。溝坑水溢魚鱉喜。庭戶風送蛟龍腥。衣巾汗垢爲一洗。呼奴舉榻臨前楹。取泉石井試日鑄。吾詩邂逅亦已成。何由探借中秋月。與子同遊白玉京。

門屋納涼

機裂齊紈如素月。牀敷蕲簟起微瀾。行人遠不分眉目。過鳥高猶響羽翰。新長庭槐夾門綠。無窮陂稻際天寬。今年項里楊梅熟。火齊驪珠已滿盤。

幽居

孤村野徑不曾鋤。惡草從來一寸無。每爲遊魚疏港瀆。更緣啼鳥植楸梧。閑門猶有僧時到。殘產渾無賦未輸。浪走人間眞誤計。暮年猶足補東隅。

露坐

殘月久方上。幽花時自零。風枝驚宿鳥。露草溼流螢。浩氣吞雲夢。危途塞井陘。菱歌何處起。及我醉初醒。暑中久不把。酒盆池千葉。白蓮忽開一枝。欣然小酌。因賦絕句。

千葉芙蓉白玉膚。一樽沈澹碧琳腴。極知俱出氛埃外。我亦秋風山澤臞。

陸放翁集 劍南詩稿 卷五十七

一八

(二七七二)

又

我讀淵明止酒篇。知渠未識玉池僊。誰言見面無多子。高壓天魔萬二千。

陸放翁集

劍南詩稿

卷第五十八

老馬

貧家畜老馬，枯萁風雨噍。本非百金產，安用三品料。馬固忘華廐，士亦安蓬藿。兩窮適相遭，萬事付一笑。少游御款段，作計無此妙。可憐杜陵翁，妄想追風驃。

大熱

五月頗閔雨，炎風吹旱塵。氣羸不給喘，流汗沾衣巾。呼婢使具浴，報以未買薪。汝事雖不恪，亦坐乃翁貧。汲井掬寒泉，自足忘我曠。譬如寓逆旅，百事聽主人。

大雨

今年景氣佳，有禱神必答。時時雖閔雨，願盼卽霑洽。縣地千里間，四月秧盡插。季夏雨三日，淒爽欲忘箠。瀦水如塞河，決水如放閘。几席亂鼃黽，庭除泳鵝鴨。舍邊魚受釣，戶外鷗可狎。飛螢最得意，終夕自開闔。蕭蕭菰蒲聲，恍若船入夾。嗟予亦耐事，堅坐書滿榻。懸知穰穰收，已足供伏臘。會約張志和，清風泛苕霅。

午睡

梅黃雨足喜初晴，投枕華胥夢已成。帳底香雲凝未散，手中書卷墮無聲。簾紋似水飛蠅避，鼻息如雷稚

子驚癡腹便竟何有。已將嘲弄付諸生。

書意

疎慵久已臥郊扉。暫出人間輒免歸。梵志放花常恨晚。士師分鹿又成非。平生舊學寧當負。同志良箴亦重違。說與吾兒勤念此。負禾勿恨露沾衣。

卜居三山已四十年矣。暇日有感聊賦五字。

薄宦非初志。幽居不計年。稚松成偃蓋。小豎亦華顛。生理憑耕稼。光陰付醉眠。從來慕園綺。一著要爭先。

又

泥古衰猶學。開荒夜亦耕。屋芘生草蓋。釜擷野蔬烹。白稻雨中熟。黃鷄桑下鳴。殘雲忽吐日。喜對小窗明。

北窗

北窗無俗物。三伏有餘涼。玉塵消長日。風漪可一牀。蓋分新作茗。爐撥欲殘香。卻岸紗巾去。翛然野水旁。

睡起已亭午。終日涼甚有賦。

飯罷頽然付一牀。曠懷真足傲羲皇。松棚盡日常如暮。荷沼無風亦自香。倚杖月生人影瘦。岸巾露透髮根涼。頗聞王旅徂征近。敷水條山興已狂。

殘雨

五更殘雨滴檐頭。探借天公一月秋。只道風吹雲散盡。數聲桑下又鳴鳩。

溪上避暑

暮年事業轉悠悠。盡日投竿杜若洲。世上漫言天愛酒。古來寧有地埋憂。全家只合雲山老。萬事空驚歲月遒。襆帶脫冠猶病渴。正平頗憶著岑牟。

又

短髮颯颯徹頂涼。悠悠隨處據胡牀。但憐鵲影翻殘月。不恨蟬聲送夕陽。門巷陰陰桐葉暗。汀洲漠漠藕花香。寓形宇內終煩惱。安得騎鯨下大荒。

龜堂避暑

縹緲紗幮覆象牀。蠻童擎粥進黃梁。硯池湛湛一泓墨。衣焙霏霏半篆香。團扇題詩無滯思。清泉灑地有餘涼。更須風伯開雲陣。準擬今宵月滿廊。

旅舍偶題

野店山橋策蹇驢。浩然聊喜遂吾初。童顏幾歲已辭鏡。胎髮今朝還入梳。小瓮謾營秋社酒。斷編閑理小年書。白雲可笑猶多事。常向人間耐卷舒。

溪月

天風吹髮冷颯颯。獨向沙邊上釣舟。愁絕平羌江上月。向人依舊半輪秋。

砭患

儲藥如丘壘。人愚未易醫。信書安用盡。見事可憐遲。錯自彈冠日。憂從識字時。今朝北窗臥。句句味陶詩。

雜興

早遇齊侯遊柏寢。晚從漢帝祀甘泉。不須苦學飛騰術。更看泥金檢玉年。

又

南山手自斲蒼苔。竹閣柴扉次第開。二十里間雲不斷。豈容一點市塵來。

又

靈府寧容一物侵。此身只合老山林。何由挽得銀河水。淨洗羣生忿慾心。

又

赤米熟炊元自軟。黃蘗頻倒不多酸。縱令酒負尋常債。也勝人求本分官。

又

冰壺冷浸玉芙蓉。三伏炎蒸一點無。淨洗硯池瀦墨瀦。乘涼要答故人書。

又

硯傳百歲璽闕角。筆擅一時錐出囊。予所用硯百年前物。一角微闕。筆姑蘇能憲作。頗佳。紙欲窮時瘦蛟

舉已看雷雨跨蒼茫。

又

扁舟夜載石帆月。雙屨曉穿天柱雲。八十老翁能辦此。不須身將渡遼軍。謂李勣

又

犀象本安山海遠。榱桷豈願棟梁材。伏波病困壺頭日。應有嚴光入夢來。

又

粟無人餽方差快。門有僧敲未絕幽。豈是毫荒深絕物。從來不慣惹閑愁。

又

瞿聃楊墨寧非學。治獄行兵亦有師。惟是儒生知擇術。百年窮達守書詩。

病瘧兩作而愈

久出天魔境。胡爲瘧鬼來。亦知無妄疾。畢竟不爲災。引睡須書卷。支羸賴粥杯。微風起秋色。樽酒亦時開。

露坐

略約方塘北。篔簹小塹東。荷盤傾夕露。芡背坼秋風。磔磔禽移樹。芒芒月墮空。詩材隨處足。盡付苦吟中。

戲詠

歲曆還逾半。人生但可悲。此身猶老健。隨處且兒嬉。累瓦初成塔。埋盆又作池。惟應上庭樹。不及髭髭時。

初秋書感

流年冉冉不容追。餘息厭厭只自知。馬革裹尸違壯志。鹿門采藥卜幽期。林蟬委蛻仙何遠。巢燕成雛去

已遲。觸事爾來多感慨。北窗閑賦早秋詩。

湖上

石帆山下舊苔磯。回首平生念念非。秋早明河低接地。夜深白露冷侵衣。風生古戍笳爭發。月過橫塘鵲獨飛。卻看宦途傾奪地。恍然敗將脫重圍。

枕上

紗幮竹簟不勝清。臥看殘缸翳復明。兩樹梧桐鳴急雨。一林鸚鵡噪疎更。靜無狂蝶妨幽夢。懶有羣鷗責舊盟。待旦欲尋梅市路。小舟先向步頭橫。

書懷

無事自能心太平。有爲終蔽性光明。皮膚脫盡見真理。梁肉掃空甘菜羹。處處浮家成野宿。時時策蹇作山行。平生常笑羊裘老。史冊猶存後世名。

游昭牛圖

游昭木石師。李唐畫牛乃自其所長。出欄初聽一聲笛。意氣已無千頃荒。客居京口老益困。衣不揜脛鬢眉蒼。時時弄筆眼力健。蹠角毛骨分毫芒。我無沙隄金絡馬。拂拭此幅喜欲狂。乞骸幸蒙優詔許。置身忽在煙林旁。日落飲牛水滿塘。夜半飯牛天雨霜。俚醫灌藥美水草。老巫訶禁祓不祥。願我孫子勤農桑。願汝生犢筋脈強。確聲驚破五更夢。歲負玉粒輸官倉。

唐希雅雪鵲

烈風大雪吞江湖。巨木摧折竹葦枯。烏鳥瑟縮墮地死。豈復能顧卵與雛。棘枝拔出亂石罅。凜凜生氣獨有餘。耐寒兩鵲亦異粟。羽族有此山澤耀。神凝氣勁中自足。不待晴日相嗚呼。深知畫手亦怪偉。用意直刮造化爐。氈毛雖細爪翻健。落筆豈獨今所無。我評此畫如奇書。顏筋柳骨追歐虞。

菖蒲

雁山菖蒲崑山石。陳叟持來慰幽寂。寸根蹙密九節瘦。一拳突兀千金直。清泉碧缶相發揮。高僧野人動顏色。盆山蒼然日在眼。此物一來俱掃迹。根蟠葉茂看愈好。向來恨不相從早。所嗟我亦飽風霜。養氣無功日衰槁。

吾廬東北皆修竹。茂林羽族來栖者。不可數計感而有作。

遶舍皆茂林。萬數栖鳥雀。詰旦輒爭鳴。未暝紛已泊。清陰交欲暗。丹實熟可啄。吾廬少人迹。媿爾肯見託。雖無惠養德。亦免彈射虐。結巢俯可窺。淳風今豈薄。

秋夜聞蘭亭天章寺鐘

絕湖上蘭亭。不過一炊頃。湖廢繚隄行。往返常畢景。猶有古寺鐘。迢迢下重嶺。煙雲含莽蒼。風露共淒冷。蕭然草堂臥。度此清夜永。百念一洗空。於焉發深省。

閔雨

歲秋固多雨。每恨不及時。黃塵蔽赤日。苗槁已不遲。踏車聲如雷。力盡真何爲。天豈不念民。雲族風散之。窮民守稼泣。便恐化棘茨。妻子不望活。所懼尊老飢。我願上天仁。願哀民語悲。鞭龍起風靈。尙繼豐年詩。徒行短歌次前輩韻。

風吹短衣雙鬢白。老人徒步歸鄉國。數樹丹楓野店西。一川紅蓼溪橋北。芒屨有賣百無愛。過盡青山到渡頭。更求款段真多事。堪笑當年馬少游。

江樓次前輩韻

一日千回上庭樹。城南尙記嬉遊處。俯仰人間八十年。鏡中未許朱顏去。甲第侵雲多貴人。朝回撲帽軟紅塵。江樓月夜吹長笛。誰似儂家不負身。

七月四日夜賦

樓角西南月一鉤。晚瓜落刃酒新篘。仙家又愴銀河別。太史新班玉曆秋。衰病歲時良冉冉。窮愁身世轉悠悠。莫因乞巧嘲兒女。我亦飄然水上浮。

出近村歸偶作

朝騎小蹇涉煙村。擁路爭看八十身。似我猶爲一好漢。問君曾見幾閑人。楊梅線紫開園晚。蓴菜絲長入市新。莫笑堅頑推不倒。天教日日享常珍。

送子修入閩

士生萬里合鵬搏。憔悴青衫且自寬。薄祿及親雖共喜。遠途將父亦誠難。關山可厭風塵惡。蓬華應思菽水歡。只道老年心似鐵。詩成也作鼻辛酸。

書志

飲水蕭然臥曲肱。桑村麥野醉騰騰。老身長子知無憾。泛宅浮家苦未能。南畝服勞勝乞食。腐儒垂死恥依僧。柴荆常閉斜陽裏。剝啄雖聞亦懶應。

秋雨

雨聲疎復密。窗影暗還明。赤米香炊飯。青蔬淡鬻羹。閑中長棋格。病後減詩情。惟有桑麻事。鄰翁與細評。

雨後涼甚

並海寬閑野。清秋搖落天。微涼供美睡。穩字入新聯。陋屋蕭蕭雨。修筒細細泉。晚窗生酒興。洗酌一陶然。

屏迹

屏迹亂山中。觀身槁木同。桑麻安舊業。薪水付村童。不散嬰兒樸。常存太古風。一錢無用處。那復計囊空。

又

飯熟起開鉢。困來徐倒牀。無狂安取聖。有短始知長。養道褐懷玉。露才錐出囊。聊須喚兒稚。細細話耕桑。

書事

聞道輿圖次第還。黃河依舊抱潼關。會當小駐平戎帳。饒益南亭看華山。饒益寺南亭。盡得太華之勝。

又

關中父老望王師。想見壺漿滿路時。寂寞西溪衰草裏。斷碑猶有少陵詩。華州西溪。卽老杜所謂鄭縣亭子者。

又

鴨綠桑乾盡漢天。傳烽自合過祁連。功名在子何殊我。惟恨無人快著鞭。

又

九天清蹕響春雷。百萬貔貅扈駕回。不獨雨師先灑道。汗流滾滾入淮來。

雨後

雨後涼生病體輕。閑拖拄杖出門行。槐花落盡桐陰薄。時有殘蟬一兩聲。

幽居

早歲猶奇怪。中年痛掃除。華堂基陸廢。名馬宴遊疎。散帙身忘倦。畦蔬手自鉏。寥寥千載後。誰此訪幽居。

書事

北征談笑取關河。盟府何人策戰多。掃盡煙塵歸鐵馬。剪空荆棘出銅駝。史臣歷紀平戎策。壯士遙傳入塞歌。自笑書生無寸效。十年枉是枕瑠戈。

秋夜感遇十首以孤村一犬吠殘月幾人行爲韻

月生東山口。宿鳥驚相呼。我起立蒼茫。恍在白玉壺。飢鶻掠危巢。大魚躍平湖。作意賦新詩。佳夕不可孤。

又

今日天氣佳。駕言適山村。種枳作短籬。疊石成高垣。牲酒賽秋社。簫鼓迎新婚。所願在仕者。努力蘇元元。

又

長康有三絕。吾獨得其一。寓世八十年。一癡萬事畢。世間所謂黠。正類禪中蝨。燂湯會有時。爲計誰得失。

又

我夢遊異境。烏帽跨小蹇。桑麻夾阡陌。山川曠何遠。俗有太古風。蕭散到雞犬。鐘鳴忽驚覺。所造恨猶淺。

又

謁作朝築陂。獨勞暮鉏菜。草煙欄犢臥。船響籬犬吠。殘年迫耄及。農事不敢廢。兒曹強學餘。努力事春蠶。

又

頽曆如昨日。俯仰芳歲殘。蜩螿方鳴秋。礎杵已戒寒。書生賦予薄。何適不艱難。梁肉固所美。食淡心始安。

又

前年蒙越召。渡江當六月。顧慚衰病軀。觸熱朝行闕。君恩雖屢下。恐懼乞骸骨。飄然返柴荆。所愧已黔突。

又

畏首復畏尾。吾身其餘幾。雖云食不足。健決豈不偉。蓬窗對親舊。情話來疊疊。何以永今朝。沽酒刺圈豨。

又

昔遇高皇帝。同朝多偉人。哀哉逝不留。君蒿返蒼旻。存者纔一二。相望不得親。秋風聞雁過。老淚霑衣巾。

又

唐虞治巍巍。洙泗道益明。豈知秦漢後。佛老起縱橫。詩書雖僅存。韶護無遺聲。書生幸有聞。未死猶力行。

草書歌

吾廬宛在水中沚。車馬喧囂那到耳。一堂脩然臥虛曠。蟬聲未斷蟲聲起。有時寓意筆硯間。跌宕犇騰作
談詭。徂徠松盡玉池墨。雲夢澤乾蟾滴水。心空萬象提寸毫。睥睨醉僧窺長史。聯翩昏鷄斜著壁。鬱屈瘦
蛟蟠入紙。神馳意造起雷雨。坐覺乾坤真一洗。小兒勸我當自珍。勿爲門生書葉兒。

自傲

牛解謹藏刀。羊亡密補牢。達人憂祿厚。奇禍出名高。所要懷全璧。寧當恥緼袍。世間俱癘疥。何事苦爬搔。

新秋

遠浦平郊弄夕霏。曲籬幽徑鎖秋暉。馴麕巧占蒼苔臥。驚鵲斜穿密篠飛。浴罷小軒成美睡。雨餘老火斂餘威。未言風月供詩思。汗幘塵衣且解圍。

又

蟬聲滿院送流年。又見秋風到海邊。舊友死來頻入夢。新詩愁絕少成篇。步頭野水雙飛鷺。林外人家一點煙。顧影自驚如許瘦。囊空無藥起沉綿。

憫俗

蚩蚩之氓不自覺。顧笑吾曹安淡薄。攜女數千行問法。腰錢鉅萬仍騎鶴。豈知此事不兩得。芻豢何可參。毒藥野狐出林作。百態擊下鬪髀渠。自作老氏五千本。清靜揚雄太玄。惟寂寞。但能於此尊所聞。萬卷丹經盡糟粕。

塊坐齋中有感

敗席凝塵嬾拂除。況能作意去庭蕪。讀書眼力衰難強。對酒心情薄欲無。野寺鍾魚思下檐。山郵鞍馱憶登途。頽然坐睡誰驚覺。寂寞西窗日又晡。

新涼示子適時子適將有臨安之行

竹簟紗櫺事已非。秋清初換熟縑衣。鵲驚山月栖還起。螢避溪風墮又飛。老眼漸昏書嬾讀。壯心雖在事多違。夜窗剩欲挑燈語。日倚柴門望汝歸。

秋雨

毒熱秋未衰。吾廬況淺迫。雖云日一浴。流汗沾衣幘。蕭蕭三日雨。出此炮烙厄。瀟湘應更佳。恨我無六翮。

又

吾廬多美蔭。最茂楸與梧。百鳥集其間。下上更嗚呼。秋風忽動地。搖落日日疏。何如澗底松。終歲無榮枯。

講學

遷善以美身。講學以盡性。能爲可行爾。用舍固有命。天方斲斯文。魯叟虛歷聘。黎元則可哀。窮死吾何病。

野興

來日無多去日適。朱顏那肯爲人留。簷聲點滴無時雨。野氣蒼茫極目秋。朝出釣魚來北渚。夜耕驅犢上西疇。此心所要常無媿。寂寞衡門死卽休。

又

江湖蕭散葛天民。敕放還山一幅巾。老去飢羸惟恃粥。病來舉動每須人。道窮舉世知心少。學進吾兒著語親。更有一端差自慰。短檠不作白頭新。

又

早見高皇宇宙新。老年猶作太平民。虛名僅可欺橫目。臆論曾經犯逆鱗。原野暮雲低欲雨。陂湖秋水浩無津。蕭條生計君無笑。一鉢藜羹敵八珍。

又

飽見人間行路難。暫陪鷓鴣意先闌。集仙院裏三題石。神武門前兩挂冠。飢臥了無千里志。倦飛元怯九
霄寒。客來莫笑蓬窗陋。若比巢居已太寬。

示元敏

學問參千古。工夫始一經。寧論綬若若。且喜佩青青。汝業方當進。吾言要細聽。仍須知稼穡。勉爲國添丁。

八月四日夜夢中作

太華巉巖數水長。白驢依舊繫斜陽。山深乳洞藥爐冷。花發雲房醅瓮香。鄰叟一樽迎谷口。蠻童三髻拜
溪旁。中原俯仰成今古。物外自閑人自忙。

明日復理夢中意作

白盡髭鬚兩頰紅。頽然自以放名翁。客從謝事歸時散。詩到無人愛處工。高挂蒲帆上黃鶴。獨吹銅笛過
垂虹。閑人浪迹由來事。那計猿驚蕙帳空。

又明日復作長句自規

大學淵源不易窮。古人立志自童蒙。醉猶溫克方成德。夢亦齋莊始見功。痛哭孰能悲陷溺。力行猶足變
雕蟲。太空雲翳終當散。吾道常如日正中。

示子孫

累葉爲儒業不墮。定知賢傑有生時。學須造次常於是。道豈須臾或可離。我老已無明日計。心存猶惜寸
陰移。巍巍夫子雖天縱。禮樂官名盡有師。

秋夕

承學雖云淺，初心敢自輕。飄零爲祿仕，蹭蹬得詩名。撫事悲長劍，懷人感短檠。不堪秋雨夕，鼓角下高城。

徂歲

徂歲風煙慘，幽居市井遙。甌香炊薏米，泉潔煮芎苗。野廟迎神晚，村船過埭囂。西窗一樽酒，亦足慰無聊。

村居遣興

追數交朋略散亡，臂孱足蹇固其常。一年又見秋風至，孤夢潛隨夜漏長。不辦誦書如倚相，頗能噉飯勝張蒼。回看薄宦成何味，只借朝衫作戲場。

又

萬里征途興已闌，三間破屋住猶寬。山薑著雨房重斂，南燭先霜實半丹。野市秋陰更蕭瑟，書生老瘦轉酸寒。掩關也有消愁處，一卷騷經醉後看。

又

野堂疎豁近江臯，喜見南山秋氣高。野外漸寒羣木脫，草根薄暮百蟲號。築陂濬畎更相勉，伐荻剝桑敢愛勞。亦念耄荒當自佚，欲將世業付兒曹。

甲子秋八月偶思出遊往往累日不能歸或遠至旁縣凡得絕句十有二首雜錄入稿中亦不復

詮次也

鬻雪猶能活窖中，僮牛亦可隱牆東。來歸里社當知幸，萬卷書邊一老翁。

又

小兒緣天摘列宿。老子含飴弄稚孫。郊居得此豈不樂。無奈催租人打門。

又

早攜書劍三隨計。晚辱弓旌四造朝。心媿石帆山下叟。一生不識浙江潮。

又

筋骸未廢寧爲老。煙火猶通豈是貧。時跨一驢山縣去。園丁野老盡相親。

又

著囊藥笈每隨身。問病求占日日新。向道不能渠豈信。隨宜酬答免違人。

又

藥籠野老偏稱效。詩淺山僧妄謂工。懷餅裹茶來問訊。不妨一笑寂寥中。

又

家居愈老厭拘纏。旅舍僧房意自便。乞菜作羹殊有味。借牀小憩卽成眠。

又

鄉閭敬老意常勤。一味甘鮮必見分。大葢在前無箸食。始知富貴本浮雲。

又

市樓嘈囂知豐歲。驛樹輪囷傲早霜。六十年間凡幾到。剩沾新酒對斜陽。

又

燂湯具浴僧窗暖。春黍供炊旅餽香。自笑平生爲客熟。關山千里一衣囊。

又

胡麻刈罷下麪初。引水家家灌晚蔬。但有茅簷隨處好。淵明可獨愛吾廬。

又

秋風敗葉委蒼苔。小蹇閑遊始此回。溪上風煙爭晚渡。縣前燈火賣新醅。

此
页
空
白

陸放翁集

劍南詩稿

卷第五十九

遊山

四序雖悉佳。莫若新秋時。已脫烹煮厄。未興搖落悲。鷺集水落渚。鷓爭風墮枝。煙村烏柏丹。晚日望最奇。豈無一舴艋。往赴幽人期。婆婆下堂迎。壞衲顛倒披。丹果垂中庭。碧花蔓疎籬。秋高才一來。怪我今年衰。

對酒

天上何曾許寄愁。酒中正自可忘憂。不能上樹作巢飲。尙辦滿船供拍浮。神仙可學君豈信。衣食裁足吾何求。但憶人如王粲輩。相攜一笑賦登樓。

遣舟迎子適因寄古風十四韻

今日拆汝書。一讀眼爲明。知汝卽日歸。明當遣舟迎。想汝片帆東。翩若飛鴻征。薄暮過梅市。咿謳雙櫓聲。到家亦尙早。城樓初發更。草草一尊酒。爲汝手自傾。夜分不能寐。頓忘衰病嬰。豈惟病良已。白頭黑絲生。暫別亦不惡。益重父子情。自今日相守。北窗同短檠。六經焰久伏。白氏方縱橫。世俗擯孤學。未易口舌爭。此責在學者。草萊勿自輕。汝壯父未死。相勉在力行。

重寄子適

秋風日日望歸裝。忽報來期喜欲狂。衰病無因楫迎汝。夢隨殘月過浮梁。

飯後偶題

環堵蕭然百慮忘。天教得飯飫枯腸。長橋鮮美桃花嫩。北苑茶新帶胯方。漠漠寒花欲晚照。翩翩孤蝶弄秋光。解衣捫腹西窗下。賴有新詩破日長。

秋興

流光冉冉迫崦嵫。常抱秋風宋玉悲。才盡已無楓落句。身存又見雁來時。自憐閉戶龐眉叟。初對還家大耳兒。子適方自行在歸。一盞青燈照寒影。不妨細舉別來詩。

又

世事元看等一毫。紛紛寵辱陋兒曹。雁行橫野月初上。桐葉滿庭霜未高。細考蟲魚箋爾雅。廣收草木續離騷。更餘一事君知否。臥聽牀頭滴小槽。

舍北行飯

飯飽逍遙信所之。茨塘蔬圃遍遊嬉。梧楸凋落風高後。瓜瓠輪囷雨足時。犬喜人歸迎野路。鵲營巢穩占低枝。晚來嬾復呼童子。自掩柴門上屨屨。

舍南野步

枯蔓絡荆籬。幽花映荻扉。馴麇驚不起。歸鶴倦猶飛。野色連收網。邊愁人搗衣。壯圖空自笑。事事與心違。

感昔

行年三十憶南遊。穩駕滄溟萬斛舟。常記旱秋雷雨霽。柂師指點說流求。

又

馬瘦行遲自一奇。溪山佳處看無遺。酒壚強挽人同醉。散去何曾識是誰。

又

負琴腰劍成三友。出蜀歸吳歷百城。最是客途愁絕處。巫山廟下聽猿聲。

又

岳陽三伏正炎蒸。爽氣淒風見未曾。白浪蹴天樓欲動。當時恨不到黃陵。

又

行遍天涯只漫勞。歸來登覽興方豪。雲生神禹千年穴。雪捲靈胥八月濤。

病齒

似病多病臂已瘳。當墮未墮齒難留。一杯藜粥吾所美。幸可自辦不待求。既無齧骨犯曲禮。亦免祝鯁煩成周。形骸外物付悠悠。那將老境供閑愁。

揮手

揮手羣玉府。說駕石帆山。偶與片雲出。卻隨孤鶴還。松風暮蕭瑟。石溜夜淙潺。阿敏讀書處。更添茆一間。

過鄰家

初寒偏著苦吟身。情話時時過近鄰。嘉穉連雲無水旱。齊民轉壑自酸辛。室廬封鏽多逋戶。市邑蕭條少

醉人甑未生塵羹有糝。吾曹切勿怨常貧。

甲子秋八月丙辰雞初鳴時。夢劉韶美示詩八篇高古可愛。明日作此詩志之。

韶美仙去三十年。一念及之常悵然。秋窗忽夢接顏色。萬里老鶴歸遼天。贈詩溫其似玉瓚。我亦麤識關雎亂。建安黃初不足言。筆端直覺無秦漢。

山居

客至何曾共劇談。行藏獨有老農諳。覓官肯信山居樂。食淡方知飯味甘。一脈泉通澆藥圃。萬重雲鎖釣魚菴。好奇自笑心無厭。行遍江南憶劍南。

歸老

兩脚走萬里。歸老樵風溪。雖遠京雒塵。窮巷還多泥。紫纍喪家狗。喔喔失旦雞。幸非徒比景。何恨棲會稽。今年更可笑。偃僂自灌畦。榮雖不滿眼。悔亦免噬臍。萬事付一尊。師友阮與嵇。

送子坦赴鹽官縣市征

父子團圓笑語譁。豈知雲散各天涯。長亭結束秋將晚。別酒淒涼日易斜。我坐老年艱就養。汝非仰祿肯離家。遊山尚有平生意。試爲閑尋一鹿車。臘中欲作一小肩輿。輕駛堅實。兩夫可舉者。以備山行。

寄子坦

目斷西陵細靄中。津亭想汝繫孤篷。頗憂昨暮雲吞日。俗以黑雲接落日爲風雨之候。猶幸今朝雨壓風。就食亦知難戀戀。挂帆終恨太匆匆。寒沙不是無來雁。頻寄書歸問老翁。

書感

老荷寬恩許退耕。絲毫無報亦何情。民貧樂歲尙艱食。道喪異端方肆行。黨禍本從名輩出。弊端常向盛時生。古人骨冷青松下。誰起英魂與細評。

自扁門歸

橘柚纍纍未著霜。陂塘渺渺度秋光。長橋虹臥當官道。重閣鸞飛出女牆。煙際遠舟俄已隱。天邊驚雁不成行。歸來有底誇兒輩。笑指奚奴古錦囊。

遣興

兔徑遊觀足。蝸廬臥起寬。垂名千古易。無愧寸心難。燈火娛清夜。風霜變早寒。一經家世事。吾興未應闌。

詩酒

詩酒平生樂。無如老病侵。才衰愁韻險。量退怯杯深。宿露滋金盞。微霜點纈林。呼鷹五陵路。惆悵少年心。

晚秋野興

病骨支離不耐秋。今年九月卽輕裘。細書燈下幸能讀。舊友夢中時與遊。連夕夢紹興間同朝諸公。官賦畢輸無吠犬。農功已息有閑牛。不知冠蓋朝天客。也得心安似我不。

又

徹底無能徹骨貧。自憐虛作六朝民。學因病廢捐長日。志與年衰媿古人。露溼亂螢飛暗廡。霜清飢雀噪空囷。一生眼境常如此。草賦憑誰問大鈞。

舟中口占

養生妙理本平平。未可常談笑老生。業力頓消知學進。人情愈薄喜身輕。鶴雛日長丹砂頂。巖溜時聞玉珮聲。最是扁舟暮歸處。一川風月遠相迎。

閉門

閉門何所樂。聊息此生勞。霜薄殘蕪綠。風酣萬木號。研朱點周易。飲酒讀離騷。斷盡功名念。非關快剪刀。

暮秋

多雨今秋水渺然。溝溪無處不通船。山回忽得煙村路。始信桃源是地仙。

又

閑傾清聖濁賢酒。穩泛朝南暮北風。射的山前雲幾片。一秋不散伴漁翁。

又

百年大耋龍鍾日。九月初寒慘淡天。嶺谷高低明野火。村墟遠近起炊煙。

又

舍前舍後養魚塘。溪北溪南打稻場。喜事一雙黃蛺蝶。隨人來往弄秋光。

又

九月山村已驟寒。看雲殊怯倚闌干。一杯濁酒栽培睡。不覺春雷起鼻端。

又

清秋又是一年新。滿眼丹楓映白蘋。海內故人書斷絕。汀洲鷗鷺卻心親。

農舍

三農雖隙亦匆忙。穡事何曾一夕忘。欲曬胡麻愁屢雨。未收蕎麥怯新霜。

又

神農之學未爲非。日夜勤勞備歲饑。雨畏禾頭蒸耳出。澗憂麥粒化蛾飛。

又

萬錢近縣買黃犢。襤褸行當東作時。堪笑江東王謝輩。唾壺塵尾事兒嬉。

又

杜門雖與世相違。未許人嘲作計非。長綆雲邊牽犢過。小舟月下載犁歸。

九月十日夜獨坐

蓬窗燈火耿疎籬。正是寒沙雁到時。頭少二毛真薦老。口無縱理亦長飢。朝聞夕死固當勉。幼學壯行嗟已遲。小豎夜闌私怪我。儼然危坐若深思。

述意

憂患無窮生有涯。惟須百事屏紛華。人誰敢侮修身士。天不能窮力穡家。頻喚老僧同夜粥。間從鄰叟試秋茶。結茅林下從來事。瓦屋三間已太奢。陸士衡兄弟共居瓦屋三間。

小疾自警

老來士弗強。舉箸輒作病。造物蓋警之。何啻三下令。而我不自珍。若與疾豎競。豈惟味攝養。實亦闕忠敬。顛踣乃自詒。何用死不瞑。自今師古訓。念念貴清靜。羔豚昔所美。放斥如遠佞。淖糜煮石泉。香飯炊瓦甑。采蔬擷藥苗。巾冪相照映。膨脝亦宜戒。僅飽勿憚剩。隱書有至理。要使氣常勝。因之戒友朋。苦語君試聽。

白龍

九月癸酉暮。白龍見西方。是時久晴明。日落天正蒼。玉宇無纖雲。凌空獨高翔。蜿蜒久乃隱。父老歎未嘗。清臺占五行。此事實殊常。我非劉子政。聊記以短章。

學易

卒歲勿多求。壺飧與褐裘。心安由自足。身貴爲無求。易化千年鶴。難馴萬里鷗。閉門方學易。未暇揖浮丘。

又

學古忘衰疾。齋心洗昨非。拳拳奉天理。坦坦息心機。改過先幽隱。收功在細微。耄期猶自警。俯仰惜餘暉。

閑中作

呼童按摩罷。倚壁欠伸餘。棋局可忘老。鳥聲能起予。掃簷憐宵蝶。投餌出潛魚。向晚明窗下。還來讀舊書。

枕上

噓噓初聽雁。南征。喔喔俄聞雞。一鳴。夢境往來雙隻。埃官途興廢短長。檠何由生計。裁能足。不願人間過。取名飯。輒茶甘。吾事了。但愁無酒酌。公榮家貧不能釀酒。而官壺多醖。

出遊

一樽隨處可開顏。此事深疑造物慳。地可登臨多恨遠。身常強健又須閑。山圍小市煙初斂。霜著橫林葉半殷。徙倚闌干君勿厭。日斜猶及棹舟還。

又

漁村酒市本無期。小蹇扁舟信所之。丹葉滿林霜落後。紫萍黏塊水枯時。山林閑寂歸雖早。齒髮衰殘病已遲。努力及時謀自適。錦囊多貯暮秋時。

又

山有籃輿步有舟。放翁身健得閑遊。羊牛點點日將夕。蒲柳蕭蕭天正秋。細徑僧歸雲外寺。疎燈人語酒家樓。歸途更愛湖橋月。獨倚闌干爲小留。

又

霜氣蕭條木葉黃。佳時病起意差強。雲煙古寺聞僧梵。燈火長橋見戲場。一枕清風幽夢斷。數匙旅飯野蔬香。道邊莫笑衰殘甚。獨往山林興未央。

又

禹窆胥濤中路分。畫橈衝破一川雲。柯橋僧閣凌空起。梅市漁歌帶月聞。蟹束寒蒲大盈尺。鱸穿細柳重兼斤。酒家報我新醅熟。且撥閑愁寄一欣。

家居

清世念遺民。常情重老人。饋漿煩郡府。分胙媿鄉鄰。穫稻黃雲卷。舂粳玉粒新。膨脝自摩腹。一笑欲忘貧。

又

老眊詩名減，登臨笑口開。釀泉爲酒熟，倩鶴附書回。紗帽方簪菊，筠枝又探梅。清狂君勿笑，曾是薄蓬萊。

又

蒲葦村深地，風霜歲晚天。溪柴勝熾炭，小束柴自若。耶溪出名溪柴，黎布敵純綿。客有遺黎布者，甚輕暖。有客問奇字，無人嘲晝眠。誰言此翁老，懷抱尙超然。

贈隱者

疇昔從君處，玄都太古壇。月高旛影直，霜重珮聲寒。鶴駕三山近，壺天萬里寬。相逢初未省，但認切雲冠。

又

力量超終古，光明破積昏。獨行寧有待，妙用本忘言。神定嬰兒戲，丹靈豎子奔。緒餘應不靳，小出濟元元。

貧中自戲

種枳爲籬草，結廬人間知。足更誰如，澗深松老忘榮謝。天闊雲閑任卷舒，門冷併無殘客跡。家貧常讀絕編書，有金可散還關念。多事從來笑漢疎。

風雨夜坐

寒風淒緊，雨空濛。舍北新丹數樹楓，欹枕舊遊來眼底。掩書餘味在胸中，松明對影談玄客。篠火圍爐采藥翁，君看龜堂新境界，固應難與俗人同。

示村醫

玉函肘後了無功。每寓奇方嘯傲中。衫袖翫橙清鼻觀。枕囊貯菊愈頭風。新詩吟罷愁無洗。好景逢來病欲空。卻羨龍鍾布裘客。隸西賈藥到村東。

秋雨

一秋風雨蔽白日。積水鬼神愁太陰。寒蛩悲鳴草根溼。水鳥暝哭菰叢深。殘年不覺日月逝。病骨惟愁霜露侵。常有淖糜支旦暮。一毫寧復少年心。

雜興

散步持書卷。閑眠枕藥囊。馴麕隨几杖。癡蝶入衣裳。病起年光速。身閑日景長。爲憐紅樹好。久立向西廂。

又

客問維摩疾。人哀范叔寒。詩囊負童背。藥笈挂驢鞍。野果攢眉澀。村醪振齒酸。老雞殊可念。且且報平安。

又

愛物停垂釣。劬身自荷鋤。時從鄰父飲。日授稚孫書。尙棄登山屐。寧須下澤車。平生雙不借。投老伴歸歟。

又

平生獨何幸。命若與人謀。疲懦逃深責。空疎得早休。位卑輕得喪。迹遠少恩讎。莫怪歸耕樂。文園久倦遊。

又

倒囊得千錢。從人買釣船。秋風宿村步。暮雪醉江天。得意鷗波外。忘歸雁浦邊。平生笑嚴子。猶有姓名傳。

又

澤居憂下溼。老病覺中乾。違俗恐不免。倚天聊自寬。受規如獲藥。喜退甚彈冠。不是憎勳業。心知骨相寒。

江亭

野市逢虛日。江亭候暮潮。蟲號霜後草。人立雨中橋。病骨羸將折。殘魂黯欲消。無心作村醉。酒旆苦相招。

晚歸

梅市橋邊弄夕霏。菱歌聲裏掉船歸。白鷗去盡還堪恨。不爲幽人暖釣磯。

懷昔

奮迹窮閭本甚微。刺天何敢慕羣飛。業文僅與驢書券。學射纔因鼠發機。罟擣縱橫真脫命。風波傾洞尙餘威。朝冠挂了方無事。卻愛山僧百衲衣。

初寒示鄰曲

村北村南數十家。陂池重複谷谿斜。荻叢缺處見漁火。蓬戶閉時聞紡車。淺瀨水清雙立鷺。橫林葉盡萬棲鴉。是中佳興無窮極。嬾著青鞵上若耶。

夢中作并序

甲子十月二日夜雞初鳴。夢宴客大樓。上山河奇麗。東南隅有古關。尤壯。酒半樂闌。索筆賦詩。終篇而覺。不遺一字。遂錄之。亦不復加竄定也。

富貴誇人死。卽休每輕庸。子覓封侯侯。讀書歷見古人面。好義常先天下憂。獨往何妨月買犢。大烹卻要鼎函牛。坐皆豪傑真成快。不負凌雲百尺樓。

初寒

老遇初寒候。貧當絕祿時。衣裳俱在笥。薪炭不衍期。鶉滿羣童網。魚浮百石陂。比鄰每分餉。捫腹可無飢。

又

重簾禦晚吹。密瓦護晨霜。小室今年冬。初增瓦三百箇。三面窗皆設紙縑。焰焰輒爐火。霏霏石鼎香。行遲依木仗。坐久穴藜牀。晝亦無聊甚。胡爲厭夜長。

鉏菜

江湖霜雪薄。終歲富嘉蔬。菘非常相續。藟蔓亦有餘。家貧闕梁肉。身病忌龍魚。幸有荒畦在。何妨日荷鋤。

對酒

賦性雖耽酒。其如老病身。氣衰成小戶。醅濁號賢人。疏廣矜君賜。劉伶畏婦嗔。蘭亭獨超絕。千載擅清真。

夜臥久不得寐。復披衣起呼燈。作草書數紙。乃復酣枕。明日作此詩記之。

才下多阨窮。地偏罕人客。半生走四海。竟無第一策。暮年忽大悟。惟有緊閉門。朝作一池墨。弄筆招羈魂。初若奔駮驥。忽如掣蛟鯨。鬼神森出沒。雷雨更晦明。飛揚輿已極。投筆徑就牀。酣酣一枕睡。不覺幽夢長。手攜避秦人。行上腰帶鞶。下視河流黃。仰視天宇青。大呼自驚覺。夜半燈欲死。亦簷雨點滴。身乃在萬里。挑燈影突兀。顧問汝是誰。留侯雖強食。輕舉亦何疑。

孤雲

四十年來住此山。入朝無補又東還。倚闌莫怪多時立。爲愛孤雲盡日閑。

自閔

破帽羸驂厭垢氛。挂冠歸伴故溪雲。年光疾病占強半。日景睡眠居七分。廬冢蕭條頻實涕。交朋零落久離羣。殘年豈復行孤學。自閔猶尊昔所聞。

贈雞

青銅三百買烏雞。關地牆東爲擇棲。更聘一雌全物性。莫辭風雨五更啼。

子適爲其長兄置酒予亦與焉作五字示之

烏衣兄弟集。我亦據胡牀。晚菊數枝在。小園幽興長。霜清桑落熟。湯嫩雨前香。草草雖堪笑。他年未易忘。

太息

太息貧家似破船。不容一夕得安眠。春憂水潦秋防旱。左右枝梧且過年。

又

禱廟祈神望歲穰。今年中熟更堪傷。百錢斗米無人要。貫朽何時發積藏。

又

北陌東阡有故墟。辛勤見汝昔營居。豪吞暗蝕皆逃去。闕戶無人草滿廬。

代鄰家子作

社日淋漓酒滿衣。黃雞正嫩白鵝肥。弟兄相顧無涯喜。扶得吾翁爛醉歸。

山行

山光秀可餐。溪水清可啜。白雲映空碧。突起若積雪。我行溪山間。靈府爲澄澈。峻嶒崖角立。蟠屈路九折。黃楊與冬青。鬱鬱自成列。其根貫石罅。橫逸相糾結。上捫雕鵲巢。下歷豺虎穴。流泉不可見。鏘然響環玦。出山日已暮。林火遠明滅。小憩得樵家。題詩紀幽絕。

行過西山至柳姑廟晚歸

倚杖西山麓。寒衣古廟墀。斷雲依釣浦。細雨壓炊煙。廢學慙詩退。安貧覺氣全。霜天日易晚。鐘鼓隔城傳。

月夕幽居有感

五嶽名山采藥身。可憐騎馬踏京塵。浮名本是挺災物。謝事寧非得道因。出岫每招雲結伴。巢松仍與鶴爲鄰。劍南舊隱離乖隔。依舊柴門月色新。

寒夜將旦作

白髮垂肩無二毛。胸中消盡少年豪。河傾月沒夜將旦。木落草枯秋已高。窗下燈殘候蟲語。牆隅淒冷老雞號。曲肱不復更成寐。起視寒空如斷鰲。

舍北獨步

霜露霑衣迫歲徂。天公欲爲老人娛。斷雲新月供詩句。蒼檜丹楓列畫圖。風葉蕭蕭歸獨鶴。煙波渺渺漾雙鳧。孤村薄暮誰從我。惟是詩囊與酒壺。

山村道中思蜀

當年萬里客西南。藥市題詩倚半酣。偶爲三遊羣玉府。遂妨重到百花潭。剡溪謾說思安道。函谷誰能識

老聃空乞丹青作橫幅。半堤寒日策羸驂。

不如茅屋底

鑄印大如斗。佩劍長拄頤。不如茅屋底。睡到日高時。

又

南伐踰銅柱。西征出玉關。不如茅屋底。高枕看青山。

又

火齊堆盤起。珊瑚列庫藏。不如茅屋底。父子事耕桑。

又

列鼎賓筵盛。籠坊從騎都。不如茅屋底。醉倒喚兒扶。

菜羹

青菘綠韭古嘉蔬。蓴絲菰白名三吳。臺心短黃奉天廚。熊蹯駝峯美不如。老農手自闢幽圃。土如膏肪水如乳。供家賴此不外取。襤褸寧辭走煙雨。雞豚下箸不可常。況復妄想太官羊。地爐篝火煮菜香。舌端未享鼻先嘗。

十月暄甚人多疾。十六日風雨作寒氣候方少。正作短歌以記之。

昔我從行臺宿師南山旁。仲秋已戒寒。九月常霽霜。入冬即大雪。人馬有仆僵。土牀熾薪炭。旃毳如胡羌。果蔬悉已冰。熟視不得嘗。獵騎荷戈歸。爭獻狐與狼。是時意氣快。豈復思江鄉。邇來四十載。餘景迫耄荒。

結茅鏡湖曲。氣候歲靡常。殘暑排不去。單衣作重陽。霜晚木未丹。地燠草不黃。玄冥失號令。瘡鬼意頗頗。忽焉風雨惡。縱擊勢莫常。頗疑地撼軸。又恐河決防。和泥補竅穴。乞火燎衣裳。霰雪雖未作。疾癘幸退藏。風爐齋糝美。瓦甌粳飯香。比鄰共安健。相與歌虞唐。

冬夜題齋壁

髮不能勝二寸冠。天教送老向江干。倚牆筇杖伴人瘦。縞瓦清霜爭月寒。壯志追思良可悔。危途遍歷始知難。一身著了餘何事。茅屋三間已太寬。

自遣

蔬食任無魚。山行可借驢。指鬢猶把釣。眼澀未捐書。客少勝紛若。家貧亦晏如。時時顧影歎。頑似十年初。

蕩蕩

蕩蕩唐虞去日遙。孔林千載亦荒丘。六經殘缺幸可考。百氏縱橫誰復憂。釋書恐非易論語。王迹其在詩春秋。君臣父子未嘗泯。吾道尙傳君但求。

晨起

曉枕初興白髮翁。弊裘百衲葑爐紅。獨居漫受書狐媚。滯思難矜筆陣雄。舊學蟲魚箋爾雅。晚知稼穡講幽風。一身自喜無餘事。且度殘年風雪中。

此
页
空
白

陸放翁集

劍南詩稿

卷第六十

述感

斷簡承孤學，窮閣負壯心。方憂一齒落，時一齒方搖動。何止二毛侵，買地開幽圃。招僧理廢琴，浮生祇如此。感慨不須深。

甲子歲十月二十四日夜半夢遇故人于山水間飲酒賦詩既覺僅能記一二乃追補之

拂衣金馬門，稅駕石帆村。喚起華山夢，招回湘水魂。心親頻握手，目擊欲忘言。最喜藤陰下，翛然共一樽。

又

小山綠曲澗，路斷得藤陰。忽遇平生友，重論一片心。興闌棋局散，意豁酒杯深。雞唱俄驚覺，悽然淚滿襟。

舟中夜賦

千里風塵季子裘，五湖煙浪志和舟。燈殘復吐惱孤夢，雨落還收生旅愁。城上霜笳入霄漢，煙中漁火耿汀洲。牧之未極詩人趣，但謂能輕萬戶侯。

舟中曉賦

木落霜清水鳥呼，扁舟夜泊古城隅。吹殘畫角鐘初動，低盡寒空斗欲無。浪迹已同鷗境界，遠遊方羨雁

程途高橋健席從今始。遍歷三湘與五湖。

漁家

江上漁家水蘸扉。閑雲片片傍苔磯。釣收鷺下虛舟立。橋斷僧尋別徑歸。海近岡巒多迤邐。天寒霧雨正霏微。羊裘老作桐江叟。點檢初心幸未違。

遠遊

少年遊宦日骯髒。恥沉浮。見虎猶攘臂。逢狐肯叩頭。力行雖自許。早退豈人謀。予年六十餘。卽退閑故山。小艇煙波上。飄然得遠遊。

與兒孫小飲

歲暮寒多雨。村深早閉門。荒園摘葵芥。近市買雞豚。短褐聯三世。幽窗共一樽。吾曹常得此。餘事不須論。

遂初

狂本類三閭。歸仍慕二疎。何由滿人笑。但可遂吾初。奕奕沙堤馬。栖栖下澤車。細看俱外物。俛首老犁鋤。

與村鄰聚飲

冬日鄉閭集。珍烹得徧嘗。蟹供牢九美。聞人戀德言。甞賦中所謂牢九。今包子是魚羹膾殘香。雞跖宜菰白。豚肩雜韭黃。一歡君勿惜。豐歉歲何常。

又

交好貧尤篤。鄉情老更親。饜香紅糝熟。菑美綠椒新。俗似山川古。人如酒醴醇。一杯相屬罷。吾亦愛吾鄰。

夜坐示子虞

裘薄知霜重。燈殘覺夜闌。爲農宜廢學。謝事等無官。疎嬾貧難醒。沉綿死有端。大兒千里至。聊復爲加餐。

行飯暮歸

暫置觀書不耐閑。飄然梅塢竹籬間。霜風盡脫千林葉。雲氣平沉一面山。笑喚筇枝扶蹇步。聊憑村酒借朱顏。廟堦牆下歸來晚。宿鳥紛紛已漸還。

寒雨中夜坐

江村風雨晚冥冥。閉戶添衣愴客情。爐爇松肪如蠟爨。鼎煎茶浪起灘聲。團欒賴有兒同話。剝啄應無客可迎。聊舉一杯生耳熱。頽然酣枕到窗明。

枕上

世間命薄有誰如。僵臥空山夢亦孤。三尺窗前燈半死。萬重雲外雁相呼。久貧僅守殘書笈。未死猶須幾酒壺。趣辦一棺那得緩。古人四十揣頭顱。

卽事

心與巖泉靜。形如野鶴臞。朝餐美藜藿。夜學講唐虞。婢老無釵澤。僮寒闕袴襦。所欣惟一事。無吏督殘租。

又

糲飯流匙滑。葵羹出甌香。有時留野客。亦復餉鄰牆。老圃傳占法。行僧遺藥方。未爲全絕物。終勝利名場。

雜感

買馬當可乘。築舍當可居。快馬多覆敗。傑屋鬼所狙。徒行與露坐。安穩無後虞。所以古達人。秋風憶蓴鱸。

又

士生誦二典。恍若生唐虞。陸降奉玉帛。可否聞吁俞。闕里得其傳。功與造化俱。孰知千載後。乃尊重譯書。

又

擁裘南窗下。堅坐試定力。爐香亦不散。伴我到曛黑。絕交近爲我。遊世易顛踣。默默何所爲。且復自休息。

又

上峽聞竹枝。入秦聞烏鳥。奏曲未及終。涕淚淒已濡。還山風月夕。菱唱起鏡湖。雖無遠遊感。白首亦窮途。

又

吾聞之古方。有病當鮮食。如其不能爾。金丹亦無益。我老更事多。此語知造極。子房從赤松。千載推達識。

又

夢育小兒女。便有無窮愛。謁醫問疾恙。對客誇警邁。晨雞忽喚覺。此愛復安在。人生困糾纏。一笑脫囚械。

閑中自嘲

鏡湖西畔有漁扉。竊比玄英似庶幾。風月定交殊耐久。煙波得意可忘歸。曾行萬里求微祿。亦伴諸公踐

駭機。試問卽今成底事。晨飧依舊北山薇。

暇日坐山麓松石間作

偶曳枯筇出槿籬。松間盤石坐移時。饑蟻翳草無餘綠。乳鵲營巢有墮枝。幽事類分皆可譜。高情辭達自

成詩莫嗟寂寂終吾世。正是他年一段奇。

得子虞臨安舟中書因寄

口水悠悠雙鯉魚。眼明初拆入關書。殘年已覺口如客。一念還成淚濺裾。春近預憂歸夢短。潮回莫遣寄聲疎。何時可棄微官縛。五畝荒畦共荷鋤。

書喜

寵辱元知不足驚。退居兀兀餞餘生。冰魚可釣羹材足。霜稻方登糴價平。鄰媪已安諧子養。閩氏媪以貧甚棄諸子而去。今始得復歸。園丁初葺數椽成。韓氏得屋湖上。以種蔬爲業。鄉閭喜事吾曹共。一醉寧辭洗破觥。

又

十月東吳草未枯。村村耕牧可成圖。歲收儉薄雖中熟。民得蠲除已小蘇。家塾競延師教子。里門罕見吏徵租。老昏不記唐年事。試問元和有此無。

老學菴夜與

冷臥空齋枕曲肱。饑鷹驚起髮鬢聾。煙霞華嶽逃名客。風雪廬山入定僧。櫛葉蔽身勝衣帛。金丹照室不燃燈。秃翁自笑無名字。聊向江湖襲舊稱。取江湖散人之意。

感昔

百丈庚寅上峽時。至今猶健豈前期。家人暗換吾何歎。鏡裏衰翁復是誰。上峽骨肉在者。四子爾今皆出。

仕

又

神女祠前猿夜鳴。相公溪上草初生。重遊惟有西窗夢。一點燈青夢不成。

又

白帝城邊鶯亂啼。憶騎瘦馬踏春泥。老來感舊多悽愴。孤夢時時到灤西。

又

小益晨裝雨作泥。南沮涉水馬長嘶。山腰細棧移新路。驛壁流塵闥舊題。

又

曾從征西十萬師。白頭回顧只成悲。雲深駱谷傳烽處。雪密嶓山校獵時。

又

老君洞外小朱扉。雲壓寒空雪欲飛。結陣弓刀邊壘去。挂鞍狐兔獵場歸。

又

少時失腳利名間。寸步何曾不險艱。造物恐人渾忘卻。夢中憂患尙如山。

孤村

少年誤計落人間。晚臥孤村日掩關。小室易溫爐火省。幽窗常暗架書閑。梅橫籬落春初動。雲闌川原雪尙慳。欲喚一藤同勝踐。恨無傑句壓溪山。

村舍書事

紙窗百衲地爐紅。圍坐牛醫卜肆翁。時節杯盤來往熟。朝晡鹽酪有無通。男丁共結春耕耦。婦女相呼夜績同。老子頽然最無事。客歸自策讀書功。

小菴居舍

野水楓林下。殘年亦自存。刈茅支漏屋。插棘補頽垣。把釣襟靈爽。爭棋笑語喧。晚窗幽興極。共酌黍醅渾。

冬至

老遇陽生海上村。川雲漠漠雨昏昏。鄰家祭徹初分胙。賀客泥深不到門。萬卷縱橫忘歲月。百年行止付乾坤。明朝晴霽猶堪出。南陌東阡共一樽。

夜坐示子適兼示元敏

微霰不成雪。大風俄散雲。孤燈翳還吐。斷雁遠猶聞。冉冉新春動。遙遙清夜分。兒孫未須睡。吾與汝論文。

客懷

客懷病思雨悽悽。瘦馬長韉濺雪泥。道左忽逢曾宿驛。壁間閑看舊留題。村醅酸薄陳山果。旅飯蕭條嚼凍齋。何處人間非夢境。恍然重到劍關西。

雜書幽居事

抱瓮窮園叟。還山老布衣。死邊常得活。鬧處偶容歸。釣恐魚吞餌。棋憂客墮機。此心君會否。洗盡百年非。

又

淡薄齊榮辱。恢疎略怨恩。爐常養丹母。手自斲桐孫。炎火下照海。黃河高泝源。道翁來不速。一笑倒吾樽。

又

庭曠多延月。齋空半貯雲。松聲行路共。泉脈近鄰分。采藥九蒸曝。朝真三沐熏。林間有叢杞。繞屋夜猿猿。

又

貧困雖終老。胸中尙浩然。直今頭搶地。未害鼻撩天。種菜慳三畝。苦茅僅數椽。布衾常不暖。夜夜亦安眠。

又

卜築南湖上。梅花幾度春。身緣作詩瘦。家爲買山貧。野步維漁艇。江樓岸醉巾。誰知會稽叟。不媿葛天民。

題齋壁

門前枯葉滿荒街。堂下殘蕪擁土階。蓬蓽蕭條如旅店。豆蔬淡薄學僧齋。畫存真火溫枵腹。夜挽黃流灌病骸。喚取鄰翁同結社。他年仙去與君偕。

探梅

歲月相尋豈有窮。早梅喚醒醉眠翁。坐中酒量人人別。花底春風處處同。白帝城邊微雪過。青衣江上夕陽紅。錦囊空復殘詩在。分付悲歡一夢中。

新移竹栽喜于得雨而池中瀾糲乃以水溢而去戲以長句記之

霧雨三日天沉陰。西溪水長二尺深。土濡新竹有生意。池滿文禽無住心。竹根蘇活賴此雨。禽亦歸飛戲煙浦。去留雖異各欣然。抽萌哺子全其天。

讀宛陵先生詩

李杜不復作，梅公真壯哉。豈惟凡骨換，要是頂門開。鍛鍊無遺力，淵源有自來。平生解牛手，餘刃獨恢恢。

勉學

學力艱危見，精誠夢寐知。衆人雖莫察，吾道豈容欺。雷雨含元氣，著龜決大疑。爲儒能體此，端不負先師。

道室試筆

浮雲萬事不到眼，千歲人間心尙孩。屏風疊下看花落，扇子峽中聞雪來。

又

兜羅緜雲常滿谷，勃落葉衣無四時。中原百戰血塗野，此老醉眠初不知。

又

事來得失若山重，放下始知前日狂。一枝藜杖一壺酒，何處人間無醉鄉。

又

吾家學道今四世，世佩施真二住銘。一窗蘿月照孤詠，萬壑松風吹半醒。

又

死來尙戀遊金谷，病廢猶難放柳枝。等是胸中不浩浩，樂天莫笑季倫癡。

又

明明行路有神仙，世上求仙卻不然。貪冒苦多廉讓少，恐君未得盡天年。

治心

治心無他法。要使百念空。秋毫作其間。有若海颶風。颶風孰能止。三日力自窮。我徐躡其後。杲杲日出東。向來一噫者。畢竟誰爲雄。萬里靜海氛。一望開天容。會從安期生。高會蓬萊宮。

夜夢遇老人于松石間。若舊嘗從其遊者。再拜敘間闊。老人亦酬接甚至云。

遼海曾從化鶴丁。百年塵土汚巾瓶。萬山深處遇行李。再拜起時如醉醒。綠樹巖前開藥笈。白驢背上指丹經。雲霄平步尋常事。不用求方更解形。

過鄰家

病去詩情動。寒深酒戒開。兒孫扶每出。鄰里喚還來。雲重時飛雪。春遲未見梅。山園多芋栗。夜話且燔煨。

村飲

舊隱青山在。衰顏白髮新。推移忝前輩。疎嬾似高人。擊鼓驅殤鬼。吹簫樂社神。家家皆有酒。莫吐相君茵。

市飲

學道無多事。消陰服衆魔。春雷驚蟄戶。海日浴鯨波。大勇收全勝。靈襟襲太和。何妨會稽市。取酒獨酣歌。

社飲

東作初占嗣歲宜。蠶官又近乞靈時。傾家釀酒無遺力。倒社迎神盡及期。先醉後醒驚老憊。路長足蹇歎歸遲。西村漸過新塘近。宿鳥歸飛已滿枝。

舟中作

一葉輕舟一破裘。飄然江海送悠悠。閑知睡味甜如蜜。老覺羈懷淡似秋。失侶雲間孤雁下。耐寒波面兩鳧浮。年逾八十真當去。似爲雲山尙小留。

風雲晝晦夜遂大雪

大風從北來。洶洶十萬軍。草木盡偃仆。道路暝不分。山澤氣上騰。天受之爲雲。山雲如馬牛。水雲如魚鼈。朝闇翳白日。暮重壓厚坤。高城岌欲動。我屋何足掀。兒怖牀下伏。婢恐堅閉門。老翁兩耳聾。無地著戚欣。夜艾不知雪。但覺手足皸。布衾冷似鐵。燒糠作微溫。豈不思一飲。流塵暗空樽。已矣可奈何。凍死向孤村。

大雪

海天黯黯萬重雲。欲到前村路不分。烈風吹雪深一丈。大布縫衫重七斤。

雪夜

病臥湖邊五畝園。雪風一夜拆蘆藩。燎爐薪炭衣篝暖。圍坐兒孫笑語溫。菜乞鄰家作菹美。酒賒近市帶醅渾。平居自是無來客。明日衝泥誰叩門。

雪霽

米盡囊空莫問渠。天公自解養迂疎。雪泥壅路斷來客。朝日滿窗宜讀書。漸暖橫林聞語鳥。乍晴幽圃富嘉蔬。東家小蹇那須借。早晚吾兒送鹿車。子坦欲作一小轎子來。

雪後

雨解平簷雪。風收際海雲。根蘇萱出土。冰斷水生紋。遊舫家家葺。行歌巷巷聞。太平元有象。端爲謝東君。

夜寒與客燒乾柴取暖戲作

稿竹乾薪隔歲求。正虞雪夜客相投。如傾激激葡萄酒。似擁重重貂鼠裘。一睡策勳殊可喜。千金論價恐難酬。他時鐵馬榆關外。憶此猶當笑不休。

排悶

殘雪融成雨。寒燈結作花。睡稀聽鬪鼠。坐久送棲鴉。食似開僧鉢。居如寓店家。餘年不須問。卽此是生涯。

席上有舉呂居仁詩者因次其韻示坐客

是身如鼠穴太倉。七十始辦求深藏。扶衰復拜求舊詔。入對講殿瞻顛昂。期年蒙恩許謝病。家居更辱鄉黨敬。今夕不醉無庸歸。此老餘年君所知。

予使江南時以詩投政府丐湖湘一麾會召還不果偶讀舊稿有感

文字塵埃我自知。向來諸老誤相期。揮毫當得江山助。不到瀟湘豈有詩。

柳橋

村路初晴雪作泥。經旬不到小橋西。出門頓覺春來早。柳染輕黃已蘸溪。

鷗

海上輕鷗何處尋。煙波萬里信浮沉。今朝忽向船頭見。消盡平生得喪心。

鷺

雪霽春回亦樂哉。棋軒正對小灘開。翩翩飛鷺真吾友。肯爲幽人一再來。

感物

日落烏將數子歸。風和雉挾兩雌飛。不如村舍安孤寂。父子飄然兩褐衣。予齋居已久。又諸子皆出仕。獨與子通相對。如世外人。

甲子歲暮

世間巧拙亦何施。萬事難禁歲月移。遲死幾時天有意。要令自悟不須師。

出遊至僧舍及逆旅戲贈絕句

山僧邂逅即情親。野叟留連語更真。淡淡論交端有味。一彈指頃百年身。

又

飯炊適熟如延客。犬喜來迎似到家。雨滴茅簷草煙溼。不妨笑語暫誼譁。

歲暮出遊

殘曆消磨無半紙。一年光景又成非。瓦溝雪水滴欲盡。江路梅花開尙稀。竹院篝燈留度宿。旗亭誇酒勸無歸。此身自笑知何似。萬里遼天一鶴飛。

出遊所至皆欣然相迎口占示之

寓館兼山澤。行裝半雨晴。隨宜分藥物。投老惜人情。邂逅成新識。慙慙講舊盟。農家尤可念。迎勞輟春耕。

題旅舍壁

老子殘年未易量。出門隨處得彷徨。窗櫺日淡僧房暖。竈突煙青旅飯香。濁酒可求敲野店。舊題猶在拂

頽牆閑來又取丹經讀。夜就松明解布囊。

野人舍小飲

梅市波光遠。柯橋柳色新。百年情分熟。數酌笑言親。沙上人爭渡。街頭婦賣薪。琴琴隔林鼓。歲暮賽江神。

自近村歸

雪晴村路尚殘泥。茅屋清寒正要低。野渡船虛飛鳥集。煙村路近蹇驢嘶。堅頑那復愁空橐。老健猶能伴架犁。蹴榻不僵君會否。更須百盞享黃齋。

夢華山

古松偃蹇谷谿飭。太華峯前野老家。久客未歸丹竈冷。碧桃八十一番花。

歲暮與鄰曲飲酒用前輩獨酌韻

出會稽南門。九里有聚落。雖非衣冠區。農圃可共酌。野實雜甘酸。草具無厚薄。小童能擊筑。一笑相與樂。徒手出叢花。空中取丸藥。王禮雖可笑。衆客亦起酌。聊持綴宿好。未用嘲淡泊。窮達則不同。亦踐真率約。予年過八十。故物但城郭。避御名。從省文。作詩記清歡。未媿華表鶴。

山中飲酒

百屋堆金錢。萬戶封公侯。富貴人所羨。熟計終繆悠。有酒君但飲。有山君但遊。雖云亦夢事。要是勝一籌。獨醉新豐市。遺魂招馬周。清獻蘇門山。曠度交公休。爛爛目如電。凜凜氣愈遒。騎鯨歸東海。已矣吾何求。

客亭

荻浦煙汀並海涯。一枝柔艣語咿啞。久從野老非生客。慣寓僧廬勝在家。乘興村村俱有酒。逢春處處可尋花。朝來雪霽梅初動。又向郵亭閱歲華。

除夜

野水楓林屋數椽。寒爐無火坐無氈。殘燈耿耿愁孤影。小雪霏霏送舊年。椒酒辟瘟傾潑灑。藍袍佻鬼舞跼躩。從今供養惟春齋。莫羨愚公日萬錢。

此页空白

陸放翁集

劍南詩稿

卷第六十一

乙丑元日

好在屠蘇酒，扶衰把一卮。家貧爲壽略，曆閏換年遲。薦廟須扶拜，題門強綴詩。惟思買春困，熟睡過花時。
俗有賣春困者，予老憊思睡，故欲買之。

元日讀易

伏羲三十餘萬歲，傳者太山一毫芒。春秋雖自魯麟絕，禮樂蓋先秦火亡。孟軻財能道封建，孔子已不言鴻荒於庠易學。幸未泯，安得名山處處藏。

自開歲陰，雨連日未止

江雲漠漠雨昏昏，歸老山陰學灌園。十里羊腸僅通路，三家鐺腳自成村。應時餽餽聊從俗，耐久鍾虺儼在門。近縣傳聞頗多盜，呼兒插棘補頽垣。
俗有年餽餽之語，予貧甚，今歲遂不能易鍾虺。

枯菊

翠羽金錢夢已闌，空餘殘藥抱枝乾。紛紛輕薄隨流水，黃與姚花一樣看。

又

積雪嚴霜轉眼空。春回無處不春風。欲知造物無窮妙。但看萱根與菊叢。

村舍雜興

冉冉年華速。昏昏睡思濃。廢書心自愧。謝病客能容。雨急鐘微度。溪湍碓自舂。可憐燈下影。隨處伴衰慵。

又

堅臥非由病。端居不是齋。世情元自薄。人事固多乖。晨飯炊稊米。宵行點豆豔。昔人言可用。第一忌安排。

徐仲車有請問于安定先生。先生曰：莫安排。

又

白首返吾鄉。功名罷激昂。掃除魔眷屬。砭熨病膏肓。老圃勤供菜。蠻童解炷香。黃昏那用問。且喜日舒長。

又

粥罷重投枕。晨起粥後再睡。最佳。燈殘起讀書。閉門常自得。作計更誰如。箭茁白於玉。櫻花長比魚。盤飧有此味。勿怪食無餘。

又

遊宦風波惡。還家日月長。厭煩思病忘。避俗欲陽狂。絕意功名會。收身翰墨場。著書吾豈敢。尙可述農桑。

夜興

窮巷行人絕。高城漏鼓稀。劇談頻翦燭。久坐旋更衣。飢鼠衝人過。啼鴉冒夜飛。客歸吾未睡。孤影自相依。

示鄰曲

北陌東阡好弟兄。老年幸復主齊盟。同嘗春韭秋菘味。共聽朝猿夜鶴聲。百世不忘耕稼業。一壺時敘里閭情。諸孫識字吾真足。安用鵬搏九萬程。

夢中作

華山數水本閑人。一念無端墮世塵。八十餘年多少事。藥爐丹竈尙如新。

春雨

倚闌正爾受斜陽。細雨霏霏渡野塘。本爲柳枝留淺色。卻教梅蘂洗幽香。小露蝶粉初何惜。暫澀鶯聲亦未妨。造物無心寧徧物。憑誰閑與問東皇。

草堂

幸有湖邊舊草堂。敢煩地主築林塘。辛幼安每欲爲築舍。予辭之遂止。漉殘醅。益葛巾。溼。插遍野梅。紗帽香。風緊春寒那可敵。身閑晝漏不勝長。浩歌陌上君無怪。世譜推原自楚狂。陸氏舊譜云。本出接輿後。

道室

筮遇風山第六爻。翛然盡謝俗間交。謀生舊買雲三頃。託宿新分鶴半巢。露下丹芽生藥壠。月明金粉落松梢。眉間喜動君知否。借得丹經手自抄。

旅次有贈

黃鶴樓前逢劍客。青衣江口見詩人。天涯莫起漂零感。物外終爲自在身。賣馬求船雖少日。阻風中酒動兼旬。中原早晚胡塵靜。緜月嵩雲要卜鄰。

雜感五首以不愛入州府爲韻

莘渭二老人耕釣俱白首功烈在人間如天有北斗方其未遇時自處固不苟夫豈邀虛名欲眩千載後降及秦漢王望古猶培塿猶能守所聞外物不得誘君看魯二生亦豈聖人偶凜然諸儒間人可我獨不

又

山棲天與癖酒復甚所愛雖云慙黃綺亦慕嵇阮輩失腳落人間二事略皆廢晚歸臥雲壑謂此在券內如何疾屢作大與初意背好山雖在眼動步輒有礙酒戒復堅持如隄憂蟻潰何以遣餘年閉戶淡蕪菜

又

鸞鳩搶榆枋枯魚過河泣鵬鯤九萬里此豈汝所及丈夫志古人絕世而獨立遠遊馬蹏穿高臥劍鋒澀其初所抱負固自高巖岌安能與兒曹俛首就維繫君看折腰趨孰若舉手揖芝老尙可餐修門戒輕入

又

澤水初平時草木充九州禽獸孳育繁與人爲敵讎于時聖人作日夜爲民憂思有以勝之食肉而服裝然後人奠居禾黍歲有秋豈知千載後戕殺無時休一食刀几赤百味供膳羞豪侈方相誇哀哉非始謀

又

我年甫三十出身事明主狂愚斥不用晚辟征西府蹭蹬過錦城邂逅客嚴武十年醉鄆筒陽狂頗自許青城訪隱翁西市買幽圃如何復不遂歸聽鏡湖雨結廬三間茅泛宅一枝艣天真儻可全吾其老煙浦

自詠絕句

雙鬢蕭條失故青。躬耕猶得養餘齡。明時恩大無由報。欲爲鄉鄰講孝經。

又

深村人有結繩風。晚歲身爲帶索翁。掇粥茹蔬茅屋底。誰知也過百年中。

又

不淪鬼錄不登仙。遊戲杯觴近百年。小市跨驢寒日裏。任教人作畫圖傳。

又

逆旅門前撥不開。先生醉策蹇驢來。未言乞得囊中藥。一見童顏且壓災。

又

遠遊索手不賣糧。薪米臨時取道傍。今日清明行亦好。經旬風雨住何妨。

又

一條紙被平生足。半盃藜羹百味全。放下元來總無事。雞鳴犬吠送殘年。

又

平生寧獨愛吾廬。何處茅簷不可居。晝闕僮奴停接客。夜無膏火罷觀書。

又

睡著何曾厭夜長。老人少睡坐何傷。無燈無火春寒惡。破絮羸氈卽道場。

風月吟

去日如馳衰有驗。萬事惟當就收斂。可憐未與酒相忘。風月婆娑猶不厭。有時清夜行中庭。幅巾藜杖影
蛤蜊。松風十里吹殘夢。羅月三更照半醒。河傾雞唱吟未已。爽透髮根清入齒。晨光底事不貸人。輓轡汲
水啼鷓起。

年光

無賴年光逐水流。人間隨處送悠悠。千帆落浦湘天晚。孤笛吟風鄂縣秋。小市鶯花時痛飲。故宮禾黍亦
閑愁。久留只恐驚凡目。又向西涼上酒樓。

龜堂

莫笑龜堂陋。生涯實有餘。春寒擁重褐。晨飯富藏蔬。薄技雕蟲爾。虛名畫餅如。兒時論語在。敢負此心初。

春晴

春如人易老。愁與漏俱長。酒著多思睡。花熏直欲狂。新晴乾蝶翅。微暖滑鶯吭。誰見龜堂叟。搗藤送夕陽。

閉門

殘髮凋零不滿巾。閉門聊得養天真。恐傷藥草停除地。爲惜松槎禁伐薪。獨木架成新略約。一峯買得小
嶙峋。蕭然便覺渾無事。談笑時時過近鄰。

又

衰疾厭厭不易醫。閉門惟與睡相宜。狂曾忤物慵迎客。瘦不勝衣悔作詩。數簡隱書忘世味。半甌春茗過
花時。寂寥終歲君無誚。正是幽居一段奇。

有所感

世事真成風馬牛。細思愈覺此生浮。舊交散後知心少。行路難來出戶愁。氣節陵夷誰獨立。文章衰壞正橫流。魯中狂士今安有。淚盡朱雲草滿丘。

八十一吟

八十古云耄。吾今不啻過。山程兩芒屨。水宿一漁蓑。雞唱劉琨舞。牛疲寧戚歌。春寒欺短褐。將奈此翁何。

高吟

食少支撐惟特粥。力衰舉動輒須人。誰知造物猶遺漏。擁鼻高吟又一春。

湖上作

耳目聰明手足輕。應酬幽事未忘情。百年日向漁樵過。千里雲從几席生。樽酒每招鄰父共。圖書時與小兒評。但餘煙水無儔侶。堪笑沙鷗欲抗衡。

賞花

湖上花光何處尋。朱朱白白自成林。衰翁何預傷春事。閑客猶懷愛物心。欲墮每愁風驟起。正開卻要日微陰。蘭亭禹廟平生事。一榼芳醪莫厭深。

園廬

天假殘年使荷鋤。白頭父子守園廬。四朝曾遇千齡會。七世相傳一束書。物理從來多倚伏。人情莫遣得親疎。功名自有英雄了。吾輩惟當憶遂初。

乍晴行西村

堤樹叢祠北。煙村古隸南。買魚論木盞。挑薺滿荆籃。積潦經旬月。時光見二三。農功殊可念。保麥復祈蠶。

書歎

塵甑炊畝粟。羸僮策蹇驢。自從行卷日。直至挂冠餘。揣分元知止。求官實抱虛。園蔬幸無恙。父子日携鋤。

新製小冠

淺醉微吟獨倚闌。輕雲淡月不多寒。悠然顧影成清獻。新製楸欄二寸冠。

又

楸欄冠子輕宜髮。練布單衣爽辟塵。縱不能詩亦堪畫。年餘八十水雲身。

書逆旅壁

市遠過三里。店孤無四鄰。窄纔容一客。久或住經旬。病軀求風藥。樵兒餽爨薪。人情愈諳熟。來往不辭頻。

倚樓

曲曲闌干縹緲間。哦詩本欲破除閑。無端又起天涯感。淡墨生綃數點山。

又

樓上憑闌小立時。淡煙漠漠雨絲絲。年光日日有佳處。不解春寒偏入詩。

小雨

小雨明復闇。餘寒去又來。新苔綠砌上。殘杏過籬開。垂老身餘幾。逢春心尙孩。江天近寒食。林外過輕雷。

書歎

無能自號癡頑老，尙健人驚矍鑠翁。未向松根藏病骨，尙尋花底醉春風。翩翩孤影如歸鶴，冉冉流年付斷蓬。曾謁高皇識隆準，傷心無復一人同。紹興朝士自周丞相下世獨予尙在爾。

遷雞柵歌

烏雞買來逾歲年，庭中赤幘何昂然。吾孫初生畏長唱，家人共議欲汝捐。烏窮必啄奴豈憚，雞賣將烹吾所憐。貴人賤畜雖古訓，物理寧不思兩全。舊棲況亦苦沮洳，新柵幸可圖完堅。東園稍去房奧遠，挾雌將雛從此遷。竹簞朝暮有餘粒，瓦缶亦自盛清泉。嗜嗜風雨守汝職，臚膊勿恤驚吾眠。

春興

暖靄催柔眼，晴光長草心。沙平看臥犢，密葉聽鳴禽。買酒貧爲祟，登山病不禁。終年惟一褐，捫蝨又春深。

小園

蕭散遺塵事，栽培得小園。土鬆花意活，林暖鳥言繁。殮醢供晨鉢，菹芹薦晚樽。餘年君莫問，送老向孤村。

二月晦日夜夢欲卜居近邑道遇老父告以不利欣然從之
夢中行卜居道遇白髯叟，一面出苦言戒我棄勿取人之生實難。失腳墮虎口，我深感其言。解衣奉杯酒，豈知立談間。得此直諒友，起坐心茫然。天闔樓挂斗。

新晴

苦雨幾終月，新晴喜夕陽。扶行呼稚子，隨意下茅堂。草茂知麀健，巢新覺燕忙。興闌歸亦好，袖手獨焚香。

病中作

苦雨侵衰骨，餘寒著弊裘。病多辭社飲，貧甚輟春遊。日日親蔬圃，時時弄釣舟。回頭語造物，與子兩無求。

示子適

敢恨吾生後聖賢，六經雖缺尙成編。本來堯舜身親見，孰謂丘軻道不傳。妙理豈求逢腋外，淳風寧在結繩前。此身未死還堪勉，更伴吾兒學數年。

窮居

羸病無時已，窮居只自悲。巾偏非雨墊，衣弊豈塵縑。米盡時炊稗，樽空慣啜漓。逐貧雖有賦，乞食未成詩。

春晚自近村歸

山陰道上柳如絲，策蹇悠悠信所之。曲水已過修禊集，餘寒不減試燈時。貧猶自力常謀醉，病不能閑日賦詩。誰道茅簷苦幽獨，一鈎新月是相知。

開孫滿月

夜夢奇童拜且言，今乃幸得生高門。夢後一日得開孫，虎兒墮地百獸奔。未論頭角與眉宇，但聽啼聲誰敢侮。就令長大未必奇，亦作人間孔文舉。

小築

西郊小築臨煙汀，南山秀色入窗櫺。朝鐘暮鼓在何許，乃是會稽山陰之蘭亭。堂中老人白鬚鬢，手扶藤杖垂九齡。客來不語坐至夕，往者絕物今忘形。牆隅老雞新樹柵，長號催上東方星。老人亦起穿兩屨，巖

泉漱齒讀黃庭。

春晚歎

一風已快晴。微雲復成雨。盛麗女郎花。坐看委泥土。蜂房蜜已熟。科斗生兩股。堂堂一年春。結束聽杜宇。老夫久臥疾。乃復健如許。便當裹米糲。醉爛作端午。

鷓鴣

翩然一鴉升。倏爾一鴉下。非惟飽殘餘。亦可免彈射。巡簷攫脯脩。入舍掠膾炙。嗟汝無盈厭。坐是取驅嚇。物情貴能改。一皆亦可貫。併語黃雀羣。勿輕敗吾稼。

舍東四詠

疎籬

數掩圍柴荆。王維畫不成。尤憐月中影。特地起詩情。

松棚

松棚尋丈地。客至共開顏。堪笑杜陵老。坐思千萬間。

盆池

寒溜初通後。新荷未長時。誰持大圓鏡。爲我照鬚眉。

小徑

環遶無十步。捷行財半之。安西九千里。自有著鞭時。

示元敏

學貴身行道。儒當世守經。心心慕繩檢。字字講聲形。吾已鬢眉白。汝方衿佩青。良時不可失。苦語直須聽。

暮春

掠面微風吹宿醒。送春空有不勝情。風煙老盡王孫草。時聽桑間小婦聲。

又

辛夷海棠俱作塵。鰲魚蓴菜亦嘗新。一聲布穀使無說。紅藥雖開不屬春。

又

市橋岸下泛湖舟。雕檻疎簾半上鈎。春事幾何君惜醉。明朝赤幟插譙樓。遊湖至立夏止。

又

祓除已過暮春初。綵舫相銜十里餘。浮蠟喜嘗新店酒。流塵閑拂壞垣書。

書感

楚些難招去。幹魂正令舌在向。誰論中分白。日歸欹枕。全付青春與杜門。凜凜怪人愁履虎。區區染指畏。嘗鼈。殘年誓報嗟何有。虛負明時養老恩。

晨起出南堂

曉枕華胥誰喚回。下堂拽杖一悠哉。啼鴉已逐晨光起。飛鷺初衝宿靄來。石路少行生蔓草。柴扉多閉長莓苔。身閑亦未全無事。檢校幽花幾樹開。

春晚小飲

病臥虛齋一味慵。今年春事又成空。籀龍奮迅風雷際。木筆凋零霧雨中。平野草深黃憤健。斷溪水長畫船通。小兒偶得官樓酒。蠶醢鱸乾一醉同。

殘春

江鰲堆盤粒粒香。山家節物亦窮忙。桑間甚紫蠶齊老。水面秧青麥半黃。語燕似催春事去。遊絲不似客愁長。鄉村年少那知此。處處喧呼蹴鞠場。

又

過了清明日愈遲。年華不復在辛夷。誰知綠葉陰成處。正是青天露坐時。茂草滿庭喧鼓吹。嫩湯出鼎試槍旗。衰翁敢作明年計。剩與東君惜語離。

聞山步有虎

茆屋穿漏雨送春。村路斷絕虎啞人。采桑鋤麥皆結伴。兒童出門翁媪曠。

久雨初霽

兩月涔涔雨不休。今年春盡尙重裘。水深草茂羣龍怒。日出風和宿麥秋。陂壞隄防誰與築。市遙鹽酪絕難求。農家辛苦尋常事。賣劍方當更買牛。

初夏幽居雜賦

雨霽逢初夏。胡牀蔭綠槐。半酣方崑峨。假寐忽怡臺。小穗閑簪麥。微酸細嚼梅。衰翁不禁老。更著物華催。

又

過盡一春雨。園林氣少和。偶然扶柳栗。復爾坐盤陀。小草數行字。殘花一曲歌。公卿非傲汝。無奈愛閑何。

又

水際閑將鶴。林間獨擁琴。披叢采香草。映樹老珍禽。正使居無屋。猶勝突不黔。過差春覺健。處處得幽尋。

又

籬落魚池北。房櫺道院東。水紋藤坐榻。山字素屏風。采藥松岡近。投竿荻浦通。悠然搔短髮。心事寄冥鴻。

又

曲曲羊腸徑。疎疎麕眼籬。渴蜂窺硯水。狂蝶入書帷。一枕輕安夢。數聯蕭散詩。餘生已過足。不必到期頤。

又

關地翦蓬蒿。何曾歎作勞。藥名尋本草。蘭族驗離騷。北澗穿籬過。南山出屋高。回頭看富貴。何啻一秋毫。

又

修名寧復冀。餘日苦無多。已歎堂堂去。將如寂寂何。編籬護香草。埋盎貯清波。兒戲君無笑。相從且浩歌。

雨

家近蓬萊白玉京。草堂登望不勝清。初驚野色昏昏至。已見波紋細細生。殘醉頓消迎亂點。微吟漸苦入寒聲。只愁今夕虛簷滴。又對清燈夢不成。

自閔

主人元是客。儒士卻成僧。垂老貧如昔。經春醉未曾。褰衣身傴僂。顧影髮鬢鬢。忽憶東岡路。捫蘿試一登。
蔬食

牆陰春薺老。筍蕨正登盤。野饑元無婦。村醅不屬官。何由取熊掌。幸免買豬肝。猶勝煩秦相。綈袍閱一寒。
讀阮籍傳

天生父子立君臣。萬世寧容亂大倫。籍輩可誅無復議。禮非爲我爲何人。

杜宇行 鄉中以杜宇早鳴爲蠶麥不登之候。

去年杜宇號阡陌。家家聚首憂蠶麥。豈惟比屋衣食憂。縣家亦負催科責。今年略不聞杜宇。蠶收麥熟人歌舞。豈惟襦新湯餅寬。隣里相約先輸官。

捕虎行 自故識有三虎出上阜天衣山谷。近者尤爲人害。捕之未獲。

山村牧童遭虎噬。血肉俱盡除雙髻。家人行哭覓遺骨。道路聞之俱掩涕。州家督尉宿山中。已淬藥箭攢長弓。明朝得虎徹檻穿。纜絲擣麩歌年豐。

遣興

前歲峨冠領石渠。卽今山市醉騎驢。目衰書卷研求嬾。心弱詩章鍛鍊疎。風雨吾廬嗟獨破。齋鹽每食歎無餘。燈前卻有欣然處。稚子談經屢起予。

三齒墮歌

一葉落知天下秋。三齒墮矣吾生休。詩人未脫紈袴態。尙樂華屋悲山丘。蓼花荻葉可以解我憂。鷓鴣白

鸞可以從我遊。君看貂蟬與兜鍪。等爲岑岑壓我頭。豈知石闌干下買籊笠。一棹飄然煙雨舟。不須強預家國憂。亦莫妄陳帷幄籌。功名富貴兩悠悠。惟有杜宇可與謀。

龜堂初暑

淪漪一曲遶茅堂。葛帳紗巾喜日長。多事林鳩管晴雨。依人海燕度炎涼。深枝著子纍纍熟。幽草開花冉冉香。安得此時江海上。與君袖手看人忙。

衰歎

十年三墮齒。久矣歎吾衰。疊疊循天理。兢兢到死時。窮空顏子巷。勤苦董生帷。道遠餘生趣。常憂日影移。

初夏閒步村落間

薄雲輻日不成晴。野水通池漸欲平。綠葉忽低知鳥立。青萍微動覺魚行。醉遊放蕩初何適。睡起逍遙未易名。忽遇湖邊隱君子。相攜一笑慰餘生。

夜興

鬢毛飽受雪霜侵。一褐蕭條寄故林。簷雨滴回羈枕夢。城笳喚起塞垣心。平生恥露囊中穎。垂老甘同爨下琴。燈燼欲殘看瘦影。不妨袖手坐愔愔。

陸放翁集

劍南詩稿

卷第六十二

寄十二姪

庚寅吾入蜀。西過齊安城。雪堂拜老仙。眉宇寒崢嶸。微泉尙如昔。激激琴筑聲。龍蛇入筆力。斷石臥縱橫。戊戌奉詔追。觸熱萬里程。歸途抵齊安。歲月浩可驚。三日乃東下。鼓角遙送迎。安國有老僧。元祐初載生。蟬聯說舊事。耳目猶聰明。徒行就船別。耿耿惻愴情。豈知二紀後。汝乃爲此行。追懷昔遊地。未語涕已傾。念汝雖並塞。殘虜方守盟。職雖在警盜。枹鼓寂不鳴。惟當奉法令。日夜撫孤惇。官卑俸入薄。切勿厭藜藿。勇如赤壁戰。節若江水清。人誰不汝知。況事賢公卿。三山與七家。相望兩柴荆。歸來講學暇。襤褸同春耕。出塞四首借用秦少游韻

又

北伐下遼碣。西征取伊涼。壯士凱歌歸。豈復賦國殤。連頸俘女真。貸死遺牧羊。犬豕何足讎。汝自承餘殃。煌煌藝祖業。土宇盡九州。當時王會圖。豈數汝黃頭。所謂黃頭女。真今茲縛蠹下。狀若黻觶牛。萬里獻太社。裨將皆通侯。

又

符離既班師。北討意頗闌。志士雖有懷。開說常苦難。諸將初北首。易水秋風寒。黃旗馳捷奏。雪夜奪榆關。

又

小醜盜中原。異事古未有。爾來閭左起。似是天假手。頭顱滿沙場。餘骸飼豬狗。天網本不疎。貸汝亦已久。

命駕

命駕清晨出射堂。筠枝羽扇受微涼。鷓鴣將數子窺苔井。桐引新枝出粉牆。岸幘影邊茶正熟。投壺聲裏日初長。興闌卻蹋湖隄去。十里山花滿袖香。

遊山遇雨

千秋觀前雨溼衣。石帆山下叩漁扉。鷓鴣苦道行不得。杜鵑更勸不如歸。

東籬雜題

終日在東籬。清和適此時。鶯聲如妬夢。花氣欲撩詩。愛客茶新碾。留僧飯別炊。流年隨手過。不覺近期頤。

又

深居遠悔客。簡事養精神。曳杖一蕭散。待茶時欠伸。風生叢竹嘯。露坼野花新。自作東籬後。經旬不過鄰。

又

昨日一花坼。今朝一草生。深林鳩婦聒。高棟燕巢成。熟果檐間墮。殘書枕畔橫。菴居澹無事。作意領新晴。

又

南陌歸雖久。東籬興又新。無求覺身貴。好儉失家貧。引水常終日。栽花又過春。桃源不須覓。已是葛天民。

又

溝聲流激激。籬影立疎疎。平旦來澆藥。臨昏尙看魚。比鄰怪疎索。風月伴躊躇。安得王摩詰。憑渠畫草廬。

書事

本來只道千鈞重。看破元無一羽輕。日月光明天廣大。不妨獻傲過平生。

又

燕雛學母飛初熟。梅子團枝亦半黃。塵尾唾壺俱屏去。尙存餘習炷爐香。

乙丑重五

盤中共解青菰粽。衰甚猶簪艾一枝。寂寞廢詩仍止酒。今年眞負此佳時。

又

飛棹中流救屈平。但歌寧復楚遺聲。危冠更在門楣上。但覺蕭敷與艾榮。

夏夜枕上

臥聽殘更下麗譙。雖非遙夜亦迢迢。正令展轉無安枕。猶勝龍鍾趨早朝。

石帆夏日

石帆山下雨冥冥。閑岸紗巾憩草亭。單複箠衣時脫著。甜酸園果半黃青。鰥魚無隊依蒲藻。病鶴長鳴鏗翅翎。自笑若爲消永日。異書新錄相牛經。

又

短棹飄然信所之。茶園漁市到無時。風從蘋末蕭蕭起。月過花陰故故遲。蓴菜羹羹吳舊俗。竹枝度曲楚遺辭。頗聞項里楊梅熟。鄰曲相招莫後期。

仲夏風雨不已

南陌東阡自在身。一年節物幾番新。鱗魚出後鶯花鬧。梅子熟時風雨頻。冠蓋敢同修禊客。桑麻不減避秦人。夕陽更有蕭然處。照影清溪整葛巾。

幽居

旌節庭下葵。鼓吹池中蛙。坐令灌園公。忽作富貴家。浮生均一閔。事過但興嗟。蚩蚩彼何人。欲摘空中花。牆偶蔬可挽。巷口酒可賒。疎懶遂吾性。不買東陵瓜。

齒落

昔聞少陵翁。皓首惜墮齒。退之更可憐。至謂豁可恥。放翁獨不然。頑頓世無比。齒搖忽脫去。取視乃大喜。譬如大木拔。豈有再安理。咀嚼浩無妨。更覺髭肩美。

雨中排悶

殷殷雷繞村。浙浙雨鳴砌。禽魚各自適。草木亦得意。願此菴中人。老病獨顛顛。飯遲每懶索。兀兀方坐睡。平生飽憂患。性命已屢試。但得過今朝。明日可徐議。

逆境

步步常由逆境行。極知造物欲其成。磨礪久已盡芒角。烹煮豈容重發生。死到面前猶覺小。事於身外孰

非輕。出門不必名山去。但見風煙已眼明。

夜興

脫冠殘髮冷颼颼。北斗闌干河漢秋。木末有風栖鵲起。亭臯無月亂螢流。酒慳僅得時時醉。詩退難禁夜夜愁。欲睡不妨還小立。一聲菱唱起滄洲。

寄題李季章侍郎石林堂

林慮靈壁名宇宙。震澤春陵稍居後。翟公黃鶴得數峯。對客掀髯詫奇秀。我行新灘見益奇。千巖萬竇雷雨垂。古來豈無好事者。根株盤踞不可移。侍郎築堂聚衆石。坐臥對之盱忘食。千金博取直易爾。要是尤物歸精識。君不見牛奇章與李衛公。一生冰炭不相容。門前冠蓋各分黨。惟有愛石心則同。崎嶇宦路多危機。凜然石友人間稀。它時檣棹華亭岸。更看全窠買鶴歸。

流年

冉冉流年迫耄期。心情漸減舊兒嬉。唾壺塵尾已從省。茶竈筆牀猶自隨。昨日客招東浦釣。今朝僧約北軒碁。敢將輕健誇鄰里。一笑元知要及時。

雨中鋤藥

庭中正苦日卓午。水面忽看雲過西。老子不辭衝急雨。小鋤香帶藥畦泥。

自嘲

壯歲耽書廢夜眠。窗明猶在短檠前。如今自笑摧頽甚。臥看兒曹理斷編。

世事

世事如今盡伏輸。面能乾唾況其餘。詩才退後愁強韻。眼力衰來怯細書。斂迹已思焚筆硯。作勞敢避把犁鉏。晴空萬里寬多少。一片閑雲足卷舒。

悲齒落自解

年運而往君自寬。此生畢竟有衰殘。語訛嚼廢尋常事。只作兒童礪齒看。

送十五郎適臨安

求祿亦常事。出門寧自由。苦留雖惜別。細話卻生愁。雨急投村市。鐘殘過寺樓。祇應今夕夢。先汝到江頭。

幽居夏日

茅舍參差煙靄中。超然高興與誰同。形骸已與流年老。詩句猶爭造物功。子母瓜新間尊俎。公孫竹長映簾櫳。日長愈覺閑無事。隱具成書又一通。

又

內史蘭亭晚卜鄰。永和風月凜如新。功名不入閑人夢。詩酒猶關老子身。簷淺時時聞寶籟。池清一一見潛鱗。正令未逐飛仙去。要是巢居太古民。

大雨

北窗欲化莊生蝶。睡思濛濛栖倦睫。川雲忽帶急雨來。萬點縱橫打荷葉。坐收爽氣入詩律。更借涼颺吹醉頰。壞簷腐瓦凜欲墮。積潦中庭深可涉。兒愁漏溼廢夜課。婦畏泥塗停早饅。老翁自笑獨爾頑。更喜煙

波搖短楫。

思雲門

一身膏脂略瘦盡。萬卷簡編如隔生。祇欲移家若耶去。亂雲深處聽灘聲。

夏夜

散髮荒池上。秋聲滿綠蒲。燐飛乘月暗。梟語似人呼。學問無新得。功名負壯圖。拾薪炊麥飯。隨事且枝梧。

觀身

欲去浮華累。先觀老病身。濁醪何負汝。淡飯最宜人。意氣隨年往。工夫媿日新。祇將閑送老。虛作太平民。

養氣

學道先養氣。吾聞三住章。屏除金鼎藥。糠粃玉函方。凜凜春冰履。兢兢拱壁藏。高談忘力守。此病最膏肓。

日用

日用無淵奧。其中妙理存。但能明物性。不必學玄門。盡力扶元氣。精思去病根。昔人由此道。推己及元元。

村市醉歸

伏櫪元知免駭機。翦翎豈復慕羣飛。坐中客滿知心少。囊裏詩多得意稀。小市兩餘尋酒去。野橋日落策驢歸。不辭十里行空翠。終勝京塵化客衣。

夏日感舊

北窗枕簟臥陶翁。樹樹鳴蟬葉葉風。睡覺殘書棲嬾架。浴回細葛覆熏籠。一藤未遂名山去。半卷還驚舊

歷空妄想金丹君莫笑。清班曾是長仙蓬。

又

五侍仙祠兩挂冠。此生略有半生閑。嘯歌雨笠煙蓑底。來往山村縣郭間。一粒何當換凡骨。數盃且復駐顏顏。胡塵掃盡知何日。不隱箕山卽華山。予仕宦屢歷宮祠崇道玉局武夷佑神太平凡五任。

又

吳人那慣粟漿酸。茶盃聊霑舌本乾。身病不堪閑客攪。日長惟憶異書看。流年冉冉誰能駐。長夏迢迢亦已殘。步有新船君賀我。西風先夢上嚴灘。近修小舟訖事村鄰多來賀。

又

獨居無復客嘲邊。終日頹然飽卽眠。護硯小屏山縹緲。搖風團扇月嬋娟。桐陰忽見翻雙鷓。石罅時聞落細泉。避暑不須河朔飲。轉頭卽見早秋天。

雨後

甘澍慰羣望。浮雲還故墟。新涼生枕簟。餘潤入犁鋤。簾上翩翩燕。蒲新鱗鱗魚。素秋猶半月。團扇意先疎。

東軒

榴花零落滿蒼苔。蒼荀忘憂亦已開。湖海片帆先已具。少安無躁待秋來。

寄子虞子遜

大兒再度吳門秋。小兒錢塘逾月留。恨身不能插兩翅。與汝相守寬百憂。聞鐘時宿雲外寺。待月亦上湖

邊樓。但常保此豈不樂。路難悠悠非善謀。

寄張季長

髮不勝簪短褐寬。每因臨鏡歎衰殘。未嘗三日不服藥。雖滿百年終闔棺。舊友豈知常阻闊。一尊那得敘悲歡。錦官花重應如昔。直欲凌風借羽翰。

夏夜

鳴蜩斷復續。宿鳥久始安。觸熱汗沾衣。暮夜猶未乾。梧桐獨知秋。一葉墮井闌。行矣戒礎杵。四序環無端。

又

落月不滿窗。驚鵲屢移樹。沉憂少睡眠。亦以衰疾故。五更忽作夢。立馬青衣渡。白首厭山村。郵亭憶征步。

讀趙昌甫詩卷

蝸廬溽暑不可過。把卷一讀趙子詩。如遊麻源第三谷。忽見梅花開一枝。寄書問訊不可得。握臂晤語應無期。惟當飲水絕火食。海山忽有相逢時。

海氣

浴罷來水滸。適有漁舟橫。浩然縱棹去。漫漫菰蒲聲。海禳乃爾奇。萬象空際生。驂驪牧龍馬。天矯騰蛟鯨。或如舉大旗。或如執長兵。我欲記其變。忽已天宇清。成壞須臾間。使我歎且驚。世事正如此。何者非強名。

村居

舍後盤高岡。舍前面平野。防盜枳作藩。蔽雨篠代瓦。村人以篠覆屋如茅。數家相依倚。百事容乞假。薄暮

耕樵歸共話衡門下。

戒殺

郊居去市遠。豬羊稀入饌。既畜雞鶩羣。復利魚蟹賤。暴殄非所安。擊鮮況親見。那得屠殺業。爲客美殷膳。餘年尚有幾。過日如露電。豈無園中蔬。敬奉君子宴。

庭中夜賦

流汗沾衣不自支。庭中散髮立多時。烏鳥畫角凌風起。淡淡銀河拂地垂。浮玉閑遊元自樂。浣花小築亦何疑。東歸萬里君知否。要了滄洲一段奇。

秋近

石榴萱草併成空。又見牆陰莧葉紅。茶醖頗妨千里夢。簾涼初怯五更風。新瓜落亦冰盤裏。晚燕添巢畫閣中。身健流年俱可樂。故人自欠一尊同。

歎老

齒墮因廢談。髮短不入把。餘年似殘尊。欲盡不禁瀉。出門見鄉曲。每恨識面寡。往昔同戲兒。纍纍塚盈野。殘暑得小雨。頗涼。

午暑不可觸。忽驚如許涼。軒窗雲作暝。草木雨生香。蒲葉先秋實。蟬聲入夜長。自欣無一事。岸幘倚胡牀。

乙丑夏秋之交小舟早夜往來湖中戲成絕句

橫林渺渺夜生煙。野水茫茫遠拍天。菱唱一聲驚夢斷。始知身在釣魚船。

又

河漢橫斜斗柄低。啼鴉掠水未成栖。怪生淒爽侵肌骨。船繫秦皇酒盞西。

又

譙門鼓角寺樓鐘。一一風傳到短篷。喚得放翁殘酒醒。錦囊詩草不教空。

又

小市易散無人行。茫茫湖橋惟月明。老夫解醒不用酒。自有千頃菰蒲聲。

又

雞頭紫纍如大珠。紅草綠荷風味殊。天與楊梅成二絕。吾鄉獨有異鄉無。

又

城南天鏡三百里。繚以重重翡翠屏。最好長橋明月夜。寄船策蹇上蘭亭。

又

酒旆搖搖出竹籬。扁舟遠赴野人期。一天風雨晚來惡。落盡白蓮渾不知。

又

七月湖中風露新。臨流閑照白綸巾。荷花折盡渾閑事。老卻蓴絲最惱人。

又

恰聽殘蟬禹寺門。又看新月石帆村。後來復有龜堂老。千載猶應此意存。

又

娥江道上欲三更。垣屋參差閉月明。倚柁賦詩無傑思。斷腸分付棹歌聲。

又

秋來湖濶渺無津。旋結漁舟作四鄰。滿眼是詩渠不領。可憐虛作水雲身。

又

夢筆橋東夜繫船。殘燈耿耿不成眠。千年未息靈胥怒。卷地潮聲到枕邊。

初秋

生世元浮脆。人言七十稀。耄期今已及。氣力固應微。食冷常憂過。追涼每念歸。入秋纔幾日。卷簾換縑衣。

又

藉草沾衣露。沿溪掠面風。桐凋無茂綠。蓮老有疎紅。小杓欹危度。鄰園曲折通。新秋得強健。一笑莫匆匆。

又

初夜月猶淡。入秋風已清。螢孤無遠照。蟬斷有遺聲。命薄慚助業。才疎負聖明。青鞵若耶路。亦足慰平生。

又

兀兀終年醉。空空四壁窮。那知雙雪鬢。又度幾秋風。高枕三峯老。深衣獨樂翁。騎驢向何許。搢筆有蠻童。

秋陰出遊

遮日雲生忽復收。黃鴉鳴喚伴林鳩。也知雨意逢秋作。未害山翁竟日遊。陌上驛亭雙隻堠。煙中漁釣兩

三舟歸遲不是尋詩料。秣蹇民家偶小留。

杜宇

杜宇雖微禽。用意舉世稀。念昔春盛時。天地皆芳菲。杜宇默無聲。不畏百鳥譏。東君將促駕。乃獨號鳴悲。日夜不肯休。流血沾其衣。念言身尚存。乃使春獨歸。飲啄雖如昔。此身當疇依。月明抱樹枝。敢忘此獻歎。雖無精衛勞。區區亦庶幾。寄言天壤間。勿謂斯禽微。

養生

衰病猶弱國。地與齊楚隣。朝憂羽書來。暮畏戍車塵。奔命不敢辭。所懼殘吾民。羸老正類此。日夜憂其身。起居飲食間。恐懼自貴珍。一念少放逸。禍敗生逡巡。所以古達者。訓戒常諄諄。不死正爾得。成真非有神。

初秋夜賦

北斗垂欲盡。明河淡不流。低回半枕夢。蕭瑟一窗秋。老益尊儒術。閑仍爲國憂。孰云生死大。卻已付悠悠。

又

炎燿猶未伏。清絕忽新秋。露氣房櫺冷。砧聲歲月遒。悲蛩草根語。孤燐竹間流。聞道河南北。飛蝗暗百州。

殘年

殘年垂八十。高臥豈逃名。泥巷多牛迹。茅簷有碓聲。炊菰觴父老。養棗哺雛嬰。遣戍雖傳說。何時復兩京。

記夢

環立江頭千萬峯。夢中於此倚枯筇。青冥誰見欵巾角。碧溜閑將洗筆鋒。一卷素書雲笈貯。數升松麩水

機舂正呼鶴，駕凌風去。驚覺西山煙外鐘。

村飲

白稻登場喜食新，太倉月廩厭陳陳。叢祠懷肉有歸遺，官道橫眠多醉人。小市孤村真送老，浩歌起舞最關身。鹽醯乞貸尋常事，惱亂比鄰莫媿頻。

老鰥

水際山前有老鰥，終年無事亦非閑。淵源師友簡編上，土木形骸魚鳥間。零落斷雲依釣瀨，連涓新月照柴關。葵羹稗飯悠然過，一飽元非造物慳。

對食作

賤士窮愁殆萬端，幸隨所遇即能安。乞漿得酒豈嫌薄，賣馬儼船常覺寬。少壯已辜三釜養，飄零敢道一袍單。飯餘捫腹吾真足，苜蓿何妨日滿槃。

七月十九日大風雨雷電

雷車動地電火明，急雨遂作盆盎傾。強弩夾射馬陵道，屋瓦大震昆陽城。豈獨魚蝦空際落，真成蓋屐舍中行。明朝雨止尋幽夢，尙聽飛濤濺瀑聲。

湖上

三伏無多暑漸微，登臨清曉試緜衣。風高病木初凋葉，瀑退流萍尙半扉。白首重來空感昔，清尊相屬欲忘歸。猶憐不負湖山處，好在平生舊釣磯。

欲雨

正苦中天赫日流。房櫳忽復變颼颼。雲生江浦初成暝。葉下亭皋剩作秋。移穴族行憐垤蟻。爭巢婦去歎林鳩。人間寒暑何窮已。礎杵行聞治褐裘。

秋懷

少年萬里度關河。老遇秋風感慨多。草聖詩情元未減。若無明鏡奈君何。

又

園丁傍架摘黃瓜。村女沿籬采碧花。城市尙餘三伏熱。秋光先到野人家。

又

迢迢枕上望明河。帳薄簾疎奈冷何。不惜衣篝重換火。卻緣微潤得香多。

又

詩如水淡功差進。身似雲孤累轉輕。落葉擁籬門巷晚。一枝藤杖且閑行。

食新

龍鍾好在夢中身。剩喜今年又食新。不用更煩人祝綆。輪囷瓜瓠是常珍。

予初仕爲寧德縣主簿而朱孝聞景參作尉情好甚篤後十餘年景參下世今又幾四十年忽夢見之若平生覺而感歎不已

白鶴峯前試吏時。尉曹詩酒樂新知。傷心忽入西窗夢。同在哺村折荔支。爲音遮

讀書

憶昔年少時。把卷惟引睡。惰遊過日月。自咎輒涕泗。老來百事廢。卻覺書多味。豈惟時有得。聖域可坐致。譬如入武庫。懽悅不暇視。淺陋安能名。出門但驚喟。天球及河圖。千古所共祕。幸今發其藏。雖老敢自棄。

諭鄰人

鄰曲有米當共舂。何至一旦不相容。爲善何嘗分士農。堯民皆當變時雍。

又

相攻本出忿與疑。能不終訟固已奇。訟端可窒君試思。歲時鄰里相諧嬉。

又

世通婚姻對門扉。禍福饑飽常相依。忿爭得直義愈非。不如一醉懷牒歸。

示小厮

儉閑打睡汝何尤。罵詈榜笞我所羞。但搢一鞭隨小蹇。不妨村路共閑遊。

又

晨興略整案頭書。十日庭中始掃除。未免丁寧惟一事。臨池莫釣放生魚。

陸放翁集

劍南詩稿

卷第六十三

秋雨

老火阻餘威。賴此一雨洗。一雨豈遽涼。涼亦自此始。陂湖菱芡熟。小市新酒美。行歌多醉人。驩意溢閭里。懸知婁豐年。絲穀賤如水。呼兒具筆牘。作詩識吾喜。

江村

江村一雨喜塵清。隱隱雷車意未平。莽蒼郊原來暮色。颼颼林壑起秋聲。書希簡古終難近。詩慕雄渾苦未成。白首愈悲知我少。從今一技不須名。

又

誤著儒冠不更論。白頭且喜臥江村。林深棲鳥逐更噪。埭近過舟終夜喧。病起日惟翻斷簡。愁來時亦倒清尊。自嫌未絕知聞處。尚有僧敲月下門。

山行

南出柴門卽是山。青鞋踏破白雲間。旋償酒券何時足。罷諾僧碑盡日閑。三尺古琴餘爨迹。一枝禪杖帶湘斑。吾廬北望雲煙裏。又伴紛紛宿鳥還。

天王寺迪上人房五十年前友人王仲信同題名尙在

綠遶青園古會稽。城東河上古招提。已公茅屋曾遊處。渭北山人半醉題。暫憩不妨停畫楫。幽尋還得杖青藜。舊人死盡惟殘屋。竹密雲深步步迷。

東窗偶書

東窗終日靜惛惛。消盡平生幻妄心。秋氣未催羣木脫。老懷先感百蟲吟。屏風疊邃思廬阜。冠子峯高憶少林。安得吾身且強健。一藤隨處更幽尋。

又

萬事何曾有速淹。熊蹯魚腹自難兼。山川置掌猶能取。日月無膠可得黏。稚子幸堪持几杖。老生元自慣齋鹽。清晨臨鏡還三歎。雪領今年無處添。

乙丑七月二十九日夜分夢一士友風度甚高一見如宿昔出詩文數紙語皆簡淡可愛讀未終而覺作長句記之

客中得友絕清真。蓋未傾時意已親。枕冷不知清夜夢。眼明喜見老成人。河傾斗落三傳漏。霧散雲歸兩幻身。心亦了然知是妄。覺來未免一酸辛。

示子邁

翁老兒窮不自支。此心幸與古人期。勞兼薪水奴初去。典到琴書事可知。藥杵無聲工忍病。米囤可掃恥言饑。餘年有幾須相守。萬里煙宵付異時。

小雨

赤日炎熇勢未回，川雲忽起亦佳哉。鴨衝細雨橋陰出，蝶弄微風草際來。欒柳不禁朝暮久，芙蓉猶有二三開。一年光景煩君看，何怪昆池有劫灰。

舟中作

蘧蔭作帆三版船，漁燈夜泊閭門邊。煙波四萬八千頃，造物推排作水仙。

又

山蔬藥苗滿箸香，超然下視太官羊。更憑語與劉文叔，豆粥從來味最長。

漁父

食簞雖薄尚羹藜，且喜今朝酒價低。一櫂每隨潮上下，數家相望埭東西。團團箬笠偏宜雨，策策芒鞋不怕泥。應笑漆園多事在，本來無物更誰齊。

又

數十年來一短蓑，死期未到且婆娑。敲門賒酒常酣醉，舉網無魚亦浩歌。片月又生紅蓼岸，孤舟常占白鷗波。人間各自生涯別，文叔君房媿汝多。

讀書示子適時子適方敗舉

我生無它營，半世隨宦牒。讒波方稽天，憂與愁相接。中間稍自覺，萬事付馬曹。告歸幸見聽，泊與淡相遭。日晏突無煙，垢面有爪痕。讀書則未置，可笑習氣存。造物哀其窮，畀之大耳兒。兒亦好古學，乃不售有司。

謂當爲瑟縮。乃如鶴昂藏。父子共薄飯。忍饑講虞唐。豐凶有常數。糠藁當自力。古言不吾欺。歲晚於汝食。

秋夕

西山樵路隔重雲。溪水微風起縠紋。暑退忽驚秋漸晚。夜長已與晝中分。菰蔣入饌渾家喜。礎杵催寒並舍聞。新作篝燈學僧樣。與兒同策讀書勳。

醉中錄近詩因題卷後

鵝兒色淺酒醺人。雞距鋒圓筆絕倫。滿引一盃書數紙。要知林下有閑身。

貧甚戲作絕句

俸祿無餘退卽耕。市人指笑太清生。從今惜取青鞋底。祇向雲邊水際行。

又

處窮上策更誰如。日晏猶眠爲腹虛。飢則臥不起。貧者之常也。尙闕鄰僧分供米。敢煩地主送園蔬。

又

貸米東村待不回。鉢盂過午未曾開。饑腸雷動尋常事。但誤生臺兩鵲來。

又

北齋孤坐破三更。庭戶無人。有月明。數種袴襦秋未贖。羨他鄰巷搗衣聲。

又

竈突無煙甑有塵。頽垣破屋越溪濱。老鰥狂怪嗔誰責。日日行歌獨賣薪。

又
行徧天涯等斷蓬。作詩博得一生窮。可憐老境蕭蕭夢。常在荒山破驛中。

又
讀書但覺慚輪扁。補吏非能去箭張。白髮歸爲林下叟。固應饑不壓糟糠。

又
糴米歸遲午未炊。家人竊閔乃翁饑。不知弄筆東窗下。正和淵明乞食詩。

自傲

出仕每辭榮。歸休但力耕。儉勤貧亦足。戒懼禍終輕。學自不欺始。智由無事行。書紳及銘座。勉勉盡吾生。

又

經術吾家事。躬行更不疑。仁常爲己任。清每畏人知。古訓必三復。危途仍十思。兢兢死方已。寧論迫期頤。

雨後極涼

金微未壯長。火老尙餘燼。可憐茅舍翁。瞑目困藉躡。蕭蕭得一雨。天氣頗清潤。豈惟爽襟靈。亦足祛疾疢。浮生日月駛。老死纔一瞬。聖賢邈不嗣。利欲以身徇。孰能痛澡雪。此道庶少進。閉門君但學。妙理天豈吝。

醉題

來往人間今幾時。悠悠日月獨心知。尋僧共理清霄話。掃壁閑尋往歲詩。疋馬秋風入條華。孤舟暮雪釣湘漓。只愁又踏關河路。荆棘銅駝使我悲。

秋感

畏塗歷盡百年中。老臥窮閭一秃翁。
衣杵淒涼常帶月。井桐零落不禁風。
空文久悔雕蟲技。大學方施習射功。
佛書云。如人習射。久久方中。萬一死前能少進。九原猶可見先公。

鼠敗書

雲歸雨亦止。鴉起窗既白。秋宵未爲永。
不寐如歲隔。平明亟下榻。亦未暇冠幘。
檢校案上書。狼籍鼠齧迹。食簞與果籩。
攘取初不責。侈然敢四出。乃至暴方册。
坐令漢篋亡。不減秦火厄。向能畜一貓。
狡穴詎弗獲。緘藤又蕩然。追咎亦何益。
惰偷當自戒。鼠輩安足磔。

秋望

千里郊原俯莽蒼。三江煙水接微茫。
橫林蟲鏤無全葉。新雁風驚有斷行。
神禹洞庭遺劍珮。先秦金石古文章。
一尊莫恨盤飧薄。終勝登樓憶故鄉。

秋夕

浴罷紗巾出草堂。一枝瘦杖倚桃榔。
蟬吟古柳聲相續。月入幽扉影正方。
頻約僧碁秋漸健。稍增書課夜初長。
亦知桑落宜蕩酒。太息何時辦一觴。

出遊

八月石帆秋。聊爲汗漫遊。本因尋友去。
卻爲看山留。小草題僧壁。長吟上驛樓。
月能從劇飲。天可寄閑愁。高下評泉品。
縱橫記酒籌。花開遇門入。水長信船流。
翫鱗人雖棄。脂韋我自羞。此心君不信。
試往問沙鷗。

病中戲詠

八十行加二，清秋住故山。新涼足眠睡，舊疾害躋攀。雪白紛殘鬢，梔黃染病顏。疲牛臥斜日，羸馬噍枯菅。貧廢兒孫學，慈生僕妾頑。贖衣時已迫，貸米歲方艱。齋鉢僧嘲薄，盤飧客笑慳。從今謝還往，惟有掩柴關。

喜書

欹斜古屋枕江干，恩賜殘骸許挂冠。杵臼有聲聊足食，羊牛識路自歸闌。不求客恕陶潛醉，肯受人憐范叔寒。兒輩漸還家，暖熱預知燈火語團圓。子龍初自江西歸，子真亦今冬當罷官矣。

春耕

去蜀歸吳會，真成萬里行。窮通竟安在，恩怨兩皆平。文字妨求道，盃觴害養生。餘年猶有幾，買犢事春耕。

秋思絕句

煙草茫茫楚澤秋，牧童吹笛喚歸牛。九衢不是風塵少，一點能來此地不。

又

榮悴元知豈有常，紛紛草木占年光。霜風一掃知何在，楚客從來枉斷腸。

又

一片雲生便作陰，東軒草樹共蕭森。秋風豈必關人事，自是衰翁感慨深。

又

枳棘編籬畫掩門，桑麻遮路不知村。平生詩句傳天下，白首還家自灌園。

又

胸次本來容具區。自私益益一何愚。片帆忽逐秋風起。聊試人間萬里途。

又

黃蛺蝶輕停曲檻。紅蜻蜓小過橫塘。老人未肯殺風景。睡起熏籠重炷香。

秋興

節物喜更新。清秋最可人。徐行曳藤杖。小立岸紗巾。煙雨迷衰草。汀洲老白蘋。鶴巢時託宿。猿果每分珍。羽客期燒藥。毛人約卜鄰。蘭亭故不遠。千載見清真。

寓歎

五畝煙蕪過半生。還山自笑又躬耕。春炊不繼兒啼飯。烹飪無方客絮羹。遊宦人間身愈困。讀書燈下目幾盲。退之已老當更事。猶向時人說善鳴。

北窗

垂老乞骸骨。飄然辭聖朝。竹頭那足用。桐尾不禁焦。短褐縫練布。晨飧采藥苗。風霜征雁路。燈火衲僧寮。隴客詢安否。狸奴伴寂寥。北窗鳴落葉。愁絕夜迢迢。

閑思

睡美精神足。心空忿欲輕。讀書無定課。飲酒不成醒。日日東軒坐。時時北渚行。最奇烏柏下。側帽聽秋鶯。

秋光

小圃秋光潑眼來。老人隱几興悠哉。翩翩蝴蝶成雙過。兩兩蜀葵相背開。雨足疎籬引荒蔓。人稀幽徑長新苔。貧家竈冷炊煙晚。待得鄰翁賣藥回。

秋夜思南鄭軍中

五丈原頭刁斗聲。秋風又到亞夫營。昔如埋劍常思出。今作閑雲不計程。盛事何由觀北伐。後人誰可繼西平。眼昏不奈陳編得。挑盡殘燈不肯明。

湖上

飄然世外更何求。終日橋邊弄釣舟。回視老身猶長物。縱無炊米莫閑愁。煙生墟落垂垂晚。雁下陂湖處處秋。欲覓高人竟安在。又聞長笛起滄洲。湖中有隱士。月夜必吹笛。人莫有見者。

讀王摩詰詩愛其散髮晚未簪道書行尙把之句因用爲韻賦古風十首亦皆物外事也

我生本江湖。歲月不可算。采藥遊名山。所歷頗蕭散。一逢巢居翁。見謂於我館。酌泉啖松柏。每得造膝款。行道不自力。殘髮日已短。海山故不造。謫限何時滿。

又

仕宦五十年。所至不黔突。取魚固捨熊。挾兔那恨鷓。退歸息厭厭。誰敢書咄咄。屋穿每茨草。驢瘦可數骨。秋風忽已厲。落葉襯殘月。脫巾坐中庭。清冷入毛髮。

又

我愛古竹枝。每歌必三反。孤舟上荆巫。天末未覺遠。最奇扇子峽。恨不遂高遯。荆棘蜀故宮。煙水楚廢苑。

至今清夜夢百丈困牽挽。人生如寄爾。勿歎流年晚。

又

往歲著朝衫。晨起事如彙。告歸臥孤村。枯淡有餘味。閉門絕外慕。自謂真富貴。蕭然畢吾生。地下亦增氣。里翁戀兒女。小疾輒憂畏。惟窮可賒死。我在君亦未。

又

萬金築華堂。千金教新音。不知憂患場。著脚日愈深。今人喜議古。後亦將議今。使汝有子孫。聞之亦何心。鄧通擅銅山。死日無一簪。未死汝勿喜。五溪多毒淫。

又

往者遊青城。猶及二老。稽首出世師。數語窮至道。妻子真弊屣。棄去恨不早。俯仰纔幾時。殘骸日衰槁。吾兒有奇骨。亦復至幽討。金丹儻可成。白髮何足掃。

又

稚川師鄭君。纔及一卷書。書大僅如箸。度世蓋有餘。想其所論說。妙極軒昊初。內篇今雖存。亦復飽蠹魚。我欲探其原。蹇步空趑趄。安得插兩翅。從公遊太虛。

又

隱書有三景。字字當力行。寸地與尺宅。可以久汝生。泝流歸崑虛。堅守臨長城。一旦告成功。河塞黃金成。笙鶴適緱山。貂蟬朝玉京。卽今修行地。千古名還嬰。予道室以還嬰名之。

又

行年過八十，形悴神則旺。往來江湖間，垂老猶疎放。滄波浩無津，天遣遂微尙。剡溪挂風帆，魚浦理煙榜。奇雲出深谷，新月生疊嶂。興懷晉諸賢，誰能續遺唱。

又

二十遊名場，最號才智下。蹭蹬六十年，亦有茆一把。典衣租黃犢，乘雨耕綠野。西成得一飽，敢計泥沒踝。住久鄰好深，百事通乞假。秋高小蠶香，相喚注老瓦。

夢行益昌道中有賦

朱棧青林小益西，早行遙聽隔村雞。龍門閣畔千尋壁，江月亭前十里堤。酒舍胡姬歌折柳，江津洮馬惜障泥。倦遊重到曾來處，自拂流塵覓舊題。

自規

忿慾俱生一念中，聖賢本亦與人同。此心少忍便無事，吾道力行方有功。碎首寧聞怨飄瓦，關弓固不慕冥鴻。老翁已落江湖久，分付餘年一短篷。

幽興

蘭渚前頭湖水清，了無俗事敗幽情。雨淋茅屋隨時補，日射油窗特地明。庭樹晚鶯窺戶語，鄰園秋筍過籬生。芥菘漸美鹽醃足，誰共貧家一釜羹。

記前輩語

疇昔見諸老。從容聞至言。馬非求路寢。木豈願犧尊。臥起數椽屋。嘯歌三畝園。人生正應爾。雲夢不須吞。

貧居卽事

筮易常逢坎。推星但值箕。老雖齊涓叟。窮不減湘纍。巷月鳴衣杵。庖煙爨豆萁。秋深病良已。且復強伸眉。

又

地偏人罕到。秋晚日猶長。病去筇枝贅。家貧菜粥香。流泉通藥壠。積雨潤書囊。欲譜幽居事。疎慵久未遑。

又

月黑梟鳴樹。燈殘鼠穴牆。牀空圍紙被。室靜爇楓香。不恨言傷直。惟憂慾敗剛。回頭顧名利。百世永相忘。

又

米竭炊煙靜。村深客屨稀。庭除荒宿莽。籬落帶斜暉。風惡披書卷。鷗馴傍釣磯。鄰家殊耐久。相伴荷鋤歸。

又

意緒喪家狗。形骸槁木枝。曲肱雖自適。縱理固當饑。買絮初寒後。畦蔬小雨時。窮途何用卜。吾道卽著龜。

又

守道常違俗。存心不媿天。終年饑過半。動步謗居前。力倦少行立。氏昏多睡眠。今宵風月好。扶杖到溪邊。

自詠

素慕巢居穴處民。久爲釣月臥雲身。經行山市求靈藥。物色旗亭訪異人。高枕靜聽棋剝啄。幽窗閑對石嶙峋。吾廬已是桃源境。不爲秦人更問津。

枕上作

一室幽幽夢不成。高城傳漏過三更。孤燈無焰穴鼠出。枯葉有聲鄰犬行。壯日自期如孟博。殘年但欲慕初平。不然短楫乘家去。萬頃松江看月明。

秋曉聞禽聲五韻

秋曉風露佳。天宇曠以清。鳥雀當此時。意樂有和聲。人獨不自喜。乃欲鳴不平。世事雖萬端。但可笑絕纓。君看郊與島。徒自殘其生。

對酒

素月度銀漢。紅螺斟玉醪。染丹梨半頰。斫雪蟹雙螯。詩就吟逾苦。盃殘興尙豪。閑愁翦不斷。剩欲借并刀。

又

密篠持苫屋。寒蘆用織簾。斲肩柴熟罨。東坡煮豬肉訣云。淨洗鍋。少著水。柴頭罨。煙焰不起。蓴菜豉初添。黃甲如盤大。紅丁似蜜甜。街頭桑葉落。相喚指青帘。

示鄰里

古學陵夷失本原。讀書萬卷誤元元。從今相勉躬行處。士庶人章數十言。

重示

篤學仁何遠。窮居道亦行。能充氣剛大。誰蔽性光明。家世艱難業。鄉閭宿昔情。歲殘相勞苦。惟是語春耕。

雨夜起行室中

老疾逢秋體自輕。披衣暫起繞牀行。隙風不斷燈將滅。簷雨如傾階欲平。繆叟何嘗愁枕冷。病夫未免待窗明。拂書洗硯龜堂上。幽事誰知日有程。

閏月辛酉壬戌連日風雨癸亥早晴

殘雨在簷猶點滴。斷雲銜日正蒼涼。清愁偏向暮年覺。少睡不禁秋夜長。簾影漸生禽語樂。杵聲初動藥塵香。諸兒作吏俱安否。那得乘風至汝傍。予諸子伯叔季皆出仕。

秋思

少日猖狂不自謀。卽今垂死更何求。簡編不隔聖賢面。夢寐時爲河嶽遊。濁酒未傾心已醉。長歌欲發涕先流。石帆射的煙嵐晚。過雁聲中又一秋。

又

十日秋陰滿徑苔。蓬門那有客敲推。水邊丹葉已如許。籬下黃花猶未開。空見遊僧衡嶽去。難逢新雁杜陵來。溪雲一片閑舒卷。戀著漁磯不肯回。

閒遊

江邊小市舊經過。歲月真如東逝波。茶竈酒墟多識面。少留賣藥買漁蓑。

又

溪橋偶與僧遊話。草市來尋逆旅炊。自笑一生爲客慣。捉驢小豎訴朝饑。

又

祓除情累煙波上。放蕩胸懷詩酒中。禹會橋邊潮落處。夕陽幾度繫孤篷。

對鏡

面大如盤七尺身。珥貂自合上麒麟。詩家事業君休問。不獨窮人亦瘦人。

幽居書事

老人初起厭囂喧。塵几從教鼠迹存。赤脚平頭俱遣去。倚牆危坐嚙朝暾。

又

買魚賒酒皆高興。野店溪橋圖畫中。從此衰翁自行耳。不須多事喚蠻童。

偶與客話峽中舊遊

我昔旅遊秋雨細。建平城東門欲閉。主人迎勞語蟬聯。小婦春炊縞衣袂。長年三老半醉醒。蜀估峽商工
算計。須臾燈闇人欲眠。泊船卸馱猶相繼。山深水險近蠻獠。往往居民雜椎髻。卽今屈指四十年。懷抱淒
涼真隔世。

讀老子次前韻

平生好大忽瑣細。焚香讀書戶常閉。少年曾預老聃役。晚歲欲挹浮丘袂。力探玄門窮衆妙。肯學陰謀畫
奇計。言狂不獨人共排。志大仍憂後難繼。君看淡掃出繭眉。豈比一尺春風髻。著書勿恤飽蠹魚。會有子
雲生後世。

作籬

生世八十餘。日夜迫衰老。中年所築舍。傾壞當官道。每逢風雨夕。性命凜莫保。況此蘆竹藩。何恃不摧倒。今朝手自葺。不暇避塗潦。雞豚有限隔。門巷得鋤掃。豈惟禦盜竊。亦足慰懷抱。陰雲忽四垂。見事幸差早。寓歎

老生讀書百絕編。日晏忘食夜廢眠。孝經一生行不盡。況有六籍陳吾前。華軒玉食非素願。廣廈高塘實郵傳。經營歸計笑時人。我老但須書數卷。

衡門感舊

蒼煙屯不散。疋素橫郊原。雨細不溼衣。著水始見痕。躊躇意自佳。未遽掩衡門。一一送歸鴉。楓林猶未昏。念昔壽州歸。紹興初紀元。闔門過百口。一身今獨存。不死實有命。送老三家村。躬耕幸得食。萬事不足論。

客中作

江天雨霽秋光老。野氣川雲淨如掃。投空飛鳥雜落葉。極目斜陽襯衰草。平沙爭渡人鵝立。長亭下馬障泥溼。纍纍紅果絡青篾。未霜先摘猶酸澀。客中雖云貪路程。買薪糴米常留行。茆檐獨坐待僮僕。不聞人聲聞碓聲。

讀書示子邁

我性苦愛書。未始去几案。生雖後三代。意尙卑兩漢。世衰道術裂。年往朋友散。澤居貧至骨。霜冷衣露漻。獨能樂其樂。肯發窮苦歎。爾來更可笑。身糴兒炊爨。一飽輒欣然。弦誦等雕泮。望古雖天淵。視俗亦冰炭。阿邁可憐生。相守忘夜旦。孤學當世傳。歲月不可翫。

老懷

老懷常易感。秋雨苦難晴。羈枕悲歡夢。高城長短更。榮枯一蠹埴。成壞幾棋枰。抱疾茅檐下。行人肯寄聲。
昨日得李孟達書。

沉縣

沉縣久未平。寂寞閉柴荆。危葉先霜墜。殘螢冒雨明。記書由默誦。得食出躬耕。此事吾親驗。方當告後生。

遊近村

行歷茶岡到藥園。卻從釣瀨入樵村。半衰半健意蕭散。不雨不晴天晏溫。薯蕷傍籬寒引蔓。菖蒲絡石瘦生根。參差燈火茆檐晚。童稚相呼正候門。

又

被髮行歌雪滿膺。夕陽顧影亂鬢鬢。乞漿得酒人情好。賣劍買牛農事興。社鼓賽秋聞坎坎。塔燈照夜望層層。歸來閑指烏藤說。個是人間耐久朋。

小亭

除地編茅作小亭。一川風露對青冥。殘螢欲盡猶穿戶。落葉初飛已滿庭。櫟老無心求匠石。鬼靈有說拒奴星。餘年默數能多少。盡付黃庭兩卷經。

記夢

少日飛揚翰墨場。憶曾上疏動高皇。寧知老作功名夢。十萬全裝入晉陽。

又

老來百事不關身。北陌東阡一幅巾。忽夢行軍太行路。不惟無想亦無因。

陸放翁集

劍南詩稿

卷第六十四

養疾

齒耄嬰新疾。才衰減舊名。短筇扶蹇步。小院愜幽情。卜叟言災退。醫翁賀脈平。飯香炊糲糲。羹美醯蕪菁。菊穎寒猶小。楓林曉漸頽。清詩披客贄。佳著指僧枰。家塾燈前課。村陂雨外耕。從今尙何事。賴此遣浮生。

客從城中來

客從城中來。相視慘不悅。引盃撫長劍。慨歎胡未滅。我亦爲悲憤。共論到明發。向來酣鬪時。人情願少歇。及今數十秋。復謂須歲月。諸將爾何心。安坐望旄節。

暮秋中夜起坐次前韻

東吳秋令遲。得雨亦良悅。中庭有流螢。烈風吹不滅。披衣起坐久。鼓角參差發。西成雖作勞。農事亦漸歇。老怯歲律殘。俛仰忽九月。蟋蟀鳴壁間。媿汝知時節。

閑遊

白石牀平偶小留。青芒屨穩復閑遊。微丹點破一林綠。淡墨寫成千嶂秋。竹院頻分齋鉢飯。苔磯時把釣魚鉤。要知此老神通否。二十年來不識愁。

自規

老疾今俱至，艱難亦備更。個中無障蔽，何處欠光明。一日能用力，三年亦有成。脩身在我爾，勉勉盡餘生。所謂三年有成者，豈獨爲國哉。

自笑

學道功賒歲月馳，平居自笑著鞭遲。安心未竟夜饒夢，與世雖疎秋尙悲。藥圃幽尋芒屨溼，棋枰憨戰角巾欹。只愁今夕西窗夢，又買長筒到古鄆。

泛舟至鏡湖旁小市

久著朝衫負此湖，扁舟剩喜補東隅。市樓合樂醅新熟，寺壁殘詩字欲無。常日不堪愁宛轉，此行猶得笑須臾。夕陽鷗鷺皆相識，更覺人間是畏塗。

懷舊

身是人間一斷蓬，半生南北任秋風。琴書昔作天涯客，蓑笠今成澤畔翁。夢破江亭山驛外，詩成燈影雨聲中。不須強覓前人比，道似香山實不同。

道院述懷

學道已非生死流，極知心外更何求。理窮性盡命亦至，氣住神全形自留。大藥一爐真度世，孤桐三尺可忘憂。故人怪我歸來晚，太華峯頭又素秋。

又

八十年前一炷香。依然餘習未全忘。舊緣入靜多扃戶。近爲精思別置牀。篝火古鐺煎檜蜜。汲泉小盞釀松肪。老翁正似遼天鶴。更覺人間歲月長。

秋雨

雨滴何由止。人眠不復成。雲深無雁影。村近有砧聲。草草殘年夢。寥寥後世名。太山并蠓垤。俱向酒中平。

又

秋晚兼旬雨。雨晴常有霜。頗思遊近縣。亦已戒輕裝。珍蠶披縣美。寒醅撥雪香。菊花常歲有。所喜及重陽。

聽雨

髮已成絲齒半搖。燈殘香燼夜迢迢。天河不洗胸中恨。卻賴檐頭雨滴消。

畏事

畏事偷安百不能。飯蔬聊得曲吾肱。舊交夢裏時時見。宿疾秋來日日增。遣悶自鉏幽圃藥。扶衰猶賴故溪藤。不因顧見鬢髻影。全是深山退院僧。

刈穫後書事

鄰里西成例少蘇。貧家生業得徐圖。雖非五鼎豈無食。未辦復禪猶著襦。牢糞漸肥堪奉祭。耕牛已買不求租。卻思流落天涯日。要是家居勝道途。

又

髦歲誰知困不蘇。每虞黠鬼笑狂圖。陶公老去但濁酒。管老歸來惟白襦。不逐兒童覓兼味。且隨鄰曲了

殘租細思自有欣然處。高謝人間九折途。

秋夜五鼓初起坐堂上至旦

蒸鬱不可過。開門星滿天。身還倚藤杖。手自酌巖泉。雞唱猶相續。鴉飛忽已翩。事隨朝日出。佳思復茫然。

習嬾自咎

習嬾多遺事。時能害睡眠。蠶驕殘竹筍。鼠橫齧牀氈。獮子巡籬落。狸奴護簡編。人間有俊物。求買敢論錢。

雨夜枕上作

雨點滴我心。雨氣傷我魂。但憂草廬破。敢思布被溫。市壚酒如山。不濕老瓦盆。天其遂吾心。窮死三家村。

晚飯後步至門外並溪而歸

徐行摩腹出荆扉。掠面風尖酒力微。市步空船迎荻去。湖隄輕擔賣魚歸。潺潺沙竇鳴殘水。莽莽平蕪襯

落暉。商略最關詩思處。滿村砧杵搗秋衣。

文章

文章如奕棋。分量固有極。學不盡其才。識者爲太息。古來名世士。亦或墮此域。至今讀其文。曷嘗不追惜。士生千載後。夙慕當自力。如其不能然。歸哉事耕織。

枕上口占

白首區區道未明。故山悔不蚤歸耕。勇如搏虎但堪笑。學似累棋那易成。殘雨墮簷時一滴。老雞棲樹已三鳴。村居孤寂知何憾。兩耳猶勝聽市聲。

乙丑九月三日晚久雨驟晴西南新月如玉鉤重陽以八月置閏菊花粲然滿園喜甚作一絕記之

初三新月見如期。重九黃花又及時。俱是人間稱心事。典衣一醉更何疑。

寓歎

蕭疎殘髮數莖絲。勝負渾如未算棋。萬里旌旗無昨夢。一蓑煙雨有新詩。潛消暗換人誰在。小醉閑眠我自奇。二十四年能幾許。汾陽回首亦成癡。

村興

結宇楓林下。久窮吾所安。村深事自簡。累少食差寬。雨閣牛眠屋。泥深鴨滿闌。呼兒擣粉餌。準擬賽鄱官。夜聞埭東賣酒鼓聲譁甚。

烏柏森疎照溪赤。寒鴉翻翻蔽天黑。鮮鱸出網重兼斤。新蟹登盤大盈尺。年年此際清霜夜。飯罷讀書聲滿舍。豈惟父子講家學。亦有朋儕結經社。誰令屠沽聚里中。鼓聲終夜聒老翁。嗚呼安得寐無聰。不但杜老左耳聾。

燈下晚飧示子通

家貧短衣不掩骭。空庖淒淒竈不爨。老翁八十忍饑熟。兀坐空堂日常盱。今年閏餘九月寒。那敢遽議南山炭。艱難幸復致一飧。舖燂燈前百憂散。適子挾册于子來。時與乃翁相論難。但令歆向竟同歸。門前籍湜何憂畔。

秋晚書懷

七澤三巴日月長。卽今萬事付茫茫。結廬窮僻新知少。屬疾沈痾舊學荒。中夜飯牛初上阪。千年化鶴復還鄉。自憐尙覺身爲累。剩蓄荆薪待雪霜。

又

頽然兀兀復騰騰。萬事惟除死未曾。無奈喜歡閑弄水。不勝頑健遠尋僧。喚船野岸橫斜渡。問路雲山曲折登。卻笑吾兒多事在。夜分未滅讀書燈。

初寒

久雨重陽後。清寒小雪前。拾薪樵髻僕。賣菜掘頭船。薄米全家粥。空牀故物氈。身猶付一畝。名字更須傳。
掘船頭見張志和詩。

黃昏小雨中。慙憊蒼頭在。傍云初未嘗得。瞑予乃甚。適若熟寐者。作五字記之。

人看初無寐。形勞幸少休。夢魂雖栩栩。鼻息未齟齬。輕若風中絮。浮如水上漚。死生君了否。試向此中求。
乾道之初卜居三山。今四十年。八十有一感事抒懷。

乾道之初結草廬。三朝六見紀元初。年光拋擲雖加倍。生計蕭條愈不如。目暗欲盲停夜課。髮殘無幾怯晨梳。市聲風便猶關耳。未死終當更徙居。

視東臯歸小酌

築陂下麥晚歸來。圍火烘衣始此回。但得諸孫傳素業。真無一事挂靈臺。井桐葉落垂垂盡。籬菊花殘續

纒開不負初寒蟹螯手。牀頭小盞撥新醅。

又

少年誤計慕浮名。更事方知外物輕。身誓生生辭祿食。家當世世守農耕。授時堯典先精讀。陳業豳詩更力行。最好水村風雪夜。地爐煙暖歲豬鳴。

梅市道中

去去浮官浦。悠悠數客檣。蓼花低蘸水。楓樹老經霜。蕭鼓迎神鬧。鉏耰小麥忙。城西小市散。歸艇滿斜陽。

又

雨暗山陂路。人喧古渡頭。廟垣新畫馬。村笛遠呼牛。買飯諳爭席。迎潮競解舟。平生苦吟處。又送一年秋。

古寺

秋草荒無路。來遊感廢興。殘僧僅粥飯。古像冷香燈。扶病驚重到。題名記昔曾。自量難笑汝。一歎倚枯藤。

夢中作

繫馬朱橋上。酒樓樓前敷水拍堤流。春風又作無情計。滿路楊花輾雪毵。

又

大慶橋頭春雨晴。行人馬上聽鶯聲。祥符西祀曾迎駕。惆悵無人說太平。

舟行魯墟梅市之間偶賦

短髮蕭蕭久挂冠。江湖到處著身寬。蓼花不逐蘋花老。桐葉常先櫟葉殘。未卜柴荆臨峭絕。且謀蓑笠釣

荒寒閑人尙媿沙鷗在。始信煙波得意難。

衰疾

衰疾支離負聖時。猶能采菊傍東籬。捉衿見肘貧無敵。聳膊成山瘦可知。百歲光陰半歸酒。一生事業略存詩。不妨舉世無同志。會有方來可與期。

惜昔偶見張安國。周子充。劉詔美。王景文。陳德召。任元受。遺集爲之感愴。作長句紆悲。不知涕泗之集也。

憶昔高皇絀柄臣。招徠賢雋聚朝紳。寧知遺恨忽千載。追數同時無一人。薶骨九原應已朽。殘書數帙尙如新。此身露電那堪說也。復燈前默愴神。

雨後寒甚

陂澤連山腳。風煙接海濱。孤鴻悲遠客。殘菊伴陳人。酒盡瓶枵腹。爐寒客曲身。老翁殊耐事。一笑自回春。

入冬病體差健而貧彌甚戲作

乞骸自喜脫風塵。北陌東阡負未身。夢裏相逢無豎子。面間時出有真人。閑憑曲几還終日。不出衡門動過旬。送老齋鹽君勿笑。天教成就一生貧。

蜀漢

憶昔遨遊蜀漢間。駸駸五十尙朱顏。呼鷹雪闇天回路。采藥雲迷御愛山。舊事已無人共說。征途猶與夢相關。夕陽不覺憑闌久。待得林鴉接翅還。

新開小室

並檐開小室。僅可容一几。東爲讀書窗。初日滿窗紙。衰眸頓清澈。不畏字如蠅。琅然絃誦聲。和答有稚子。餘年猶幾何。此事殊可喜。山童報炊熟。束卷可以起。

初冬絕句

鱸肥菰脆調羹美。麴熟油新作餅香。自古達人輕富貴。例緣鄉味憶還鄉。

又

道途冬暖衣裘省。村落年豐鼓吹喧。下麥種麴無曠土。壓桑接果有新園。

卽事

雲起山容改。潮生浦面寬。寒鴉先雁到。烏桕後楓丹。年邁狐裝帽。時新豆搗糲。非關嗜溫飽。更事耐悲歡。

又

遜居無外事。白日不勝長。詩爲窮差進。琴雖老未忘。映窗精試墨。閉閣苦留香。年少無相諂。功名事更狂。

又

日上小窗東。禽鳴高樹中。樂哉容膝地。著此曲肱翁。香迺常遲散。兒來亦旋通。所慚貪坐睡。鉛槧少新功。

又

紙潔晴窗暖。粳新午飯香。嗜眠爲至樂。省事是奇方。孤蝶弄秋色。亂鴉啼夕陽。詩情隨處有。信筆自成章。

又

井稅無餘負。川原已飽犁。樵歌歸市步。帆影過河堤。野實丹兼漆。村醪蜜與齋。雖云有豐約。不廢醉如泥。

又

還鄉吳語熟。伏枕越吟悲。接客寒溫簡。過鄰几杖隨。獨嗟親舊少。不覺歲時移。陌上人爭看。風歛白接羅。

閑吟

閑吟可是治愁藥。一展吳牋萬事忘。不惜暮年酬倡絕。猶能作意答秋光。

自遣

衣冠尙作閑身祟。梁肉終非退士宜。惟有褐裘并豆飯。尙能相伴到期頤。

記乙丑十月一日夜夢

夢裏江淮道上行。解裝掃榻喜新晴。店門邂逅緋袍客。共把茶甌說養生。

又

旋糴街頭米數升。黃昏看上店身燈。明朝山路聞饒石。買得烏驃喜不勝。

縱遊

人事元知不可諧。名山踏破幾青鞵。百錢拄杖無時醉。一錫隨身到處埋。驛壁讀詩摩病眼。僧窗看竹散幽懷。亦知詩料無窮盡。燈火蕭疎過縣街。

村居書事

過門車馬誰曾入。塞路蓬蒿不復鋤。雨漏日惟支敗屋。鼠餘時自緝殘書。

又

矮餅羹粥猶難繼。小甌蒸饍豈解常。偶得鹽醢便豪侈。晨殮滿舍野蔬香。

又

架橋築路村翁事。裂網伸鉤老嫗心。自笑年來足衰態。軒昂故步嬾重尋。

又

書收鼠齧猶堪讀。柿拾鴉殘亦自甜。動念不如姑省事。智謀老健恐難兼。

又

修身世世詩書業。營利明明市井人。安得後生俱自好。百年門戶本來貧。

又

文辭苦思徒妨睡。官職虛名不療飢。垂老始知安樂法。紙鷲竹馬伴兒嬉。

湖堤暮歸

出郭並湖無十里。我歸蟹舍過魚梁。川雲蒼白不成雨。汀樹青紅初著霜。俗孝家家供菽水。農勤處處築

陂塘。樂哉追逐鄉三老。半醉行歌詠歲穰。

題揚本姜楚公鷹

憶昔呼鷹塞草枯。妖狐狡兔笑談無。明窗見畫空三歎。恍若霜郊遇獵徒。

又

弓面霜寒斗力增。坐思鐵馬蹴河冰。海東俊鶻何由得。空看緜州舊畫鷹。

書巢五詠

銅之在人間。細大各有境。散爲五銖貨。聚作九牧鼎。天祿與辟邪。乃復參泓穎。致用孰相須。寒泉出金井。

右硯滴

古者貝爲貨。庶物賴以通。後世貴銅臭。退處書几中。楮生借光輝。文字傳亡窮。言利古所羞。孰謂汝不逢。

右研蠶

時來偶見收。過時自當退。豈惟裁紙尾。亦或用牘背。人情有貴賤。志士感興廢。庫中九萬張。視我猶前輩。

右故紙

鸞膠擣松煙。成此金石姿。雖以剛故折。挺特終不移。微功在簡冊。敢惜身蹈危。雖非破硯文。永世亦有辭。

右折墨

銅壺受五升。中貯太古醇。相從亦已久。一朝委流塵。我豈少恩哉。白頭刀如新。誰知矮道士。亦作斥仙人。

右空酒壺

感遇

仕宦五十年。終不慕熱官。年齡過八十。久已辦一棺。結廬十餘間。著身如海寬。此外皆長物。簡去心始安。

又

士方貧賤時。藜藿苦不足。一朝得富貴。奴僕壓梁肉。大戴食亞夫。空器餽荀彧。何如茹檐下。父子共餽粥。我生有至願。世世謝寸祿。有子復有孫。無榮亦無辱。

又

人之所甚患。饑渴與寒暑。粗免則已矣。過計安用許。自奉非其分。三彭將嫉汝。寓形天壤間。大抵皆逆旅。但能飽菜根。何地不可處。堂堂七尺軀。切勿效兒女。

又

我以善勉汝。汝謂出嘗毀。置之不復言。意又不能已。爲善如築臺。成功由積累。中休猶不可。況本無基址。未言破萬卷。日且讀十紙。學雖在力行。要是從此始。

又

我初居三山。同里數十人。尊酒相勞苦。言辭亦諄諄。去來四十年。皆成家。中麀子孫雖或存。敗屋賣作薪。此亦何罪哉。不過坐一貧。我幸未至此。亦復拙謀身。無飯可哺汝。觸目成悲辛。

又

人與人爲徒。事我蓋有緣。司晨與警夜。異類亦可憐。舐糠啄遺粒。要使全其天。人則當教誨。見善或能遷。盛怒姑小忍。雖蒲豈非鞭。事過我亦喜。陶然送流年。

幽興

老向浮生意漸闌。飄然俟死水雲間。龜支牀穩新寒夜。鶴附書歸舊隱山。無意詩方近平淡。絕交夢亦覺。

清閑一端更出淵明上。寂寂柴門本不關。

題詹仲信所藏米元暉雲山小幅

俗韻凡情一點無。開元以上立規模。鏡湖老監空揮淚。想見楚江清曉圖。徽宗見元暉楚江清曉圖大加賞歎。

又

一棹朝南暮北風。奇峯倒影綠波中。定知漸近三山路。認得漁翁是放翁。

詹仲信以山水二軸爲壽固辭不可乃各作一絕句謝之

策蹇渡橋春雨餘。亂山缺處草亭孤。不知何許丹青手。畫我當年入蜀圖。

右春山

雪嶮梅村一徑斜。茆檐煙火兩三家。眼明見此幽栖地。卻恨吾廬已太奢。

右雪山

有所懷

鏡裏形模日夜衰。三峯師友久睽離。芝房又失耘鋤候。丹劑常思沐浴時。雷雨未成龍起晚。海天無際鶴歸遲。午窗一鉢青精飯。揀得香薪手自炊。

自嘲老態

世念秋毫盡。渾如學語兒。得牀眠易熟。有飯食無時。紗帽簪花舞。盆池弄水嬉。從今轉無事。靜坐不吟詩。

十月十四夜夢與客分題得早行

麝食寒燈下，脂車小市傍。驛門猶淡月，街樹正清霜。觸目關河異，興懷道路長。丈夫當自力，雙鬢易蒼蒼。紹興中予初仕爲寧德主簿與同官飲酒食蠟房甚樂後五十年有餉此味者感歎有賦酒海者

大勸盃容一升當時所尙也

昔仕閩江日，民淳簿領閑。同寮飛酒海，小吏擘蠔山。夢境悠然逝，羸軀獨爾頑。所嗟晨鏡裏，非復舊朱顏。病中雨夜

蹭蹬今如此，沈絲不復支。心隨形共頓，年與智俱衰。雨急孤燈暗，雲深斷雁悲。舊書空滿架，惆悵負明時。讀呂舍人詩追次其韻

士生始從學，取友實先務。吾聞諸古人，傾蓋有如故。漢宮長生藥，至取雲表露。治身當何如，而受一塵污。又

有過當相規，有善當相告。豈惟定新交，亦以篤舊好。勢利古所羞，置之勿復道。霜實萬木凋，孰秉歲寒操。又

少壯如昨日，忽已及耄期。舊友散莫收，亦復少新知。言歸鏡湖上，日日醉東籬。自笑如寒蝶，裴回殘菊枝。東籬予小圃名。

又

道士成金丹，青雲可接翼。小夫豈知此，危坐學數息。如持一畚土，自謂河可塞。生不遇碩師，幾何不自賊。

又

三沐復三熏。佩玉懷明珠。何至不自珍。欲效豕負塗。傳呼雖甚寵。正可誇羣奴。君看魏徵孫。世世爲農夫。

菴中晚思

小庵摩腹獨徜徉。俗事紛紛有底忙。雲影忽生鴉蔽日。雨聲不斷葉飛霜。經綸正復慚伊傅。雜駁猶能陋漢唐。卷盡殘書窗已晚。笑呼童子換爐香。

枕上

熒熒地爐火。煮藥土牀前。高帝老朝士。長安舊少年。松高露時滴。城遠鼓猶傳。拋擲百年事。且安殘夜眠。

冬夜

杞菊家風有自來。充饑藜糝不盈盃。雲迷野渡一聲雁。雪暗山村千樹梅。宴坐何妨面蒼壁。長吟且復畫爐灰。歲殘尙恨新春遠。欲挽天邊斗柄回。

雜興

陋巷無心長草萊。柴門偶自不曾開。餘齡漸迫諸孫長。徂歲將窮積雪來。且欲燎衣無宿燼。暮思頽頽煩但空。曩孰知自有忘憂處。遠坐新書正作堆。

又

此身漂蕩等流槎。又向江村送歲華。急雨遇寒凝作雪。明燈無地結成花。座懸鏡古森毛髮。甌聚茶香爽齒牙。況是貧家多樂事。阿開漸學手吒叉。

陸放翁集

劍南詩稿

卷第六十五

稽山行

稽山何巍巍。浙江水湯湯。千里亘大野。勾踐之所荒。春雨桑柘綠。秋風秔稻香。村村作蟹棧。處處起魚梁。陂放萬頭鴨。園覆千畦薑。舂碓聲如雷。私債逾官倉。禹廟爭奉牲。蘭亭共流觴。空巷看競渡。倒社觀戲場。項里楊梅熟。采摘日夜忙。翠籃滿山路。不數荔枝筐。星馳入侯家。那惜黃金償。湘湖蓴菜出。賣者環三鄉。何以共烹煮。鱸魚三尺長。芳鮮初上市。羊酪何足常。鏡湖滄衆水。自漢無旱蝗。重樓與曲檻。激澗浮湖光。舟行以當車。小繖遮新粧。淺坊小陌間。深夜理絲簧。我老述此詩。妄繼古樂章。恨無季札聽。大國風泱泱。

贈論命周雲秀才

周郎頎然市中隱。精神卓犖秋天隼。忽來過我論五行。袖出詩卷如束筍。人生一息不自保。況我耄期真待盡。君今盛爲談未來。我亦聽之俱可驪。雖然此心猶未泯。何至死去同蠢蠢。地下不作修文郎。天上亦爲京兆尹。

自嘲

受福元無一羽輕。豈知造物假餘生。抱痾不死躋高壽。遇亂能全見太平。投箸斷鴻常自閔。營巢倦鷁固

難成。乘除亦有堪慚處。記誦文辭誤得名。

自寬

兀兀空齋靜掩扉。篝爐香細著秋衣。蒼頭殘雨晴猶滴。欄角羈雲晚未歸。支枕口和心共語。挑燈形與影相依。卷書未覺唐虞遠。知我何妨舉世稀。

唐虞

唐虞雖遠愈巍巍。孔氏如天孰得違。大道豈容私學裂。專門常怪世儒非。少林尙忌隨人轉。老氏亦尊知我稀。能盡此心方有得。勿持糟粕議精微。

幽事絕句

死生歸有命。榮悴出無心。苔井閑磨劍。松窗自斲琴。

又

矮紙來吳下。長毫出宛陵。自書霜夜句。持寄剡中僧。

又

昨夕風掀屋。今朝雨壞牆。雖知炊米盡。不廢野歌長。

又

煙畦朝斲藥。雪澗夜淘丹。仄徑何曾嶮。單袍不覺寒。

又

新傳服氣訣。舊喜步虛吟。兒女不難棄。雲山何處深。

又

客生聞吠犬。草茂有鳴蛙。日暎方炊飯。秋深始采茶。

寄題廬陵王晉輔先輩桂堂

楚人記草木。桂在椒蘭中。我懷小山句。妙絕窮化工。唐人作山水。亦以桂配松。丹葩間綠葉。錦繡相疊重。不知始何時。巖桂開秋風。楚人所稱者。委棄等蒿蓬。嗚呼各有時。士豈怨不逢。我作桂堂詩。廣子雲夢胸。

寄題王晉輔專春堂堂前皆種牡丹

三月風光不貸人。千紅百紫已成塵。牡丹底事開偏晚。本自無心獨占春。

鼠屢敗吾書偶得狸奴捕殺無虛日羣鼠幾空爲賦此詩

服役無人自炷香。狸奴乃肯伴禪房。晝眠共藉牀敷暖。夜坐同聞漏鼓長。賈勇遂能空鼠穴。策勛何止履胡腸。魚飧雖薄真無媿。不向花間捕蝶忙。道士李勝之畫捕蝶獅貓以訊當世。

讀唐書忠義傳

志士慕古人。忠臣挺奇節。就死有處所。天日爲無色。大義孰不知。臨難欠健決。我思杲卿髮。可配嵇紹血。

病後作

骨相坐一寒。仕宦經百謫。晚入文昌省。又坐煩言噴。詔書復收召。付以大典冊。期年甫奏篇。皇恐亟自劾。歸來稽山下。三食新穫麥。草屨布裙襦。徒步老阡陌。今年疾屢作。恍若將歸客。道士言犯土。拜章安舍宅。

巫言神去幹。翦紙招魂魄。把臂忽自悟。此豈屋漏脈。盡去囊中藥。默觀鼻端白。正氣徐自還。鬼子何足磔。

山中

草閣留雲宿。溪橋引鶴行。身閑詩曠逸。心靜夢和平。石乳無時滴。松肪徹夜明。山中足幽趣。不是傲公卿。

夜思

風掃浮雲作快晴。窗聲終夜雜簾聲。月明滿院鵲驚起。霜冷壓栖雞嬾鳴。名字虛稱舊朝士。門庭元是老書生。尙餘一事猶堪喜。北陌東阡醉太平。

晨起

晨起梳頭雪滿膺。可憐衰與病相乘。浮名何足欺橫目。眞樂聊須付曲肱。仕有俸錢渠亦好。退無耕壟我何憑。具牛力盡殊堪閔。買犢東村恨未能。

老態

破榼愁春近。空園畏日長。頭風便菊枕。足痺倚藜牀。冉冉殘年逼。悠悠萬事忘。有兒堪晤語。無客亦何妨。

又

寡欲貧何損。無才老更宜。挂牆多漢刻。插架半唐詩。飯已頻摩腹。兒來暫解頤。尙悲吳蜀遠。未免故人思。

請張季長。

枕上

夜雨一再作。燈前獨詠詩。影看孤鶴瘦。吟答斷蛩悲。幽夢悠然覺。清笳何足吹。殘年猶幾日。已矣媿明時。

贈過門道人

朝行市塵中。奔馬不可及。暮涉清溪流。芒屨了不濕。巖扉一丹竈。山路爾書笈。白驢可置掌。童子亦絕粒。邂逅安期生。電逝不暇揖。太華獨巖然。萬仞道傍立。

道院雜興

江上霜風吹角巾。東歸不獨爲吳尊。掃除長劍華纓夢。收拾孤颿短棹身。勾漏丹砂開竈晚。商顏芝草滿山春。東封敢擬迎鑾仗。且作行歌陌上人。

又

征途暗盡舊貂裘。歸臥林間喜自由。體倦尙憑書引睡。心安不假酒攻愁。丹爐弄火經年熟。竹院聽琴竟日留。今且理髻還一笑。白間時有黑絲抽。

又

早歲知聞久已空。歸然猶有灞城翁。東樓誰記傾春碧。敝州蓋古戎州也。有東樓廚醞。本名重碧。范至能易爲春碧。北嶺空思擘晚紅。北嶺在福州。予少時與友人朱景參會嶺下僧舍。時秋晚。荔子獨晚紅在。冉冉流年霜鬢外。纍纍荒冢綠蕪中。琳房何日金丹熟。老鶴猶堪萬里風。

又

龜堂有叟富神通。白髮何妨兩頰紅。先取山川來掌上。卻移天地入壺中。鶯花不老非塵世。風月常新奪化工。近作東籬君未見。一尊少住莫悤悤。

山村經行因施藥

閑行偶復到山村。父老遮留共一尊。曩日見公孫未暉。如今已解牧雞豚。

又

耕傭蠶婦共欣然。得見先生定有年。掃灑門庭拂牀几。瓦盆盛酒薦豚肩。

又

兒扶一老候溪邊。來告頭風久未痊。不用更求芎芷輩。吾詩讀罷自醒然。

又

驢肩每帶藥囊行。村巷歡欣夾道迎。共說向來曾活我。生兒多以陸爲名。

又

逆旅人家近野橋。偶因秣蹇暫消搖。村翁不解讀本草。爭就先生辨藥苗。

歎老

身歷遭回事萬端。天教林下養衰殘。文編似是他人作。書卷如曾隔世觀。久已悠悠置恩怨。況能一一記

悲懽。牀頭周易眞良藥。不是書生強自寬。

卽事

秃尾驢嘶小市門。側蓬帆過古城村。此生感慨知何限。斗酒新豐不足論。

又

草衣木食更何求。穴處巢居過卽休。尙恨未能全省事。一竿風月釣滄州。

自賀

胎髮茸茸綠映巾。歸耕猶是太平民。流觴內史招同社。扛鼎將軍與卜鄰。弊居去闌亭項里。皆甚邇。曾冠六鰲非俗吏。已開九秩是陳人。一盃剩約梅花醉。又見開禧第二春。

天氣作雪戲作

八十又過二。與人風馬牛。深知老當逸。孰謂死方休。細衲兜羅襪。奇溫吉貝裘。閉門薪炭足。雪夜可無憂。

家風

春耕秋釣舊家風。門巷荒寒屋壁空。四海交情殘夢裏。一生心事斷編中。買魚日待攜籃女。裹藥時從挾籠翁。俗謂買藥爲裹藥。便廢閑吟亦未可。吾徒豈獨坐詩窮。

十二月二日夜夢遊沈氏園亭

略近城南已怕行。沈家園裏更傷情。香穿客袖梅花在。綠蘸寺橋春水生。

又

城南小陌又逢春。只見梅花不見人。玉骨久成泉下土。墨痕猶鏤壁間塵。

江干

霜晴忽念到江干。小蹇羸童路已乾。骨相豈能當富貴。鬢毛聊喜耐悲歡。客途冬暖衣裘薄。村市年豐酒醜寬。殘臘卽今無十日。剩求芹蓼助春盤。

獨行過柳橋而歸

寒雲覆江干。慘慘雪欲作。草枯狐兔見。鷹隼方縱搏。老翁臥蓬戶。疾痛在腰腳。忽覺意稍佳。快若解束縛。呼童扶下堂。西出度略約。浮波見鳧雁。決起驚鳥鵲。籬根犬迎吠。碓下雞俛啄。霜餘桑葉積。春近柳枝弱。徐行過傍舍。醉笑盛酬酢。歲暮農事休。羨爾羣飲樂。

戲遣老懷

平生碌碌本無奇。況是年垂九十時。阿囷略如郎罷老。穉孫能伴太翁嬉。花前騎竹強名馬。階下埋盆便作池。一笑不妨閑過日。歎衰憂死卻成癡。

又

清羸正怯倚闌干。紗帽還驚半指寬。日漏雲端纔欲暖。風催梅信又成寒。尋僧竹院逢茶熟。引鶴溪橋及雪殘。只道捐書差似達。庖丁數紙尙須看。

又

兒時萬死避胡兵。敢料時清畢此生。已迫九齡身愈健。熟觀萬卷眼猶明。深深小塢梅初動。潏潏清溪水欲平。安得飄然從此逝。纒山風月聽吹笙。

又

舊襲家風號散人。晚承恩詔賜閑身。放狂泥酒都忘老。厚價收書不似貧。霜曉方驚羣木脫。春晴又喜一花新。先生偶出人難遇。陌上爭先看角巾。

又

本意歸來老故丘。閉門飯足尙何求。閑雲一片自舒卷。幽鳥數聲相應酬。但得有書時到眼。正令無酒亦忘憂。東籬偏仄纔尋丈。已敵征西萬戶侯。

對鏡

歲月雖過邁。形容未苦羸。髮如新沐潤。顏似半酣朱。書讀常終卷。山行亦卻扶。悠悠隨日過。不復歎頭顱。

晨起

客枕畏霜氣。曉窗收月痕。芸芸萬物作。皎皎一心存。老已忘開卷。貧猶力灌園。兒孫能繼此。亦足報君恩。

吾年過八十

吾年過八。久已棄朝簪。化蝶有殘夢。焦桐無賞音。溪聲喧夜旦。野色變晴陰。欲講平生學。茫然不可尋。

又

八十又過二。自言名放翁。斧斤遺壽櫟。雲海寄冥鴻。酒挂驢鞍側。詩投藥笈中。灞城逢薊叟。共語莫匆匆。

述志

椎牛醢酒千人帳。破浪凌風萬斛船。常恨書生無此快。一生低首短檠前。

又

新豐買酒慰無聊。衝雪騎驢上灞橋。熊老尙堪吞獐子。松風何至羨山苗。

排悶

吹盡梅花了不知。化工也誤老人期。離離新草隨愁出。漠漠餘寒與睡宜。古錦一聯吟舊句。文楸數著理殘棋。波生澄澗君何怪。禪榻從來映鬢絲。

舟中作

林麓重重霧雨昏。扁舟晚過郡南門。鑄金越相遺祠古。執玉塗山王氣存。官道蒼茫多水驛。客遊飄泊厭風飈。剡中此去無多地。會約支公聽斷猿。

丙寅元日

縹緲初聞寺閣鐘。霏微零雨兆年豐。家家椒酒歡聲裏。戶戶桃符霽色中。春枕方濃從賣困。社醅雖美倦治豐。從今萬事俱拋擲。且作人間百歲翁。

新晴

夜雨空堦滴到明。山雲忽斂作新晴。門前月淡有檐影。牆外泥乾無屐聲。與世日疎愁易遣。入春得暖疾差平。使常剩作滄洲趣。寄語沙鷗勿敗盟。

新歲

改歲鍾馗在。依然舊綠襦。老庖供鱸飴。跣婢暖屠蘇。載糗送窮鬼。扶箕迎紫姑。兒童欺老聵。明燭聚呼盧。

簡邢德允

邢子襟靈舊絕塵。爾來句法更清新。淡交喜得山栖友。傑作疑非火食人。豈但僕奴看屈子。直須塗改到生民。與君兩世交情厚。剩欲燈前對角巾。

簡蘇邵叟

君家文獻歷十朝。魏公峩冕加金貂。孫支得君愈雋發。貴名突兀凌煙霄。居吳入蜀三十載。諸公孰能折簡招。澗松意氣極磊砢。天馬毛骨何超遙。鼎來行卷十九首。縱山明月聞吹簫。沉香亭畔未須說。想見風雪上鬪橋。老夫誦之羣玉府。學士如堵不敢驕。爾來一編愈妙絕。粲若新霽瞻斗杓。出爲龍首子何有。老穿豹尾我亦聊。湖邊酒樓無十步。胸次漣漣思同澆。

東村

信脚村墟路。歸來日未西。波清魚隊密。風小鵲巢低。白水初平岸。青蕪亦徧犁。市墟多美酒。飲具不須齎。

新曆歎

新曆在手心怕開。日月聯翩相續來。黃金散盡自一快。白髮不貸真可哀。無爲健羨廣成子。千二百年終有死。膠不可黏西去日。刀何由剪東流水。酒無醇醜俱痛飲。市醞上尊俱醉耳。堂堂七尺死卽休。不飽烏鳶飽螻螻。

雪中

忽忽悲窮處。悠悠感歲華。暮雲如潑墨。春雪不成花。眼澀燈生暈。詩成字半斜。殘尊已傾盡。試起問東家。

又

春晝雪如篩。清羸病起時。跡深驚虎過。煙絕閤僧飢。地凍萱芽短。林寒鳥哢遲。西窗斜日晚。呵手斂殘棋。

早春出遊

微雲薄靄新晴後。小蓋輕輿古道遙。林杪幽禽初學囀。牆陰凍雪未全消。酒壚日暮收青旆。市步人歸擁畫橈。欹帽捫髻常半醉。逢人誰與話無憊。

又

人生何適不艱難。賴是胸中萬斛寬。尺宅常朱那待酒。上池頻飲自成丹。楚祠花發呼舟去。禹穴雲生倚杖看。更有新春堪喜事。一村簫鼓祭蠶官。

東籬

東籬深僻嬾衣裳。書卷縱橫雜藥囊。無吏徵租終日睡。得錢沽酒一春狂。新營茅舍軒窗靜。旋煮山蔬匕筯香。戲集句圖書素壁。本來無事卻成忙。

又

漫道深居畫掩關。東籬栽接不曾閑。每因清夢遊敷水。自覺前身隱華山。花發時時攜綠酒。客來往往羨朱顏。藥爐安著猶無地。擬展茅茨一兩間。

又

東偏隙地作疎籬。遇興無非一笑時。陪客投壺新罰酒。與兒鬪草又輸詩。山桃溪杏栽俱活。藥鑿漁竿動自隨。家事猶令罷關白。固應黜陟不曾知。

村市醉歸

明時乞得水雲身。白首扶衰又見春。橫木門幽謝來客。獨轅車小避行人。湘湖水長蕪絲滑。蘭渚泥融箭

苗新處處酒壚皆可醉。不辭微雨墊吾巾。

村夜

入春雨雪無休日。雨止猶陰未快晴。萬竅怒號風不定。半輪斜照月微明。百年辛苦農桑業。五處嗙離父子情。但得平安已爲幸。孤燈殘火過三更。時子虞調官行在。子龍阻風西陵。子修在閩。子坦在海昌。子與子布子通守舍。

旅思

百病集殘骸。閑遊且散懷。旅裝如遠役。蔬食似長齋。買藥停山步。求醫過縣街。春寒殊未已。閉戶夜燃藍。

對酒作

憑閣風吹帽。穿林雨墊巾。相呼十日飲。不負百年身。陌上金羈馬。墳前石琢麟。於吾竟何有。笑殺武陵人。

遊東村

露草衡門曉。風松一塢幽。新春有佳日。老子得閑遊。鷗爲忘機下。魚緣得計浮。歸途無遠近。一葉亂漁舟。

晨起

老境真無事。深居每畏人。喔咿雞失旦。姪姹鳥鳴春。過擔餽餽白。擎盤糗糗新。出門還可喜。一笑語比鄰。

夢中作

世事何由可控搏。故山歸臥有餘歡。澗泉見底藥根瘦。石室生雲丹竈寒。人遠忽聞清獻起。山開頻得異書看。一朝出赴安期約。萬里煙霄駕紫鸞。

春雨

片片紅梅落，纖纖綠草生。無端夜來雨，又礙出門行。

又

春陰易成雨，客病不禁寒。又與梅花別，無因一倚欄。

又

胸懷阮步兵，詩句謝宣城。今夕俱參透，焚香聽雨聲。

又

疎點空階雨，長明古殿燈。廬山岑寂夜，我是定中僧。

村店

水汎輕搖楫，山行穩跨驢。朝晡半晴雨，閭里雜樵漁。野鷺浮寒浦，飢鴉集老樗。店家看壞壁，忽見昔年書。

久雨薪炭食飲俱不繼戲作

澤國春饒雨，書生老益貧。固難誇練炭，亦豈擇勞薪。鹽盡纔供暮，醴微尙惱鄰。人嗤信書誤，癡絕望常珍。

溪上

偶就澄溪照幅巾，蘭亭遺韻想清真。功名不入山林夢，詩酒猶關老病身。萬事只增思魯歎，百年常媿避

秦人。超然聊喜高情在，手挈長條貫細鱗。

謝君寄一犁春雨圖求詩爲作絕句

說著功名我自羞。喜君解劍換吳牛。莫將江上一犁雨。輕博人間萬戶侯。

又

老農雖瘠喜牛肥。回首紅塵萬事非。耕罷春蕪天欲暮。小舟衝雨載犁歸。

二月一日夜夢

夢裏遇奇士。高樓酣且歌。霸圖輕管樂。王道探丘軻。大指如符券。微瑕互琢磨。相知殊恨晚。所得不勝多。勝算觀天定。精忠壓虜和。眞當起幸渭。何止復關河。陣法參奇正。戎旃相蕩摩。覺來空雨泣。壯志已蹉跎。

新晴

寂寂房櫺鳥雀聲。熏籠茶竈正施行。繁花滿樹春纔半。斜日穿雲雨乍晴。引睡書橫猶在架。圍棋客散但空枰。病懷莫道傷幽獨。小榼芳醪手自傾。

又

挂冠湖上遂吾初。捫腹消搖適有餘。羹糞野蔬元足味。屋茨生草亦安居。市墟分熟通賒酒。鄰舍情深許借驢。更喜新晴滿窗日。籤題重整一牀書。

望永思陵

高帝中興萬物春。青衫曾忝綴廷紳。仕爲將相卻常事。年及耄期能幾人。早幸執戈觀北伐。晚叨秉筆記東巡。歸耕況復蒼梧近。鬱鬱葱葱佳氣新。紹興末。駕幸金陵。游適在朝列。淳熙末。上命羣臣齊集文華閣。修高宗實錄。游首被選。

燈下小酌

江湖雙鬢禿。宇宙一身窮。酒浪搖輕碧。燈花落碎紅。交情元易見。春事半成空。尙覲身強健。煙畦插芥菘。

春遊

杏花天氣喜新晴。白首書生樂太平。小陌鞦韆雖隔世。名園祓禊尙關情。山林自古流觴地。絃管誰家送酒聲。蕪菜鱖魚初滿市。莫將羊酪敵南烹。

又

窮愁終日竟胡爲。老健人間自一奇。每駕柴車遊古寺。閒騎竹馬伴羣兒。登臨蘭渚流觴地。蘭亭本名蘭渚。蕭散狐泉冷澗時。練布單衣白羽扇。路傍人總道相宜。

春日雜賦

羈懷病思正厭厭。詩卷漁竿信手拈。老境何嘗忘一笑。春風也解到窮閭。殘花滿地無餘萼。新筍掀泥已露尖。轉老轉窮君勿笑。熊蹯魚腹豈容兼。

又

鬢毛八九已成霜。此際逢春只自傷。苦雨不容花抵敵。餘寒猶賴酒禁當。退紅衣焙熏香冷。古錦詩囊覓句忙。堪笑散人閑事業。西窗容易又斜陽。唐樂府云。床上小熏籠。韶州新退紅。

又

江湖放浪水雲人。藥物枝梧夢幻身。移竹南窗初試筍。掃花北陌旋成塵。窮忙自笑常終日。老健猶能不

負春未遂初心惟一事。乞薪賒米惱吾鄰。

又

乞得身歸剡曲邊。衡門茅舍共蕭然。向來誤計守書冊。此日遺愁無酒錢。俗客妬閑來袞袞。流年欺老去翩翩。梨花楊柳清明過。且向江村剩放顛。

又

人生覓飯元多術。最下方爲祿代耕。脫卻朝衫猶老健。快如苦雨得春晴。鳥聲頻喚五更夢。花氣頓醒三日醒。最喜晨興聞剝啄。吾兒書札到柴荆。

悲歌行

讀書不能遂吾志。屬文不能盡吾才。遠遊方樂歸太早。大藥未就老已催。結廬城南十里近。柴門正對湖山開。有時野行桑下宿。亦或慟哭中途回。檀公畫計三十六。不如一篇歸去來。紫駝之峰玄熊掌。不如飯豆羹芋魁。腰間纍纍六相印。不如高臥鼻息轟春雷。安得寶瑟五十弦。爲我寫盡無窮哀。

梅市暮歸三山

日日蠻童佩一壺。壺乾時亦復村酤。橫林露塔遠猶見。暮靄籠山淡欲無。綠浦例憑孤作界。畫橈常遣鷺前驅。此身元是滄浪客。敢學高人乞鏡湖。

龜堂偶題

文章何物求渠力。詩亦安能使汝窮。春水一池花百本。此生未易報天公。

又

細肋臥沙來左輔，巨螯斫雪出東吳。不知一飽摩便腹，得似茅檐薺糝無。

泛湖

白鷺雙飛導我前，自疑身是水中仙。放舟漢客樵風裏，擲釣秦皇酒瓮邊。山寺雲間傳講鼓，漁家浦口起炊煙。個中得意君知否，買盡煙波不用錢。

陸放翁集

劍南詩稿

卷第六十六

園中作

疎籬圍中庭。野水赴方塘。春雨路易乾。徐步蹋夕陽。豔豔紅杏梢。忽已占年光。我老來日短。乃復不自量。接花待其成。鄰里共笑狂。萬事孰能料。社櫟老不僵。磊磊盤中果。安知不獲嘗。作詩遣閑愁。一笑無留觴。

寄題求志堂

古人不輕出。出則堯舜其君民。古人不輕隱。隱則坐使風俗淳。孰知後世乃不然。唐虞日遠如飛煙。異端欲出六籍上。裔夷直居中夏先。窮居求志達行道。儻不塞責真負天。士固不可苟富貴。顧亦豈可徒貧賤。如其一念有愧心。寧不終身戴慚面。老夫少年鐵鑄硯。欲窺聖門終未見。祝君勿恃來日長。八九十年如掣電。

贈過門道人

賣藥人間兩屨輕。飄然雲水不論程。曉經浦口亂流渡。夜宿山家乘月行。

春晚

門巷蕭條老病侵。春晴方快又春陰。啄吞自笑如孤鶴。導引何妨効五禽。雨洗杏花紅欲盡。日烘楊柳綠

初深。雛鶯寧有平生舊。也傍茆檐送好音。

又

村巷泥深晝掩門。倚欄搔首一消魂。花經風雨人方惜。士在江湖道更尊。擘浪忽看魚對躍。入雲時見鶴孤鶩。向來莘渭今安在。歎息誰能起九原。

梨花

開向春殘不恨遲。綠楊窳地最相宜。征西幕府煎茶地。一幅邊鸞畫折枝。宣司靜鎮堂屏上有邊鸞梨花。

又

粉淡香清自一家。未容桃李占年華。常思南鄭清明路。醉覆迎風雪一杈。

又

嘉陵江色嫩如藍。鳳集山光照馬銜。楊柳梨花迎客處。至今時夢到城南。

農桑

農事初興未苦忙。且支漏屋補頽牆。山歌高下皆成調。野水縱橫自入塘。

又

水長人家浸稻秧。蠶生女手摘桑黃。差科未起才無事。鄰曲相過日正長。

又

采桑蠶婦念蠶飢。陌上忽忽負籠歸。卻羨鄰家下湖早。畫船青繖去如飛。

又

蠶如黑螳稻青鍼。夫婦耕桑各苦心。但得老親供養足。不差布袂與蒿簪。

自嘲

野叟身常雜傭保。萑圃荒庭自鋤掃。小兒耕養董董足。大兒游宦垂垂老。朝餐未破百衲蓋。晚餉猶存兩困棗。春粳但備翁作糜。儲帛纒堪孫裂襍。賢愚元自一王尊。癡鈍寧論萬馮道。可憐對客猶自矜。談道能令君絕倒。

春晚

寂寞又過桃李時。東園微雨草離離。破園食外有餘粟。殘髮白中生黑絲。小疾已能忘藥石。餘年寧復問蒼龜。飾巾待盡從來事。閉戶燒香更不疑。

又

正見山陂草木芽。狂風忽掃萬枝花。病懷久已忘春事。老眼猶能惜物華。枕上有詩頻自改。尊中無酒不妨賒。昔人漫道傷幽獨。野鶴分巢卽是家。

閉戶

乞身林下養衰殘。閉戶寧容外物干。正使有爲終淡泊。未能無疾已輕安。寸陰息念如年永。丈室端居抵海寬。老子爾來深達此。卻嫌兒女話團圓。

晨起

初聽高枝鶉鷓鳴。旋聞深井轆轤聲。煙籠小閣猶疑雨。日射東窗頓作晴。古洗注湯供頽濯。春畦摘菜助
魚烹。老人頽惰雖堪笑。終勝胸中懷不平。

出遊

九日陰蕪一日晴。此行處處是丹青。斷雲零落江郊路。壽木輪囷古驛亭。饑婦微行望耕壟。漁歌相和起
煙汀。拔山意氣今何在。猶有遺祠可乞靈。路過項羽廟。

又

近過父老遠尋僧。病起經行力漸增。織室蹋機鳴軋軋。稻陂瀦水築登登。淺深村落時分徑。高下川原自
作層。薄暮到家還熟睡。隔林鐘鼓報晨興。

又

吳地清明未減寒。梨花初動杏花殘。平沙漫漫人爭渡。微雨蕭蕭客跨鞍。野寺吹螺作春會。山郵糴米具
朝餐。已開九帙吾何覲。時說金丹強自寬。

又

東阡南陌適逢晴。小蹇輕裝短作程。白水滿陂秧馬躍。綠陰遶舍緯車鳴。過村小婦憑牆看。入寺高人攬
襪迎。剩倩東風吹柳絮。放翁詩到此時成。

曳杖

曳杖寄徜徉。徐行轉曲廊。病知貪酒害。老悔愛花狂。庭樹雲收影。簾旌雨浥香。悠然有佳處。物我兩相忘。

自詠

曾著杞菊賦。自名桑苧翁。常開羅爵網。不下釣魚筒。租稅先期畢。陂塘與衆同。士章八十字。世世寫屏風。

雜興

謀生在衣食。不仕當作農。識字讀農書。豈不賢雕蟲。婦當娶農家。養蠶事炊春。晨耕候春扈。夜織驚秋蛩。畦蔬勝肉羹。社酒如粥醲。毋爲慕朝幘。諂笑求見容。

又

家世木屨儒。自奉至儉薄。肉食固難期。間亦闕鹽酪。賓朋飯芋豆。時節羹藜藿。偶然設鷄豚。變色相與作。家居常守此。自計豈不樂。蔬園畏蹴蹋。切勿思大嚼。

又

家本徙壽春。遭亂建炎初。南來避狂寇。乃復遇強胡。于時髡兩髦。幾不保頭顱。亂定不敢歸。三載東陽居。人事固難料。今乃八九餘。努力未死間。讀我先人書。

又

讀詩讀七月。治書治無逸。王業與農功。事異理則一。此外復何爲。齊民有遺術。一飽不啻足。切勿爲利誑。大屋起道傍。百鬼闕其室。曷不觀陸翁。食菜開九帙。

又

三吳氣候異。開歲固多雨。今年已暮春。霽日僅可數。寒氣薄腠理。沉痛結心膂。遣奴買藥物。日夜事炮煮。端居情懷惡。欲出泥淖阻。安得平生歡。駕言問良苦。

雜感

病臥踐衰境。躬耕歸故園。怒蛙號廢沼。妖鵬嘯荒村。里巷魚殮薄。坊場黍酒渾。相逢欲話舊。意極轉忘言。

又

道進身垂老。方靈病已侵。知難逃死籍。猶得遂歸心。星斗開孤劍。塵埃拂素琴。妄庸常袞袞。誰與論幽深。

又

雨霽花無幾。愁多酒不支。淒涼數聲笛。零亂一枰棋。蹈海言猶在。移山志未衰。何人知壯士。擊筑有餘悲。

又

草徑纔容步。茅廬僅庇牀。原貧道尊顯。回天死芬芳。弦誦喧清曉。鉏耰滿夕陽。此風能不墜。韋布亦何傷。

又

早仕讒銷骨。遲歸悔噬臍。短衣猶掩脛。窮巷固多泥。婢喜蠶二幼。鄉中謂蠶眠爲幼。奴貪雨一犁。衡茅明

我眼。刮膜謝金篦。

又

春晚晴還雨。村深醉復醒。溪添半篙綠。山可一窗青。藥品隨長鑿。花名記小屏。閑身幸無事。吟嘯送餘齡。

兩聲

吾園畜兩驢。善驚未易馴。及今纔幾時。弭耳常依人。飢食園中草。渴飲溝澗濱。時時輟餘糧。亦未耗吾困。吏或無佳政。盜賊起齊民。孰能撫以德。坐還三代醇。

書感

疋馬曾爲塞上遊。東歸幾見剡川秋。故城廢市古今歎。斷角殘鐘朝暮愁。尺寸無功真碌碌。耄期未死轉悠悠。阿奴尙喜強人意。三日於菟氣食牛。開孫以二月二十日擊碎盤。

書意

萬事馬牛風。蕭然破屋中。忍貧增力量。耐辱見神通。道進天魔散。心安客疾空。微言施魚鳥。一一脫池籠。

讀唐書

力行可使金如土。篤好能徠馬若龍。斗米三錢本常事。風雲千載自難逢。

雜題

貧中得味如殮蔗。語下明心似到鄉。對客欲談渾忘卻。笑呼童子替燒香。

又

半飽半飢窮境界。知晴知雨病形骸。軒昂似鶴那求料。枯槁如僧不赴齋。

又

傳家只要存書種。學道當知養聖胎。寧使終身遷比景。莫令一物汗靈臺。

又

大兒都門久栖栖。小兒調官今復西。鄰家父子我所羨。泥水沒膝扶耕犁。

栽牡丹

攜鋤庭下斲蒼苔。墨紫鞵紅手自栽。老子龍鍾逾八十。死前猶見幾回開。

夜聞姑惡

學道當於萬事輕。可憐力淺未忘情。孤愁忽起不可耐。風雨溪頭姑惡聲。

哭開孫

學步漸扶牀。乘車已駕羊。虛稱砌臺使。不遇玉函方。杳杳天難問。茫茫夜正長。寂寥誰伴汝。蕭寺閉空房。

晚春東園作

雨餘木葉綠成陰。一日身閑直萬金。習氣自嫌除未盡。烏啼花落尙關心。

又

女郎花開春事闌。王孫草長思婦歎。蜂釀蜜脾猶未熟。雨催梅頰已微丹。

禽聲

布穀布穀天未明。架犂架犂人起耕。宦途不似農家樂。東作西成過此生。

秦皇酒瓮下垂釣偶賦

酒瓮山邊古釣磯。沙鷗與我共斜暉。目前雖有小得喪。天下豈無公是非。滄海橫流何日定。古人復起欲

誰歸。道邊醉倒君奚憾。豈失風塵一布衣。

出遊歸鞍上口占

渺渺煙波飛漿去。迢迢桑野策驢還。寄懷楚水吳山外。得意唐詩晉帖間。每惜好春如我老。誰能長日伴人閑。世間自是無兼得。助業元非造物慳。

閑詠

本志常思退。前緣剩得閑。聽猿來剡縣。采藥上稽山。超絕風塵表。瑩然冰雪顏。向來香火地。五綬羽衣班。

雨

曉望橫斜映水亭。暮看飄灑溼簾旌。不嫌平野蒼茫色。實厭空堦點滴聲。上策莫如常熟睡。少安毋躁會當晴。且將穡事傳童稚。未插秧時正好耕。

立夏

赤幟插城扉。東君整駕歸。泥新巢燕鬧。花盡蜜蜂稀。槐柳陰初密。簾櫳暑尙微。日斜湯沐罷。熟練試單衣。

孤寂

晚境諸兒少在傍。書堂孤寂似僧房。家居不減旅懷惡。夏夜尙如寒漏長。數筯筍蠶甘淡薄。半盂麥飯喜豐穰。愚儒幸自元無事。日課朱黃自作忙。

明日觀孤寂詩不覺大笑作長句自解

獨處將如長夜何。直將寂寞養天和。愛身不惰如懷璧。守氣無虧似塞河。塵篋空存獲麟筆。煙陂懶和飯牛歌。年來助業君知否。蠶下新降百萬魔。

初夏出遊

早緣疎拙遂歸耕。晚爲沉繇得養生。藥鑊釣竿緣已熟。海村山市眼偏明。安西萬里人何在。廣武千年恨未平。但使蓮峯歸路穩。亦無閑手揖公卿。

又

平生與世曠周旋。惟有清遊意獨便。小竈炊菰山市口。東芻秣塞海雲邊。春融恨欠舒長日。秋爽已悲搖落天。首夏清和真妙語。爲君誦此一欣然。

又

泥鞦櫻鞵雨墊巾。閑遊又送一年春。長歌聊對聖賢酒。羸病極知朝暮人。廢堞荒郊閑吊古。朱櫻青杏正嘗新。桃源自愛山川美。未必當時是避秦。

自詠

龜屋裁小冠。鹿皮製短裘。陸駕少游車。水泛淵明舟。山澤與城市。有路即可遊。或時一飯去。間亦旬日留。方見草木萌。忽已天地秋。淘丹雲澗冷。采藥乳穴幽。逢人亦欣然。有問乃不酬。摩挲金銅人。千載寄悠悠。

五更聞雨思季長

幽叢鳴姑惡。高樹號杜宇。驚回千里夢。聽此五更雨。展轉窗未明。更覺心獨苦。天涯懷故人。安得插兩羽。

醉中作

小市鐘聲斷。高樓月色新。醉眠當大路。狂舞屬行人。有客要元亮。無妻諫伯倫。山花信手插。不復惜烏巾。

溪園

跌宕欲忘形。溪園半醉醒。靜看猿哺果。閑愛鶴梳翎。矮榻水紋簟。虛齋山字屏。更須新月夜。風露對青冥。

初夏閑居

雲液初籥小。盞香風漪乍。展北窗涼。巢燕乾乳蟲。供哺花過蜂。閑蜜滿房。閉戶不知春已去。鈔書但覺日方長。所嗟詩思年來減。虛負奚奴古錦囊。

又

川雲漠漠雨冥冥。濁酒閑傾不滿瓶。蠶簇尙寒憂繭薄。稻陂初滿喜秧青。王師護塞方屯甲。親詔憂民已放丁。病起自憐猶健在。不須求應少微星。

又

松棚黯黯接虛堂。掃地燒香旋置牀。密葉留花供淺酌。斷雲障日作微涼。高城薄暮聞吹角。小市豐年有戲場。白首史官閑盡歲。祇將搜句答流光。

又

城上朱旗夏令初。溪頭綠水蘸菰蒲。花貪結子無遺萼。燕接飛蟲正哺雛。簫鼓賽蠶人盡醉。陂塘移稻客相呼。鄉中謂備耕者爲客。長安青蓋金羈馬。也有農家此樂無。

又

啜茗清風兩腋生。西齋雅具愜幽情。熏衣過後篝爐冷。展卷終時嬾架橫。巢燕何曾擇貧富。鳴鳩元不爲

陰晴。但能與物俱無著。小草新詩取次成。

又

野水楓林久寄家。慣將枯淡作生涯。小樓有月聽吹笛。深院無風看禮茶。靜岸葛巾穿蒼蔚。閑拖筇杖入
谿谿。平居每與兒孫說。切勿人前一語誇。

又

水邊茆屋兩三間。野叟幽人日往還。兩卷硬黃書老子。數峯破墨畫廬山。功名會上元須福。生死津頭正
要頑。試說龜堂得力處。向來何啻半生閑。

又

養酒青梅次第嘗。啼鶯乳燕占年光。蠶收戶戶纒絲白。麥熟村村搗麩香。民有袴襦知歲樂。亭無桴鼓喜
時康。未嘗一事橫胸次。但曲吾肱夢自長。

子坦今秋鹽官市征當滿作絕句寄之

八十老翁頭似雪。柯橋送汝淚頻揮。殘年豈料猶強健。卻向柯橋接汝歸。

子適調官得永平錢監待次甚遠寄詩寬其意蓋將與之偕行也

黃紙起家陸仕籍。青衫遡闕拜恩光。署銜汝勿憎銅臭。就養吾方喜飯香。世事極知多倚伏。人生正要小
回翔。但令父子常相守。斂版扶犁味總長。

送韓立道守池州

千里江山控上流。省郎懷綬去爲州。才華放在諸公右。談笑遙分聖主憂。月墮麗譙喧鼓角。雨餘綠野徧鋤耰。萬家歌舞春風裏。秋浦如今不似秋。

野興

寓館無常地。輕裝不宿謀。迷途問耕叟。過渡上漁舟。野飯香炊玉。村醪滑瀉油。還家亦無事。隨處送悠悠。

又

小雨迎藜杖。微風入葛巾。寧甘結襪系。不作拜車塵。施藥鄉鄰喜。忘機鳥雀馴。家山又初夏。好在不費身。

又

山豁逢孤寺。林窮渡小溝。松聲亂僧梵。雨點雜魚遊。早蠶三軍帥。金章萬戶侯。人生各有願。未肯換扁舟。

又

去去歷山村。行行並廟垣。湍流鱸魚小。夕徑鮓花繁。白鷺飛如導。青蘿險可捫。歸途不寂寞。迎笑有諸孫。

東齋雜書

吾廬雖甚陋。窗扉亦疎明。開卷冬日暖。曲肱暑風清。昨日一鳥鳴。今日一木榮。欣然與之接。悲慨何由生。

又

吾貧無時醒。日月忽過邁。空林春采萁。荒壠秋種稗。孤學有自來。飢死奚足怪。著書充棟宇。一字不肯賣。

又

負負無可言。上上不須說。天壤大如許。我獨身子子。苟合不可爲。萬事聽瓦裂。年登麥飯足。得酒且勤歡。

又

有客可劇談。有酒可盡醉。老夫老更窮。終日惟坐睡。既無客款門。酒亦未易致。頽然北窗下。兀兀有餘味。

又

下帷聽雨聲。開戶延月色。霏霏半篆香。湛湛一池墨。徐行舒血脈。危坐學踵息。吾聞諸先賢。養生莫如齋。

又

門低不通車。室隘劣容膝。掩脛無全衣。作字用挫筆。親朋孰可望。門內自相恤。一笑語吾兒。汝馭未須叱。

又

區芋常願雨。秧菜常願晴。吾兒行渡江。晨起愁風生。人生各徇私。夫豈造物情。孰能均此意。萬里皆春耕。

又

吾居魚鱉鄉。戒食兼鮮蠹。雞鷺以御客。乃者亦一掃。區區仁愛心。殆可質蒼昊。物情豈遠哉。我亦吝肝腦。

又

菝花恨不茂。薤草欲其盡。心常墮貪愛。否則近殘忍。蝶網猶翩翩。蚓斷更菌蠢。君其等觀之。何者非可閔。

又

藥與疾相當。何恙不能已。良醫善用藥。疾去藥亦止。晨晡節飲食。勞佚時臥起。藉曰米長生。耄期直易爾。

又

養生有妙理。省事與寡言。於此能力守。衆說皆其藩。擾擾斲汝本。譊譊傷汝魂。要當俱置之。息深踵自溫。

又

學者學聖人。斯須不容苟。百年樂箏瓢。千載仰山斗。家庭盛弦誦。父子相師友。但令書種存。勿愧耕壟畝。

梅市

沙際人家半掩扉。借炊小住不相違。水生溪面大魚躍。風定草頭雙蝶飛。竹院遊僧聞鼓集。煙畦老圃荷鋤歸。浩然物外真堪樂。回首浮生萬事非。

初夏幽居

日長巷陌曬絲香。雨霽郊原割麥忙。小擔過門嘗冷粉。微風解箨看新篁。傍籬鄰婦收魚笱。叩戶村醫送藥方。欲到湖邊還嬾動。悠然扶杖立斜陽。

又

虛堂一幅接羅巾。竹樹森疎夏令新。瓶竭重招麴道士。牀空新聘竹夫人。寒龜不食猶能壽。弊帚何施亦自珍。枕簟北窗寧有厭。小山終日對嶙峋。

又

野草幽花無歇時。一窗終日對東籬。病猶獨醉雖堪笑。老未全衰亦自奇。古紙硬黃臨晉帖。矮牋勻碧錄唐詩。個中疑是忘憂處。問著山翁卻不知。

又

東園梅熟杏初丹。老子披襟每不冠。古硯坡陀麝煤綠。小山蔥蒨石盆寒。移牀剩欲眠松塢。鼓枻還思泊

蓼灘未用絲毫辨差等。黃塵終勝客長安。

泛舟至近村茅徐兩舍勞以尊酒

小舸悠颺亦樂哉。迢迢故取北村回。山從樹外參差出。水自城陰曲折來。樂歲共忘東作苦。殘租不待急符催。舊鄰父老睽離久。喚取開顏把一杯。

再次前韻

少壯卽今安在哉。輕舟訪舊莫輕回。兒童擁岸迎舟入。婦女窺籬喜客來。多難只成雙鬢改。流年更著暮笳催。放懷魚鳥平生事。少住茅檐盡此杯。

題陳伯予主簿所藏秦少游像

晚生常恨不從公。忽拜英姿繪畫中。妄欲步趨端有意。我名公字正相同。

入梅井序

吳俗以芒種後得壬日爲入梅。今年正以此日重雲蔽天。比夜乃雨。父老以爲有年之候。賦詩以識之。

今年入梅日。雲腳垂到地。芬香小麥麩。展轉北窗睡。甲夜聞雨聲。起拜造物賜。三登於此卜。一飽可坐致。語兒高爾困。戒婦豐爾饋。擊壤歌太平。門無督租吏。

北窗雨中作

鬱蒸作不解。風雨來有信。豈惟窗戶清。更喜草木潤。簡編旣陳前。燈火亦可近。跂予望聖賢。傾河洗驕吝。

扶衰幸未死。吾道其少進。安得平生歡。懷抱爲君盡。

戲書觸目

狸奴閑占熏籠臥。燕子橫穿翠徑飛。我亦人間好事者。憑欄小立試單衣。

四月二十八日作

四月欲盡五月初。九十未及八十餘。開口何曾談世事。收身且復愛吾廬。

又

行徧人間病不禁。鬢毛飽受雪霜侵。茅檐一夜蕭蕭雨。洗盡平生幻妄心。

MAR 8 1937

~~1154604~~

上海图书馆藏书



A541 212 0006 1147B

